

22239/c

A xxxi Lan

12 pp

506 pp

coll: J. F.

L'Art Ancien
Luzano
1550-1600. 3 vols
april 128

LANZONI.

Verdini

OPERA OMNIA



Stampa: 1840

31258

JOSEPHI LANZONI,

FERRARIENSIS
PHILOSOPHIÆ AC MEDICINÆ DOCTORIS
IN PATRIA UNIVERSITATE LECTORIS PRIMARI,II,
S. R. I. Academiae Cæsareo - Leopoldino - Carolinæ
Naturæ Curiosorum Socii &c.

OPERA OMNIA,

MEDICO-PHYSICA ET PHILOLOGICA
CUM EDITA, HACTENUS, TUM INEDITA.
Accedit

VITA AUCTORIS HIERONYMO BARUFFALDO
Ph. D. Ferrariensi, Scriptore.

CUM INDICIBUS RERUM CUIQUE VOLUMINI NECESSARIIS.

TOMUS SECUNDUS.



LAUSANNÆ,

Sumptibus MARCI-MICHAELIS BOUSQUET & SOCIOR.

M. DCCXXXVIII.

THE JOURNAL

OF THE
ROYAL SOCIETY OF MEDICAL AND PHYSICIAN

AND
THE LANCET

AND
THE BRITISH MEDICAL JOURNAL



THE
JOURNAL OF THE
ROYAL SOCIETY OF MEDICAL AND PHYSICIAN
AND THE LANCET
AND THE BRITISH MEDICAL JOURNAL



I N D E X

CONSULTATIONUM.

I. D E Apoplexia.	Pag. 3	XVII. De Dysenteria.	Pag. 36
II. D e Paralyſi poſt Apoplexiam.	5	XVIII. De Dolore Iliaco.	38
III. De Vertigine.	7	XIX. De Febre Maligna.	40
IV. De Cephalalgia.	9	XX. De Febre Heſtica.	42
V. De Tuſſi contumaci.	11	XXI. De Hemitritæo.	47
VI. De Aſthmate.	14	XXII. De Febre mari moris.	51
VII. De Melancholia Hypochondriaca.	16	XXIII. De Capitis Dolore perti- naci.	52
VIII. De Sputo Sanguinis, &c.	18	XXIV. De Pervigilio.	54
IX. De Pleuritude.	20	XXV. De Phrenitide.	55
X. De Cordis palpitatione frequen- ti.	23	XXVI. De Apoplexia in Paraly- ſim terminato.	58
XI. De Mania.	24	XXVII. De Catarrho.	60
XII. De Nauſea, & Vomitu.	27	XXVIII. De Catharro.	62
XIII. De Cardialgia.	28	XXIX. De Mania.	71
XIV. De Singultu.	30	XXX. De Melancholia.	73
XV. De Lienis obſtructione.	32	XXXI. De Memoria Debilitate, ac Imminutione.	75
XVI. De Diarrhæa.	34	XXXII. De Tremore.	77

XXXIII. <i>De Imperfecta Paralysi.</i>	Pag. 79	LXV. <i>De Tussi.</i>	Pag. 134
XXXIV. <i>De Stupore Sensus.</i>	81	LXVI. <i>De Tussi contumaci, ac ferina in Puella.</i>	136
XXXV. <i>De Convulsione.</i>	82	LXVII. <i>De Sputo Sanguinis.</i>	138
XXXVI. <i>De Incubo.</i>	84	LXVIII. <i>De Sputo Sanguinis qua- libet Lunatione.</i>	140
XXXVII. <i>De Epilepsia.</i>	86	LXIX. <i>De Cordis Palpitatione ex Iracundia.</i>	142
XXXVIII. <i>De Comate.</i>	88	LXX. <i>De Turbatione Pracordio- rum, & Pulsu magna, & irregulari.</i>	144
XXXIX. <i>De Cataphora.</i>	90	LXXI. <i>De Cordis Palpitatione.</i>	145
XL. <i>De Nimia Oscitatione.</i>	91	LXXII. <i>De Syncope.</i>	148
XLI. <i>De Aegilope.</i>	92	LXXIII. <i>De Animi Deliquio.</i>	150
XLII. <i>De Madarosi.</i>	94	LXXIV. <i>De Hydrope Pulmonis.</i>	153
XLIII. <i>De Ophthalmia.</i>	95	LXXV. <i>De Cardialgia.</i>	155
XLIV. <i>De Suffusione.</i>	97	LXVI. <i>De Fame, & siti lesa.</i>	158
XLV. <i>De Suffusione spuria.</i>	99	LXVII. <i>De Innepetentia.</i>	160
XLVI. <i>De Amblyopia.</i>	100	LXXVIII. <i>De Pica seu Malacia.</i>	161
XLVII. <i>De Visione imminuta.</i>	102	LXXIX. <i>De Dyspepsia.</i>	164
XLVIII. <i>De Surditate.</i>	104	LXXX. <i>De Singultu.</i>	165
XLIX. <i>De Surditate.</i>	104	LXXXI. <i>De singultu Frequentis- simo.</i>	168
L. <i>De Hypocophosi.</i>	107	LXXXII. <i>De Nausea & Vomitu.</i>	170
LI. <i>De Ozana.</i>	108	LXXXIII. <i>De Vomitu Sanguinis.</i>	172
LII. <i>De Ozana.</i>	110	LXXXIV. <i>De Cholera.</i>	174
LIII. <i>De Narium Hemorrhagia</i>	111	LXXXV. <i>De Lumbricis.</i>	176
LIV. <i>De Narium Hemorrhagia.</i>	113	LXXXVI. <i>De Dolore Iliaco.</i>	179
LV. <i>De Ptyalism.</i>	114	LXXXVII. <i>De Dolore Colico.</i>	182
LVI. <i>De Stupore Dentium.</i>	116	LXXXVIII.	
LVII. <i>De Angina.</i>	117		
LVIII. <i>De Raucedine.</i>	118		
LIX. <i>De Raucedine.</i>	119		
LX. <i>De Phtisi.</i>	121		
LXI. <i>De Sputo copioso & Macie ferè universali.</i>	123		
LXII. <i>De Pleuritide.</i>	125		
LXIII. <i>De Empyemate.</i>	129		
LXIV. <i>De Orthopnea.</i>	132		

LXXXVIII. *De Retentione Alvi.*
Pag. 184

LXXXIX. *De Alvi Adstrictio-*
ne. 186

XC. *De Lienteria.* 188

XCI. *De Lienteria.* 190

XCII. *De Diarrhæa.* 192

XCIII. *De Dysenteria.* 194

XCIV. *De Fuxu Hepatico.* 197

XCV. *De Tenesmo.* 199

XCVI. *De ani Prolapsu.* 201

XCVII. *De Fluxu Hamorrhoi-*
dum. 203

XCVIII. *De Hamorrhoidum Flu-*
xu. 205

XCIX. *De Dolore Hamorrhoi-*
dum. 207

C. *De Ascite.* 209

CI. *De Tympanitide.* 212

CII. *De Anasarca.* 214

CIII. *De Ictero.* 215

CIV. *De Lienis Tumore.* 218

CV. *De Scirrroso Lienis Tumore.*
220

CVI. *De Lienis Scirrho.* 221

CVII. *De affectione Hypochon-*
driaca. 224

CVIII. *De affectione Hypochon-*
driaca. 226

CIX. *De Flatu Dolorifico.* 228

CX. *De Nostalgia.* 230

CXI. *De Scorbuto.* 232

CXII. *De Nephritide.* 235

CXIII. *De Calculo Renum.* 238

CXIV. *De Incontinentia Urinæ.*
240

CXV. *De Ischuria.* Pag. 242

CXVI. *De Stranguria.* 245

CXVII. *De Diabete.* 247

CXVIII. *De Ulcere Vesicæ.* 250

CXIX. *De Pollutione Nocturna.*
251

CXX. *De Gonnorrhoea.* 253

CXXI. *De Lue Gallica.* 255

CXXII. *De Articulari Dolore.*
257

CXXIII. *De Rheumatismo.* 259

CXXIV. *De Signo Deflorationis.*
261

CXXV. *De Suppressione Mensium.*
264

CXXVI. *De Nimio Fluxu Men-*
sium. 265

CXXVII. *De flore Albo.* 267

CXXVIII. *De flore Albo.* 269

CXXIX. *De suffocatione Uterina.*
271

CXXX. *De Sterilitate.* 274

CXXXI. *De Sanguinis Missione*
in Gravidis, & Somno post
vena sectionem. 275

CXXXII. *De Secundinarum Re-*
tentione. 278

CXXXIII. *De Crusta Lactea.* 280

CXXXIV. *De Favis, & Achori-*
ribus. 281

CXXXV. *De Epileptia Puero-*
rum. 283

CXXXVI. *De Dentitione Diffici-*
li. 284

CXXXVII. *De Furunculis.* 286

CXXXVIII. *De Pernione, &*
* 3 *Gran-*

- Grandine.* Pag. 288
- CXXXIX. De *Asperitate Cutis.* 289
- CXL. De *Herpete Serpiginoso.* 291
- CXLI. De *Scabie fœda, ac perti-*
naci. 292
- CXLII. De *Scabie.* 293
- CXLIII. De *Phlyctænis : de Motu*
peristaltico Intestinorum : de
Urinæ quantitate in Corpore
humano : Et de Chocolata. 295
- CXLIV. De *Impetigine.* 298
- CXLV. De *Cicatrice in Facie.* 301
- CXLVI. De *Esseris.* 302
- CXLVII. De *Gutta Rosacea : de*
Unctione pectoris in Tussi In-
fantum : & de connubio in
Cholorosi : ac de aliis. 303
- CXLVIII. De *Strumis.* 305
- CXLIX. De *Ganglio.* 309
- CL. De *Ganglio.* 310
- CLI. De *Verrucis.* 311
- CLII. De *Varis.* 313
- CLIII. De *Morphæa.* 315
- CLIV. De *Alopecia.* 316
- CLV. De *Area, seu Alopecia tol-*
lenda. 317
- CLVI. De *Porrigine.* 318
- CLVII. De *Phthiriasi.* 319
- CLVIII. De *Obesitate.* 321
- CLIX. De *Vesicatoriis.* 322
- CLX. De *Coalitu Palpebrarum, &*
& de Sale Alembroth. 325
- CLXI. De *Hippolitho, & an si-*
mul, & semel aqua utendum
intus, & foris. 327
- CLXII. De *Termintho, & Ton* 329
- CLXIII. De *Hypercatharsi : de San-*
guine Hircino : ac de usu Vini
in curatione Pleuritidis. p. 330
- CLXIV. De *Pedum Intumescencia*
post morbum relicta : de Sangu-
nis missione in Hydrophobia :
De aquis Thermalibus in Hypo-
chondria : De purgatione in
Lienteria. 331
- CLXV. De *Amuletis Abortum im-*
pedientibus. 333
- CLXVI. De *Animadversionibus in*
curatione Mensium suppressionis.
334
- CLXVII. De *Abusu Venæ Sectionis.*
336
- CLXVIII. De *Venæ Sectione in Fe-*
bris Tertianæ Curatione. 339
- CLXIX. De *Purgatione Corporum*
Verno - autumnali ad præserva-
tionem. 341
- CLXX. De *Purgatione diebus Cri-*
ticis in Morbis acutis : Et de
usu Aceti in nimia obesitate.
342
- CLXXI. De *Remediis Diaphoreti-*
cis. 344
- CLXXII. *Formule Remediorum Au-*
ctoris ad Hemorrhoidas, ad
Gonorrhæam, & aquæ vitæ Sa-
lutiva. 345
- CLXXIII. De *Variis Quæsitis in*
Medicina. 346
- CLXXIV. De *Aliquibus observatis*
in Re Medica. 351

I N D E X

O B S E R V A T I O N U M.

- | | |
|---|---|
| <p>I. DE Verme ab Utero. 359</p> <p>II. DE Magnis Calculis renalibus. Pag. 360</p> <p>III. Ulcus in Pulmone Sanatum. ib.</p> <p>IV. De Diarrhea annua. 362</p> <p>V. De Lacte concreto in Stomacho. 363</p> <p>VI. Partus mirabilis Scandiani editus 26. Maii anno 1690. ibid.</p> <p>VII. Noxa ex frigidissimo potu. 367</p> <p>VIII. Mira antipathia cum Paeonia. ibid.</p> <p>IX. Febrifugum pluries expertum. 368</p> <p>X. De Alvo adstricta. ibid.</p> <p>XI. Raucedinis remedium. 369</p> <p>XII. De rara Cordis Palpitatione. ibid.</p> <p>XIII. Gula & Narium coalitus à Variolis. 370</p> <p>XIV. De Sternutatione cum singultu. ibid.</p> <p>XV. De Nummo deglutito & post duos menses vomitu exclafo. 371</p> <p>XVI. De Eluxu Hepatico curato. 372</p> <p>XVII. De Pure in Coxa tumore</p> | <p>collecto, per Alvinum expurgato. Pag. ibid.</p> <p>XVIII. Partus quinque Puerorum. 373</p> <p>XIX. De Inedia novem dierum in Muliere. ibid.</p> <p>XX. Sera dentitio. 374</p> <p>XXI. Dysenteria aquæ frigida potu curata. ibid.</p> <p>XXII. De Infidis Experimentis Medicis. 375</p> <p>XXIII. De Foemina tres Mammæ habente. 376</p> <p>XXIV. De Liene eximia magnitudinis. ibid.</p> <p>XXV. De Vipera duplici capite prædita. 377</p> <p>XXVI. De Epilepsia Arthritide superveniente fugata. ibid.</p> <p>XXVII. De Phrenitide Vena jugulari secta curata. ibid.</p> <p>XXVIII. Ex fumo candela sebaeæ mors. 378</p> <p>XXIX. De Squamula Ossis per Nares excreta. ibid.</p> <p>XXX. De Fluxu Mensium immodico, Scabie superveniente curato. 379</p> <p>XXXI. Mulieris Gravida antipathia</p> |
|---|---|

- thia cum Anguillis.* Pag. 380
 XXXII. *De Mortuo ex Tertiana simplici.* ibid.
 XXXIII. *De Stercoris excretionem in Mortuo.* 381
 XXXIV. *De Remedio facili ad Quartanam.* ibid.
 XXXV. *De Cephalalgia Capitis Vulnere curata.* 382
 XXXVI. *De Cacitate ex adstricta Dysenteria.* 383
 XXXVII. *De Vomitu & singultu ex Venere.* ibid.
 XXXVIII. *De Muliere Gravida Epileptica.* 384
 XXXIX. *Mira calculorum excretio.* ibid.
 XL. *De Puero Diabete laborante.* 385
 XLI. *De Fluxu Menstruo imminuto Hirudinum appositione curato.* 386
 XLII. *De Variolis in Vetula.* 387
 XLIII. *De Remedio Arthritidis prodigioso.* ibid.
 XLIV. *De Fistula curata.* 388
 XLV. *De Ulcere in inguine, Alvi facibus transitum concedente sanato.* ibid.
 XLVI. *Mors à Narium Hemorrhagia suppressa.* 389
 XLVII. *Mania ex amore nimio.* ibid.
 XLVIII. *Epilepsia per subsequens Matrimonium curata.* 390
 XLIX. *Quartana Venere curata.* 391
 L. *Ufus Aquæ Tettuciana in Dysenteria.* Pag. ibid.
 LI. *Dysenteria Scabie soluta.* 392
 LII. *Coma Somnolentum ex nimio pulveris Tabaci usu.* 393
 LIII. *Pleuritis Spiritus vini potu fugata.* ibid.
 LIV. *Ufus Euphrasie in Oculi caligine.* 394
 LV. *De Vulnere Aqua Vitæ curato.* 395
 LVI. *De Vagitu Uterino.* ibid.
 LVII. *De Narium Hemorrhagia sola aqua simplici curata.* 396
 LVIII. *Diarrhæa solo Plantaginis succo curata.* 397
 LIX. *De Papillis duabus in unica Mamma.* ibid.
 LX. *Colica biliosa usu aquæ frigida curata.* 398
 LXI. *De usu Chinæ Chinæ ad fungandos Vermes.* ibid.
 LXII. *De Veneris Stimulo ex assumpto Pharmaco purgante.* 399
 LXIII. *Præservatio à Calculis.* ibid.
 LXIV. *Abortus ex Tenesmo.* 400
 LXV. *Lac in Infante.* ibid.
 LXVI. *Dolor Capitis à solo odore Sulphuris.* 401
 LXVII. *De remedio ad Tremorem.* ibid.
 LXVIII. *De Ictu Scorpionum.* 402
 LXIX. *De Corporis totius Pruritu periodicè recurrente.* 404
 LXX. *De Risu Lethali in Puerpera.* 406
 LXXI.

LXXI. De Impregnatione nullis unquam præviis Menstruis. P. 409
 LXXII. De Prasagio ex Somnio. ibid.
 LXXIII. De Longævis. 410
 LXXIV. De Vanitate nonnullorum remedium. ibid.
 LXXV. Obesitas curata. 411
 LXXVI. De Dente molari orto in Quinquagenario. ibid.
 LXXVII. De Convulsione Febri excitata, curata. 412
 LXXVIII. De Arthritide usu Betonice & Vini abstinentiâ curata. ibid.
 LXXIX. De Lactis examine ope Microscopii facti. 413
 LXXX. De dolore Capitis diurno. 414
 LXXXI. Singultus ex Diarrhæa suppressa. ibid.
 LXXXII. De Ischiade facili remedio curata. 415
 LXXXIII. De Juvene in tenebris vidente. ibid.
 LXXXIV. De Raucedine Syrupi Raphani curata. 416
 LXXXV. De Febre Chronica metu ac terrore curata. ibid.
 LXXXVI. De Fancium ulcere ab Unguento Mercuriali. 417
 LXXXVII. De Fluore albo, usu Syrupi Coralliorum Quercetani sanato. ibid.
 LXXXVIII. De Sudore Vini simili. 418
 Jos. Lanzoni Opera Tom. II.

LXXXIX. De Doloribus post partum Spermate Ceti sedatis. Pag. ibid.
 XC. De Gallina pullum pariente. 419
 XCI. De Magnetis virtute non interrupta ab alii succo. ibid.
 XCII. De Singultu alapâ cohibito. 420
 XCIII. De Risu in Puero, primo nativitatis die. ibid.
 XCIV. De Excrementis per umbilicum emissis. 421
 XCV. De Spiritus vini vi solutiva. ibid.
 XCVI. De Morte ex Singultu. ib.
 XCVII. De Tumore vento pleno. 422
 XCVIII. De Monstro Mentulato & bicorpori. ibid.
 XCIX. De Epilepsia Ulcere in crure sanata. 423
 C. De Lapillis multis vomitu reiectis in Arthritico. 424
 CI. De Ebrietate à nimia Mellis assumptione. ibid.
 CII. De Colore Capitis, sonitu campanarum sanato. 425
 CIII. De Ictero vini potu sanato. ibid.
 CIV. De Malo Hypochondriaco Lactuca usu curato. 426
 CV. De variis Remediis expertis. ibid.
 CVI. De Somnio mortem prædicente. 428
 CVII.

- CVII. De Ficu & Aloë, simul cum Possessoribus suis emortuis. Pag. ibid.
- CVIII. De Verme ex Nare in Restica, Cephalalgia causæ. 429
- CIX. De Ligno per tumorem excreto. 430
- CX. De Arthritide Aquæ potu fugata. 431
- CXI. De Diarrhæa Aquæ frigida potu sanata. 432
- CXII. De Dysenteria, balneo aquæ frigida curata. ibid.
- CXIII. De Pica singulari in Gravida. 433
- CXIV. De Puella exhorre mortuo. 435
- CXV. De Epilepsia quartana superveniente sanata. 436
- De Scabie continua. 437
- CXVI. De Singultu & Sternutatione ante menstrua. ibid.
- CXVII. De Insania diurna seu Solari. 438
- CXVIII. De Febris continuæ solutione ex sanguinolento secessu. ibid.
- CXIX. De Syncope ex Imaginatione. 439
- CXX. De Continua Icteria, à felle in Vesiculâ suâ in lapidem coagulato. ibid.
- CXXI. De Sudore post mortem. 440
- CXXII. De Frustulis Raphani per urinam excretis. ibid.
- CXXIII. De Cornu in fronte Puelli. 441
- CXXIV. De Fibri Quartana larga Uvarum assumptione curata. ibid.
- CXXV. De quinque Filiis Cæcis ex Patre Cæco. 442
- CXXVI. De Epileptico saltante. 443
- CXXVII. De Vomitu ex manu sinistra distorsione. ibid.
- CXXVIII. De Globulo plumbei per triennium in corpore humano detento, tandem per tumorem in Inguine extracto. 444
- CXXIX. De Remedio singulari ad Lues Veneream curandam. 445
- CXXX. De Hydrope Ascite urinæ profluvio sanato. 446
- CXXXI. De Vino à Mamma excreto. ibid.
- CXXXII. De Partu quinque Filiorum. 447
- CXXXIII. De Nævis Menstruo Sanguine delectis. 448
- CXXXIV. De Noctambulatione periodicâ. ibid.
- CXXXV. De noxa Venæ Sectionis & purgationis in Pleuritide grassante Ann. 1696. 449
- CXXXVI. De Phrenitide Balneo Aquæ frigida curata. 451
- CXXXVII. De Corde pilis referto. 452
- CXXXVIII. De Vermiculis cum urina profusis. 453
- CXXXIX. De Furore Uterino ex inflammatione Uteri. ibid.
- CXL. De Hysterica passione, Lactis Asinini usu sanata. 454
- CXLI. De Hydrope ulcere aperto in Scroto sanato. 455
- CXLII. De prædictione ex Barba. ibid.
- CXLIII. De Pure in brachii tumore collecto, per alvum expurgato. 456
- CXLIV. De Puero sine Ano. 457
- CXLV. De Muliere barbata. ibid.
- CXLVI. De Febre Quartana Abortu soluta. 458
- CXLVII. De Herpete sola aqua marina curato. ibid.
- CXLVIII. De Tumore insigni à capitis lotionem. 459
- CXLIX. De Coecitate, ex intempestiva Sanguinis missione. 460
- CL. De Dolore maximo Dentium Nive apposita ablato. ibid.
- CLI. De Vermibus per tussim rejectis. 461
- CLII. De Morte à frigido Potu. ibid.
- CLIII. De Pulvere Febrifugo. 462
- CLIV. De Calculis in Pericardio. ibid.
- CLV. De duplici Dentium ordine in Infante.

- fante. Pag. 463
 CLVI. *Noxa ex Cibo cocto in Vase æneo.* Pag. 464
 CLVII. *De Variis Antipathiis curiosis.* 465
 CLVIII. *De Morte ex Scabie malè curata.* 467
 CLIX. *De Mania in Coeco ex nimio Puellæ amore.* 468
 CLX. *De Phthiriasi Oleo Olivarum curata.* ibid.
 CLXI. *De Venæ sectione in Gravida absque ulla noxa unoquoque gestationis mense celebrata.* 469
 CLXII. *De Cachexia cum Hydropis principio, ulcere in crure à natura aperto sanata.* ibid.
 CLXIII. *De Variis liquoribus infusis in venas variorum Animalium, & circa ex observatis.* 470
 CLXIV. *De Morte ob Tineam malè curatam.* 472
 CLXV. *De Quartana Febri Ebrietate fugata.* 473
 CLXVI. *De Febri Maligna tumore brachii soluta.* ibid.
 CLXVII. *De Dolore Capitis pertinaci, nullis cedente remediis in Canem transplantato.* ibid.
 CLXVIII. *De Fluore Albo, Salivatione sponte orta, sanato.* 474
 CLXIX. *De Phthisi à Vermibus.* 475
 CLXX. *De Gonorrhœa pertinaci, rotulis nostris fugata.* ibid.
 CLXXI. *De Umbilici Hæmorrhagia.* 476
 CLXXII. *De Abdominis Tumore sponte sanato.* 477
 CLXXIII. *De Brachii dolore ex imaginatione.* ibid.
 CLXXIV. *De Variis in Anatome reperi-
tis.* 478
 CLXXV. *De Chirurgia Infusoria in Canibus.* 479
 CLXXVI. *De Scabie crescente Luna au-*

- sta.* Pag. 480
 CLXXVII. *De Urina Frigida in Febre Maligna.* Pag. ibid.
 CLXXVIII. *De Diabete solo Aquæ fer-
rata usu curato.* 481
 CLXXIX. *De Febri tertiana simplici,
cum surditate symptomatrica.* ibid.
 CLXXX. *De Verminoso Abdominis Tu-
more.* 482
 CLXXXI. *De Puella nata cum Vario-
lis.* 483
 CLXXXII. *De Menstruis Vomitu eva-
cuatis.* ibid.
 CLXXXIII. *De Catameniorum fluxu
non assueto tempore in variis Foeminis.* 484
 CLXXXIV. *De Acicula deglutita cum
urina excreta.* ibid.
 CLXXXV. *De Angina ex retentione mu-
ci Narium.* 485
 CLXXXVI. *De Mania in Puero Castra-
tione curata.* 486
 CLXXXVII. *De Alvi fluxu periodico.* ibid.
 CLXXXVIII. *De Ulcere ex Vespæ pun-
ctura.* 487
 CLXXXIX. *De Morte ex suppresso su-
dore.* ibid.
 CXC. *De Calculo in dextrâ Maxillâ.* 488
 CXCI. *De Ingenti ac subita Mammarum
inflatione.* ibid.
 CXCII. *De Febre periodica lunari.* 489
 CXCIII. *De Hydrope Sanato.* ibid.
 CXCIV. *De Subita Morte ex percussione
regionis Ventriculi.* 490
 CXCV. *De vi admiranda Digestionis in
quodam Bajulo.* ibid.
 CXCVI. *De viribus Aquæ vitæ.* 491
 CXCVII. *Urina Verminosa.* 492
 CXCVIII. *Arteriotomia.* ibid.
 CXCIX. *Maligna Febris Dentium casu
finita.* 493
 CC. *Quædam rara in Anatome reperta.* 494

- CCI. De Morbis Lanionum. Pag. 495
 CCII. De Variis observatis in Boum contagio. 497
 CCIII. De Strabismo ex terrore. 499
 CCIV. De Usu aquæ Villensis cum cibo. 500
 CCV. De dolore Capitis periodico in Narium hæmorrhagiam terminante. ibid.
 CCVI. Epicarpium antifebrile. 501
 CCVII. De Hydrope esu Ceparum sanato. ibid.
 CCVIII. De Ictero notabili. 502
 CCIX. Experta in hæmorrhoidum dolore. 503
 CCX. De Sudore colorato. ibid.
 CCXI. De Vermibus in variis corporis partibus observatis. 504
 CCXII. Vermis per vomitum ejectus. 505
 CCXIII. Hydropica sanata. 506
 CCXIV. Constitutio Epidemica Ferrariensis; Anni 1715. ibid.
 CCXV. De innoxio esu carnis Boum Lue pessima contagiosa denatorum. 510
 CCXVI. De Febre octana & sextana. 511
 CCXVII. Odontalgia Venæ sectione curata. 512
 CCXVIII. Mors ex Stomacho percussione. ibid.
 CCXIX. Lachrymæ sanguineæ. 513
 CCXX. Constitutio Epidemica Ferrariensis Annorum 1716. & 1717. ibid.
 CCXXI. Febris quartana à terrore fugata. 517
 CCXXII. Surditas ex terrore. 518
 CCXXIII. Splen petre factus. ibid.
 CCXXIV. Hæmorrhagia lethalis ex scarificatione. 519
 CCXXV. Coecitas ex Scabie retropulsa. ibid.
 CCXXVI. Dolores Articulares ex adstricta Diarrhoea. 520
 CCXXVII. Tumor Verminosus. ibid.
 CCXXVIII. Insania periodica. P. 521
 CCXXIX. Dolor inter caput & genua reciprocus. ibid.
 CCXXX. De puerperio infelici à potu frigido. 522
 CCXXXI. De Fele rabida. 523
 CCXXXII. De Noxa ab esu carnis vaccinae à cane rabido demorsa. ibid.
 CCXXXIII. De Arsenicò sine noxâ deglutitò. 524
 CCXXXIV. De Fungorum Veneno. 525
 CCXXXV. De Laudano opiato ad pondus 3. v. sine noxa assumpta. 526
 CCXXXVI. Vini & Veneris nimium usum venenatum esse probatur exemplis. 527
 CCXXXVII. De morte à Gypso sumpto. 528
 CCXXXVIII. De Vesparum ictu. ibid.
 CCXXXIX. De Morte ex Aqua forti. 529
 CCXL. De Citri ac Limonum succo optimo remedio contra Veneium Aque-ta dictum. ibid.
 CCXLI. De facili Curatione Vulnerum simplicium. 530
 CCXLII. Remedia Varia experta ad vulnera simplicia sananda. ibid.
 CCXLIII. De remedio ad Vulnera: ad Dom. Mangetum. 531
 CCXLIV. De Observatiene circa vulnera c. pitis. 532
 CCXLV. De fractura cranii, cute illaesa manente. ibid.
 CCXLVI. De Vulnere sola aqua simplici curato. 533
 CCXLVII. De Vulnere in thorace, pure per urinam emisso, curato. 534
 CCXLVIII. Epilepsia capitis vulnere curata. 535
 Dissertatio de Vita & Morte ad Dn. D. Lucam Schroeckium. 536

JOSEPHI LANZONI

Philosophiæ & Medicinæ Doctoris Ferrariensis, in Patria Universitate Lectoris Primarii, ac S. R. I. Academiæ Cæsareo-Leopoldino-Carolinæ Naturæ Curiosorum Socii, &c.

CONSULTATIONES MEDICINALES

VIGINTI.

Post ADVERSARIA ejusdem Auctoris
antea editæ.



L A U S A N N Æ,
Sumptibus MARCI-MICHAELIS BOUSQUET ET SOCIOR.

M D C C X X X V I I I.

Recta Consilia Ægrotis damus.

Terentius in Andria Act. 2. Scen. 1.



CONSULTATIO I.

De Apoplexia.

AD EXCELLENTISSIMUM DOMINUM
FRANC. MARIAM NIGRISOLIUM

Medicum Sapientissimum, &c.



EXTOR Ferrariensis Annorum ætatis 49. habitûs carnosî, alioquin sani, Baccho indulgens sub finem Quadragesimalis Jejunii hujus anni 1713. in meridie, de repente collapsus instar mortui jacet sine voce, nec videns, nec audiens, quin etiam tactu, motuque privatur, cum stertore quodam, pulsu adhuc integro, absque febrî; super cubile delatus, consilium, atque medicum petit auxilium.

Hæc affectio est morbus ille gravissimus Apoplexia fortis dictus, qui primò caput obsidet, & protinùs, ac subitò sensu, & motu corpus univèrsum privat, ut in præsentî Patientè apparet, signa enim diagnostica per se manifesta sunt; Hujus affectionis causa est impedita irradiatio spiritûs animalis ad organa sensûs, & motûs, quod, si observationibus anatomicis credendum, à stagna-

tione sanguinis evenit, quemadmodum innuit *Hippocrates* & post eum *VVefferus* ac *Dolæus*; impedito enim sanguinis motu, ipsoque cruore coagulato in vasculis cerebri, seu meningum, vel in jugularibus ipsis, influxus in animales spiritus tollitur, unde lumen animale deficit, ex quo immediatè Apoplexia habetur; Quoad prognosim spectat, *Hippocrates* in casu nostro apertè ait, *Apoplexiam fortem solvere impossibile esse*, & cùm stertorem habeamus, nulla vitæ salus sperari potest; At quia, monente *Celso*, *melius est anceps experiri remedium, quàm nullum*; ideò ad indicationes curativas, ut rectam consultationis methodum servemus, transeamus; Istæ igitur sunt, primò restituere, quanto citiùs fieri possit, sanguini motum, indè spiritibus animalibus; postea depurare, ac volatilizare cruorem ipsum; tandemque viscera, & præsertim cerebrum ipsum corroborare: Pro quibus assequendis, cùm in casu nostro Diæta, ac Pharmacia frustraneæ sint, æger enim nihil per os admittit, experto enim me præsentè aquæ apoplecticæ brevi haustu, ipse per os ingrediebatur, & unà exhibat; Tota ergo spes salutis in Chirurgia est reponenda; Venæ sectio in brachio, pede, ac jugulari instituatur partitis vicibus; Frictiones fortes, ligaturæ, cucurbitulæ scarificatæ, & avulsæ applicentur, nec non experiatur remedium à *Clariss. Dom. Mistichello* præscriptum, nempe ferrum ignitum plantis pedum appositum; clystere acri uti non incongruum puto; quod si istis non cedat aliquantisper morbus remediis, ac saltem liquida æger inglutiat; tunc de vita actum est; ut in præsentì nostro casu accidit; nocte enim sequenti vitam cum morte commutavit; & si in meridie lumine animali orbatus fuit, sub media nocte, vitalis pariter flamma extincta; atque sic illi

In æternam clauduntur lumina noctem.

CON-

CONSULTATIO II.

De Paralyfi post Apoplexiam.

AD EXCELLENTISSIMUM DOMINUM

ALOYSIUM A FABRA

Medicum Præstantissimum.

NOtissima est Affectio Rever. Sacerdotis Parochi nostri Ferrariensis Annorum ætatis 50. post enim validum Apoplexiæ insultum, diversarum partium corporis subsequuta est, & præsertim linguæ, ut neque verbum integrum articulare valeat, Paralyfis. Hujus affectûs generationem descripsit *divinus Senex in 4. de rat. viêt.*, cujus causa videtur esse vitium musculorum, & animalis spiritus; & quidem musculorum, cùm ipsorum fibræ ineptæ sint, & malè dispositæ ad sui extensionem, cùm sint flaccidæ, ac molles; vitio autem animalis spiritus, si impotens sit ad musculorum fibras distendendas, aut quia deficiat, aut quia impediatur ejus influxus in nerveas partes à materia crassa, & obstruente; Quoad prognosim, hæc paralyfis curatu est difficilis, quia inveterata est, & quartum nunc videt annum, immò quia ab Apoplexiâ ortum habuit, timendum, ne iterùm in Apoplexiam degeneret; attamen quia ætas consistens est, aliquid boni sperandum, nam si in senectute esset Patiens, tunc incurabilis omninò esset, cùm tubuli partis affectæ sint duriores, & fibrillæ crassæ, ac densæ, & minus sint mobiles, unde obstructions in iis genitæ non facilè tolluntur; Indicationes igitur curativæ in hoc casu sunt, restituere motum spiritui animali, tollere materiam illam crassam, ac obstruentem, tandemque firmare, ac corroborare fibras, aliasque partes nervosas; Pro quibus assequendis, ad tres Medicinæ Fontes deveniendum puto; nempe ad Chirurgiam, Pharmaciam, ac Diætam; & quoad primam, venæ sectionem commendo repetitam,

titam, ad hoc, ut communicato motu cruori, impedimenta facilius tollantur; frictiones, ac cucurbitulæ scarificatæ, etiâ in subsidium venire possunt; ex Pharmacia, expiatis primò communibus viis: & alvo sollicitata, potione nostra magistrali solutiva, vel pilulis de agarico, Cochiis, & aggregativis, & pro alterantibus ad plures dies utendo jure vituli, in quo bullierint *Cornu Cervi limatum*, *folia primulæ veris*, *Betonicæ*, & *Graminis*; indè ad specifica deveniendum; ut est sequens mixtura per cochlearia repetenda ad plures dies. ℞. Aquæ Ceraforum nigrorum, Salviæ, ana, ʒ. ij., Epilepticæ Langii, ʒ. sem., Extracti castorei, ʒ. sem. Syrupi de stœchade, ʒ. sem. misce. Præbeatur pulvis viperinus per mensem, superbibendo decoctum ex Ligno Quercino, Salsæ parillæ, Santali citrini, Radicibus Pœoniæ, & foliis Majoranæ, Salviæ, Betonice, mixtis, & in aqua Fontis paratum S. A. Quovis vesperè utatur conserva primulæ veris, Florum tunicæ, betonicæ, & liliorum convallium. Inungatur pars affecta, oleo vulpino, Castorei, & spiritu vini mixto, nec non vinacea calida apponantur suo tempore; Vitet frigus, ac aërem nocturnum, victus sit moderatus, & cibi condiantur aromatibus; cavendum à carne suilla, anatum, anserum, & pavonum, & à vino nimio, ac generoso; immò poterit vinum suum medicari foliis rorismarini, & sassafras. Cœna sit parrior prandio, & valdè ab eo distet; Somnum fugiat meridianum; Motum, atquè exercitium præsertim sereno cœlo commendo; alvus lubrica semper servetur, & hilari animo speret salutem à Deo, qui solus languores omnes sanat.

CONSULTATIO III.

*De Vertigine.*AD EXCELLENTISSIMUM DOMINUM
FRANCISCUM JUSTINUM*Medicum, Chirurgum, & Anatomicum Solertissimum.*

CIVIS noster Ferrariensis ætatis 40. annorum, aurium primò tinnitum sensit, cum modico capitis dolore, ac rubore oculorum, paulò post omnia verti in gyrum videbantur, nec rectà stare poterat, ità ut timeret, ne caderet; hæc affectio facta est frequens, & nunc visio tenebricosa est, & nisi baculo inhæreat ambulare nequit, ob timorem concidendi; Petit à Medicina auxilium, remedia, & salutem.

Vertigine affici hunc nostrum Civem certum est, signa enim tam manifesta sunt, & aperta, ut cuilibet etiam non Medico appareant; Subjectum hujus affectionis communi Authorum consensu cerebrum statuitur, cum spiritibus animalibus, qui valdè perturbantur, ac inordinatè vagantur circa callosa corpora, & strata cerebri, nec non per poros omnes ipsius visceris principalis; sic causa conjuncta hujus affectus erit spirituum animalium turbatio à corpusculis heterogeneis, & ipsis spiritibus infestis, vel in sanguine, vel in aliis humoribus latentibus producta; particulæ enim vertiginosæ in internas partes cerebri insinuatæ spiritus fugant, atquè tenebricosos faciunt; undè inordinatè ad oculos propulsi, vertiginem pariunt in casu nostro.

Post causas, ad Prognosim est deveniendum, & primò si vertigo hæc diutiùs duraverit, apoplexiam, vel maniam, vel spasmodicos insultus prænunciat; undè colligo, hunc affectum non floci pendendum esse, tanquàm morbi majoris prodromum; Interrogandus autem est Æger præsens, an viridis, aut purpureus color antè

antè oculos obversetur, tunc enim amentiam, ac epilepsiam præ-
nunciare, scribit *Clariss. Dolæus*; Si verò recens vertigo est pe-
riculo vacat; Aliquandò capitis dolor hujus affectionis solet esse re-
medium, cujus exemplum dat *Læl. à Fonte Consf. 6.*

Indicationes curativæ sunt, sedare inordinatum spiritus animalis
motum, corpuscula vitiosa heterogenea eliminare, atquè cerebrum
corroborare; Quarè primò innixi aphorism. *Hippocratis* sect. 4. num.
17., „si febrem, non habeat, & æger noster abstineat à cibo, &
„tenebricosam vertiginem patiatur, & oris amaritudinem sentiat,
„purgatione indigere significat; sic igitur alvo sollicitata aliquo le-
nienti pharmaco v.g. Cassia, Manna, Syrupo aureo, Conserva flo-
rum Persicorum, vel similibus, dico sanguinis missionem, tanquam
singulare remedium, admittendam, & si de facili non cedat reme-
diis Vertigo, tunc frictions, Arteriotomia, Cucurbitulæ scarifi-
catæ, Hirudines, & id genus remedia, è Chirurgo fonte derivata,
usurpanda sunt; Ex Pharmacia verò nonnulla veniunt assumenda
præsidia, ut Decoctum ligni Guaiaci, Visci Quercini, Buxi, Ra-
dicis Pœoniæ, Foliorum Calendulæ, Betonicæ, procurato sudo-
re per hypocaustum, & id per dies triginta; sudor tamen sufficiet
per x. dies, habito respectu ad Ægri tolerantiam, & resistantiam;
omni autem octavo die decoctionis, sumat Patiens Pilulas de Agari-
co ad 3. j. Immò, tincturam Succini parcius, sed sæpè datam cum
Syrupo florum pœoniæ meritò inter specifica referri ait *Waldsch-
midtus in monit. med.* Laudo etiam sequentem Tincturam à *Præ-
stantiss. Dolæo* descriptam & Florum Pœoniæ, Liliorum Convallium,
ana, 3. sem. Rorismarini, 3. iij., Salviæ, Betonicæ, Tiliæ, ana
3. ij., cum Spiritu cranii humani suo sale imprægnati; Ultimo loco
Conserva florum Calendulæ quavis vespere ad Cochleare unum
commendarem, sicut non semel uti sequenti bolo bonum erit, &
Stercoris Pavonis albi in Sartagine leniter exsiccati, & pulveri-
fati, 3. sem. cum conserva betonicæ q. s. fiat bolus auratus. Hoc
autem stercus effectum suum edit ob suum copiosum sal volatile,
quo scatet; Ad Diætam quod attinet, Cibus eligatur succi boni,
& qui facilè digeratur, vitentur ergò omnia legumina, Suillæ car-
nes, & præsertim salitæ, Caseus, Pasta, item vinum generosum,
quia hoc adauget sanguinis, spiritusque effervescentiam, indèque
multas

CONSULT: MEDIC. Consult. III.

multas particulas indomitas ad cerebrum mittit; Æger animi perturbationes fugiat cane pejus, & angue, quia istæ valdè sanitatem lædunt; Aër sit serenus, temperatus, ac lucidus, austrini cœli flatus fugiat; sicque sanitatem Deo adjuvante recuperabit; Faxit Deus, &c.

CONSULTATIO IV.

De Cephalalgia.

AD EXCELLENTISSIMUM DOMINUM

FRANCISCUM SALMIUM

Medicum Præstantissimum.

Mulier 30. Annorum Vidua boni corporis habitus, cui mensium fluxio imminuta est, dolore capitis pungitivo per plures dies afficitur, cum inappetentia, & aliquandò cum cordis palpitatione; vix febre tentatur, ordinatè enim motus cruoris incedit, præter exiguam alterationem pulsûs; aliquandò pallet, & modò rubet, atque oculi inflammantur; Ob dolorem nequit è lecto surgere, consilium medicum poscit, & auxilium sperat.

Hic affectus Cephalalgia nuncupatur, & est dolorifica sensatio capitis à continui solutione dependens; Partes affectæ sunt partes nervosæ capitis, illæ enim sunt exquisito sensu præditæ, & quò magis acres particulae sanguinis, & lymphæ in illis partibus latentes sunt acutiores, ac in majorem motum percitæ, eò dolor exsurgit validior, undè pungitivum sentit nostra Ægra dolorem; Causæ igitur istius affectionis, sunt acres particulae cum humoribus per vasa ad caput derivatæ, & cerebri filamenta, meningesque vellicantes, atque pungentes, quæ fortassis acres particulae ortum habuere ex imminuto catameniorum fluxu, non benè enim purgato menstrualiter sanguine, ut scateat particulis impurioribus est necesse, & maxime in Vidua juvene, cui fervet massa sanguinis.

Circa Prognosim, Galenus ait, quod ex se iste dolor lethalis non
Josephi Lanzoni Opera. Tom. II. B est;

est; nihilominus tamen periculo non careret, si longus, ac diuturnus esset, altasque radices produceret, tunc enim in Apoplexiam, Epilepsiam, & cœcitatem transire posse docuit *Joh. Fortis in Consult.* monendo cum *Aretæo* capitis doloris finem mortiferum esse, exigui enim dolores non sunt spernendi; attamen quia in nostro casu, mulier sana est, & juvenis, ac dolor altas non egit radices, sperandum ope remediorum, citò salutem ipsam recuperare posse, ut voveo.

Indicationes ergo curativæ sunt, sanguinem à particulis illis acribus depurare, easque eliminare, caput corroborare, & cruorem ad inferiora loca invitare, atque per ea minuire, sicque catameniorum fluxum in perenni motu, ac debita mensura restituere.

Quibus, ut satisfiat, ad tria Medicinæ brachia recurrendum; & primò quoad Chirurgiam, præcipuè consideretur sanguinis missio, & ità sanguis erit educendus à vena pedis, *Hippocrates* enim suadet, ut *dolorem sedes, sanguinem de venis detrahito*; & si dolor non cedat, monente *Waldschmidio*, vena secetur in fronte, vel manu; & ego pluries observavi feliciter sectam fuisse venam jugularem, quin & Arteriotomiam in temporibus summæ efficaciam esse putarem, quando dolor pertinaciter hæreret, nec de facili cederet; Cucurbitulæ etiam scarificatæ spernendæ non sunt tanquam Venæ Sectionis vicariæ; hæc in quantum ad Chirurgiam in casu nostro; Quod attinet ad Pharmaciam; Expurgatis primò à saburris, & vitiosis fermentis primis viis vel Syrupo aureo solutivo, vel Potione nostra magistrali, ad sex unciarum pondus; Prò alterantibus utatur quavis mane jejuno stomacho jusculis, in quibus bullierint folia *Betonicæ*, *Cichorei*, *Endiviæ*, *Oxalidis*. Ab opiatis abstinendum; hæc enim, teste *Waldschmidio*, palliativè curant, idque non sine periculo gravioris recidivæ, vel affectus lethargici; Pro magno remedio in tali casu, & in mea potissimum dilectissima Uxore expertus fui, decoctum ligni *Visci Quercini* per plures hebdomadas jejuno stomacho assumptum; Nonnulli usum frequentem *Pilularum de Aloe*, atque *de Agarico* laudant; Pro externis remediis, Primò sint lintea sequenti liquore madefacta, & fronti ad dolorem cicurandum apposita; R. Aquæ *Verbenæ*, *Betonicæ*, *Rosarum*, ʒ. iij., vel unguento *populeonis*, & *alabastrino* inungatur frons; *Verbenam* collo suspensam

commendat *Petr. Forestus*; Lotio pedum sæpè juvat, quatenus fibrillæ nerveæ blando popysmate demulcentur; quod etiam laudat *Dolæus*; Quoad Diætam demùm, cibi sint optimi succi, & facilis concoctionis; Potus sit vinum tenue, immò si à vino omninò abstineret melius esset, nam vinum capiti nocere ait in suis *monitis Medic. Waldschmidius*; Exercitium sit moderatum, somnus, & vigilia sint mediocria, Animi pathemata fugiat, utpotè quæ spiritus, & humores agitant, sicque dolori capitis calcar adderent, & effervescentias sanguinis excitando nimias, arterias extendendo, cephalalgiam augerent. Cæterà quæ pertinent ad varias conservas, aliaque medicamina à Practicis, tam antiquis, quàm recentibus præscripta, silentio præterire volui, tum quia præscriptis super remediis salutem recuperaturam spero, tum etiam cum illa in dies à prudenti Medico præsentì perfici debeant.

CONSULTATIO V.

De Tussi contumaci.

AD EXCELLENTISSIMUM DOMINUM
PETRUM DOMIN. VOLTOLINAM

Medicum Doctissimum.

CAsus proponitur ab Excellentissimo D. Medico ad Curam Nobilissimi Juvenis, qui immodicè delectatus potionibus gelidis ex succo limoniorum, & modico sacchari paratis, diebus canicularibus incidit in tussim molestant, adeò ut noctu dormire nequeat, & tam pertinacem, ut usque adeò elapsi sint tres menses, & multis tentatis ex Arte remediis, nondùm convaluit; quare opem, & auxilium à Deo primò, indè à Medicina implorat.

Affectus igitur, quo noster hic Æger laborat absque dubiò est Tussis molesta, & contumacissima, quæ definiri potest, valida crebrior, inæqualis, & sonora efflatio, vel expiratio, qua magn

spirituum pars cum impetu foras erumpens vi sua explodere nititur acria excrementa, ex lymphâ peccante orta, trachæam, ipsasque pulmonares fibrillas laceffentia, & vellicantia: Pars affecta est primò Pulmo, qui vel per se, vel per consensum alterius partis afficitur; postea fibræ bronchiorum, muscutorumque pectoris, ac alii nervi laceffiti mediantibus spiritibus tussim excitant, nec excludenda venit trachæa fibris suis quoque instructa; Signa Diagnostica jam per se nota sunt, unde per adagium dicitur, tussim, & amorem dissimulari, & abscondi non posse; Nunc igitur pergamus ad causas, quæ in casu nostro, sunt particulæ in sanguine cuspidatæ, acutæ, & ferientes, quæ per cruoris circulum ad partes supradictas pectoris derivatæ, illas vellicant, atque molestè pungunt, & sic motum præternaturalem excitant, qui formaliter tussis dicitur; tales autem irritantes particulæ ortum habuere à nimio succi limoniorum usu, & à valido frigore, quo imbutæ fuerunt Potiones inordinatò desumptæ; *Frigidum enim pectori inimicum esse docuit maximus Medicorum magister Hippocrates.*

Quoad Prognosim observandum, in nostro casu, tussim non esse affectum spernendum, qui diu durat, & contumax est, ut advertit doctissim. *Franc. de le Boë Sylvius*; immò addit Clariss. *Ettmullerus*, timendum ne sit Phthiseos prodromus; Capiti, & oculis tussim molestam nocere volunt multi, ideoque citò ad hujus affectionis est deveniendum curationem, ne ager in pejorem incidat morbum.

Curativæ igitur indicationes erunt in casu nostro tollere irritamenta, dulcificando cruoris acredines, retundendo, & hebetando cuspides ferientes nerveas partes illarum particularum, quæ propriè causant tussim; demùm, eas è corpore eliminare, atque pectoris partes corroborare; Ad quæ assequenda, ad tria Medicinæ brachia deveniendum, & primò ad Pharmaciam; ex qua expiatis primò communiter primis viis, & pro præparantibus exhibitis ad plures dies *Syrupo de Hyssopo, de Præssio, & Jujubino*; ad usum *Lactis asinini* per longum tempus est deveniendum; Indè *pulverem Hally commendarem, oculos Cancrorum, Conservam rosarum recentem; Mixture Pectoralis* non exigui est usus, sicuti *Ferculum Saxonie, Syrupus de Erysimò Lobelii, & liquiritiæ succus; Balsamum Sulphuris*.

com-

commendatur à *Rob. Boyleo in tract. Philos. experim.*, & decoctum *Raparum* à *Joanne Cratone in Epist. Medic.*, & si lubricare alvum oporteat, usum Clysterum, ex lacte vaccino chalybeato; aut ex oleo amygdalarum dulcium, confectorum laudo, fretus autoritate Celebris *Malpighii in cons.* 32., quas Consultationes recenter collegit, atque Typis Patavinis publici juris fecit Clarissimus, atque omni laude dignus *D. Hieronymus Gaspari*. Opiata rarius esse adhibenda monet *Ettmullerus*, cum *Waldschmidio*, qui sudores conducere scribit; Usam spermatis ceti, & myrrhæ approbo; linimenta verò tanquàm parùm utilia, vetulis credulis linquo, quæ in tussi non tantùm pectus, verùm etiam plantas pedum inungunt; Ex Chirurgia suscipienda est Venæ sectio, quæ licèt à Practicis tantoperè non commendetur, magnæ tamen solet esse efficacix, ut in *monit. suis* ait *Waldschmidius*; Hic autem obiter noto, similem casum observasse temporibus suis Amstelodamensium Medicorum lumen *Nicolaum Tulpium lib. 4. observ. medic. num. 21.*, qui tamen casu solo *Raparum* Decocto fuit curatus. Diætâ denique sit blanda, ita ut suavibus particulis demulceat partes membranosas, & fibrosas, ideoque fugiat Ægrotus noster à cibis acribus, salis, aromaticis, aliisque alimentis serum fluxile, & acutum reddentibus; Potus sit ptisana Veterum, vel decoctum hordei cum passulis, Vinum fugiat maximè generosum, ob particulas acidas, quas in se habet; Motus, & quies mediocriter se habeant; motus enim nimius humores agitando laticem acriorem reddit; Aër impurus, & frigidus nocturnus, cane pejus, & angue vitetur; Læto sit animo; dùm hæc pauca ego indico pro salute nostri Juvenis tussi pertinacissima ægrotantis; Exit Deus &c.

CONSULTATIO VI.

De Asthmate.

AD EXCELLENTISSIMUM DOMINUM

HIERONYMUM BARUFFALDUM

Philosophum Eruditissimum.

Proponitur mihi curandus Rev. Sacerdos ætatis annorum 60. habitus carnosus, qui quatuor ab hinc annis correptus est quadam spirandi difficultate, præsertim in ascensu scalarum; modò magis invaluit hic affectus, adeò ut fermè continuus sit factus, & nocte decubitus sit difficilis; Anhelosus igitur, & suspiriosus difficillimè trahit spiritum, adeò ut ob pectoris angustiam, suffocationem timeat; & hæc ex historia dictæ affectionis desumpta fuere ab Excellentiss. Viro Curante eleganter exarata, atque ad me transmissa.

Ex qua colligo Reverend. Sacerdotem Asthmate premi, & non incipiente, sed inveterato, & ad quatuor annos protracto; Hic affectus à multis caducus pulmonum nuncupatur, & est difficilis respiratio ferè semper absque febris, cum sonitu, & strepitu à cellularum pulmonis, & bronchiorum obstructione originem trahens; unde pars affecta sunt bronchia, seu asperæ arteriæ propagines, non exclusis vesiculis, & vasis sanguifluis materiam vitioso-viscidam afferentibus; Causa est materia crassa, & glutinosa, ductus, & pulmonis vesiculas obstruens; & hoc dignoscitur, ex eo quod à Famulo Ægrotantis intelligo, per tussim enim sæpè ipse Rev. Sacerdos crassam materiam excernit, & quò magis illa excernitur, tantò magis affectus imminuitur; quia verò materia vitiosa, & viscida ab humoribus circulantibus assiduè ad pulmonem defertur, atque ibi deponitur, hinc est, quod licet æger à materia stagnante exoneratus tamen Asthma continuum humorosum perseverat; Prognosis

sim quod concernit, advertendum, quòd, cùm vita, & respiratio pari passu ambulent, iste affectus asthmaticus, sit valdè periculosus, & maximè quia contumax est, & quatuor annorum soboles; ex quo dubitari potest, insignem pulmonis læsionem inductam esse; Quia verò expectoratio, & excreatio cum aliquo levamine succedit, ideò spes erit paroxysmorum ferociam mitigari posse; Timendum autem, ne sub morbi hujus contumacia Rever. noster Patiens, vel cachecticus, vel hydropicus fiat, quod tamen Deus avertat; Indicationes itaque medicæ in nostro casu erunt depurandi sanguinem à materia viscida, ac glutinosa, eamque, vel per diuresim, vel per diaphoresim educendo, & partes affectas corroborando; Pro quibus assequendis ad Medicinæ practicæ ordinarios fontes vertendum est; & primò quoad Diætam spectat, quia victus ratio constat ex rebus nonnaturalibus; ideò primò aër sit moderatus, serenus, siccus, non tamen æstuans, è contrà frigus vitetur, ex hoc enim humores faciliter conspissantur; Cibus sit attenuans, ne materia crassescat, isque condiiatur herbis aromaticis, pectoralibus, *hyssopo* scilicet, *fœniculo*, *Salvia*, &c. Abstineat à Caseo, carne suilla, à leguminibus, omnibusque illis, quæ crassum, lentumque succum generant; Vinum sit tenue, ac variis herbis pectoralibus medicatum; Somnus sit moderatus, nec sit diurnus; Alvus quotidie servetur lubrica, & sicuti ira, & mœror lædere possunt, ita Gaudium conducit; A pharmaceutico fonte duo remediorum genera desumi possunt, unum in paroxysmo, alterum extrà paroxysmum; quoad primum *Syrupum de Tabaco* & *de Erysimò* commendo, una cum *balsamo Sulphuris*, & *spermate ceti*; ad secundum verò primò oportet blandè alvum sollicitare modico *Cassia* cum *pulvere Cremoris tartari*, vel *oleo recenti amygdalarum dulcium*, indè exhiberem ad plures dies *Serum Caprinum* depuratum, postea *lac asininum* cum saccharo fino, more consueto per xx. faltem dies; Commendabilis etiam est usus *Syrupi de Helenio Horatii Augenii*, cujus formulam habet *Dolaus in Encyclopedia med. pract.*, sicuti pilularum sequentium, id est; *℞. Pulveris Millepedum præparatorum*, 3. ij., *Florum benzoini*, *Salis succini*, ana, ʒ. ij., *Extracti Helenij*, *Castorei*, ana, ʒ. sem., *croci* ʒ. j. *Therebinthinæ*, q. s. misce, fiant S. A. pilulæ parvæ quarum assumat Æger quatuor omni vespere; *Gummi Ammoniacum* tanquam egre-

egregium expectorans, ac incidens commendatur ab *Ettmullero*; *Flores sulphuris* extrà paroxysmum pro pulmonum conservatione, atque si læsi fuerint, restitutione feliciter usurpari possunt, nempe *℞. Florum sulphuris, Sacchari ana, q. s.*, notandum tamen, ne nimis abutatur *Æger* noster saccharo, & saccharatis, propter facilem effervescentiam, ob quam multi exasperantur morbi, & præcipuè pectoris, viscidiora reddendo excrementa, & putrilaginem, & corruptelam pulmonis magis intendendo; Usum *pulveris Viperini*, etiam laudavit *Joh. Fortis in suis Consult.*

Deveniendum tandem ad Chirurgiam; ex qua si Paroxysmus sit talis, ut metum incutiat suffocationis, tunc statim vena secetur, ut sic circulatio in pulmonibus paulum impedita promoveatur; cæterum postea Venæ sectio per se in Asthmatis curatione methodica nullum locum habet; Quibus ritè, & ex præscripto modo observatis per divinam benedictionem salus perfecta erit speranda, quod faxit Deus &c.

CONSULTATIO VII.

De Melancholia Hypochondriaca.

AD EXCELLENTISSIMUM DOMINUM

ANTONIUM FRAN. BOTTICINUM

Medicum Præstantissimum.

MEdicos in decernenda ægritudinis Honesti Civis nostri Ferrariensis sede, discrepantes habuisse sententias mirari non oportet, quia, *Hippocrate* teste, in morbis internis si Medici decipiuntur, sunt excusandi, quemadmodum postea nculpandisunt, ait *Mercurialis*, si in externis, & sensibus ipsis subjectis morbis, hallucinentur; Nos tamen sensum nostrum super hoc casu breviter exponemus.

Honestus Vir annorum ætatis 47. variis obstructionibus, & præcipuè Lienis, affectus, post cibi assumptionem, anxietates in præcordiis sentit; profundis, ac assiduis cogitationibus deti-

detinetur, ità ut ad interrogationes aliquandò non respondeat; hypochondriorum adsunt tensiones, ac tandem imaginatur multos habere morbos, quos realiter non habet; Ex quibus colligitur præsentem Ægrum melancholia hypochondriaca affectum esse; hoc est Delirio sinè febre; Hujus morbi generatio obscurissima est, quoniam Natura in cerebro phantasiæ actus exercet, & aliorum sensuum interiorum modo adhuc ignoto, & difficili explicatu; ut ingenuè fatetur *Clariss. Malpighius in suis Consil. à præstantiss. D. Gaspari evulgatis pag. mihi 45.* Nonnulli putant Stomachum affici, alii Mesenterium, Pancreas, & Lienem accusant; certum tamen est, ex sectione Cadaverum hypochondriaca affectione denatorum, modò observata fuisse vitia in Ventriculo, modò in Mesenterio, nunc in Omento, nunc in Liene, modò in aliis visceribus; Ego pro se de istius morbi agnosco, globosam partem cerebri, in qua functiones non ritè peraguntur; utpotè quia cerebro subministratur sanguis infectus, ex eo quod ratione obstructionum, nec sufficienter filtrari, nec fermentari potest, undè acidior factus, vitiatum succus nerveus, qui à corticalibus glandulis perpetuò separatur, & acidis salibus imbutus, non omnimoda pollet volatilitate, undè mens angitur, & specie timoris torquetur; Hypochondriorum adsunt in nostro casu tensiones, quia segniùs cruor movetur per vasa infimi ventris, undè retardato motu extenduntur membranæ, & in nimia illa extensione, particulæ illæ, quæ debent egredi per insensibilem transpirationem retinentur in musculorum poris, abdominis, & intestinorum, unde flatus excitantur. Quoad Prognosim, dico hunc affectum chronicum esse, & curatu difficillimum, & meritò dici Medicorum flagellum, ac opprobrium, cùm plura, immò & generosa eludat remedia; interdum iste affectus in maniam transit; Indicationes sunt depurare humores à salibus acidis, tollere vitium in Cerebro, obstructiones in Liene, Mesenterio, &c., tandemque viscera ipsa corroborare; quæ ut peragantur primò ad Pharmaciam deveniendum est, & alvus est lubricanda lenienti remedio; cavendum tamen à catharticis, nam hæc majorem excitabunt confluxum ad partes affectas, & quia noster Hypochondriacus est Flatulentus, ideò admodum conducere posse enemata puto; Usus succorum depuratorum *fumariæ, borraginis, & Cichorei*, per plures dies laudo, quibus

bus succi addi potest *tinctura chalybis*; Deinde bonum erit uti *sero caprino* cum *slibio diaphoretico*; quin & *lactis asinini* usum præscribit *Clariss. Malpighius*; *Pulverem oculorum Cancri*, præparatorum, & *rasura eboris* egregii sunt usus. *Rotulas Diarrhodon Abbatis* non improbarem, & *essentiam Croci*, teste *Clariss. Zannichello*. Ex Chirurgia sanguis mittatur per hæmorrhoidales venas ope hirudinum, atque nihil aliud ab hac Medicinæ parte sumatur, quia sperandum est, teste *Clariss. Joh. Forti*, talem morbum medicamentis sine ferro, & igne magna parte cessurum; Interim victus ratio non sit rigida, sed moderata; Vinum alteretur infuso *Chalybe*, *croco* cibus condia-
tur; Potus *Caffè*, & *Thee* utilis erit; Abstinendum à carne suilla, le-
poris, avium aquaticarum, ac cibus ex pasta paratis, à Legumini-
bus præter *Hordeum*, & *Oryzam*; Somnus maximè nocturnus val-
dè proderit; sicut exercitium moderatum ante cibum; Animi pas-
siones, tanquam saluti oppositæ, juxtà *Clariss. Terenzonum de Valet.*
tuenda exercit. 8. vitandæ, & gaudio, atque hilaritati studendum;
Ipiritus enim tristis exsiccat ossa; Pauca autem hæc dicebam pro
confirmatione eorum, quæ à Doctissimis Viris proposita fuere, quo-
rum judicio libens me subjicio; Faxit Deus, &c.

CONSULTATIO VIII.

De Sputo Sanguinis, &c.

AD EXCELLENTISSIMUM DOMINUM

JO. DOMINIC. BENETTUM

Medicum Præstantissimum.

Qui historiam medicam, super qua consilium meum, etsi par-
vi pendendum, mihi tulit, Sacerdos quidam venerabilis fuit,
ex illustri Jesuitarum Collegio satis eruditus, & summa
bonitate præditus, quales solent esse omnes alii illius Illustrissimæ
Religionis, à me perpetuò venerandæ, atque vero amore jugiter
prosequendæ. Historia Affectionis talis est.

Civis

Civis cujusdam Nobilis Filius annorum ætatis 21. post nimiam incalescentiam, atque violentum exercitium in venatione incidit in sputum sanguinis spumosi cum tussi, præcedente titillatione, & pruritu in aspera arteria, & præsertim in ejus principio; variis tentatis remediis convaluisset videbatur, sed falsò, tres enim post menses iterum tussis invaluit, & Hæmoptoe recrudit; ita ut cum quadam violentia ultimo loco sanguinem vividum, floridum, ac spumosum ad pondus ferè unius libræ excreverit; ita quod vomere videretur; nunc remedia quærit non tantum pro præsentis curatione, quam pro præservatione; super quam historiam Juvenis præsentis Hæmoptoici sic consulo.

Graviores inter pectoris affectionis sanè, & omnibus annuentibus Practicis, est sputum sanguinis; potest verò hic tripliciter à pulmone exire, per anastomosim videlicet, id est per osculi vasis aperitionem; vel per diapedesim, nempe per transsudationem, vel per Diæresim, hoc est per rupturam vasorum, quam ultimam timeo accidisse in nostro casu; qui est rejectio cruoris per os cum tussi, sine inflammatione, à vasorum pulmonalium ruptura ortum habens; Pars affecta propriè est Pulmo, ejusque vasa, membranæ, & vesiculæ; Causa est sanguinis acrimonia, undè particulæ acres suis cuspidibus feriunt, ac erodunt partes supradictas, atque continuum solvendo, sputum Sanguinis excitant; Consultationis methodus nunc postulat, ut ad Prognostica calamum vertam, & quid de Ægri nostri salute sperandum sit candidè fatear; idcirco primò cum *Hippocrate* dico, quamcunque sanguinis supernam ejectionem malam esse, à disrupto enim pulmone suppuratio, & tabes timendæ sunt; à sanguinis enim sputo puris sputum, à puris sputo Phthisis, sunt verba magni nostri Præceptoris; quia verò in juvene præsens affectio est divite, atque præcepta medica summa obedientia recipiente; sperandum, ut assumptis ab Arte præscriptis remediis salutem recuperet, ut ex corde voveo; Indicationes ergò curativæ sunt dulcificare massam cruoris, & aperturam pulmonis claudere, atque consolidare; Quibus ut satisfaciamus; ad tria medicinæ lumina vertendum, nempe ad Chirurgiam, Pharmaciam, & Diætam; & quoad primam; injecto prius clystere, vena cubiti dextri aperiatur, & si

cruor in magna copia, & quantitate exiret, venam etiam pedis erit secanda, Ex Pharmacia sumatur *succus Urticæ*, cum *pilulis ad Hæmoptoem D. Helvetii*, quibus sæpe feliciter utor in Praxi facienda hic Ferrariæ pro sanguinis quibuscumque effusionibus; Decoctiones insuper conducunt *Plantaginis*, *Malvæ*, *Cichorei*, *Borraginis*, cum pulvere oculorum Cancri præparatorum ad plures dies; postea ad usum lactis asinini cum saccharo more solito confugiendum est, & hoc per 40. dies; vespere autem utatur *conserva Rosarum*, ex cuius frequenti usu aliquos etiam Phthisicos sanatos esse nonnulli Aucthores perhibent; Tempore vero, quo lac assumet, abstineat à vino, & ejus loco poterit aquam hordei, & *emulsiones quatuor seminum frigidorum majorum*, & loco cœnæ sumat ptisanam hordeaceam; *Esus testudinum, ranarum*, atque *cancrorum fluviatilium* utilis erit, Carnes sint elixæ, & facilis coctionis; abstinendo ab acidis, falsis, ac austeris tanquam à cane, & ab angue; & hæc sunt quæ à Diætâ præscribi possunt; Somnus, & Vigiliæ non excedant limites mediocritatis, & ab ira, aliisque animi vehementioribus affectibus, abstineat Aeger, ut optatam recuperet salutem. Faxit Deus. &c.

CONSULTATIO IX.

De Pleuritide.

AD EXCELLENTISSIMUM DOMINUM

N I C O L A U M B E L L A J A M

Medicum Præstantissimum.

HOnestus Mercator annorum ætatis 40. Mense Februario, aëre inclementiore, & frigidioris existente, per diem perfonatus incedit, atque Bacchanalia celebrat, domum reversus defatigatus assumit haustum magnum vini generosi, ad sitim, qua torquebatur, tollendam, & ut dicebat, ad vires reficiendas; Hinc paucis elapsis horis, horror totum ejus corpus invadit, cubile

petit, obdormit spatio duarum horarum, expergefactus sentit dolorem, sed obscurum sub mamma dextra, inde corripitur febre, cum dolore, & rigore, dolor augetur cum tussi sicca, & cum spirandi difficultate, pulsus est durus, & frequens, urina turbata, tandem expuit sanguinem in modica tamen quantitate; Auxilium petit ab Arte nostra.

Ex signis in historia enarratis, colligitur nostrum Aegrum vexari Pleuritide, cujus pars affecta est pleura membrana scilicet, quæ costas internè vestit; unà cum dextra pulmonis parte; certum enim est in quavis pleuritide pulmonis partem inflammari, sicuti in Peripneumonia ambo latera pulmonis inflammatione corripuntur, & hoc Hippocrates docet de loc. in homin., sicuti Erophilus, Bonetus, Dolæus, Celsus, Platerus, & alii tam antiqui, quàm recentes Medicinæ Magistri; cum enim substantia pulmonum sit valdè apta ad inflammationem, quia mollis, spongiosa, rara, & porosa, hinc est quod faciliè obstrui potest indequè erysipelatosa inflammationes oriuntur; quæ originem habent à sanguine crasso, & lentefcente vitio aciditatis contractæ, à qua coagulatio dependet; & cum fixatæ in pleura particulæ acres evadant, ideò dolor insurgit pungitivus; particularum enim acrium cuspides feriendo pleuram sensu exquisito præditam, solutionem continui inducunt, undè acutus dolor invadit; causæ verò remotiores sunt in nostro casu, insensibilis transpiratio impedita, exercitia vehementiora in solemnibus Bacchanalium habita, quatenus ista fermentant magis cruorem, undè hic impetuosior redditus per arterias, & venas fertur, indequè faciliùs extra vasa effluere potest, imprimis si subitò in suo motu impediatur, & in pleura, & pulmone sistatur, tunc enim vasa nimium distenduntur, atquè inde faciliter rumpuntur; ex acredine verò illarum particularum irritante, tussis sicca primò oritur; Visis causis, nunc ad Prognosim veniemus; Pleuritis igitur cum sit morbus acutus semper est timenda; morborum enim acutorum, juxta Hippocratem, incertæ sunt prænunciationes Salutis, aut Mortis; Si pulsus sit parvus, & creber atque serratus nunquam periculo carere ægrum, ait Jungken in sua Praxi; si sputum appareat ante quartam, & sit album, leve, & æquale, septima die terminabitur morbus; Urina

est inspicienda, & si sit mala cum sedimento copioso, sputis tamen bonis, rem salvam esse docuit *Waldschmidius*, cum citato *Jungkenio in sua Praxi*. Indicationes curativæ erunt, coagulationem in parte particulari auferre, sanguinem ab aciditate coagulante liberare, dolorem lenire, atque vires conservare; Quibus ut satisfiat; ad Chirurgiam primò recurrendum, & ab ista primò præmisso Clysterè, sanguinem mittere è vena brachii dextri opus erit, ipsamque operationem repetere tanquàm necessariam, & summè proficuam, ut monet *Clariss. Barthol. Corte pro Venæ Sectione*; Ex pharmacacia desumantur pulveres dentis apri præparati, sanguinis hirci præparati, mandibulæ *Lucii piscis*, oculorum *Cancris præparatorum* cum aqua *Papaveris erratici*, *Graminis*, *Endiviæ*, & *Hordæi*; Utiles erunt medicinæ diureticiæ, & sudorifica mitiora omnem absolvere paginam inquit *Waldschmidius in Monit. medic.* diaphoresim enim juvare ait *Clariss. Pascolus in observ. medic.*; sicuti Opiatis, ceteris infidis remediis hîc non admodum fido. Electuarium pectorale, Syrupum de *Ibisco*, de *hyssopo*, *Jujubinum* commendarem; externe *Oleum nostrum de cucurbita antipleuriticum* semper adhibeo non sine juvamento; Purgare autem in tali casu esset eum magno exponere vitæ periculo; Quoad Diætam verò, notandum eam tenuem esse debere; Vinum omnino vitetur, & huc facit illud observatum *Brasavoli incliti Medici nostri Ferrariensis comm. in lib. I. Hipocratis de rat. vict. in acut.* præsentissimum esse venenum in laterali morbo, vinum præsertim in principio. Pro potu igitur sit decoctum *Hordei*, & aqua pectoralis nostra; & hîc pariter advertendum nihil nocentius in Pleuritide esse, & quod malum magis exasperare soleat, quàm potus frigidus; tepida ergò debet esse portio; Si adsint vigiliæ urgentes, emulsiones papaveraceæ non erunt absque effectu; Quoad excreta, & retenta melius est alvum suppressam habere, quàm laxam, cum ex *Hippocratis* sententia purgantia noceant, quod etiam docuit *Clariss. Dolæus*. Sed jam tempus est, ut vela contraham, & de hac Pleuritide satis, superque; Deum itaque O. M. deprecor, ut salutem optatam Mercatori nostro restituat.

CONSULTATIO X.

De Cordis palpitatione frequenti.

AD EXCELLENTISSIMUM DOMINUM

JACOBUM CICOGNINUM

Medicum Præstantissimum.

EXactissima, & Eruditissima morbi nobilissimæ Matronæ à Te (Vir Excellentissime) ad nos missa historia, demonstrat nostram Ægram vexari cordis palpitatione; Hæc enim, ut colligo, est nobilis mulier vidua annorum 39. quæ post vehementes animi passionēs, post Mariti mortem, sæpius immani, ac frequenti palpitatione cordis corripitur, summa cum anxietate, & animi deliquio; deficit autem in mensium fluxu; nunc scire desiderat à me, quæ hujus morbi sit causa, & quomodò sanari possit; circa quod breviter respondeo, istam nobilissimam Viduam affici cordis palpitatione, quæ definitur à Doctoribus inordinatus, ac convulsivus cordis motus, sive concussio, cujus causa est quidquid musculos cordis, aut nervos moventes irritare potest; & in nostro casu hæc irritatio fit à particulis salino-acribus in sanguine existentibus, quæ per arterias coronarias deponuntur in parenchyma Cordis; per intervalla verò malum urget, quia sanguis non semper eodem modo dispositus existit; vitium autem sanguinis hoc dependet à catameniorum defectu; Quoad Prognosim attinet; pro affectione periculosa palpitationem cordis agnoscit *Waldschmidtus*, quia dicit ille, æger suffocatione facile extingui potest; Quia verò levior est, & à mensium defectu eam oriri putamus, ideò major salutis spes effulget; Palpitatio verò frequens, & magna mortalis est, suadente *Illustriss. D. Lancisio de subit. mortib.*; Indicationes considerandæ nunc sunt, ad hoc, ut curationem istius affectus assequamur, istæ verò sunt, meo videri, Sanguinem à particulis acribus liberare, menstrualem purgationem stimulare, obstructions leves in vasis uteri tollere,

lere, & partes affectas corroborare. Quibus, ut satisfaciamus, in primis laudo omnia remedia ab Excellent. D. Medico Curante adhibita; indè, ut salutem optatam acquiramus, ad Chirurgiam, Pharmaciam, & Diætam, tanquam ad remèdiorum fontes devenio, & primò quoad Chirurgiam; in ipso Paroxyfmo venam secare licet, sed vide ne excedas in quanto, ut monet *Waldschmidtus*; extra paroxyfsum etiam juvabit, quatenus à vena pedis eductus mensium fluxum promovet, à Chirurgia verò nullum aliud præsidium capere posse ægram nostram cogito; Ex Pharmacia in Paroxyfmo exhiberi poterit sequens remedium. R. Aquæ Epilepticæ Langii, hystericæ Quercetani ana, ʒ. j. sem. Melissæ, unc. ij. spiritus Cornu Cervi, ʒ. j. Sacchari perlati, ʒ. iij. Misce. In hoc negotio opiata optima esse aiunt multi, quod ego non semel expertus fui; A Purgantibus fortioribus abstinendum, Usus seri lactis, indè *Decocti Radicis Chinæ, Salsæparillæ, Santali* ego comendarem; sub vespere etiam *Conserva Betonicæ, Florum Tunicæ, Borraginis* exhibeatur; Aperitiva etiam, quatenus aperient vias uteri commodè administranda erunt, atque externè applicetur Theriaca cum vino, & croco, quod remedium commendat *Wolfgangus Hoeserus*, & post eum *Burnetus*. Diætâ constet ex cibis laudabilis succi; Juscula sint medicata radicibus asparagi, fœniculi, & petroselini; Vinum pariter medicatum sit ligno sassafras; Alacri animo vivat, & salutem speret à Domino, ut enixè precor.

CONSULTATIO XI.

De Mania

AD EXCELLENTISSIMUM DOMINUM

DOMINICUM MAZZARELLUM

Medicum Doctissimum.

S Ummus ille Philosophus Plato in Charmidis initio sub persona Socratis dicere solebat omnes morbos, qui in hominibus

nibus generantur, ab animo originem ducere; Quod manifestum est ex Historia sequenti, super quam consilium medicum petitur.

Juvencula Annorum 20. ingeniosa valdè, ac non deformis speciei, Adolescentis cujusdam amore capta, correctiones frequentes matris ægrè ferens, incidit in obstructiones, undè immixta fuit mensium fluxio, & pallidus color apparuit; successit hysterica passio, à qua malè vexata est; post hanc vigilias patitur, modò cogitabunda, & taciturna, modò nimis hilaris, & incomptè loquax, ad insaniam redacta est sine febre; auxilium implorat.

Delirio Maniaco Adolescentulam præsentem affici manifestum est, quod definitur crudelis animæ passio cum actionum ejus plurium, vel sensuum omnium perturbatione, præprimis delirio, cum audacia, & furore absque febre, à texturæ pororum cerebri, & ejus vasorum inversione, & circulantium humorum acrimonia ignea dependens; Pars affecta est Cerebrum cum suis incolis tum passivis, tum activis. Causa est perturbatio texturæ pororum cerebri, & ejus vasorum, nec non spiritûs animalis, quæ omnia dependent à vitio sanguinis acrioris redditu à mensium fluxione imminuta, à passionibus animi, &c. cum enim spirituum animalium motus, & generatio consistat in blanda sanguinis fermentatione, & dulci crasi, nec non apta pororum, & vasorum cerebri configuratione, hinc est, quod illis vitiatis, pariter operationes animæ in cerebro vitiantur, undè delirium sequitur. Prognoseos ratione notetur, quod Mania rarò est lethalis, etsi curatu sit admodum difficilis, maximè quando jam altas egerit radices; benè autem sperandum in nostro casu, nam nostra patiens Juvenis est, nec in morbo adulta; Si præsens delirium somnus sedaverit, juxta *Hippocratem Sect. 2. aphor. 2.* bonum erit, quin, & bonum etiam, si cum risu sit præsens insania; si verò ad suum statum naturalem fluxio menstruorum restituatur, tunc spes erit salutis; quàm ut celeriter, & perfectè assequamur, primò indicationes veniunt examinandæ; indè curatio instituenda; Primaria igitur indicatio medica, videtur esse restitutio, & correctio sanguinis, ità ut ad naturalem statum reducetur, ut tùm exindè laudabilis fiat succus nerveus, & spiritûs animalis motus, ex quo rectæ mentis operationes dependent; indè corrigere oportet vasa, ac porositates ip-

Josephi Lanzoni Opera. Tom. II. D. fius

sius cerebri, ipsumque corroborare; Quibus ut satisfiat, primò ad Chirurgiam deveniendum, ex qua sanguinis missio est petenda, & repetenda, à venis brachii, pedis, atque jugularibus. Hirudines, & cucurbitulæ scarificatæ applicandæ, & tonsura capillorum commendatur à *Joh. Forti in suis consult. cent. 1.* cauterium futuræ coronali applicatum maximè probatur à *Gordonio*, immò ego commendarem ipsam arteriotomiam; à Chirurgia gradum faciamus ad Pharmaciam; Ex qua Tincturam florum hyperici, suadente *Raio*, usurpandam suadeo, sicuti emetica ex *antimonio*, atque cathartica, & medicamenta ex *Helleboro* confecta, unà cum *opiatis* commendarem; si somnus enim delirium sedaret bonum esset, uti suprà ex *Hippocrate* innui; A *Thoma Bartholino*, & *Clariss. D. Luca Tozzio* Amico meo semper recolendo in sua Praxi proponitur sequens Pulvis, & Pulveris Gentianæ, 3. j. Myrrhæ, tantundem, pulveris cancerorum fluviatilium ustorum, duplum. Misce pro duabus dosibus; Balnea aquæ tepidæ frequenter, & post singulas purgationes usurpanda sunt; & memini de quodam Cive nostro Maniaco, qui post purgationem, usu Balnei aquæ currentis nostri Eridani sanatus fuit; Diætetica cura nunc sequitur, unde ci- bus sit refrigerans, & humectans, & juscula refrigerantibus her- bis sint medicata; Vinum perpetuo exulet, juxta illud *Poe- tæ*.

Vina gravant animos, faciuntque furoribus aptos.
& hujus loco aqua hordei bibenda; Hic autem noto, *Clariss. Do- laum decoctum hirundinum cum lapide prunellæ* sua experientia com- probare; immò pro potu ordinario serum lactis convenire, mo- net *Waldschmidius*. Quæ in præsentí affectione sufficiant. Faxit Deus, &c.

CONSULTATIO XII.

De Nausea, & Vomitu.

AD EXCELLENTISSIMUM DOMINUM

JOS. FLOR. VACCARIUM GIOIAM

Medicum Eruditissimum.

EX litteris Excellentissimi Medici ordinarii accepi, Illustrum nostrum Juvenem, à longo tempore nausea, & vomitu laborare multis incassum exhibitis remediis, quare à me consilium petit.

Ventriculus recipiendis, retinendisque alimentis a Natura destinatus, aliquandò si gravetur, vel a noxiis humoribus irritetur, nausea primum, mox vomitu afficitur; qui nihil aliud est, quàm ventriculi, atque in specie fundi ejus, & pylori, versus superius orificium contractivus, aut convulsivus fibrarum motus, contenta quævis per superiora rejiciens, cujus levior species est nausea; subjectum ventriculus est cum suis fibrillis nerveis; Causa verò istius affectionis consistere videtur in particulis viscosis, & acribus, vel in ventriculo ipso detentis, vel per arterias in ipsum delatis, quæ suis irritantibus acuminibus fibras Ventriculi pungendo nauseam primò, inde vomitum excitant; probabile enim est, inquinamenta primæ coctionis in hoc Juvene membranas ventriculi amplexantia convulsionem in ventriculo excitare, unde vomitus accidit; Accedamus nunc ad signa prognostica; & primò timendum, ne in Hecticam incidat, ut monuit *Dolæus*, ulterius vomitus contumacia semper mala solet esse, quia laborat pars quædam nobilis, & cessante actione Ventriculi tota destruitur animalis OEconomia; Indicationes curativæ sunt in nostro casu, tollere irritationem, & convulsionem Ventriculi, hebetando cuspides particularum irritantium, illasque evacuando, & demum corroborare oportet fibras Ventriculi ipsius;

Quæ ut assequantur ad tria Medicinæ Brachia deveniendum, nempe ad Pharmaciam, Chirurgiam, ac Diætam, quibus mediantibus salus sperari potest; & quoad Pharmaciam laudo frequentem usum *olei amygdalarum dulcium* signe igne extracti, ut & *seri caprini colati* longo tempore usurpati, cum *Gelatina Corvi Cervi*, tandem cum *Clariss. Malpighio lac asininum* propono, quo irritatio demulceri potest, & si quid exulceratum esset potest detergi, ac consolidari; Commendarem præterea *Specificum stomachicum Poterii*, *Salem Absinthii*, *Aquam Menthæ*, *Laudanum opiarum* & *Syrupum de corticibus Citri*, cum *succo Cydoniorum*; Exteriùs apponatur *emplastrum de Crusta Panis*, aut *aqua rosarum* cum modico *camphoræ*, & *succo limoniorum* pro linimento; Utatur sæpè *Conservis Cydoniorum*, *Rosarum*, ac *totius Citri*, ut & *China Chinæ*, suadente *Clariss Nigrisolo* nostro, in *Feb. chin. curat.*; Ex Chirurgico fonte nihil assumerem in nostro casu; Diætata sit moderata, & fugiantur legumina, dulcia, & pingua; atque condiantur aromatibus esculenta; cum cibo conveniet *balsamum Peruvianum* & *Chocolata*; *Vinum hispanicum* in modica sumptum quantitate juvare potest, sicuti *fructus cydoniorum* cum *emulsionibus ex amygdalis dulcibus*. Pauca hæc scribebam in tali Ventriculi affectu, quæ itaque subjicio acri judicio Doctissimorum Virorum. *Faxit Deus, &c.*

CONSULTATIO XIII.

De Cardialgia.

AD EXCELLENTISSIMUM DOMINUM

DYONIS. ANDR. SANCASSANUM

Medicum Præstantissimum.

CIVIS noster Ferrariensis ætatis annorum 41. post longum iter tempore æstivo, febri corripitur cum stomachi immani dolore, erosione, & morfu, ita ut penè mori se sentiat; auxilium petit. Morbus iste Cardialgia est cum febri, quæ affectio definitur dolorifica

lorifica sensatio excitata in ventriculo à particulis acrioribus in eo contentis, orificium ejus superius convulsiva constrictione irritando, & rodendo afficientibus; Subjectum istius est propriè sensibillissimum ejus ventriculi orificium superius, non exclusis etiam reliquis ipsius visceribus partibus; dolet autem magis orificium superius, cùm longè copiosiores nervos habeat, qui per illud diffunduntur; Cardialgia verò dicitur, quia æger, ob istum dolorem animo deficit, & sudore exsolvitur, unde *Galeno Duce, Sapientiss. D. Lucas Tozzi*, hanc affectionem syncopem stomachicam appellat. Causa istius affectûs immediata est rosio orificii superioris Ventriculi, totumque nervosum genus per consensum trahens; quam causam suppeditat omne id, quod figura sua acuta, & pungente, dictum orificium ventriculi quovis modo potest lædere; Non excludit etiam *Franc. de le Boë Sylvius* halitus ascendentes ad dictam partem cùm acriores fuerint; sicut contingit porum felleum natura tam proximum Pyloro superfluitates biliofas è sua cysti deponere in duodenum intestinum, ex quo in ventriculum, ut subindè Cardialgia accidat; & similiter dicendum de succo pancreatico. Prognosis, morbum hunc periculosum pronunciat, si diutiùs duraverit, siquidem pars ista ventriculi affecta exquisito adeò sensu pollet, ut in consensum trahat utrumque principium vitæ, nempe cor, & cerebrum propter nervorum à cerebro manantium copiam, undè *Galenus* dicebat, os ventriculi in sui consensum animam ducere; immò observavit *Trallianus*, quod si humores erodentes pertinaces sint, æger brevi morietur.

Citò ergò indicationes videndæ, & his satisfaciendum est; istæ sunt, materiam acrem lædentem internè stomachum dulcificare, educere, atque omninò eliminare, ulteriùs ventriculum corroborare, ac ipsi suum naturalem tonum restituere; Quibus, ut satisfaciamus, ad tria Medicinæ brachia deveniendum, nempe ad Chirurgiam, Pharmaciam, atque Diætam, ista enim Praxeos Medicæ magna sunt lumina, sine quibus nihil; Ex Chirurgia igitur desumatur Venæ sectio non tantùm ob febrem, sed ad avertendam inflammationem, quæ de facili posset excitari à particulis erodentibus; sic apud *Hippocratem in Epid.*, Vir vehementi dolore ventriculi correptus, secta vena in utraque manu, & sanguine educto, liberatus fuit.

A Pharmacia vomitorium primò commendarem sumendum, ut monent *Guil. Fabricius Hildanus, Felix Platerus, Mart. Rulandus, Mich. Ettmullerus, Jungken*, aliique plures; Summè conferunt *Coralium rubrum præparatum Crystallus Montana præparata, Oculi Cancrorum præparati, Margaritæ præparatæ*, omniaque alkalia acredines acidas imbibentia; Opiata maximi sunt usus, clysteres proderunt, sicuti *serum depuratum, emulsiones quatuor seminum frigidorum majorum*. Externè *Emplastrum de crusta panis* laudo cum *succo agrestæ*, aceti loco paratum; Hisce remediis addatur congrua victus ratio, circa quam notat *Joh. Fortis* tardius cibum sumere esse nocuum; ideo *Celsus* cibum paucum, & sæpè exhibebat; vinum absinthites commendatur à *Jungkenio*, ut & decoctum falsæparillæ cum cinnamomo, pro potu sit ordinario; Quæ omnia D. O. M. pro votis propitia reddat.

CONSULTATIO XIV.

De Singultu.

AD EXCELLENTISSIMUM DOMINUM

BERNARDINUM GIBERTUM

Medicum Præstantissimum.

A Deò clara, & manifesta est Morbi, qui nostrum Civem torquet, Natura, ut supervacaneum omninò sit diutiùs in ea indaganda immorari; est singultus valdè frequens molestiam inferens, ac somnum impediens; quæ affectio definiri potest per motum convulsivum interpolatum diaphragmatis in consensum trahens ventriculum, & vicinas partes; undè *Dolaus* pro subiecto cognovit ventriculum secundum fibrillas suas, nervos, & tunicam cum diaphragmate communem; Causa hujus affectus provenit ab humoribus, vel vaporibus, aut copia, aut qualitate acri peccantibus, & ad membranaceum diaphragmatis centrum, vel medium penetrantibus, ipsumque pungendo, vel rodendo, vel aggravando ad convulsivum motum

motum irritantibus ; Fatetur autem ingenuè , ac candidissimè Sydenham, in obs. de morb. acut., se sibi met ipsi de singultûs causa disquirenti satisfacere non potuisse ; Hippocrates verò , eum provenire ex inanitione , vel ex repletione statuit ; Quoad prognosim attinet , notandum , quod , quia est sine febre , ideò periculo vacat , si verò cum febre jungeretur periculosus esset ; Cæterum si nostro patienti sternutatio supervenerit bonum erit , docet enim Clariss. D. Lucas Tazzi Amicus meus semper recolendus , sternutationem remedium esse singultus , concussione enim ea quæ ventriculi tunicas vellicant faciliè excutiuntur , & ablegantur ; Indicationes erunt materiam irritantem cicurare , atque educere , & ventriculo , aliisque affectis partibus robur addere ; Quæ ut fiant , ad Pharmaciam , ac Dietam deveniendum , ut sic salutem optatam Patienti nostro restituamus ; ex primo igitur remediorum Fonte , leviter purgare convenit ventriculum , & si æger non abhorreat , vomitus leviter excitandus , ut causa , si quæ esset , in stomacho educatur ; ad cujus verò correctionem non tantum oleum recens amygdalarum dulcium , emulsionès seminum quatuor frigidorum majorum , sed cremorem ptisanæ , juscula pingua , cum oculis Cancrorum præparatis commendarem ; Valdschmidius præcipitantia , Ebur , Cornu Cervi , & CrySTALLUM montanam præparatam laudat , & Clariss. Pomp. Saccus Parmensis Collegii Lumen hodiernum , mixturam Sydenham præscribit , quæ talis est. R. Aquæ Menthæ , ʒ. ij. , Theriacalis , ʒ. semis , confectionis alchermes , ʒ. j. , laudani opiat , gr. ij. , Syrupi Menthæ , ʒ. j. Misce. Extrà maximè convenit fœtus ex aceto valdè acri cum castoreo , pipere , & sinapi benè calido per spongiam ventriculi regioni applicatus monente Rod. à Fonseca ; immò Joh. Hartmannus extemporaneum pro singultu remedium esse ait thoracis compressionem ; Ex Chirurgia nihil petendum , nisi in casu timoris , ne inflammatio succederet , tunc enim Venæ sectionem instituerem in pede dextro ; Fugienda tandem sunt omnia frigida , acida , flatulenta , acria , & consequenter vinum , quod nerveis partibus est inimicum ; Pro regula enim est , vinum in omnibus morbis convulsivis non convenire ; Pro potu , itaque ordinario inservire poterit Decoctum hordei cùm tantillo Cinnamomi , vel Galangæ paratum. Victus ergo sit tenuis , optimi nutrimenti , ac facilis concoctionis.

Exerci-

Exercitium confert antè cibum, hilari sit animo, ut completam adipiscatur sanitatem, quàm à D. O. M., & nos eidem nobilissimo Civi ex corde precamur.

CONSULTATIO XV.

De Lienis Obstructione.

AD EXCELLENTISSIMUM DOMINUM

HYACINTHUM AGNELLIUM

Medicum Præstantissimum.

EE his, quæ non minùs eleganter, quàm abundè de mala nobilissimi Viri valetudine, scripsit Excellentiss. Medicus assistens, facile cognovi, præsentem affectionem esse Lienis tumorem, id est obstructionem pertinacem; quæ à pluribus annis ægrum nostrum vexat; certum enim est, licet Lien nullo præditus sit sensu, obstructionibus fieri obnoxium, nam quotiescumque cruor ab arteria derivans in cellulis splenis ipsius stagnans, amissa sua fluiditate, debita facilitate per venam splenicam non reportatur, sed remoratus distendendo membranosas cellulas, ipsius visceris molem auget, & continentia involucra tensa reddit; Lienis enim usus est sanguinem subtilizzare, cùm autem obstructus est, hoc munus exercere nequit, undè varia oriuntur incommoda; optimè siquidem dicebat *Waldschmidtus*, humorem obstruentem aliquandiù ibi delitescens, acquirere naturam fermenti, quod postea variorum morborum est author. Visis causis mox Prognosis sequatur, quapropter observandum Lienis affectiones semper esse magnificiendas; ex annosis enim splenis obstructionibus hydropes provenire posse timendum, maxime quia obstructio Hepatis ordinariò antecedit Lienis Obstructionibus, teste

teste Sapientiss. D. Joh. Baptista Bianchi Taurinensi in Hist. Hepatic.

Indicationes Medicæ sunt tollere tumorem, sanguinem volatilizare, coagulationem jam factam attenuare indèque viscus corroborare; Quæ, ut assequantur ad Chirurgiam, Pharmaciam, ac Diætam deveniendum, & primò ex Chirurgico Fonte, sanguis mittendus, & à vena brachij sinistri, & ab hæmorrhoidalibus ope hirudinum; Mox ad Pharmaciam vertendo, instituatur levis, & communis purgatio, post quam, usum *juris columbini chalybeati*, & *absinthio alterati* cum *Celebri Malpighio* proponerem, cui potioni adderem guttas aliquot *Spiritus salis ammoniaci*, insuper *pilulas ex ammoniaco aceto dissoluto* confectas ad plures dies propinarem, sicuti *antimonium diaphoreticum cum Croco martis aperitivo* per longum tempus; Externè pars affecta inungatur *oleo de Capparibus*, vel *unguento nostro de Bryonia*, & apponatur *Emplastrum de Cicuta*, juxta *D. Zannicchellum*. Circà Diætam demùm, victus ratio sit attenuans, panis benè salitus, benè fermentatus, & benè coctus; intereà infundatur Chalybs, & absinthium in Vino, quo in mensa uti debeat, immò cibaria ipsa condiri poterunt sale absinthij; Vascula sui Vini parentur ex ligno Tamarisci; Exercitium commendo, undè *Aëtius* vidisse fatetur aliquos ex solis deambulationibus, & cursibus sanatos; Alvus lubrica servetur, & hilari, ac festivo animo vivat; Quæ pauca scribebam prò confirmatione eorum, quæ à Doctiss. Viro proposita sunt pro salute nostri nobilissimi Patientis; Faxit Deus, &c.

CONSULTATIO XVI.

De Diarrhæa.

AD EXCELLENTISSIMUM DOMINUM

ANTONIUM MARIAM BONONUM

Medicum Præstantissimum.

MOrbus, qui mihi proponitur est manifestus, & Diarrhœa nuncupatur; est enim in Viro alioquin robusto, ætate media, frequens alvi dejectio non cruenta, cum siti intensa; Hæc affectio describi potest, quod sit frequens, largior, & diuturna excretio fluidorum serosorum, & biliosorum excrementorum cum utilibus permixtorum magis, vel minùs acrium, cum torminibus; cujus causam existere puto, vitiosam succorum in intestinis effervescentiam, & eorundem particularum acrium irritationem, undè oritur intestinorum stimulatio; itaque pars affecta intestina erunt, & præsertim eorundem glandulæ, atquè fibrillæ; adjuvantes verò causæ sunt errores in victu commissi, & maximè in nostro ægrotante, qui dulce vinum recens in magna quantitate potavit, comedendo etiam Uvam in copia; undè egregiè *Clariss. D. Luc. Tozzi* Amicus meus semper recolendus in sua Praxi docuit, Diarrhœam ab acribus, acidisque humoribus, dolorem simul, & irritamentum intestinis afferentibus, pendere, quorum humorum vitium pendet à cibis, & potibus corruptis; Quoad Prognosim, se primo loco sistit *Hippocrates in aphorism.*, qui ait, quod si in turbationibus alvi, quæ spontè fiunt, purgentur ea qualia oportet, conferant, & facilè etiam ferentur, & è contrà; & tendit ad salutem cùm est mitis, ut in nostro casu; undè salus citò est speranda, & maximè si mutatio excrementorum in melius vertatur; Indicationes curativæ sunt educere humores peccantes, eorumque acrimoniam temperandam, ac corrigendam esse ac intestinorum fibrillas corroborare; quæ ut assequamur, confugere oportet ad tres ordinarios Practicæ Medicinæ fontes, nempe ad Pharma-

maciam, Diætam, atquè Chirurgiam, quibus mediantibus Deo adjuvante salutem restituendum Ægrum nostrum brevi cogito fore; & quoad Diætam, Aër primò sit temperatus, cibi sint laudabilis succi, & in pauca quantitate assumantur; Carnium esus nocet alvi fluxu laborantibus, juxtà *Waldschmidium in Monit. Medic.* Potus sit *Aqua Hordei & Plantaginis & Portulacæ*, *Vinum granatorum* commendatur à *Dolæo*; Somnus erit conciliandus. Ex Chirurgiæ Venæ sectio erit sumenda, atquè in usum ducenda, dum tamen Medicus assistens cognoscat, recrementa fermentiscibilia Diarrhœam causantia à sanguine deponi in intestina, febre accedente, sin minùs verò nullum à Chirurgia sperandum auxilium; Pharmacia tandem totam remediorum implebit paginam; cavendum tamen, ne curam Stipticis inchoemus, sic enim introducuntur, ait *Waldschmidius*, contumaces viscerum, & intestinorum obstructions, quas sequitur hydrops de facili; & *Bellonius* exemplum exhibuit unius, qui ex cydoniatis in Diarrhœa principio exhibitis, illaque sic intempestivè suppressa ileon lethale passus fuit; undè tutius erit clysteribus uti ad abstergenda intestina, eaque confortanda, in quibus dissolvatur modicum *Diascordii Fracastorii*; quin & *rhabarbarum* in principio ob purgationem assumptum juvabit; indè mixturam sequentem commendatam à *Sylvio de le Boë* cochleatim exhibendam præscribere auderem. *℞.* *Diascordii Fracastorii*, 3. j. *℞.* *Confectionis de hyacintho*, 3. j., *Syrupi myrtini*, 3. j. *Aquæ Cinnamonomi*, 3. *℞.* *Plantaginis*, 3. j. *℞.* *Misce.* Post septimam, sequentes pulveres usurpare bonum erit. *℞.* *Terræ sigillatæ Magni Ducis*, *Antimonii Diaphoretici*, *Cornu Cervi usti*, *Corallii rubri præparati*, *Terræ Catechu*, *Salis Absinthii & aliorum hujusmodi*; Externè ungatur ventriculi regio oleo sequenti. *℞.* *Olei mastiches*, *menthæ*, *ana*, 3. *℞.*, *cydoniorum*, *rosacei*, *absinthii*, *ana*, 3. ij. *misce*, vel apponatur *Emplastrum de crusta panis*, & *de palmulis Galeni*. Quæ pro salute istius Viri nostri Ægrotantis sint satis, quam sanitatem D. O. M. illi elargiri dignetur, ut ex corde precor.

CONSUTATIO XVII.

De Dysenteria.

AD EXCELLENTISSIMUM DOMINUM

HYACINTHUM BELLANIUM

Medicum, & Chirurgum Præstantissimum.

Adolescens Ferrariensis ad iram pronus, æstatis tempore, fructibus, ac in specie peponibus nive refrigeratis usus, cum multa vini gelidi potatione, tandem incidit in alvi fluxum cum doloribus ventris; cruenta fit excrementorum materia cum torminibus paulò ante excernendi tempus; Pulsus evadit justo celerior, calor totius corporis acris, atque febrilis, cibi adest fastidium, sitis, anxietas, tenesmus, ac vigiliæ excruciant; Ex quibus enarratis, non est difficile judicium facere, Adolescentem hunc eo morbo conflictari, qui appellatur Dysenteria, & hæc à Medicis definitur Dejectio Alvi frequens plus minùs cruenta, ventrem magnis doloribus, & torminibus affligens, & ab intestinorum continua forti irritatione, quandoque cum exulceratione juncta, originem trahens; Subjectum ergo hujus affectus sunt intestina, tam tenuia, quàm crassa cum suis glandulis, ac vasis; Causa immediata sunt, non tantùm vasa varia intestina constituentia ad excretionem irritata, sed & ipso actu quandoque corrosa, sive ad sanguinis effusionem stimolata, & concitata; mediatam verò causam constituunt corrosivæ, acres, & acidæ particulae humorum circulantium, in intestina depositæ, sive in ipsis intestinis vitio rerum nonnaturalium enatæ, & acres factæ; & dolores in nostro casu excruciantes dependant à spasmodia fibrarum ipsorum intestinorum, propterea sanguis, qui excernitur, non ex corrosis vasis derivat, sed exprimitur ratione ejus irritationis. Febris autem oritur à vitio sanguinis ope particularum acrium, undè ejus mixtio turbatur, & pulsus celerior evadit; cibi fa-

stidium à depravato ventriculi fermento dependet; Quoad Prognosim, *Hippocrates* vocat hunc morbum magnum, periculosum, longum, laboriosum, atque lethalem; si superveniet singultus tunc malum signum erit; cùm verò simus in Adolescente, symptomata sint mitiora, ac vires consistent, spes adest salutis; Indicationes curativæ in nostro casu sunt mitigare acredinem, & eliminare particulas salium acrium, ac partes affectas roborare; Quæ ut assequantur; ad tres Medicinæ practicæ fontes deveniendum est, & primò ad Pharmaciam, ex qua *Rhabarbarum* primò ad ʒ. j. ʒ. assumatur, ac propinetur cum Decoctione *Hordei*; multi vomitorium in principio commendant, ut potè quo solo *Dysenteriam* à principio curabilem existere experimento, casu quodam facto, comprobat *Albrechtus in not. ad Chirurg. Bontekoe pag. 814.* Pulverem *Radiciſ Ipecacuanhæ* summoperè commendo, & antea commendavit *Clariss. ac Eruditiss. D. Anton. Franc. Bertinus Medicinæ Professor Florentinus omni Scientiarum genere instructus in sua Medic. defensa*; & hujus pulveris usu ego hîc *Ferrariæ* curatas vidi plures *Dysenterias*. Notandum autem cum *Sapientiss. D. Joh. Baptista Vulpino Astensi Medicinæ Practicæ maximo lumine, ac omnium virtutum genere ornato in sua Spasmologia eleganter conscripta pag. 18.* hanc radicem esse *Asaram Indorum*, quæ in pulverem redacta ad pondus drachmæ unius propinatur cum jusculo, vino, aut conserva rosarum, & hæc per vomitum, & alvi fluxum primas vias purgat, detergit, emundat, ab excrementis ibi morantibus cum salutis discrimine. Circà adstringentia, ea in principio non convenire puto, non enim relaxata, sed irritata sunt intestinalia; *Crystallum montanam præparatam, Laudanum Nepenthes Quercetani, Cornu Cervi ustum, Diascordium Fracastorii, Philonium Persicum, & Stibium Diaphoreticum* partitis vicibus, à prudentis Medici Curantis peritia exhibenda, laudo, unà cum clysteribus ex lacte chalybeato, & modico *Theriaca. Chinam Chinæ* commendat *Illustriss. D. Franciscus Tortus insignis Medicus Mutinensis in sua Therap.* Sequentem conservam ad unum cochleare vespere assumendam præscriberem. R. Conservæ rosarum antiquarum, ʒ. iiij. laudani opiat, gr. vi., Confectionis *Alchermes*, ʒ. ii., Syrupi papaveris erratici, q. s. fiat Electuarium. S. A. Externè inungatur abdominis

regio, oleo Absinthii & Rosarum, atque suprà unctionem imponatur omentum Hirci castrati, & hoc tam mane, quàm vespere exerceatur, ac usurpetur; Quod verò spectat ad Chirurgiam, nihil ab ista desumerem, sic Venæ sectio exulet, & non admittatur, nisi in casu metus inflammationis intestinorum, quam Deus avertat; Tandemquè circa victus rationem nonnulla addere oportet pro consultationis præsentis coronide. Primò igitur advertendum, quod excrementa qualibet vice sint exportanda à cubiculo, nè ab eorum halitibus foveatur morbus, & semper vas aqua frigida abluatur, & detergatur; immò postquam in latrinam projectæ sunt fæces, statim aqua pariter projiciatur, ad infringendam excrementorum malitiam; sæpè enim contagiosæ fiunt Dysenterix; Ciborum parsimoniam commendo, cibiquè sint facilis concoctionis; laudo *oryzam cum lacte, juscula carnis vervecinæ, ova recentia*; Potus sit *aqua hordei destillata, vel communis chalybeata*, addunt nonnulli *vinum granatorum*; Somnus sistit omnes fluxiones, monente *Joh. Forti in Consult. cent. 2.*, præter tamen sudorem; concilietur igitur remediis appropriatis, & præsertim *emulsionibus seminis peponum, amygdalarum dulcium recentium, & seminis papavetis albi*; Quiete tandem opus est, nec à cubili surgat, sed in eo egerat; Quæ omnia D. O. M. pro votis propitia reddat; ut cupio.

CONSULTATIO XVIII.

De Dolore Iliaco.

AD EXCELLENTISSIMUM DOMINUM

BORSUM FERRUM

Medicum Præstantissimum.

V Ir nobilis ætatis annorum 60. animi candore à Natura donatus, quod hac nostra tempestate rarissimum est, post nimium exercitium sudore madidus, sitique oppressus, aquæ glacie nimium infrigidatæ magnum calicem ebibit, indè ab ejus potu in sublimio-

mioribus intestinis dolorem sensit acutum; Domum se confert, vomit sæpè, alvus adstricta erat per quatuor dies; dolor circà umbilicum vehementior evadit, pulsus fit frequens, color totius corporis cum siti, & vigilia; tandem per vomitum stercorariam materiam emittit; nunc auxilium petit.

Ex præsentī historia facilè colligitur Ægrotum nostrum Iliaca affectione detineri, pars enim affecta in hoc morbo, est intestinum Ileum, omnium intestinorum longissimum; Definītur hic morbus, quod sit dolor acerbus tenuiorum intestinorum, cum pertinaci alvi obstructione, & fæcum per vomitum ejectione molesta; undè *Clarissimus A. Musa Brasavolus noster*, in tota sua Praxi nunquam vidisse ait, Ileum absque vomitu. Causa istius morbi est convulsio intestinorum tenuium, quæ derivat ab humoribus acerbis intra membranas intestinorum sensu exquisito donatas hærentibus, undè invertitur intestinorum motus, & convulsio excitatur non sine metu inflammationis. Prognosim quod attinet, hoc malum horrendum omninò est, & periculosum, & præcipuè in casu nostri Patientis sexagenarii. *Galenus* insuper scribit, stercora rejicere exitiale esse signum, si autem inflammatio sit facta, desperatus dicitur æger, teste *Dolæo*. Attamen quia in casibus etiam deploratis, suadente *Celso*, melius est anceps experiri remedium, quam nullum; idèo curationem tentare non incongruum erit; ad quam rectè peragendam primò erunt observandæ, & diligenter considerandæ indicationes, quæ in nostro casu, sunt inflammationem tollere, humores acres moderare, atque expellere, convulsionem sedare, ac tonum naturalem fibræ intestinorum restituere, atque intestina ipsa corroborare; Ut his igitur satisfaciamus, operæ pretium erit ad Medicos fontes recurrere, nempe ad Chirurgiam, Pharmaciam, & Diætam; & quoad primam, mittendus sanguis à brachio ad pondus unciarum decem, atquè clysteres emollientes sine sale fiant; Pharmacia dabit *oleum recentem amygdalarum dulcium* ad pondus unciarum quatuor assumendum, quod *Petrus Forestus* summopere commendat; *Epiphanius Ferdinandus Mercurium crudum* exhibet; hoc autem nonnisi cogente magna necessitate exhiberem, sicuti assumptionem *pilularum plumbearum*, quod remedii genus approbare videtur *Zacutus Lusitanus*; Profunt etiam *Elixir*

proprietas Paracelsi, Sal Absinthii cum succo Limoniorum, Laudanum opiatum, Emulsiones quatuor seminum frigidorum majorum cum Saccharo, & confectiōe de hyacintho; & alchermes; Externè fiat fomentum ventri adhibendum hujusmodi. R. Foliorum Malvæ, Altheæ, Violarum, ana, man. j. Florum Chamomillæ, Meliloti, verbasci, ana, man. semis; Seminum lini, anisorum, anethi, ana, 3. iij. Misce decoque in aqua communi, vel lacte, & fiat S. A. fomentum; Axungiam Taxi laudat Dolæus, quo totum inungatur abdomen. Circa Diætam verò, victus ratio sit tenuis, sic conveniunt Cremor hordei, juscula caponum, &c. Somnus concilietur, & quies; Pauca hæc indicabam, eaque subjiciebam libenter pro salute nobilis Patientis acri judicio Excellentissimi Domini Curantis.

CONSULTATIO XIX.

De Febre Maligna.

AD EXCELLENTISSIMUM DOMINUM
FRANCISCUM ALBINUM

Medicum Præstantissimum.

HOnestus Civis 37. annum agens negotiis multis implicitus, ventri, gulæque nimis indulgens hoc tempore æstivo, post longum iter Domum reversus, conqueritur primò de lassitudine totius corporis, mox cum exiguo horrore decubuit, cui non magnus calor febrilis successit, absque vomitu, siti, & sine ullo pravo symptomate; tertia die alvi fluxus apparet, cum pulsu languido: Urina sanorum urinis est similis, attamen adest summa virium prostratio, ut vix è cubili surgere possit, erumpunt maculæ in facie, & in brachiis, modò in sopore jacet, modò delirat; Domestici consilium poscunt.

Eodem ferè pacto, quo dantur homines maligni, qui boni specie simulantes alterum lædunt, ità febres aliquæ dantur, quæ placidam, atque mitem effingunt naturam, & tamen Patientes perdunt, & febres malignæ dicuntur, qualis est præsens nostrum ægrum infestans;

ex

ex ignis enim pathognomonicis enunciatis in historia, malignam febrem cognoscimus, & præcipuè ex alvi fluxu, nam *Galenus de præ-*
sag. ait, perpetuum esse symptoma, fluxum colliquativum febris malignæ essentialis; sicuti etiam urinam a naturalibus parum distare, ait *Joh. Fortis*, quia venenum magis urget quam putredo, quod idem esset, ac si diceretur, quod causa febris malignæ magis infensa esset spiritibus, quàm humoribus. Sedes verò hujus morbi est ipsa massa sanguinea non exemptis tùm vitalibus, tùm animalibus spiritibus; & quia ad felicem morborum curationem instituendam causarum inquisitio est maximè necessaria; ideò causam istius febris nunc est inquirenda, ut exindè curativæ indicationes habeantur; Omnes febres malignæ vel à sanguinis coagulatione, vel ab ejusdem dissolutione dependent, sicque cogito præsentem febrem à sanguinis nimia dissolutione pendere, quæ concitatur à particulis salinis, septicis, atque solventibus; ab istis enim sanguinis pars sulphurea nimium agitur, undè effervescentia, & calor insequitur, & sal volatile acre sanguinis consistentiam naturalem minuit, undè prava oriuntur symptomata, quæ malignitatem sua pernicie ostendunt, ut sunt pulsus languidus, alvi fluxio, & virium prostratio; Ad Prognosim quod concernit, quoniam febris maligna est ex classe acutorum, ideò habet locum id, quod *Hippocrates* scripsit, nempe acutorum morborum incertas esse prædictiones, adeoque febris hæc est timenda; & præstat præsagium suspendere, donec vel naturæ, vel morbi victoriæ indicia certa se obtulerint; advertendum tamen, quod si superveniat Singultus, & æger floccos carpere incipiat, tunc erit lethale signum; quemadmodum sæpè observavi in praxi facienda spatio triginta annorum. Indicationes curativæ sunt salia solventia tollere, massam cruoris ad statum naturalem reducere, atque spiritus, tùm vitales, tùm animales restaurare; Quibus indicationibus, ut satisfaciamus, primò ad Pharmaciam est confugiendum, & Clystere imposito ad alexipharmaca deveniendum ut v. g. ad usum *Aquæ cordialis Saxonæ*, *Scorzoneræ*, *Melissæ*, & *Cardui Sancti* cum pulvere oculorum *Cancrorum præparatorum*, *Cornu Cervi philosophicè præparato*, *Margaritis præparatis*, & lapide *Bezaar. occidentalis*; Profunt etiam *Gelatina Cornu Cervi*, *Confectio Alchermes*, *Juli Gemmarum*, *Diascordium Fracastorij*, *Terra sigillata*, & *Spiritus Vitrioli*; cum *Stibio diaphoretico*, & *nix Ferri*,

Josephi Lanzoni Opera. Tom. II. E juxta

juxta *Præstantiss. Zannicchellium*; Ad Chirurgiam quod attinet, frictions, atque cucurbitulæ leviter scarificatæ conveniunt, ad sudorem concitandum, & ab intrâ ad extrâ, id est, ad corporis ambitum causam morbi evocandam; sudorem enim laudat *Clariss. Antonius Stolfinus Medicus Mantuanus*; Quia verò adest alvi fluxus, committatur Venæ sectio, ait enim *Waldschmidtus in suis monitis*: Præfente Diarrhœa nunquàm V. S. tentandam esse; immò sum in voto in malignis febribus, & potissimum in illis à sanguinis dissolutione pendentibus sanguinem mittere nocuum esse, quia salia corrosiva dominantur, & vires sunt debiles, ut quoque docet *Præstantiss. D. Joan. Simbenius in Exercit.* De Vesicatoriis nihil. Diæta tandem sit tenuis, & juscula carnis pullorum sint alterata cum radice *Scorzoneræ*, & *Cornu Cervi* limato; Pro potu utatur æger *Decocto Scorzoneræ*, & *Sero Vaccino destillato*, nec non *Aqua hordei*, modicum vini concedatur tanquam cordiale; Somnus, atque vigilia debitam servant alternationem; & si vigilia nimia sit, somnus arte concilietur ope laudani opiatî ad gr. ij. cum conservæ violarum q. s. ad conficiendum bolum parvum; Excreta verò, & retenta in statu naturali sunt conservanda; Quæ ad Ægroti nostri salutem dicta sufficiant.

CONSULTATIO XX.

De Febre Hectica.

AD EXCELLENTISSIMUM DOMINUM
DOMINIC. ANTON. TRAVINUM

Medicum Eruditissimum.

N Obilissimus Adolescens ætatis annorum 18. ad iram pronus, & facilis ad sudorem, post præcedentes æstivo tempore multas corporis defatigationes, & præsertim in venatione, incidit in tussim molestant, cui successit Febris tertiana duplex.

plex cum valido capitis, dorſique dolore; variis ex arte adhibitis remediis die morbi undecima melius ſe habere incepit, aſt febricula oborta eſt parva, cum tuſſi poſt cibum, & maximè nocturnis horis; Somni ſunt breves, lotia clara, & fæces duriores; nunc auxilium petit.

Ex qua hiſtoria, atque ſignis apertè colligitur, Ægrum noſtrum febris hectica incipiente laborare; cujus ſedem juxta Veteres, eſſe partes ſolidas volunt multi, quia conſumptio, & emaciation in illis ſolidis, & maximè carnoſis partibus evidenter apparet, cùm tamen non minùs indiſpoſitio ſanguineæ maſſæ inhæreat, in qua latex baſſamicus deperditur, undè ſanguis acrem, & fermentativam indolem acquirit, & hinc Febris hectica oritur. Sic ergo in maſſa ſanguinea, & lymphæ latere cauſam hujus affectionis non dubitamus; Cauſa verò febris hecticæ nihi aliud eſt, quam dyſcrasia ſanguinis acris, & inepti ad nutritionem, quatenùs caret moleculis baſſamicis aptis ad nutriendum, non ſinè obſtructione vaſorum lacteorum in meſenterio; ſit autem incaleſcentia poſt cibum, quia aliqua pars Chyli vitioſi, tunc ſanguini admiſcetur; & tuſſis ad acres particulas refertur; Febris hæc eventum habet dubium, & quando eſt confirmata, & ut dicunt Doctores, in tertio gradu, tunc eſt inſanabilis: verùm quia in noſtro Patientè eſt incipiens, ideò curari faciliter poſſe affirmo; Quod ut aſſequatur, ad ordinarios Practicæ Medicinæ Fontes deveniendum eſt ſatiſfaciendo indicationibus, quæ ſunt, ſanguinem edulcorare, aptumquè reddere ad nutritionem, & vaſa lactea obſtructa reſerare; Ideò relictæ Chirurgia tanquam in noſtro caſu inutili, ac vana, teſte doctiſſimo *Ferrario in ſuis Reſponſ. ad Pharmaciam* gradum faciamus; Commendam ergò uſum oculorum *Cancri præparatorum, Margaritarum præparatarum, Antihectici Poterii, & Gelatinæ Cornu Cervi cum Conſerva roſarum recentium*, cujus tantummodò uſu hecticos ſanatos referunt Authores qui de Praxi ſcripſere; Poſteà ad lac confugiendum *Aſirinum*, ad xxx. dies aſſumendum cùm modico ſacchari fini pulveriſati, quavis mane jejuno ſtomacho ad pondus unciarum ſeptem; Horis autem poſtmeridianis conveniet Balneum aquæ dulcis; cathartica verò fugienda ſunt: cane pejus, & angue; Circa Diætam demùm, alimenta ſint boni ſucci, & cruorem edulcorantia, ut *juscula Caponum, Vituli cum*

hordeo mundato ; Carnes pariter Vituli, Caponis, Testudinis, Cancros fluviatiles laudo ; Pro potu sit decoctum hordei cum radice Chinae, & passulis, cum emulsionibus quatuor seminum majorum frigidorum, Animus sit tranquillus, & lætus, ex mœrore enim, & tristitia sæpiùs hecticam febrem productam se vidisse fatetur Joh. Dolæus in sua *Encyclopædia Medica* lib. 4. cap. 4. sicque Deo favente noster adolescens sanitatem recuperabit, ut spero, & ex corde precor.

FINIS.



JOSEPHI

JOSEPHI LANZONI

Philosophiæ & Medicinæ Doctoris Ferrariensis, in Patria Univerſitate Lectoris Primarii, ac S. R. I. Academiæ Cæſareo-Leopoldino-Carolinæ Naturæ Curioſorum Socii, &c.

CONSULTATIONES MEDICINALES

Nunc primùm in lucem editæ



L A U S A N N Æ,
Sumptibus MARCI-MICHAELIS BOUSQUET ET SOCIOR.

M D C C X X V I I I.

THE LANCET

Published weekly, except on Sundays and Public Holidays, at No. 11, Abchurch Lane, London, E.C. 4.

CONSULTATIONS MEDICAL

For the purpose of consulting with the Medical Staff of the Hospital, the following cases are selected for discussion.



Printed and Published by J. & J. A. Smith, 11, Abchurch Lane, London, E.C. 4.



CONSULTATIO XXI.

DE HEMITRITÆO.

N

Obilissimus Patiens ætatis annorum LXIX. boni corporis habitûs, frequenter Arthriticis doloribus obnoxius, vivacissimi Spiritûs, ac promptissimæ concoc-tionis, hilaris, lætus, ad iram pronus, sed de facili remissibilis, post urinæ supressionem periculosam è qua difficulter evasit, & non omninò sanus surrexit, licèt Medicus sanum esse promitteret, brevi duorum mensium spatio in fe-brem incidit cum totali virium prostratione, siti intensa, ac æs-tuatione, & respiratione magna, & frequenti; quæ febris cum horrore ac frigore incepit, & ad statum usque inæqualiter perse-veravit, ita ut modò in summo esse, modò retardari sit visa: calor in statu acris, & mordax, & paulò post vaporosus, & hu-midus, atque tarda usque in sequentem diem declinatio: biliosæ, & frequentes sunt alvi dejectiones: aliquandò visum est, febrim cum mediocri sudore terminare: pulsus frequens, magnus, celer, ut in febre Tertiana: adveniente nocte nova est observata feбри-lis accessio cum extremarum partium refrigeratione, & aliquo horrore, calor mox succedit acris, & mordax; pulsus mutatus, nam modò parvus, modò inæqualis, ac debilis cum aliquali ma-dore usque ad noctem; quo tempore nova apparet accessio, an-tecedente non terminatâ, & non semel subdelirium adest cum ma-nus agitatione. Verùm cùm Nobilissimum Patientem morbus hic magnoperè torqueat, ac ejusdem vires pessundet; modò in quin-

ta vocatis ad consilium aliis Medicis, de agendis pro recuperanda sanitate consulit.

Febris hæc Græcè *Ἡμιτερίλαος* *Hemitrilæos*, Latinè *Semitertiana* vocatur; à *Galeno*, & *Spigelio* febris horrida dicitur; undè Ego eam in numero malignarum, & complicatarum febrium pono, & definiri poterit, quod sit febris composita, maligna, putrida, participans de Tertiana, & Quotidiana, proveniens à sanguinis biliosi, cum serosis & crudis portionibus permixti fermentatione præternaturali ad dissolutionem malignam vergente; quamobrem cum constet ex pluribus, cognitu difficilis existit, ita ut aliquandò transeat quarta morbi dies, antequam dignoscatur, ut ait *Joh. Fortis*, & ut accidit in nostro *Ægroto*; Medicus enim ordinarius eam nisi tardè nimis cognovit. Componitur igitur præsens febris ex *Tertianâ*, uti dixi, intermittente, & *Quotidianâ* continuâ, ab humoribus pravis in primis viis existentibus, & à sanguine in vasis depravato, atque ad dissolutionem disposito, ut evenit in febre *Maligna à dissolutione*; est tamen unica febris, nempe maligna, unicus morbus, licèt duo sint humores formâ distincti, qui duas complicatas excitant febres uno, eodemque die, ac tempore invadentes. Instat autem *Cardanus*, si in hac febre alter humor reperitur in vasis, alter extrâ, quomodo simul agunt, & uniuntur ad excitandum hoc malum? Sed facilè respondetur, nam quotidiana à continua fermentatione præternaturali cruoris dependet, & sic adest continuatus motus inordinatus cruoris, id est febris; accenditur verò, & additur alia febris, cùm accenditur humor exoticus in primis viis stagnans *Tertianam* efficiens; ex quibus duobus humoribus, ac causis unitis præsens oritur febris; quæ, meo videri, conjunctas habet in sanguine septicæ quasdam, ac vitriolico-lixiviales particulas, quæ massam sanguinis non tantum turbant, sed dissolvunt, & fundunt magno cum salutis detrimento. Habet igitur quatuor conditiones hæc febris, primò quod sit horrida, secundò quod sit continua, tertio quod sit acuta, & periculosa, quartò demum quod alterâ die, scilicet impari, gravior sit, alterâ verò levior. Cognoscitur porro hæc febris ex signis simplicium febrium, & in primis ex frigoris, horroris, & rigoris reditu post quietem, & si rigor fiat, mox sudor sequitur.

Pulsus

Pulsus sæpè contrahitur, cùmque duæ sint febres, fieri potest, ut utraque, aut altera anticipet, aut utriusque paroxysmus in unam conveniat horam, ut monuit *Galenus lib. 2. de differ. febr.*: Aliquandò additur alicujus visceris interni inflammatio, ut notavit *Sennertus de feb. lib. 2. cap. 21.* Ad Prognosim quod attinet, notandum, *Hippocratem* lethalem vocavisse hanc febrem, & *Galenum* periculosam: cùm verò, ut in casu nostro, aliis morbis succedit, omninò periculosa videtur, sicque timendum erit, ne Nobilissimus noster Ægròtans vitam cum morte commutet, quod Deus avertat. Magnâ igitur diligentia, & industriâ opus est, ut cura instituat, ideòque duo illa communia axiomata potissimùm erunt observanda, urgentiori scilicet indicationi incumbendum, altero non neglecto, & festinemus prodesse, ita tamen, ut non noceamus, quod semper in morbis periculosis fiendum monuit *Clariss. Dom. Joh. Fortis*: imò advertendum, nos in hoc casu esse in febre Maligna, omnes enim Practici ponunt, hanc febrem in Malignarum numero, eo quia adsunt signa febris Malignæ, ut sunt prostratio virium non ordinaria in principio, ut in casu nostro, sitis inextinguibilis, Nausea, Vigiliæ contumaces, & subdelirium, quæ esse certa signa febris Malignæ ait *Alex. Pascolus in lib. de febr.* Licet autem hujus mali curatio elici videatur ex cura febris Tertianæ, & Quotidianæ, attamen præter hanc ad meliorem febris Malignæ deveniendum, suprà enim monuimus hanc febrem esse de genere Malignarum. Indicationes igitur curativæ erunt sanguinem ad bonam crasim reducere, & vitriolicas, ac septicas particulas in eo luxuriantes, illumque fundentes corrigere, ac remove, primas vias à pravis fermentis liberare, calorem febrilem temperare, symptomatibus occurrere, atque demùm partes affectas corroborare. Quæ ut assequantur tres Medicinæ fontes adire oportet, nempe Chirurgiam, Pharmaciam, & Diætam: Et quoad primam nihil dicunt de Venæ sectione Arabes, & Græci, undè in hac febre, utpotè Maligna, omninò à Phlebotomia abstinendum: Clysteres refrigerantes, ac humectantes adhibendi sunt ad nocuas humorum saburras ex Intestinis eliciendas, absque incommodo viscerum principalium. Fricationes utiles erunt, ut & balneum aquæ tepidæ ad pedes, & crura, quam operationem

Phlebotomiam siccam vocat *Clariss. D. Joh. Masseneau in sua Medicina, & Chirurgia naturali pag. 237.* Nonnulli commendant cucurbitulas scarificatas, & vesicantia, à quibus abstinendum esse constanter affirmo. A Pharmaciâ verò desumi poterunt sequentia remedia, videlicet *semiuncia Cremoris Tartari* ad leniter stimulandas primas vias: *Diascordium Fracastorii, Confectio de Hyacintho, Laudanum liquidum Sydenhamii, pulvis Bezoar Occidentalis, Magisteria oculorum Cancri, aqua cordialis Saxoniae, Theriacalis, & Melissæ* utiles erunt. *Radicem Contraiervæ* optimam esse semper in pra-xi facienda collegi; usumque *Chinæ Chinæ pulverisatæ* non improbandum esse monuit *Clariss. Dom. Franc. Torti Archiater Mutinensis in suâ Therapeuticâ Speciali.* Inter Julapia conveniunt *Julapium de Contraierva, & Perlatum*, nec non *Gelatina Cornu Cervi in aqua Scorzoneræ.* A proprietate juvant, si *Joh. Forti* fides habenda, *decoc-tum Centaurii minoris, & Smaragdus collo appensus.* Victus ratio sit tenuis, & qualis in Malignâ febre, boni succi, & facilis coctionis. Vinum in duobus casibus concedatur, primò si vires deficiant, secundò si apparerent signa coctionis, quod utinam eveniat, sit autem modicum, tenue, & oligophorum, disponat tamen æger domui suæ; vita enim in periculo existit, & nihil vel parum de salute sperandum.

Eventus.

Multa ex supra dictis remediis fuere diligenter observata, & administrata, sed omnia incassum, nam die morbi undecimâ à decubitu, sanctè, ut sperare convenit, obdormivit in Domino. Secto verò cadavere omnia viscera sana fuerunt reperta; evidentissimum signum, causam hujus morbi in humoribus, ac spiritibus delituisse, ut in Consultatione fuerat dictum, & pronunciatum.

CONSULTATIO XXII.

De Febre mali moris.

P Harmacopola ætatis annorum 28. biliosæ temperiei, primò conqueritur de ingenti, ac spontanea lassitudine corporis, inde sequitur horripilatio, & rigor, tandem calor cum siti magna, vigilia, capitis dolore; pulsus est languidus, & sæpè naturali similis; mox animi deliquio afficitur cum stomachi dolore, nausea, ac Diarrhœa; Lingua aliquandò est arida, modò humida; urina cruda. Quæritur quænam sit talis febris, & quibus remediis curanda.

Veram curationem morborum esse illorum cognitionem, docuit *Hippocrates*. Itaque primò consideranda istius febris idea, quæ, meo videri, est febris mali moris, & ferè maligna ratione symptomatum, quia potest decipere Ægrum, Medicum, & Adstantes, & cùm symptomata habeat gravia, eludere potest artis remedia: dicitur autem mali moris, quia similis est homini malo, qui aliud facit, & verbo præ se fert, & aliud in corde gerit. Subjectum istius morbi esse totum corpus assero, cum omnes penè actiones sint læsæ. Hujus febris causa consistit in particulis acris volatilibus, ac valdè incongruis, quæ compagem totius cruoris solvunt, & destruunt, ut in serosum abeat liquorem, undè particulas has acres esse malignitatis, & effervescentiæ causam febrilis, puto. Lassitudo corporis totius partim dependet à copia humorum vitiosorum, partim à vitio spirituum animalium, siquidem læso sanguine, læditur etiam genuina spirituum animalium generatio, unde functiones animales non ritè peraguntur; Horror autem, & rigor oriuntur ab halitibus acris partes sensiles lædentibus: Pulsus est languidus ob cruoris corruptelam; undè *Clariss. Sylvius* ait, pulsum minorem fieri ab halitibus acidis ad cor delatis, & Sanguini admixtis. Alvi fluxus oritur ab ipsa sanguinis fusione, & colliquatione, quæ signa profectò febrem mali moris denunciant. Signa prognostica hac in febre sunt dubia; ait enim *Hippocrates*, in affectionibus acutis incertas esse prænuntiationes
salu-

salutis, vel mortis: Metus augetur in hoc Ægro à gravitate Symptomatum, attamen inter spem, & metum versamur. Ad curationem accedo, & primò Venæ sectionem excludo, malignitas enim nunquam indicat sanguinis missionem præterquam quod alvi fluxus videtur perpetuum prohibens Venæ sectionem; & hujus loco cucurbitulæ scarificatæ apponi poterunt. Purgantia pariter excludenda tum ratione malignitatis, tum ratione alvi fluxus. Poterit autem uti cordialibus, & alexipharmacis, ut *Diascordio Fracastorii*, *Cornu Cervi philosophicè præparato*, *Oculis Cancris præparatis*, *aqua Cordiali Saxonica*, *aqua Scorzonera*, *Bezoar Occidentali*, *Cornu Rhinocerotis*, *Confectione de Hyacintho* & aliis hujusmodi. In hoc autem casu opiata vitanda sunt. Victus sit tenuis, ac potus pareretur ex *Emulsionibus quatuor seminum frigidorum majorum*, vel *sere Caprino destillato cum cichoreaceis*: abstinendum a vino, quia delirium potest excitare, ac sulphure suo sanguinem inflammare. Fides nostri Patientis sit apud Deum qui solus nostros languores sanat.

Eventus.

Septima morbi die magno perfusus sudore Æger noster convalescit.

CONSULTATIO XXIII.

De Capitis Doloze pertinaci.

Quamvis Vir Perillustris annorum ætatis 45. de cujus adversa valetudine habita est consultatio, satis firma corporis constitutione sit natus, assuetus commodâ salute frui; duobus tamen abhinc annis dolore capitis vehementi penes dextrum temporalem musculum primò, mox in occipite afficitur; à quo liberari suspirat. Hæc igitur affectio symptoma est terrificum propter excellentiam, & dignitatem affectæ partis, cujus officio vita carere nequit: definitur autem à Medicis molesta quædam, & tristis sensatio partium capitis membranarum à solutione continui producta: Pars affecta sunt Pericranium, Meninges cum ap-
pensis

penſis nervis, & membranæ, quæ à particulis ſalinis irritatæ ſolutionem continui patiuntur: Cauſa proxima eſt ipſa continui ſolutio: remota verò ſunt ſalino-acres particulæ in lymphæ, & ſanguine hærentes, quæ ad illas partes delatæ, eas ſuis ſpiculis pungunt, unde dolor emergit. Quoniam tamen ætas in noſtro Patientē conſiſtit, ac viſcera incontinentia ſunt, ideò curabilis affectus evadit; probabile enim eſt, peccantes iſtas moleculas non eſſe in magnâ quantitate, ideòque faciliter ſuperandas, ac corrigendas. Indicationes in noſtro caſu ſunt, deſtruendi ſcilicet, ac cicurandi has particulas acres, depurandi univerſam humorum maſſam, & corroborandi affectam partem.

A Chirurgia igitur primò aſſumerem venæ ſectionem in pede, ac ſectionem Jugularis, pariterque appoſitionem hirudinum hæmorroidibus; cucurbitulæ etiam, fricationes, & clyſteria laudantur à nonnullis Medicis. Pharmacia interim dabit, non omiſſa tamen priùs communi corporis expiatione, *decoctum Salsæ parillæ, & Betonicæ cum extracto ligni Viſci Quercini*; non neglectis tabelis interdiù aſſumendis, præſcriptis à *Malpighio in Consult.* & paratis ex *raſura Matris Perlarum, Eboris, & Antimonio Diaphoretico*. Juvabunt *Emulſiones quatuor ſeminum frigidorum majorum*, ut & aliquandò præſtabit propinare *bolum ſequentem* ad ſedandum dolorem. R. Laudani opiat, gr. ij, Conſervæ Violarum, q. ſ. Miſce fiat bolus, & deauretur. His tranſactis, & adhuc ſæviente dolore, ſuaderem uſum ſeri *Vaccini deſtillati cum cichoreaceis* ad multos dies. Blanda etiam pedibus conveniunt balnea parata ex aqua dulci, herbis emollientibus alterata; quod remedii genus non ſemel profuiſſe obſervavi. *Unguento Alabaſtrino, & Populeonis* inungere tempora utile erit. Sunt qui laudant *Verbenam* collo appenſam, vel *radicem Plantaginis*. Peſtinatio inſuper capitis, teſte *Gilberto Anglico*, peſtine eburneo valet in omni Capitis dolore, ut refert *Foreſtus*. Circa Viſtûs rationem, Ægrotus noſter abſtinere debet à vino, ejuſque loco ſupplebit *aqua Nucérina ligno Viſci Quercini* medicata. Quantum autem fieri poterit, omnes aëris inclementias vitare debet, cibis optimis veſcatur, ut ſunt *ova recentia, carnes Vituli, & Pullorum*; ex oleribus, *Aſparagi, Faniculi, Endivia, Borrago* concedi poterunt. Fugiat cibaria concoctu difficilia.

Somnus sit diuturnus; alvus quotidie respondeat; & procuretur animi quies: Hæc erant dicenda in casu nostri Ægrotantis.

CONSULTATIO XXIV.

De Pervigilio.

EX Litteris, quæ ad me delatæ sunt, apparet Adolescentem ægrotantem, à principio tentatum fuisse capitis gravedine, cum sensuum omnium quodam torpore, quibus successit morbofa ad somnum propensio, ob quam clausis oculis, licet ad somnum se componat, illud tamen capere nesciat, & subdelirans apparet; quare medicam suspirat opem.

Hunc affectum esse vigilem comam, vel, ut Medici aiunt, Pervigilium, manifestum est; claudit enim oculos, & se ad somnum componit, & tamen dormire nescit, nec non adjunctâ febre delirat. Pars affecta est corticalis cerebri portio, & porositates spiritus animales continentes; hujus enim affectionis causa est nimia dilatatio pororum à spiritibus animalibus nimis agitat, & accensis; causa verò mediata consistere videtur in omni eo, quod sanguinem attenuat, nimium calefacit, & spiritus agitat, ut sunt omnia acria, & aculeata in massa cruoris præternaturaliter grassantia, quæ non tantum febrem, sed symptoma hoc pessimum excitant. Prognosis nunc accedat, quæ solet esse in Ægrotis præcipua pars consultationis. Idcirco cum vigiliæ in senibus sint curatu difficiles, teste *Dolæo*; sic in nostro casu, bonus erit sperandus eventus, quia Pervigilium est in Adolescente, eò magis quod fatale Tussis indicium in ipso non habemus; nihil autem certi prædici potest, nam monet *Magister*, acutorum morborum incertam esse prænunciationem salutis, aut mortis: Indicationes curativæ erunt, sanguinem ad naturalem crasim reducere, agitationem spirituum nimiam compescere, porositates cerebri ad propriam figuram revocare, ipsamque partem affectam corroborare. Quibus ut brevi satisfaciamus, ad tres Medicinæ fontes deveniendum. Et primò ad Diætam; cibus ergo sit facilis coctionis, & tenuis, qualis in acuta febre optimè fuit præscriptus ab Excellentiss. Medico curante.

te: Potus sit *decoctum Hordei*, & *Emulsiones quatuor seminum frigidorum majorum*, cum modico *seminis Papaveris albi*; & fugienda sunt omnia illa, quæ propellunt sanguinis motum, ejusque consistentiam minuunt, & ipsos spiritus accendunt. Somnus autem omni opera conciliandus est: Alvus lubrica fervetur. Ad Chirurgiam, quod attinet, Phlebotomiam in brachio suaderem, cucurbitulas scarificatas, Hirudines sedalibus Venis, & sæpè Clysteres. Pharmacia demum dabit primò *opiata*, quæ tamen cum grano salis (ut dici solet) sunt accipienda, moderatè enim ista sunt applicanda; & tunc spiritus animales impetuosos compescendo aliquid levaminis afferent: poterit ergo exhiberi modicum *Laudani opii*, id est *ad grana duo tantum*; mox sumenda erit *gelatina Cornu Cervi*, *serum Caprinum destillatum* cum *cichoreaceis*, *aqua Hordei destillata*, *pulvis Oculorum Caneri præparatorum*, quæ acrimoniam humorum, & nimiam spirituum motionem compescunt. Externè laudo *Aquam Rosarum cum Croco*, & *Lac Muliebre* temporibus applicandum; Pedes etiam in tepido balneo detineri poterunt, in quo prius bulliti sint *flores Chamomillæ*, *Malvæ*, *Violarum*, & *capita Papaveris*; *Dolæus* Indusium ex aqua frigida madidum Ægro imponendum laudat, quod Ego in nostro casu non experirer, ne transpiratio impediretur. Cæterum Adolescens noster animo sit constanti, & læto, & benè de valetudine speret, quæ ut illi quamprimum contingat Deum precor.

Eventus.

Proposita auxilia omni studio administrata fuere, at magno superveniente delirio cum tussi, & singultu die decima quarta mortuus est Æger.

CONSULTATIO XXV.

De Phrenitide.

HOnesta Mulier ætatis annorum 31. post partum non benè purgata, in febrem acutam incidit cum gravi delirio; qua-

re tanquam Phrenitis vera judicata hæc affectio est à Medico suo ordinario. Parentes me in consilium vocant, ut opem medicam Patienti feram; quamobrem sensum meum ad Ægrotantis salutem propono.

Licet posset dubitari, an febris mulierem nostram vexans sit essentialis, an verò symptomatrica: ego brevi me expedio, & hanc febrem utriusque conditionis existimo, nam esse febrem ardentem certum est, quia autem inflammatio in cerebro adest, ideò etiam essentialem Phrenitidem in hac Patienti dari firmiter puto. *Avicenna* enim Phrenitidem Apostema Cerebri vocavit. Definiri autem, seu, ut melius dicam, describi potest hic affectus, inflammatio membranarum Cerebri febrem acutam, & mentis alienationem continuam inducens, ut plurimum ab excandescencia, & accensione spirituum animalium dependens; ideòque pars affecta erit in primis globosa cerebri pars, cum suis membranis. Causa istius magni morbi dependet à sale volatili acri in sanguine prædominante, atque spiritibus se admiscente, ex quo & inflammatio in cerebro habetur, & læsio memoriæ, phantasiæ, ac imaginationis; quemadmodum etiam innuere videtur Batavorum Medicorum Decus, & splendor *De le Boë Sylvius*. Nunc sub jungenda est Prognosis, ut consuetam consultationis methodum servemus, quare cum *Tralliano*, & *Joh. Forti*, acutissimum & periculosissimum hunc morbum esse assero; etenim essentialiter læduntur instrumenta principalium operationum, immò princeps corporis, id est Cerebrum læditur; quin augetur etiam periculum à febre ardente, & continua: Inspiciendæ autem erunt diligenter urinæ, si enim istæ albæ erunt, & perspicuæ, teste, *Hippocrate*, *Aphor. 72. Sect. IV.* morbus hic erit pessimus; sicuti malum, & lethale erit, si Ægra nostra floccos, & festucas carpat; si autem somnus sedaverit aliquantulum, vel saltem minuerit delirium, bonum erit & quia congruis, ac opportunis remediis utendum est, & ætas Patientis consistit, ideò salus speranda erit; quam ut brevi assequamur, indicationes prius examinandæ sunt, videlicet febrilem æstum temperare, sanguinem à sale volatili acri liberare, & humores ad partes affectas fluentes revellere, ac revocare; pravis symptomatibus occurrere, ac tandem Cerebrum ipsum corroborare;

re; quæ omnia, & singula, ut celeriter habeantur, ad tria Medicinæ Practicæ brachia recurrendum, sine quibus in Arte nostra nihil. Ex Chirurgia igitur *clysteres ex lacte & saccharo* sumi poterunt, sicuti venæ sectiones in brachio, & pede, immò in jugularibus venis: Frictiones, & cucurbitulæ scarificatæ dorso appositæ erunt proficuæ; pedum quoque lotiones in usu venire possunt: Ex Pharmacia sumi poterunt *Emulsiones quatuor seminum frigidorum majorum* factæ S. A. in aqua *Endiviæ* cum modico *Sacchari*; Aquas essentielles ex succis *Cichorei, Acetosæ, & Anguriæ* destillatas commendo pro assiduo potu. Sequens mixtura cochleatim, & per intervalla usurpanda erit, nempe ℞. *Diascordii Fracastorii*, ʒ. ij., *Confectionis de Hyacintho*, ʒ. j. *Syrupi de Papavere*, ʒ. j. *aquæ Plantaginis, & Betonicæ*, ana, ʒ. ij. *Misce. Pulveres etiam oculorum Caneri præparatorum* utiles erunt, sicuti *Margaritæ præparatæ, Stibium Diaphoreticum & sal Prunellæ* nec non *Gelatina Cornu Cervi*, unà cum *conservis Tunicæ, Violarum, & Betonicæ*. Poterit etiam exhiberi ad somnum conciliandum *Laudanum Nepenthes Quercetani* ad gr. ij. cum *Conserva Rosarum q. s.* ad conficiendum bolum auratum. *Felix Platerus Gallinam* per medium dissectam tepentem, & adhuc cruentam vertici capitis impositam laudat, quod remedii genus expertum vidi in quodam Reverendo Sacerdote: Ego tamen istud propono, verum non laudo, nec vitupero; cum hoc sit ex illis medicamentis, quibus mihi est pauca, vel nulla fides. Quibus omnibus victus ratio tenuis, refrigerans, & humectans addatur; & D. O. M. præsto sit.

Eventus.

Multa ex propositis remediis fuerunt adhibita; sed incassum; undecima enim morbi die Syncope superveniente, unà cum nonnullis convulsionibus, & singultu, honesta hæc Mulier interiit.

CONSULTATIO XXVI.

De Apoplexia in Paralyfim terminata.

Honestus Civis sexagenarius, boni corporis habitus, duobus abhinc annis vertigine corripì incepit, cum magna propensione ad somnum; tandem mense Februarii dùm à Cœna surgeret, corripitur subitâ sensûs, & motûs privatione, cum omnium principum operationum abolitione, nec non magnâ respirationis læsione, & mediocri stertore: accersito Medico repetita fuit sanguinis missio, cum aliis remediis: post noctem veluti à somno expergefactus, imperfectè loqui incepit; lævum brachium sine motu observatur, cum modica oris tortura. Auxilium nunc petit.

Subitam privationem motûs, ac sensûs, cum respiratione læsa, & principum operationum abolitione, quæ huic nostro Ægro accidit, Apoplexiam dicunt Medici, & Siderationem jam vocavit *Hippocrates*: hujus morbi præfagia fuêre affectus vertiginosi, qui fere semper anteire solent apoplexias. Proximam hujus affectionis sedem Cerebrum, ac nervos, & spinalem medullam esse, certum est; *Cartesius* dicit esse canaliculos spirituum animalium. Hujus morbi causa est obstructio nervorum à materia viscida, ut potest esse sanguis ineptus coagulatus, & narcotico spiritu repletus, vel lymphæ crassæ, quatenus hæc extravasata poros Cerebri, & nervorum obstruere potest, à qua obstructione spirituum animalium influxum tolli certum est.

Paralyfis verò præsens à defectu spirituum animalium in musculis derivat. Accedamus nunc ad Prognosim, & primò notandum, hunc morbum curatu difficillimum esse, & maximè si paralyfis confirmetur, & in primis, cùm ab Apoplexia ortum ducat; immò timendum, ne recidivam patiatur Æger, idcirco exacta debet esse Medicorum diligentia, ne revertatur Apoplexia. Ut autem recta hujus morbi curatio habeatur, primò observandæ sunt indicationes, quæ meo judicio, sunt restituere influxum perennem
spiri-

spiritibus animalibus, materiam illam crassam, ac obstruentem tollere, & Cerebrum, ac partem affectam corroborare, quibus intentionibus, ut satisfiat, à Chirurgica classe nulla est depromenda sanguinis missio; quoniam in massa cruoris vitium non est; paralyticæ tamen parti frictiones quotidianæ sunt exercendæ ad promovendum influxum animalis spiritus in partem. Nunc ad Pharmaciam transamus, & primò præparantibus utendum, ut sunt *Acidum Citri conditum*, *decoctum radicis Ireos*, *Florum Salviæ*, *Stæchados* per tres dies; indè lenitivo aliquo blandè alvus sollicitanda erit, lenia enim purgantia in nostro casu fortioribus esse præferenda docuit etiam *Dolæus* experientiâ edoctus. Sic præmissis universalibus, ad sudorem promovendum me converterem, ope decocti *Salsæparillæ optimæ* manè sumendi in lecto *ad unc. viii.*; indè stragulis benè contactus sudationem expectet; deindè præscribatur usus *limaturæ Cornu Cervi bullitæ in juscule Pulli chalybeato*, & alternato cum floribus *Primulæ Veris*, & *Betonicæ*, cui addatur *pulvis stibii Diaphoretici*, & *pulvis Viperinus*. Pro capite verò, & toto nervorum genere, roborantia in usum erunt ducenda, ut sunt *Corservæ capitales* sub ingressum lecti ex floribus *Roris marini*, *Salviæ*, *Pæoniæ*, *Primulæ Veris*, *Betonicæ*. Hinc topica non sunt negligenda, & pars affecta inungi poterit *Oleo Vulpino*, *Succini*, & *aqua Vitæ camphorata*. *Epiphanius Ferdinandus* apud *Burnetum* admovet *Urticas pungentes*, quod remedii genus propositum fuit antiquis temporibus à *Celso*, & testatur *Deum citatus Ferdinandus*, se hoc remedio pluries usum fuisse semper magna cum felicitate, & nunquam votis esse deceptum. Vinum pro mensa medicatum redatur *Visco Quercino*, & *Sassafras*; cum cibo assumat pulverem *oculorum Cancris*, & *decoctum herbæ Theè*; & si abhorreret à vino, uti poterit *aqua Nucérina Cinnamomo correctæ*. Sequens remedium laudatur à *Dolæo*. & *Aquæ Cerasorum nigrorum*, *Salviæ*, ana, \mathfrak{z} . ij. *Epilepticæ Langii*, \mathfrak{z} . vi. extracti *Chamæpytios*, *Chamædrios*, *Castorei*, ana, \mathfrak{z} . semis, *Elixir Cephalici* \mathfrak{z} . j, *Syrupi de Stæchade* \mathfrak{z} . j M. & hujus mixturæ capiat Æger duo cochlearia pro vice.

Quod attinet ad victus rationem; carnes laudo assas, & cibos boni succi *Roremarino*, *Salvia*, & *Majorana* conditos: vitentur autem

autem saliti, fumo indurati, & acidi; absit omnis vehemens motus; somnus sit moderatus; vigiliæ autem nimix nocebunt, istæ enim animales exhauriunt spiritus, & cerebrum, totumque nervosum genus debilitant; hilaritati studeat noster hic Patiens, ex qua vividiores, & subtiliores particulæ salinæ volatiles, & oleoso-balsamicæ in cruore humano gignuntur, ex quibus animales spiritus fiunt, qui nihil aliud sunt, quam subtilissima sanguinis pars, seu, ut ita dicam, ipsius massæ sanguinis flos. Exulent curæ omnes, mœrores, tristitiæ: novi enim virum quendam ex mœrore solo in pertinacem incidisse paralysem, quæ ad ultimum usque vitæ suæ diem perseveravit. Frigidum aërem fugiat, juxtà illud vulgatum, *frigida nervis inimica*. Pauca hæc indicabam pro salute nostri Ægrotantis, cui omnia bona à D. O. M. ex corde precor.

CONSULTATIO. XXVII.

De Catarrho.

Quanquam casus Illustrissimi Viri satis eleganter ab Excellentissimo Domino fuerit pertractatus, ut mihi potius tacendum, quam loquendum videretur; ne tamen omninò inutilis videar: Primò examinabo naturam morbi, quo afficitur Vir Illustris, annorum 60: secundò an affectus iste sit sanabilis: tertio demum quibus remediis. Igitur dico morbum hunc Catarrhum esse, seu defluxum humorum à capite, cerebroque in subjectas corporis partes: definiri potest extravasatio lymphæ, seu feri vitiosi in capite ob moram ibi magis acescentis, & se coagulantis. Partes affectæ in hoc morbo sunt, cerebrum, glandulæ, & vasa lymphatica. Causa non suppeditatur immediatè à cerebro, sed à sanguine, & aliis fluidis; ab istis enim humoribus, aquea pars acrimonia, falsedine, & aciditate peccans, ruens ad cerebrum, & alias partes capitis, morbum, hunc Patientem afficientem, excitat. Post causam secundo loco videnda Prognosis, & dicendum, quid de hoc morbo prædicendum: Si igitur per nares distillet serosus, ac lymphaticus humor, leve erit malum, & citò desinet;
fi

si autem in fauces migret illud excrementum, malum erit, & pectus si in pectoris partes descendat, & præsertim in pulmones: si autem diu perduraverit hæc affectio, periculum esset, ne in Anginam, vel Paralytim, aut Surditatem, quod tamen Deus avertat, Æger incideret: & si iste catarrhus evaderet suffocativus, tunc vitæ minaretur periculum. Antequam autem ad curam deveniamus, indicationes sunt inspiciendæ, quæ in nostro hoc casu videntur esse; educere has excrementitias humiditates per loca conferentia, humores ad statum naturalem accommodare, atque cerebrum, & omnes affectas partes corroborare; quibus ut satisfiat: Cibus in hoc affectu sit concoctionis facilis, & bonum succum generans, ut verbi gratia sunt ova recentia, carnes Gallinæ, Vituli, & Pullorum: & notandum meliora esse assata cibaria, quam elixata: Moderata sit alimentorum quantitas, & cœna sit levis. Fugiat Æger à cibis viscidis, crassis, & concoctu difficilibus, quia isti augent saburram humorum, & spiritus obnubilant: Potus verò sit moderatus, quod si tenuis fuerit, ac defæcatus, sibi similem gignet cruorem. Aqua putealis fugienda, suadente *Dolæo*: somnus sit moderatus, nec meridianus: Alvus lubrica servetur; & hilaritati studeat Ægrotus noster. Quoad Chirurgiam, clysteribus frequenter utendum erit, quia humores naturæ obedientes reddunt, & corporis sentinam eluunt: Frictiones sint in usu, sicuti poterunt juvare cucurbitulæ scarificatæ dorso imponendæ, immò Venæ sectio in cephalica brachii dextri non erit inutilis. Ad Pharmaciam demum ut gradum faciamus, primò communes vias sollicitare conveniet *Potione ex Manna clarificata ad uncias sex; Conserva Rosarum* sub vesperam sumenda ad semiunciam qualibet die laudatur à *Joh. Bapt. Montano*, & Ego non inutilem esse usum asfero: sequentes rotulas *Joh. Zecchius* præscribit, quas optimas esse in quodam Rever. Sacerdote expertus nuper fui &. *Diatragacanthi frigidi*, ʒ. ij. *boli Armenæ*, ʒ. i. *terræ sigillatæ*, ʒ. j. *syrupi de Papavere*, q. s. *Misce. Fiat mæssa*, ex qua formentur parvæ rotulæ S. A. ore detinendæ: *sperma Ceti in aqua Hyssopi* solutum poterit exhiberi. Si autem adhuc morbus perseveraret, confugerem ad usum decocti *salsæ parillæ*, *ligni quercini*, *sassafras*, *santalî Citrini*, *liquiritiæ* quotidie sumendi, ante cibum mane jejuno stomacho, &

hoc ad viginti dies. Quod si tractu temporis Catarrhus iste ad falsum tendat, tunc accedente Maio consulo ut bibat *lac Asinae* cum pulvere *sacchari* inchoando *ab 3. iv.*, & paulatim ascendendo usque *ad lib. j.* Epoto autem lacte non erit indormiendum, neque exercendum corpus: Usus *pilularum de Cynoglossa* non respuo, saltem semel in hebdomada. Atque hæc omnia in salutem Illustrissimi Domini nostri Patientis Deo concedente cedant.

Eventus.

Pauca ex remediis propositis ad usum adhibita sunt, & Deo adjuvante intra mensem pristinae sanitati revocatus est Æger.

CONSULTATIO XXVIII.

De Catarrho.

Nobilissima Mulier Vidua, annorum ætatis 63., post varias in ratione victus commissas culpas, dolore capitis primò afficitur, mox Catarrho cum Tussi assidua, crassam materiam frequenter excernens cum difficili respirazione; parùm urinæ fecernit, febriculâ accedente sub vesperam, & Tussi nocte magis exacerbatur; nunc à me petit auxilium.

Malorum penè omnium, quæ hominibus accidunt, caput, & radicem esse, ait *Hippocrates*, Catarrhum; vix enim adest corporis pars ab eo immunis, & quæ ab eo non afficiatur; sic aures, oculi, nares, pectus, fauces, brachia, glandulæ, & aliæ corporis partes à Catarrho læduntur, ex quo Apoplexiæ, Paralyfes, cœcitates, Surditates, Orthopnoea, Tusses, Raucedines, Arthritis, alvi profluvia, & aliæ oriuntur affectiones: & latè sumptus Catarrhus dicitur è capite versus inferiora defluxio: strictè verò definitur, quod sit humoris excrementitii à capite defluxio in palatum, os, ac pulmonem. Causa materialis est lympa crassa interdum insipida, vel acris, acida, & falsa; separatur verò hæc materia in capite, quæ modò tendit ad nares, & Coryza dicitur,

tur, modò ad fauces, & Branchus vocatur, modò ad Pectus, & appellatur Catarrhus, ut in casu præsentis; hinc Poëta cecinit.

*Si fluat ad Pectus dicatur Rheuma Catarrhus,
Ad fauces Branchus, ad nares esto Coryza.*

Fit autem ista destillatio cum ebullitione febrili, quæ febris Catarrhalis dicitur, dependens à lymphâ viriata in glandulis in cerebro existentibus; tanquam à causa antecedenti ortum habet ab alimentis frigidis, & ab aëre frigido, tum ratione temporis hyemalis, tum ætatis senilis. Quoad Prognosim: Catarrhi, illiusque dolores interdum de facili, interdum difficulter sanantur. Convenit in Catarrhis viscidis decoctum ex ligno Sassafras, Guaiaco, Serpillo, & Roremarino, ut in nostro casu, mane jejuno stomacho. Ne autem lymphâ in Thoracem præceps dilabatur, & spiritum intercludendo suffocet, fluxio erit inhibenda, vel clysteribus, vel extremarum partium frictione, cucurbitulis, pedum lotione. Pilulæ ex Succino Cratonis adhiberi possunt. Conservas Rosarum, species Diamargarit., Syrupum de Althæa, & pilulas sequentes commendo: ~~R.~~ Thuris Masculi, succi Liquiritiæ, anam 3., Opii, croci, Myrrhæ, ana, ʒ. i. Misce cum syrupo Papaveris albi fiant Pilulæ parvæ S. A. sicuti rotulas sequentes cum fructu exhibere convenit. ~~R.~~ Pulmonis Vulpini præparati, florum sulphuris præparatorum, ana, 3.ʒ. Conservæ Rosarum, 3. i. ʒ. Pinearum recentium, Amygdalarum mundatarum, ana, 3. i. Sacchari penidiati dissoluti in aqua Tussilaginis, ana Q. S. fiant S. A. Rotulæ. Inungatur pectus oleo recenti Amygdalarum dulcium, Butyro, & adipe Gallinæ; & consulo, ut Ægra nostra sæpè assumat oleum Amygdalarum dulcium recenter expressum, quod magnis laudibus extollit Joh. Masseneau Amicus noster suavissimus in sua Medic. & Chirurgia natur. cap. 7. Aqua tepida cum saccharo mixta frequenter assumpta levamen affert. Caput, & Thorax diligenter panis muniatur; evitetur aër ventosus, pluviosus, & frigidus, caveat Solis, & Lunæ radios, hi enim Catarrhum multiplicant; & inter omnia provocetur Urina, hæc enim plurimum levaminis afferet. Somnus sit nocturnus, diurnus siquidem est malus; carnes

sint facilis coctionis; panis sine sale, & benè fermentatus, evite-
tur caseus; ova forbilia bona sunt; arceantur aromata, & potus
sit *aqua Hordei cum modico sacchari cum semine Coriandri decocta*; &
si vinum desideret, sit medicatum *radice Chinæ*. Interim D. O. M.
huic nostræ Mulieri Nobiliss. præsto sit.

Eventus.

Nonnullis istorum remediorum applicitis Nobilis hæc Fœmina in
bonum statum fuit redacta.

EPISTOLA CONSULTATORIA

V. CL. JOH. PAULI FERRARI.

De Mania.

Juvenis ætatis Annorum vigint iquinque; temperamenti cali-
di, & humidi cum melancholiæ subdominio, structuræ; & ha-
bitûs mediocris; studiis, & literis vehementer applicatus, Anno
præterito capitis oppressione vexatus ad modum catalepsis, in-
cidit in somnum, & per plures dies dormivit, transactis etiam
duobus integris diebus antequam oculos aperiret, nec quidquam
per os sumeret; postea evasus, & expergefactus clamabat for-
titer, objurgando minis, & percussionibus Famulos, qui ejus
servituti addicti stabant; ad instar delirii, sine febre; neque die-
bus subsequenter de transactis incommodis, & tragædiis re-
cordabatur; stipticitate alvi adeò laborat, ut nisi per clysteres
fæces subducere possit, cibum tamen benè appetit, & come-
dit; in cæteris operationes ejus sunt sine regula, quia aliquando
expergefactus prudenter discurrit, & operatur, aliquando verò
sine recta methodo dicit, & agit; & iterum incidit in sopo-
rem.

In tantis verò discriminibus à diversis Medicinæ Professori-
bus præscripta fuerunt varia remediorum genera, eundem pur-
gando cum *Electuario lenitivo, Cassia, Syrupo rosato solutivo, Dia-*
senna,

senna, & similibus, pro primarum viarum expiatione, postea cum refrigerantibus fervorem sanguinis compescendo cum *Emulsionibus* *seminum Peponum*, & *Aquis Nucerianis*, necnon per nonnullos dies cum *Syrupis ex Papavere albo*, & *Laudano Nepenthes Quercetani* eundem detinuerunt; *Vinum emeticum* paraverunt, & *Laudanum liquidum cum sale Saturni* per multas vices præbuerunt; Vesicantia, & iteratas sanguinis missiones, tam ex Venis majoribus quam ex hæmorrhoidalibus addixerunt; super caput lactis stillicidium, postea columbum illicò exenteratum miserunt; in balneo aquæ dulcis collocaverunt, in quo cum magis caput gravaretur, ab eo recedere opus fuit; nuper *Jus*, in quo *cancri fluviatiles* fuerunt decocti exhibuerunt; alia etiam remedia dederunt, quæ dinumerare inutilis labor videretur; Nunc modò dormit, modò ambulat, modò discurrit; modo benè, modò malè; & quod pejus est, tali urinæ profluvio laborat, ut in dies suprà quindecim libras mingerit, urinæ inconcoctæ, & aqueæ, licet non attingat quartam partem humidi, pondus librarum trium, ponderato humido per calculum, de quo tam in cibo, quàm in potu nutritur; cum propensione ad Diabeticum fluxum (quod Deus avertat.)

Curiosas nullibi magis suas pompas ostentat Natura, quam in humani capitis contemplatione, in quo cum adsit sedes animalium spirituum, eos admirari, & credere opus est, tanquam Divinæ Omnipotentia miraculum, quia eos affatim perscrutari mentis nostræ nativa imbecillitas non permittit; sed quia tentamina etiam in arduis rebus generosum ostendunt animum, horum diram affectionem in dicto Dom. Ægrotante bonum duxi meditari, ut è sapientissimorum Medicorum sententiis ingenio meo tam rudi lumen evinceretur; gloriam semper dando Deo ter Maximo, & optimo, & illis, qui aurato calamo magis promptè scribere parati erunt pro tam ferali morbo extirpando; eo maximè, quia ea semper fuit Literariæ Reipublicæ consuetudo, & libertas, ut quibuscumque Medicinæ cultoribus liceret, absque vituperationis nota, sui animi sensus liberè proferre, ubi præsertim de re tam gravi, & urgenti agitur, qualis est consideratio humanæ vitæ servandæ, & nos me herculè plaudere debemus felicitati hujus nostri sæculi, quatenus servilis credulitatis excusso jugo, ad liberioris

Philosophiæ cynosuram Medicina suos dirigat rationum cursus.

Autumarem Domini hujus Patientis incommoda oriri à depravatione fermentorum nimia aciditate redolentium, qua ablata volatilizatione massæ sanguineæ, succedit quædam concretio humoris visceris, quo irretita massa spirituum animalium per cerebri Emporium discurrentium tardè, & sine regula erumpit eorum motus, & sic invincibilis somni necessitas evenit, juxta doctrinam Hippocratis Medicorum omnium Magistri, & Antesignani dicentis, *IV. de Loc. Affect. 2. quod spiritus animalis est primum animæ instrumentum in cerebri Ventriculis contentus ad sensum, & motum in universam corporis partem transmittendos procreatus*; cum quo consentiunt, & concordant cæteri Auctores, qui determinant, somnum pendere ab obstructione nervorum, & pro majori parte eorum, qui motui spontaneo inserviunt. In somno enim sensus feriantur, & motus membrorum pro majori parte intermit, & sicuti sensus, & motus vigent per spiritus implentes nervorum ductus, ita ii non possunt intermittere, nisi impedito influxu spirituum in nervos, & hoc impedimentum nisi in obstructione eorundem nervorum potest inveniri, quod videtur confirmari ab experientia, ex eo quod in somno nervi fatiscunt, & concidunt, genua, & brachia labunt, quæ accidentia nervorum impotentiam ad membra regenda ostendunt; prout eximiè scribit *Thomas Willis in Neurologia*. Dependenter itaque ab impedito spirituum transitu per obstructionem in organa motus, prædictus somnus succedit ab obstructione contumaciori eorundem nervorum, qua motus, & sensus longiori tempore coguntur intermittere, præter naturæ leges.

Hæc igitur obstructio, aliquandò fit, cùm materia segregata, naturæ errore, in substantiam cerebri deponitur, forsan quia pori Cerebri materiam absorbent; aliquandò verò producit ab usu narcoticorum, quia soporosorum omnium causa deducitur ab acido figente, & coagulante, prout in præfato Domino licet suspicari ob nimis longam applicationem studiis, propter quam defatigata, & depauperata spirituum animalium conditione, etiam animæ vitalis potentia læsa fuit, juxta commune assertum Docto-
rum

rum dicentium: *Spiritus animales a vitalibus generari*. Obstructis itaque nervorum principiis, spiritus rectè intrudi non possunt, undè ex impedita eorum intrusione, de consequenti etiam impeditur eorundem generatio, secundùm oraculum sapientissimi *Marcelli Malpighii* olim Magistri mei semper colendi in tractatu de *Cerebro*. Aliquando verò fit obstructio in nervis, quia sanguis è Venis absorptus coagulatur, & incraassatur ab acido coagulante, propter deficientiam caloris, per quam tardè movetur, undè interservit pro impedimento sanguini advenienti ab arteriis, qui cùm liberè transire non possit, diffunditur per substantiam Cerebri, & regurgitatione sua prohibet transitum spirituum, prout docuit eximius Doctor *Pompeius Saccus* æterna laude dignus; in *Irid. febr. 95.* & hoc pro causa somni invincibilis assignatur à *Villio* in principio febrium invadentium cum rigore, propter sanguinis coagulationem.

In hoc casu verò obstructio nervorum non est totalis, nec omnimoda, sed est talis, quæ recipit aliqualem numerum spirituum, non tamen sufficientium ad obeunda munia vigilantium, quia præfatus D. Comes vocatus sentit, ac punctus se movet, distendit, & contrahit, quod signum est spiritus fluere in aliqua copia, taliter solummodò diminuta, ex qua sequitur obstructio nervorum Cerebri, per quam impeditur transitus eorundem spirituum, ex quo impedimento reflexi de novo concentrantur; & hæc est ratio, qua cognoscitur impedimentum in poris Cerebri in nostro Domino Ægroto, quia aliquando benè, aliquando confuse, & sine methodo agit; dum spiritus animales per porositates Cerebri oberrantes huc, & illuc moventur, & impelluntur ad organum sensus cum perceptione variorum objectorum; Motus namque fibrarum ab objecto procedens quò est vegetior, & sensibilior in organo sensus communis, eò ejus perceptio est magis distincta, undè aliquando distinctè, aliquando confuse agit. Præter motum objecti sensus organo impressum, & traductum ad aliud sensus communis, & communicatum fibris cum prædicta dispositione, alius datur motus organi sensus communis versus principia nervorum, cui supereminet copia spirituum animalium illuc confluentium, undè ad determinatum nervum impelluntur pro

pro motu partis ei correspondentis, & anima, in qua cognitio latet, est directrix hujus motus; sicut concordēs scribunt Doctores utriusque Scholæ.

Hinc patet conditio hujus acidi in nostro Domino Ægroto, quia benè comedit, & cibum petit; *Appetitus, & famis sensatio fit, quia acidum austerum vellicando fibras nerveas Ventriculi, corrugationem in eas inducit, & sic producitur famis sensatio; suavitas verò comestorum percipitur, dum fibræ Ventriculi, & Linguae ab humore acido, & austero contrahuntur, & adstringuntur, ita ut à quolibet motu, & a qualibet figura particularum moveri, & penetrari non possint, motu patiente titillationem, in qua consistit suavitas comestorum respectu Ventriculi.* Sic docebat egregius Pompeius Saccus Præceptor meus triplici Corona dignus.

Causa verò erroris actionis benè, vel malè factæ, modò ritè, modò confusè, pendet ab eodem acido degenerante, ex quo alteratus motus spirituum in Cerebro, modò veras, modò falsas ideas præconceptas admittit, benè, & malè cognoscendo, undè evenit libertas spirituum quando benè cognoscit, & confusio eorundem quando inordinatè agit, quia aliquando motus ab objecto impressus alteratur per propriam constitutionem nervorum, quando namque motus fit velocior, vel tardior, undè magis, vel minus penetret, quam conveniat motui objecti, & dum ratio motus non est ex toto conveniens, confusam de eo parit cognitionem, & obscuritas spirituum insurgit, quia ut dicebat *Willisius in Pathologia Cerebri: perceptio imaginationis confusa sequitur cum inadvertentia, pro conferendo inter se omnes notiones perceptas de objecto; neque revocari posse in dubium hoc documentum puto, quia in tali notione confusa aliquando existens imaginatio Domini Ægroti percipit res cum inadvertantia aliter ac sunt, maximèque quando connexionem habent cum aliquo præjudicio, vel passo, vel ab eodem supposito, quia tunc moventur spiritus quidam uniti cum illis spiritibus motis ab objecto, & cum tali modificatione, quæ est apta ad movendam imaginationem ad percipiendum aliquàlter detrimentum, vel passum, vel mediatum, undè quodammodò cogitur mens concipere res connexas cum præjudicio, & per consequens animus affectus mœrore ducitur ad confusionem.*

Hoc

Hoc plenissimè confirmatur à Philosophis omnibus dicentibus, quod anima amans, vel timens aliquod objectum, vel illud appetit, vel abominatur; ideòque semper movet influxu spirituum fibrillas illas, in quibus primò impressa fuit modificatio repræsentans talia objecta cum impulsu in organum sensus communis, ex quo impulsu cogitur percipere tale objectum, quia movetur motu illi simili, quem motum recipit à sensibus externis in prima perceptione talis objecti, quamobrem hic motus, sive continuus influxus spirituum producitur ab anima, quæ ardenter amans objectum, cum illo optat uniri, sicuti celeriter satagit fugere ab eo quod timet, & propter hanc causam, & propter hunc continuum influxum, semper via aperitur ab Emporio spirituum, ad tangendam, & movendam dictam fibræ, ut etiam anima non impellente succedat influxus prædictorum spirituum, à quibus actio confusa producitur, & hoc unanimiter admittunt omnes Doctores tam Veteres, quàm Neoterici.

Modò dicam de stipticitate, sive alvi inobedientia, qua laborat Dominus Ægrotans, & reor eam pariter pendere à prædicto acido ad austeritatem inclinante, quia ut scribebat doctissimus *Ettmulerus de acid. auster. Fæces condensantur, & adstringuntur ex vitio acidi, vel Stomachici, vel Pancreatici in Intestinis prævalentis, eo magis quando acidum est austerum.* Compertum est enim omnibus Medicinam colentibus, quod bilis, & succus pancreaticus, sicut separant cremorem nutritivum ab excrementis, ita simul eisdem excrementis certam consistentiam tribuunt, secundum quam, nunc magis, nunc minus sunt fluxibilia, undè sicuti abundans alcali oleosum bilis diluit fæces, & fluxibiles facit, ita acidum vel Stomachi, vel Pancreatis vitiosum, aut nimium, aut austerum, fæces nimis coagulat, & indurat, quia ab eodem acido impeditur activitas bilis oleosæ facientis ad mollitiem fæcum, qua de causa, acido prævalente, fæces indurantur, & diutiùs subsistunt in Intestinis, quod expressè docuit *Sylvius de le Boë de offic. acidi* cum multis aliis.

Hoc ipsum acidum austerum hospitans, & abundans in corpore Domini Ægroti, si est causa præjudiciorum hucusque examinatorum, est etiam in causa copiosæ urinæ aqueæ, & crudæ, quam prædictus Dominus mingit, ex quibus suspicandum est de ejus vitæ pericu-

lo, eo quia rationabiliter inferitur, quod sit subsecutura major laxatio vasorum, sicut in Diabete evenit, quod esset teterrimum Naturæ excidium, quoniam per copiosam urinæ dejectionem dissipantur partes balsamicæ massæ sanguineæ, undè parva remanet substantia, & etiam imperfecta, & hoc habetur ex *Hippocratis* oraculo sic monente *Aphor. 72. Sect. IV. Urinæ albæ, & perspicuæ malæ*; & alibi etiam docuit idem Magister, quod *Urinæ crudæ, & aquosæ vap- pidam reddunt sanguinis massam*; & ratio patet, quia arguunt in eadem massa sanguinea colluviem serositatis excedentis; à qua de consequenti generatur falsum fermentum, à quo particulæ balsamicæ sanguinis corroduntur, de quo penitus dubitandum est, quia omnes scholæ, tam Veterum, tam Recentiorum admittunt, & statuunt, quod *serosa colluvies nascatur à falso fermento recepto in massa sanguinis, in qua omnes partes balsamicas depopulatur, easdem corro- dendo, & dividendo, adeò ut sic divisæ, & attenuatæ producant co- piam urinæ aquosæ, & crudæ, relinquendo illam humiditatem, cui se- cundum majorem molem uniebantur, & colligatis per dictam humidita- tem pluribus particulis massæ sanguineæ, derelinquatur corpus humidita- tis, & separetur, deperdito unientis officio.*

Quibus breviter tactis, & consideratis, apparet periculum vitæ Domini Ægroti; Primò quia *Hippocrates* ipse fatetur, quod som- nus longus semper sit malus, quia modum excedit, prout legitur apud eum *Sect. 2. Aph. 3. Somnus, atque Vigilia, utraque, si modum exce- serint, malum*; Deindè quia accidentia, quæ morbo adjiciuntur, sunt exitiosa, & prava, quibus curatio perdifficilis redditur; Attamen si D. Ægrotans remediis obtemperabit, spes assurgit futurum iri, ut (Divina dante clementia) primævæ sanitati restituatur; pro qua impetranda, opus esset sanguinem dulcificare cum eis, quæ aci- dum corrigere nata sunt, ut austeritas tolleretur, & dulcedo toti massæ sanguineæ conciliaretur; quia cum sit verum, quod *dulci- nutrimur*, teste *Galeno de tuenda valetudine. 1.* expedit in primis dulcem nutritionem promovere, quod posset assequi cum usu decocti facti in ventre *Columbi veteris cum lignis Corylo, Lentisco, Ebena, Visco Quercino, Santalis, Sassafras, summitatibus Pini, & similibus, secundum Hoffmanni descriptionem*, in quo persistendum esset per mensem, sumendo in Aurora ejusdem decocti uncias octo; & ante prandium laudarem dra-

drachmam semis *perlaram orientalium* præparatarum sine acido, ut stomachi acidum imbiberetur, & ligaretur; sero verò hora una ante cœnam propinarem scrupulum semis *pilularum antimelancholicarum à Fischeo* præscriptarum, quibus summa facultas conceditur pro extirpanda acidi austeritate; Deindè transirem ad maximum sanguinis dulcificativum, quod est *Aurum potabile* designatum à *Paracelso* in confectione sui *Samech*; & tandem opus absolverem cum corroborantibus caput, qualia sunt *Charabe*, *Castoreum*, *Electuarium capitale Montagnanæ*, *Betonica*, *Pæonia*, & similia; quorum ope, & Deo ter Optimo Maximo annuente, à tanto vitæ discrimine evasurum esse sperarem nostrum *Dominum Ægrotum*, cui ex corde Nestoreos deprecor Annos ad majorem Dei gloriam semper propagandam. Meliora opto, quod suadeant Medici omnes, qui potiori lumine gaudent, nam ego aliorum Voto me submittens obsequentissimè sapientissimis Professoribus me adjicio.

Sub censura. Raptim scribebat Florentiæ XV. Kal. Maii Anno Salutis MDCCXXIV.

Joannes Paulus Ferrari
Patricius Parmensis, Philosophus, &
Medicus Collegiatus.

CONSULTATIO XXIX.

De Mania.

EX doctissima Excellentissimi *Dom. Ferrari* Medici præstantissimi, ac Amici mei Suavissimi consultatione collegi nobilissimum Juvenem pertinaci, ac periculosa vexari affectione, quam ad Maniæ speciem, cum somnolentia, & urinæ crudæ profluvio, nec non alvi adstrictione auderem referre; nec mirum, nam docente *Aristotele*, homines, qui ingenio pollent, & studiis incumbunt, de facili melancholici evadunt, undè apud *Homerum* Ajacem, & Bellerophontem maniacos fuisse legitur. Hujus autem affectionis causam in Acido-austero vitante primarum viarum fermenta, nec non humorum massam, consistere puta-

rem quemadmodum etiam cogitat Illust. *Ferrarius*; benè siquidem scribebat *Valdschmidius*, causam maniae consistere in humoribus circulantibus ab acido singulari acre fermentescibili depravatis; cum enim proprium sit aciditatis austeræ præternaturalis, fixare fluida, hinc igitur retardationes in humorum, & spirituum motibus contingunt, unde somnolentia, stypticitas, & reliqua omnia symptomata in consultatione enarrata nascuntur, & cum adsint in sanguine crasso particulæ aliquæ angulosæ, & corrosivæ ab iis spiritus afficiuntur, qui mille modis inter se agitantur, & celerrimo, maximoque impetu Cerebrum invadunt, unde delirium accidit; anima enim tandiù manet tranquilla, quandiù motus in corpore fiunt placidè, & sine tumultu; immò quoniam ichores acido-austeri sanguinem infestantes eundem ferum attenuant, sic major urinæ copia secernitur, quam necessariò partium, & virium debitas sequitur. Quoad Prognosim, ardua est curationis provincia, quæ tamen non desperanda, nec deferenda, nam cum in Juvenisimus, salus erit speranda. Indicationes porrò curativæ sunt, aciditatem austeram in fermentis primarum viarum tollere, humores edulcorare, calorem moderare, omniaque ad suam naturalem crassim reducere, quocirca opportuna fore remedia, quæ austero-acidas particulas corrigunt, vel eliminant, judico, è tribus Medicinæ curativæ Fontibus desumpta; ideòque commendo decoctionem *Salsæparillæ* quotidianam ad multum tempus, lac *Asininum*, *Gelatinae Cornu Cervi* usum in die, & *Oleum Amygdalarum dulcium recentius expressum*, ex quo fortassis alvus sollicitabitur; quotidianam pedum lotionem sub vespere calentem laudo, sicuti ardente syrio usum aquæ *Nucerinæ* cum lenienti vehiculo exhiberem ad decem dies; postmodum ad alicujus fluminis balneum Ægrum nostrum demandarem: statim cauterium in brachio aperirem, & si fortior fieret Mania, ac vires permetterent, jugulares secarem, vel frontis mediam pertunderem Venam, quod à *Cæsalpino* proponitur: prodest oleum destillatum *baccarum Juniperi* juxta dosim, ac descriptionem *Donzelii*: Tincturam *florum hyperici* epotam optimam esse ait *Joh. Raius* referente *Burneto*. Externè in usu esse *Camphoram*, ait *Ettmullerus*, qui etiam pro specifico laudat sanguinem *Asini* in aqua *anagallidis*. Optima sit victus ratio, ac à vino abstineat; ait enim Poëta:

Vina

Vina gravant animos , faciuntque furoribus aptos ;

& vini loco , suadente *Joh. Forti in Consult.*, sit aqua *Borraginis* ; & *pomorum* , vel *serum lactis* commendatum à *Valdschmidio* ; Cibaria facilis sint coctionis , vitetque acida , acria , & falsa. Pauca hæc raptim , & currenti calamo scribebam pro salute Nobiliss. Juvenis , ad confirmationem egregiæ consultationis præstantissimi *Dom. Ferrari.*

CONSULTATIO XXX.

De Melancholia.

Nobilis Patritius annum agens sexagesimum , post varios in ratione victus commissos errores , violenta passus animi turbatione , sensim sine sensu incidit in Melancholiam sævam ; ita ut timens , & mœrens cum imaginatione læsa nunc vivat , & non sine civilis conversationis odio , nec non mortis ipsius desiderio ; diem aliquando integrum sine cibo , & potu suspirans in proprio clausus cubiculo vivit. Domestici auxilium ab arte Medica poscunt.

Affectus iste ex signis diagnosticis , quæ in præsentī historia videntur , nihil aliud est , quam Melancholia , quæ definitur delirium febris expers cum metu , & terrore absque causa manifesta : Alii dicunt imaginationis depravationem à phantasmate melancholico exortam : Pars affecta est Cerebrum , quatenus cogitandi officina , & in ipso principes animæ facultates exercentur : Causa consistit in labefactata structura ipsius Cerebri , & præsertim globosæ ejusdem partis , vitiata tensione fibrarum , quibus accedit obscuritas , & tenebrositas animalium spirituum , undè cogitationes melancholicæ emergunt , & incongruæ , absurdæque animæ plerumque objiciuntur , & sic oritur mœstitia , & metus. Cum enim in sano corpore spiritus animales sint lucidi , vividi , atque irradiantes , hinc est quod in melancholico torpidi , segnes , & obscuri habeantur , ex quo præcisè affectio ista dependet : Vitium verò tale spirituum oriri potest

test ab ichoribus acidis in humoribus stagnantibus, qui alterare valeant structuram globosæ partis Cerebri, & naturam spirituum animalium.

Prognosis erit primò, morbum hunc esse ut plurimum chronicum, & curatu difficilem, quare dicitur Flagellum Medicorum, cùm plura eludat remedia; & timendum, ne, si altas egerit radices, apoplexiam afferat, quod tamen Deus avertat: Ulterius faciliter transit affectio hæc in maniam: Quia verò incipiens adhuc, potest præsens hæc melancholia vocari; idcirco bonus exitus sperandus, quem ut citò assequamur ad tres Medicinæ Practicæ consuetos fontes recurrere fas est; & primò quoad Diætam, aër sit temperatus, ac lucidus, undè vivi, & irradiantes spiritus emergant: sub aëre enim nubiloso, crasso, & pluvioso homines tristiores, ac lassī cernuntur: Cibus, & potus sint boni succi, ut sunt *carnes Gallinarum, Vituli; ova*, & id genus alia; Absint pisces sale conditi & fumo indurati, omnia legumina, & carnes Anserum, Leporum, Cervorum &c. quæ nocere poterunt; qualis enim est cibus, talis fit chylus, qualis hic, talis sanguis, qualis cruor, talis spiritus qui ab eo generatur. Vini etiam generosi, atque fœculenti usum fugiat Ægrotus noster, & melius esset pro vino *aquam Nucerinam* potare. Somnus, & Vigilia moderatæ sint, Gaudio, & hilaritati maximè studeat: alvus lubrica servetur. Nunc Pharmaciam adeamus; & primò præparantibus utendum est, scilicet *jusculis*, in quibus primò bullierint *radices Cichorei, Fœniculi, Capparidis, Borriginis*, inde lenire convenit alvum, exhibendo *potionis Magistræ solutivæ unc. vi.*; postmodum usum *succorum depuratorum Borriginis, Cichorei, & Melissæ* laudarem quovis mane, quibus adderem modicum *tincturæ chalybis*, superbibendo postea *serum Caprinum depuratum*: Vesperī autem ante Cœnam poterit exhiberi *pulvis oculorum Cancrī præparatorum ad drachm. unam*, pro qualibet vice, & hoc per x. dies: suaderem postea, si adhuc affectio pertinaciter duraret, usum *lactis Asinini* ad mensem. Potus Thee opportunus erit. Ut verò perfectè indicationibus satisfaciamus in nostro casu ad Chirurgiam est deveniendum, & Venam communem brachii dextri secandam esse judico ad libram unam sanguinis educendam; hæmorrhoidales Venas hirudinibus aperire laudo: Frictiones totius corporis, ac etiam cucurbitulæ scarificatæ utiles erunt; denique cauteria non
sine

sine magno fructu suadet *Dolæus*. Interim autem Altissimum Deum vehementer oro, ut hæc omnia proposita ipsum nostrum Ægrum à sæva hac melancholia vindicent, atque præservent.

CONSULTATIO XXXI.

De Memoriae Debilitate, ac Imminutione.

REver. Sacerdos, ætatis annorum LIII. boni corporis habitus, post Febrem Quartanam incidit in memoriæ debilitatem, pro qua curanda consilium Medicum postulat.

Cùm igitur Memoria sit ille sensus internus, quo objecta semel, iterumque percepta Cerebri porositatibus ita impressa tenentur, ut occasione data mens sibi eadem veluti denuò præsentia sistere, ac eorundem recordari, vel reminisci queat; illa enim objecta per animalium spirituum undulationem determinatam imprimunt quædam vestigia in medullarem Cerebri substantiam, sicque vel eadem objecta vel similia alio tempore occurrentia spirituum agitationem per dicta vestigia instituunt, ac ita reminiscentia producitur; ad quam requiritur certus quidam tonus, seu blanda rigiditas fibrillarum medullaris Cerebri substantiæ apta ad recipienda vestigia objectorum, per quæ si animalis transeat spiritus, & illas fibrillas concutiat, idque sæpè contingat, idæ earundem rerum in mente exoriuntur, & memoria excitatur; undè patet, teste *Zuvingero*, pro diverso tono illarum Cerebri fibrillarum, Memoriam apud homines, nunc feliciorē, nunc infirmiorē existere: quod si Cerebri fibrillæ in suo tono mutantur, atque molliores reddantur, & flaccidæ, tunc non possunt objectorum vestigia imprimi, undè oritur memoriæ debilitas.

Sic ergo iste affectus in flaccidiori constitutione fibrarum Cerebri Medullarium consistit. Ad hunc tollendum debent illæ fibræ reddi sicciore, ac firmiores, & sic memoria, vel revocanda, vel confortanda, Cerebrique substantia corroboranda: ad quæ assequenda Medici multa præscripsere remediæ triplici Medicinæ Practicæ fonte decepta, nempe à Chirurgia, Pharmacia, & Diætâ; à quarum prima vix assumerem unam Venæ sectionem, cùm ex hac
parum

parum utilitatis capi possit. Tota ergo vis erit in Pharmacia, quæ primò dabit lenitivum aliquod medicamen ad alvum solvendam, & primas communesque vias expurgandas; post cujus assumptionem, optimum erit uti decoctione facta ex *Salsaparilla*, *ligno Quercino*, *Sassafrass.* in *aqua Betonicæ* ad XX. dies mane jejuno stomacho tribus saltem horis ante prandium. Sub vesperam autem bonum erit assumere cochleare unum sequentis conservæ, nempe, *R. Conservæ Rosarum, florum primulæ veris, Betonicæ, Anthos, ana, 3. j. Pulveris succini albi, 3. iiij. Misce.* In forma pulveris adhiberi poterit sequens commendatus à *Burneto* *R. Thuris masculi, 3. x. Piperis, 3. iiij.* fiat pulvis, & detur omni mane 3. j. per multos dies. *Marsilius Ficinus* è tribus illis muneribus, quæ Jesu Christo obtulerunt Magi confectionem paravit pro ingenio acuendo, & memoria conservanda, & spiritibus fovendis, quæ talis est *R. Thuris, 3. ij. Myrrhæ, 3. j., Auri foliati 3. 8. misce cum vino,* fiant pilulæ, quarum aliquot sub aurora fumantur.

Oleum Vitrioli rectificati cum haustu vini generosi commendant alii. *Oleum* pariter *Myrrhæ* temporibus, & sincipiti inunctum laudat *Wolffgang. Hoeferus*. Remanet nunc, ut aliquid dicam de confectione *Anacardina*, quam altis encomiis extollunt multi Medicinæ Magistri; quocirca Ego cum *Sennerto* damnandam esse puto perniciosam quorundam consuetudinem, qui cum à prima constitutione debili Memoria sint præditi, student violentis medicamentis, quod nunquam habuerunt, recuperare; undè aliqui seducti cupiditate, ac utilitate Memorix felicitis, precibus, ac pretio confectionem *Anacardinam* dari poscunt, & ita multi, vel judicio contracto vacillant, vel Memorix nihil recuperant, vel Capitis doloribus inquietantur: Quis enim non intelligit, naturalem Cerebri crasim, si in meliorem mutari, & corrigi ejus fibras oportet, paulatim esse agendum, non verò vehementibus, & efficacissimis auxiliis, ut quæ ex *Anacardo* conficiuntur, hæc enim infirmant temperiem naturalem cerebri, & fortè fit Memoria deterior; imò ait ipse *Sennertus* aliquos assumpsisse hanc confectionem, & parum vitales fuisse, imò in ipso ætatis flore corpore nimis exsiccato extinctos esse: præterquam quod compositio istius confectionis parvi momenti existit, quia ex butyro confecta, quod de facili rancidum, & nauseosum apparet; undè ait *Ett-*

mullerus confectionem Anacardinam in defuetudinem jam abiisse, quoniam observatum, Anacardium acrimonia sua volatili excitare febres ardentes, & loco Memoriae confortandæ, stupiditatem, & amentiam conciliare; unde benè à *Matthiolo* inter venena ponitur Anacardium, & electuarium Anacardinum, non confectionem sapientum dici ait *Hoffmannus*, sed potius remedium stultorum, de quo plura apud *Raium*, & *Mangetum* in *Biblioth. Pharmaceut.* Denique victus ratio sit potius sicca, quam humectans, vinum concedatur, à crapulis tamen Æger absteineat; exerceat quotidie memoriam in variis rebus tum recitandis tum repetendis. Balnea iuvabunt, ut & frictiones ante somnum. *Rosmarinus*, *Ocymum* jejuno stomacho juvant, & pulvis *Trithemii* laudatur ab *Ettmullero*, sic aqua *Magnanimitatis*, cujus descriptio est apud *Donzellum* in *Theat. Pharmac. part. 3.* quotamen remedio Ego nunquam sum usus, quia mihi parum placet hæc formicarum compositio. Hæc verò sunt, quæ in rem præsentem obiter in mentem venerunt mihi pro Rever. Sacerdotis nostri incolumitate.

Dabam Ferrariæ tertio nonas Quintilis anni 1727. hora secunda Noctis.

CONSULTATIO XXXII.

De Tremore.

Reverenda Monialis ætatis annorum 44. corpore potius gracili, quam carneso, statura mediocri, albo colore ad subpallidum, sæpe vertigine afficitur, & continuo tremore capitis, & manuum, auxilium postulat.

Hic affectus est tremor cum vertigine sæpe recurrente: differt à convulsione per hoc, quod tremor ferè semper conjungitur cum motu voluntario, verbi gratia, manus vix unquam tremit, nisi moveatur: in convulsione autem ægro inscio, ac præter voluntatem ejus motus convulsivi accidunt; Consistit autem tremor in impedita, vel imbecilliori causæ, vel materiæ contractivæ nihilominus indefinenter urgentis virtute. Pro causa ergo, exclusa facultatis motricis debilitate, agnosco tenuem materiam aciditate volatili

præditam spiritus animales irritantem, partes nervosas dulciter vellicantem, & ad contractionem, sed insufficientem, assiduè instigantem. Remota autem causa potest esse suppressio mensium sub trigésimo ætatis anno præhabita; docuit enim *Ettmullerus*, & ante illum *Sennertus*, mensium, & lochiorum suppressiones, tremores inferre. Quoad Prognosim, notandum hunc affectum per se minimè esse periculosum, quando autem altas egerit radices, poterit in graves affectiones degenerare, ut in Paralytim, Spasnum, vel Apoplexiam; quia verò in ætate adhuc vegeta, & consistenti reperitur Rever. hæc nostra Monialis, ideò salus erit speranda: Ut autem curatio regulariter instituatur, indicationes sunt examinandæ, quæ meo videri sunt, volatilem illam materiam acidam irritantem tollere, vel saltem corrigere, ipsam dulcificando, & hebetando cuspides illius, indè partes nervosas capitis, & manuum corroborare, totumque corpus firmare: Quæ ut faciliter consequantur, ad Pharmaciam, Chirurgiam, ac Diætam gradum facere oportet, his enim ministris salus sperari poterit. Ex Pharmacia igitur primò desumenda erit *Potio Aurea solutiva ad uncias sex* pro blanda alvi solutione ad primarum viarum expiationem faciendam; postquam erit deveniendum ad usum *Decocti ligni Quercini, Juniperi, Salsæ parillæ electæ S. A. parati*, imperando simul sudorem; *Pæonia, & Baccæ Juniperi* boni erunt usus; sicuti laudarem *firmam Pavonis, electuarium Orvietanum, & extractum Calami aromatici, & Visci quercini*: sub vesperam utatur *Patiens conserva florum Liliorum Convallium, Anthos, Pæoniæ, Tunicæ, & Betonicæ cum syrupo de Stæchade*. Externè confert urina propria, qua manus erunt lavandæ. *Forestus* autem potius *urinam pueri* commendat: Spiritus *Lumbricorum, Formicarum* cum *sale Ammoniaco* pro membris affectis fricandis in loco calido præsertim nucha, & spina dorsi laudatur ab *Ettmullero*. Ego tandem probarem *lixivium*, in quo essent decocta *folia fraxini, & salviæ*, immò jurare possum me olim Mercatorem à tremore brachii sinistri liberasse solo usu balnei *Aquæ Vitæ camphoratae*. Nonnulli adhibent *oleum Amygdalarum dulcium vino Malvatico permixtum*, vel *aquam Reginae Hungariæ*. Ex Chirurgia peti possunt frictiones partis affectæ; & si adsit sanguinis abundantia, *Venæ sectio* administrari poterit in pede dextro ad uncias decem sanguinis edu-

educendas; & si alvus non respondeat, ut debet, clysteribus utendum erit. Præter autem ista chirurgica remedia, nullum aliud è tali Medicinæ Practicæ fonte præsidium sumendum erit. Ad Diætam denique quod attinet, victus sit moderatus, caveat à vino generoso, *Emulsiones quatuor seminum majorum factæ in aqua Betonica* sint in usu; Familiaris sit *potus Caffè*, & cum cibo pariter assumat *rasuram Cornu Cervi, & Cranii humani*. Et hæc pauca sint dicta pro confirmatione eorum, quæ ab aliis Doctissimis Viris proponuntur, & quorum acri judicio libens me subjicio.

Eventus.

Proposita remedia penè omnia adhibita fuere, ac tandem superveniente Diarrhœa spontè orta sanitatem pristinam Patiens adeptus fuit.

CONSULTATIO XXXIII.

De Imperfecta Paralyfi.

JAm defluxère duo menses, quod Illustris Civis ætatis annorum XLIV. temperiei sanguineæ, habitûsque plethorici, post sævam aëris inclementiam, & post multos errores in omnibus rebus non naturalibus, incidit in morbum sequentem; nempe post pertinacem gravedinem, aliquod impedimentum in sensu, & motu præsensit, cum nonnullo partium stupore, quæ symptomata adhuc perdurant: sensus namque, & motus torpet, & hebescit, per nervos enim spiritus animalis influxus imminuitur, ac retardatur. Ex quibus manifestissimè apparet affectum præsentem esse Paralyfim imperfectam, talis quippe affectio manifestis indiciis se prodit, ut non sit facienda jactura temporis in illis recensendis. Definiri potest hæc affectio motus animalis, & tactus imminutio in affectâ parte, quæ, ut audio, dextra est corporis, cum exigua atrophia, & debili pulsu; proveniens, velut à causâ immediatâ, à partium nervosatum relaxatione propter deficientem spirituum animalium præsentiam, & activitatem, ob intemperiem materiales cerebri ipsius, vel obstructionem nervorum subortam. Antiquio-

res dicerent, hunc affectum à fluxione materiæ catarrhalis haberi, nervos semioccludentis. Iste affectus non parvi faciendus; potest enim de imperfecta ad completam paralyfin transire, immò ad ipsam Apoplexiam. Ad ejus autem curationem quod spectat, debet primò Medicus discutere, & auferre materiam peccantem, restituere crasim partibus affectis, & præcipuè nervosis; immò ipsis spiritibus animalibus activitatem reddere, Cerebrum ipsum corroborare. Ad quæ assequenda confugiamus ad Chirurgiam, Pharmaciam, atque Diætam: & quoad primam, unicam Venæ sectionem adhibere conveniet in pede partis oppositæ ad uncias IX. Sanguinis hauriendas: Et si Medico ordinario placeret fonticulum aperire in opposita parte, non inutile existere putarem; vesicantia verò non approbo. Quod attinet ad Pharmaciam, pro universali corporis evacuatione exhibere poterunt *species Hermodactyli ad ʒ. iiij.*, in jusculo, cujus remedii particulæ ab intimis, & remotis partibus trahere humores peccantes possunt, ac valent. Quo peracto, ad decoctum sequens per mensem deveniendum erit. *R. Salsæ parillæ electæ, Sassafrass, Ligni Quercini, Lentisci incisi*, bulliant in aqua communi, & fiat decoctum S. A. *Antimonium diaphoreticum, Cornu Cervi philosophicè præparatum* cum sero Caprino laudat *Malpighius*. Potum *Thee*, & ejus loco *Salviæ* commendo. Pars affecta foveatur frequenter spiritu vini cum camphora. His omnibus accedat conveniens victus ratio: alimenta sint boni succi, facilis coctionis. Vinum sit vel medicatum *Sassafrass*, & *Quercino*; vel prorsus exulet, nam suspectum est in nostro casu, tartaro enim figit, & impetu in caput propellit humores, ejusque loco substituatur aqua *Nucerina*. Aqua pro parandis cibis chalybe alteretur, & cum cibis ipsis sumatur *pulvis Oculorum Cancris præparatorum*. Pauca hæc pro salute Illustris nostri Civis exarata *Judicio Doctiss. Virorum* libenter subjicio.

Eventus.

Ægitudine imminuta ope remediorum propositorum tandem recuperata omninò salus fuit.

CONSULTATIO XXXIV.

De Stupore Sensus.

VIr annorum ætatis XLIX. bonæ temperiei, alioquin sanus, nunquam enim in ætate sua morbum acutum est passus; sæpè sensus stupore, modò in una, modò in alia corporis parte afficitur; timens ne in pejus ruat, & hoc symptoma aliquem pravam minetur effectum Consilium Medicum postulat:

Affectus iste à multis *Narce* dicitur, à *Dolæo* somnus membrorum vocatur, & est propriè sensus, motusque diminutus nervosarum partium: in nostro autem casu motus manet; sed sensus quodammodo est imminutus, & interdum depravatus, ita ut aliquando velut acum puncturas leves sentiat, modò formicas leviter per nervos prorepentes veluti patiatur. Oritur autem iste affectus, quia aliquando ipsi nervi quasi comprimuntur, ita ut humores non moveantur in tubulos partium, qui ideò inanes manent, sicque spiritus animales per nervos, ac tubulos inanes influunt, qui cum sint quasi acriores, undique obvolitando, fibrillas nervosas irritando sensationem illam molestam excitant; quod autem breviter durat, quia citò humores in partium tubulos influunt, eosque replent. Non tam ergo iste stupor affectus est nervorum, sed musculorum eorumque tendinum, & est symptoma in genere actionum motricium, & sensitivarum læsionis: dixi autem suprà, in hoc affectu spiritum animalemp impediri, vel retardari, unde videtur quasi esse Paralysem imperfectam, unde *Galenus*, & *Mercurialis* docuere stuporem, medium quemdam esse affectum inter Paralysem, & sanitatem, ut jure dixerit *Rhasis*, stuporem si perduret, converti tandem in veram Paralysem. Ad quod avertendum, quanto citius possit, deveniendum est ad curationem, ne fortè altius morbus confirmetur. Quapropter derelictâ prorsus Venæ sectione, quæ locum non habet suadente *Dolæo*; statim ad Pharmaceutica præsidia procedendum erit. Purgandum igitur communiter corpus, exhibendo *pilulas Cochias, Aggregativas, de Agarico, ana, ad drachmam semis*; inde decoctione *Salsæparillæ Lentisci, Visci*

Quercini, & Sassafras in aqua Iuæ arteticæ parata utendum ad XX. dies; vespere autem assumatur sequens bolus R. Extracti ligni Quercini, Pæoniæ, ana, ʒ. ʒ. , cranii humani præparati, gran. X. misce, fiat Bolus auratus S. A. Ante somnum sumatur conserva florum Tunicæ, Betonicæ, Liliorum Convallium, & Anthos. Externè frictiones ad partes affectas faciendas laudo; imò aliqui levem urticationem commendant, donec rubor appareat ad evocandum spiritum & calorem. Inungi pars poterit Spiritu Lumbricorum, & fomenta, & balnea ex herbis appropriatis conferre possunt; quæ omnia prudentiæ Medici Ordinarii præscribenda relinquo, sicuti victûs rationem etiam, quæ consistit in recto usu sex rerum non-naturalium: & hæc dicta sufficiant pro salute recuperanda nostri Illustris Patientis.

CONSULTATIO XXXV.

De Convulsione.

PROponitur casus honestæ Fœminæ annorum 40., quæ à patrio Cœlo discedens, Ferrariæ se recipiens hoc anno 1716. mense Januarii frigidissimo, derepentè convulsionibus brachii dextri non sine dolore correpta fuit: Auxilium petit.

Affectus iste Convulsio, à convellendo sic dicta, vocatur, à multis Spasmus dicitur, quibus me subscribo; iste autem à convulsione differt, quatenus spasmus semper est cum dolore, convulsio verò non item: Definitur involuntaria musculorum contractio stabilis, & dolorosa à nervearum partium irritatione, vel à nimia spiritûs animalis insufflatione orta. Pars affecta in nostro hoc casu sunt, musculi brachii, qui propriè sunt instrumenta motûs voluntarii, mediantibus nervis, & musculorum fibris. Causa prima, & principalis hujus spasmodici affectûs latet in ipso brachio, non verò in Cerebro, ut alius Medicus asseruit in sua Consultatione eleganter, ac doctè exarata. Probabile igitur est, acidam quandam lympham in nervis, & musculis brachii congestam, particulis suis acutis vellicantem nervos, & fibras musculorum, motus istius spasmodici causam existere. Nunc aliquid circa Prognosim dicendum, &

& primò monerem, ut, si fieri posset, febris excitaretur, Magister enim docet, bonum esse, si febris convulsioni succedat, quia hæc dissipando materiam peccantem spasmus solveret. Secundò timendum, ne particularis convulsio universalis evadat, communicatâ aliis partibus causâ, maximè si diù perseveret: Quia tamen ætas in nostra Ægrotante consistit, & vires sunt validæ, ideò salus quamprimùm speranda; quam ut assequamur examinandæ nunc sunt Indicationes, quæ, meo videri, sunt, corrigere, & tollere omninò aciditatem lymphæ in brachio læso stagnantis, atque ipsum brachium corroborare: Ad tria igitur Medicinæ Practicæ solemnia auxilia quam citissimè est recurrendum, & primò quoad diætam, aër sit temperatus, & vitandus frigidus; notavit enim *Hippocrates* frigidum nervis esse inimicum, ideòque posse ex se solo convulsionem excitare; quoad cibum caro *Caponum*, *Gallarum* conveniet, attamen potius sit assa, quam elixa; addantur semper autem cibus *Salvia*, *Majorana*, & *Serpillum*: Vitari debent falsi cibi, acidi, muriatici, & acres, omnesque fructus austeri: Vinum sit tenue, & nervinis maritatum, ut sunt *radix Pæoniæ*, *Enulæ*, *Folia Salviæ*, *Chamædrys*: Somnus sit moderatus, alvi excretio quotidie naturæ respondeat, ut & reliquæ consuetæ evacuationes: animus sit semper hilaris. Pharmacia interim dabit primò levem Ventriculi, & Intestinorum communem purgationem excitatam à *Cassia* cum *cremore Tartari*. Pro alterante sit *serum Caprinum* colatum tantum ad semilibram cum *gelatina Cornu Cervi* per quindecim dies: indeumat *lac Asinæ* cum modico *Sacchari fini*, ne coalescat. *Malpighius* lacti addit *Saponem Venetum*; *Decoctum Pæoniæ*, *Salsæ parillæ*, *Guaiaci*, *Sassafras*, commendatur ab *Heurnio*, quod in summa hujus affectus pertinacia exhiberem; externè applicetur parti læsæ sequens linimentum. R. Olei Lumbricorum, Vulpini, ana, ℥. ij., olei Therebintinæ, Ceræ, Castorei, Philosophorum, ana, ℥. β., Adipis humani, ℥. ij., succi ipsorum Lumbricorum, ℥. j.; Misce, & calidè applicetur. Impositionem in super brachii læsi in cado olei communis tepidi suaderem, quod remedii genus commendatum legi apud *Burnetum*. Ex Chirurgia tandem sumantur fricationes, & Venæ Sectio bis celebranda in pede ad libram unam pro qualibet vice sanguinis extrahendi: cucurbi-

curbitulas etiam laudo scarificatas. Et hæc sunt, quæ in hoc casu mihi erant dicenda, quæ ut cedant in Ægrotantis nostræ salutem Deum rogo.

Eventus.

Non omnia, sed multa, ex his propositis remediis fuere usurpata, & curatio ad mensem usque fuit protracta; post quem pristinae sanitati restituta fuit honesta hæc Mulier; nunc sana vivit.

CONSULTATIO XXXVI.

De Incubo.

Adolescentula annorum ætatis 17. bonæ temperiei, post mensem suppressionem ab immani timore ortam hyemali tempore, terrificis insomniis agitatur, cum angore quodam & animi anxietate, ita ut Incubo graviter acta cum magno terrore somnum excutit. Vocant Domestici Medicum, Patientem sine febre ille reperit, pulsū tamen inæquali: consilium poscunt adstantes: illa petit auxilium.

Ex istis signis manifestè apparet præsentem Adolescentulam vexari Incubo à multis Asthma nocturnum vocato, & ab aliis Suffocatio nocturna; in hac enim passione Æger à magna mole incumbente suffocari se in somno putat. Vulgus credit à spectro, vel Dæmone homines insultante hoc fieri. Definiunt sic Doctores, imminutio motus animalis, & partium vocis, & respirationi interventium, dependens à prohibito spirituum influxu, cum falsa imaginatione molis gravis pectori incumbentis, cujus paroxysmus inter dormiendum potissimum fit, ut in nostra Patientem. Ego cum *Villisi* partem affectam in istâ affectione puto esse, ipsiusque sedem Cerebellum, ubi scaturigo animalium spirituum habetur: Causa autem immediata est retardatio spiritus animalis; mediata verò materia incongrua Cerebello instillata, quæ spiritibus in prima sua scaturigine torporem, sive narcosim conciliat; sicque per aliquod tempus cessat actio functionum ipsorum spirituum.

tuum animalium, ex quo omnia insurgunt symptomata, quæ nostram Adolescentulam vexant. Ad Prognosim quod attinet, notari debet Incubum de raro affectum mortalem esse; si autem frequens sit, ac sæpè ipsius paroxysmus redeat, tunc timendum esset, ne in Melancholiam, Apoplexiam, vel Epilepsiam transiret.

Indicationes curativæ sunt, liberare spiritus animales ab illa narcotica materia, hanc è corpore educere, vel disperdere, atque demum ipsum Cerebellum corroborare, ut & totum genus nervosum: Quibus satisfaciendi causa, primò examinanda venit cura diætetica. Cibus ergo sit nutrimenti laudabilis, ex quo sinceri spiritus generari possint, qui roscido madore Cerebrum irrigando, mentis aciem, deterfa stupiditatis caligine, illustrent; concedi autem poterit *vinum album tenue*, hoc enim suadente *Dolæo* faciliter in naturam sanguinis transit, deducto in omnem corporis partem alimento; & spiritus lucidos, minimèque densos gignit, atque virtutem cordis corroborat, animumque hilaritate perfundit. Somnus, & Vigilia modum non excedant: Animi quies conciliari debet, & alvus quotidie, si fieri potest, naturæ respondeat. Chirurgia præstabit Venæ sectionem in pede, clysteres, & cucurbitulas scarificatas dorso imponendas. Pharmacia denique dabit pro præparantibus *syrupum de Stæchade, & Menthæ cum aqua Buglossæ, & Capillorum Veneris*. Pro lenitivo medicamine optima erit potio ex *Manna*, seu *Cassia clarificata*: Species *Diamargaritæ cum aqua Cinnamomi* commendantur. *Aloes* per aliquot dies cum *cubebis*, & *passulis* certum habetur præservativum contra Incubum, si *Michaëli* fides habenda. Sub tempore somni commendarem sequentem emulsionem assumendam \mathfrak{R} . *Seminis Pæoniæ* 3. iij. cum f. q. *aquæ florum Pæoniæ* fiat emulsio, edulcoretur *rotulis manus Christi perlata*, cui addantur ʒ. ij. *pulveris smaragdi præparati*. *Misce*. Externè etiam proderit lenire dorsum cum modica frictione, unà cum regione stomachi, sequenti unguento. \mathfrak{R} . *Olei nucis moschatæ expressi*, 3. ii., *Mastiches, Menthæ, ana*, 3. j. *misce*: Interim Deum precor, ut hæc omnia Adolescentulæ nostræ patienti sint salutaria, atque proficua.

CONSULTATIO XXXVII.

De Epilepsia.

IUvenis quidam ætatis annorum 23. amoribus deditus, post intensam applicationem, & molestantem animi perturbationem ob amatae Mulieris interitum, dolore primò capitis afficitur, mox vertigine tentatur, tandem Epilepsia corripitur; derepente enim cadit in terram, & corporis fit præternaturalis concussio, cum motibus convulsivis, non sine mentis, ac sensuum omnium læsione; spuma circa os apparet, & resolutis musculis urina, & stercus præter voluntatem exit, & in tali miserabili statu per aliquod spatium temporis manet, postea attonitus, & confusus veluti expergefactus exsurgit; iterumque die altera eadem pariter symptomata passus est, majora formidans. Nunc salutem cupiens Medicum auxilium implorat.

Varias hic morbus appellationes fortitur; vocatur enim affectus Herculeus, Comitialis, Caducus, Sonticus, Divinus, & Lunaticus; & definitur, varia, & mixta actionum animalium læsio cum totius corporis concussione, motibus convulsivis, cum mentis, & sensuum omnium læsione: Pars affecta est Cerebrum cum nervis; hæc enim pars, ait *Malpighius*, à præternaturali causa laceßita spiritus animales tumultuariè propellit: sicque Juvenem istum Epilepsia corripitur certum est, cum in eo appareant omnia, & singula hujusce morbi signa. Hujus affectionis causa est, spiritus quidam acidus volatilis, qui à quodam menstruo pravæ indolis elevatus ad cerebrum, animales spiritus impetuosè divellit, ut indè ad instar pyrii pulveris quasi accensus, illicò ad omnes partes communicetur, & convulsiones excitet; spiritus autem ille pravus generatur à menstruo quodam ex alterato, & corrupto aliquo fluido orto; quod vitium fuerat excitatum à violenta animi passione in nostro hoc Patientem; occurrente enim re aliqua improvisa, & terribili Epilepsiam posse excitari docuit *Burnetus*. Quid verò sit de hoc Ægro sperandum, paucis nunc exponamus. Omnis Epilepsia periculosa est, curatu difficillima; quia autem

in nostro Juvene non fuit hæreditaria, sed tantum incipiens vocari possit, ideò spes aliqua salutis apparet: quia verò ortum habuit iste pravus affectus ab intensa, & forti applicatione, ac molesta animi turbatione, sperari potest, quod data metamorphosi in stupiditatem, & melancholiam, morbos non tam horrendos Epilepsia transeat, ut suis temporibus etiam notavit *Villius*.

Adhibitis tamen remediis ex arte salus speranda, quæ ut nostro Ægro restituatur primò Indicationes curativæ sunt considerandæ, & sunt; auferre irritationes, sedare motum spirituum animalium, dulcificare humores peccantes, eosque è corpore educere, ac demum Cerebrum roborare, quæ ut assequantur ad tria consueta Medicinæ Practicæ brachia deveniendum. Et primò quoad victus rationem, aer nebulosus, cane pejus & angue, vitandus est; cibus sit facilis concoctionis, & succi boni: *carnes Gallinarum, Turdorum, Columbarum, Agnorum, Vitulorum, Caponum, Perdium* laudantur, dummodò aromaticis rebus non condiantur: Pisces autem vitentur, ut & Anseres, Fungi, Lentesc, & carnes suillæ sale conditæ; Vinum sit tenue, & aquosum, immò si ab hoc abstineat, melius erit, & aquis appropriatis ad calcem hujus consultationis describendis utatur pro potu ordinario: modica corporis exercitatio proderit, sicuti Veneris usus nocebit: Somnus, ac Vigilia mediocritatem non excedant, & excrementa alvi singulis diebus respondeant: Animi perturbationes vitentur, has enim excitando hoc morbo magnam vim habere docuit *Dolæus*. Nunc ad Pharmaciam transeamus, & primò consulerem abstinentioniam à fortibus medicinis purgantibus; istæ enim acuunt potius humores, & fortassis majore cum impetu ad affectam partem propellunt, ut quoque innuit *Clariss. Malpighius in suis Consultationibus*, sicque erodentes succi, sero spoliati, acriores, & activiores redduntur, unde suaderem ad communes sollicitandas vias, usum *Cremoris Tartari in aqua Borraginis, vel olei Amygdalarum dulcium, ac conservæ florum Persicorum*. Pro alteranti poterit inservire serum *Vaccinum* depuratum, cum gelatina *Cornu Cervi*, vel jusculum pulli, in quo bullierint prius *folia Betonicæ, Salniæ, & Rorismarini*: *Lactis Asinini* usum commendo per mensem: & hîc notandum, citatum

Malpighium lacti addere modicum *saponis Veneti*. Ego verò pulvere *Sacchari fini* sum contentus, qui addatur lacti ad impediendam coagulationem: Inter alia commendat *Foreſtus* hunc pulverem cum jure pulli ad unam drachmam sæpè in aurora sumendum. R. Pulveris Radicis *Pæoniæ*, Cranii humani, ana, ʒ. iij. Caryophyllorum, Nucis Moschatae, seminis Citri, ana, ʒ. j. M. fiat Pulvis usui servandus: Laudatur *oleum Buxi*, cujus gutt. iij. poterunt exhiberi in conserva *Pæoniæ* jejuno stomacho: Nonnullis placet propinare pro hujusce morbi curatione pulverem seminis *Saponariæ*, vel *Pavi stercoris* cum *Vino* ad unam drachmam, *Theriacam*, confectio- nem *Alchermes*, *Aquam Betonicæ*, *Lilicrum convallium*, *Cerasorum nigrorum*, *Epilepticam Langii*; Pulverem veri *Visci Quercini* ad pondus drachmæ unius commendavit *Boyle*; & Ungulam *Alcis* multis prædicavit encomiis *Lemnius*; sicuti exsiccavit ova *Coturnicis* paulatim *Hoefferus*, ut in pulverem teri possint, & hujus exhibuit pro dosi semidrachmam. Si placeret Amuleta experiri, *Smaragdum* collo apponerem, & radicem *Pæoniæ*. Spinalem verò medullam sequenti linimento inungere bonum erit. R. Olei de Castoreo, Lumbricorum, Rutacei, ana, ʒ. j. Misce. Demùm ad Chirurgiam manum admoveamus, à qua clysteres nonnulli sumendi erunt, ut & Phlebotomia, cautè tamen instituenda in brachio, maximè si in nostro Patiente adsit plethora: Lotiones pedum sæpè suadeo; quibus omnibus adhibitis salus, ut spero redibit, ut ex corde precor. Faxit Deus &c.

CONSULTATIO. XXXVIII.

De Comate.

Mercator ætatis annorum 42. temperiei calidæ, & ficcæ, negotiis suis intensè addictus, mense Octobris Comate soporifero detinetur, ita ut neque tympanis valdè sonantibus, vel quovis alio horribili strepitu excitari à somno vix possit; imò in mensa sedens somniculosus, stupidus, & immotus manet: Nunc Medicum postulat auxilium.

Morbus iste est profunda, & nimia in somnum delatio, ac propensio,

pensio, & Coma somnolentum à Medicis dicitur. Causa hujus morbi est quidquid prohibet influxum spirituum animalium ad organa sensuum, provenit enim hic morbus à spiritibus animalibus propter portiones vaporosas, vel serosas impuras inquinatis, & ad fixationem pronis, intemperiem cerebri frigidam præsupponentibus. Sunt & aliqui, qui hujus morbi causam vaporibus adscribunt narcoticis, spiritibus animalibus torporem inducentibus. Est hæc affectio magni facienda, *somnus enim, & vigilia, utraque si modum exceßerint, malum*, sunt Hippocratis verba in *Aphorism. 3. Sect. II.* Unde Plato dixit somnum multum, nec animis, nec corporibus, neque rebus gerendis condecere; imò hæc affectio ad verum Lethargum, & Apoplexiam perducere Ægrum potest. Quocirca omnes movendi sunt lapides, ut Coma removeatur quanto citius possit, ne æger in pejus ruat. Primò igitur expurgandæ erunt primæ corporis viæ; secundò sanguinis massam depurare convenit; tertio vapores revellendi, & caput corroborandum erit. Quæ ut assequantur, ad Præcticam Medicinam confugere oportet, ut supradictis intentionibus satisfiat. A Chirurgia igitur Venæ sectio desumi poterit, non simplex, sed iterata; & clysteres acriores, unà cum frictionibus, ac cucurbitulis scarificatis: Vesicatoria verò non laudo, cùm mitioribus remediis possimus indicationibus satisfacere; linquamus igitur hæc illis, quibus isti cruciatus sunt in deliciis. Ex Pharmacia alvus poterit solvi ope *pilularum de Agarico, Cochiarum, & Aggregativarum, ana, 3. semis: decoctiones Betonicæ, ligni Quercini, & Sassafrass.* utiles erunt. Sternutatoria proderunt, & spongiola naribus frequenter apponatur, in qua sit *acetum*, in quo bullierint *Nicotiana, Serpillum, & Majorana*; imò *spiritum salis Ammoniaci* naribus appositum nonnulli commendant. Diæta demum suppeditabit aptam victus rationem; parcè bibat Æger, & vinum tenue, oligophorum, album; cibi condiantur *aceto, salviâ, Majoranâ*. Cubiculum lucidum inhabitet; obscuritas enim de facili somnum inducit. Omnia verò prudenti judicio Excellentiss. Dom. Medici ordinarii remittenda erunt.

Eventus.

Nonnulla ex prædictis remediis adhibita fuere, & intra mensis spatium sanitati fuit Æger restitutus; observatum tamen fuit, deficiente Comate, Scabiem obortam esse, quæ tamen spontè intra paucos dies fugata fuit. Nunc sanus vivit, ac Deo gratias agit.

CONSULTATIO XXXIX.

De Cataphora.

Honestus Civis, biliosæ temperici, ætatis annorum XXXIII. apud convivas paulò largiùs vino delectatus, incidit in Febrem continuam cum Cataphora, sive Comate soporifero, adeò ut neque tympanis valde sonantibus, vel fortiter exclamantibus à somno expergiscatur; imò semper somniculosus, stupidus, & immotus manet; interdum aliquæ adsunt convulsiones, Auxilium petit.

Hæc affectio Cataphora dicitur, & est morbus veternosus, sive gravis in soporem delatio: definitur sopor nimius, ac præternaturalis cum febre, ubi Æger noster perpetuò in somnum inclinat, profundè dormit, nec tam facile à somno revocatur. Pars affecta principaliter est portio glandulosa substantiæ Cerebri corticalis, vel ipsum Cerebri meditullium. Causa proxima hujus morbi est prohibitus influxus spiritûs animalis in organa sensuum; ad quod contribuit vel obstructio tubulorum glanduliformium Cerebri, vel eorum compressio: Proque istius affectionis causâ assignari potest vapor narcoticus ad Capitis supradictas partes elevatus, quæ narcosis fortè à nimia vini assumptione tanquam à causâ remotâ dependet. Circà Prognosim dico, per se hunc affectum non esse exitialem; sed quia nunc associatur Febri timendus est. Ad curationem quod attinet; huic potissimum indicationi satisfaciendum, ut viscida cruoris serositas, à qua spiritus animales extricari nequeunt, corrigatur: quod ut obtineatur, ad tres Medicinæ consuetos fontes devenire opus erit; Et primò ad Pharmaciam, quæ utiliter dabit medicamen lenitivum ad
alvum

alvum laxandam, ut verbi gratia *potio ex Manna Clarificata*; postea sumi poterunt *pulvis Cornu Cervi Philosophicè præparati*, *stibium Diaphoreticum cum decocto Caffè* ad vigiliam inducendam. *Aqua Betonica*, *Antiepileptica Langii*, *Cerasorum nigrorum*, ut & *Gelatina Cornu Cervi* utilitatis aliquid afferent. Chirurgia utiliter secabit Venas in brachio, & pede, cucurbitulas scarificatas apponet; frictiones, & balnea ad pedes exercebit. De Vesicatoriis autem nihil. Capitis Capilli abradantur; & Clysteres acres utiles esse poterunt, sicuti sternutatoria. Acetum perfusum super laminam ferream ignitam naribus appositum somnum, expellere ait *Rondeletius in Prax.*: Sic *Oxymel Scilliticum* laudat *Forestus*. Victus ratio sit congrua, sine qua nihil, quæ à Viro Excellentissimo adstanti erit præscribenda, cujus prudentiæ cætera omnia rectè administranda committantur, ut spes salutis à me concepta felicem fortiatur effectum. Faxit Deus &c.

Eventus.

Penè omnia proposita auxilia adhibita fuère, & Æger die morbi undecima superveniente Diarrhœa biliosa convaluit. Nunc sanus vivit.

CONSULTATIO XL.

De Nimia Oscitatione.

Quantam mihi delectationem attulerint literæ tuæ humanissimæ paucis quidem explicare non possum; in ipsis consilium Medicum desideras circa nimiam Oscitationem; habes enim curandam Mulierem honestam, annorum ætatis XLII. virginem, bonæ temperiei, cui menstrua ritè quovis mense fluunt; hæc tamen patitur nimiam Oscitationem: frequens enim in ea admodum maxillæ oris diductio fit cum lachrymarum expressione conjuncta, de qua re petis consilium.

Communem esse Oscitandi consuetudinem hominibus somnolentis, vel è somno evigilantibus ait *Clariss. Theodorus Zwingerus*,
quæ

quæ si frequens non sit, nec admodum violenta, nullam in Medici considerationem venit, nec fuit hætenus, qui remedia contra hanc necessariam, ac consuetam hominibus affectionem postulaverit. Quando verò nimis Oscitatio frequens evadit, tunc incommoda non levia excitare valet; musculi quippe maxillæ valdè relaxantur, & lassitudo toti corpori fit communis; lachrymæ etiam profluunt, & sic visio fermè impeditur; & aliquando capitis jungitur dolor; imò potest ex nimia Oscitatione maxilla ipsa luxari, & ex frequentiori hac affectione febris nuncius haberi potest, ut in me ipso pluries expertus sum, cùm enim frequenter Oscitare incipio, febrem esse ad limina sentio. Causa hujus incommodi est lymphæ quædam viscida, lenta, & salibus acribus prædita, in lymphaticis tubulis musculorum maxillæ subsistens, suis salinis acribus particulis eosdem musculos ad sui contractionem assidue stimulans; Quando autem Oscitatio habetur, glandulæ lachrymales, & ductus salivales comprimuntur, undè lymphæ talium Partium exprimitur: Quia igitur puto, lympham in nostra patiente crassiores, & tenaciorem esse; propter hoc frequens adesse Oscitationem censeo nam difficiliter attenuatur talis lymphæ, atque consumitur. Ut talis curetur affectus, primò expiandæ sunt primæ viæ assumpto aliquo leniente, ut verbi gratia *floribus Cassiæ*, *pulpa Tamarindorum*, vel ipsa *Manna*; postea juvabit appositio Cucurbitularum scarificatarum in dorso; inde commendo usum decoctionis *Salsæparillæ* ad plures dies, eodemque tempore poterit etiam ingredi laconicum; Et musculi maxillæ inferioris spiritu *Cerasorum nigrorum* foveri poterunt; quibus congrua addatur victus ratio.

CONSULTATIO XLI.

De Ægilope.

H Onesta Fœmina suæ ætatis annum trigesimum tertium agens, temperamento bilioso prædita, nonnullis abhinc annis faciei pallore, & humiditate nimia capitis laborare incepit, tandemque exiguo quodam tuberculo inter nares, & majorem oculi dextri angulum suborto, de Fistulâ Lachrymali timens, medicam opem implorat.

Præ-

Præsens affectio a Medicis *Ægilops* vocatur, licet nonnulli *Anchilopem* potius dicant, qui volunt differre per hoc quod *Anchilops* sit tumor in magno angulo oculi nondum ruptus, *Ægilops* verò jam ruptum tumorem significet: Verùm quia penè semper tumor rumpitur, ideò *Ægilops* communiter dicitur *Fistula Lachrymalis*, quia ulcus ex rupto tuberculo de facili sinuosum evadit, & abit in *Fistulam*. Morbus igitur iste, quo nostra hæc *Patiens* afficitur, est abscessus quidam ad angulum oculi, qui naribus propior est in dexterâ parte, pus continens; quod erumpens, aut os potest vitare, aut ad angulum, & usque ad nares pertransire, & intrinsecus destillare. Causa cum aliis ulceribus est communis, humor nimirum acris falsus, lixivialis, & corrosivus, hinc de facili in *Fistulam* abit, & maximè si ulcus fuerit neglectum. Ad Prognosim quod spectat, quanto citius possit, curari debet, ne in *Fistulam Lachrymalem* transeat, tunc enim longissima est, curatu difficilis, & sæpè usque ad vitæ terminum durat; quapropter benè *Franciscus Peccettius* in *sua Chirurgia lib. 1.* ait, quod *Ægilops* est ægrè curabilis, tum ob corporis affecti tenuitatem, tum ob subjecti ossis corruptionem. Observandum tamen non semper tubercula talia suppurari, sed ope internorum remediorum curari posse, ut apparet ex *Consultatione Clariss. Redi pag. 178.*, & in nostro casu idem sperandum.

Cùm *Ægilops* secum semper habeat inflammationem, a principio maximè abstinendum est a vini usu, & Vena brachii propinquioris secanda, & apponendæ cucurbitulæ. Convenit etiam levis quædam corporis purgatio facta ope potionis ex *Manna*, vel *floribus Cassiæ*; post quam laudarem usum ad multos dies decoctionis *Salsæ parillæ*, & *radicis Chinæ* cum modico *ligni Visci Quercini*. Conservæ capitales ad vesperam in usu sint; quibus extractum *ligni Quercini* addi poterit; quæ pro internis remediis satis erunt. Externa verò, sive topica sint, & *Succi Solani*, 3. iij., *Thuris*, 3. j. *Misce*, & superpone: si ad suppurationem devenerit, aperto tumore, ulcus detergatur, carne repleatur, & tandem cicatrix inducatur. Si os corruptum fuerit, suadente *Aëtio*, ignito ferro adurendum erit, vix enim sine tali remedio perfectè *Fistula* sanari poterit, ut a me pluries observatum est; sine enim igne, quæ clausæ fuere, iterum post non multum tempus noviter in *Ægilopem* transferunt. Squammato osse balsamicis

utatur, & cicatrizetur. Linimentum poterit esse *Aquæ vitæ, Mellis Rosati, ana, ʒ. j. Myrrhæ, ʒ. ij. misce, fiat linimentum.* Quando ferrum ignitum Ægilopi apponitur, applicetur fronti, & oculo spongia aqua Rosarum madida, vel stupa cum albumine ovi. Quæ omnia comitetur congrua victus ratio, ut demum saluti Patiens nostra restituatur. Faxit Deus.

CONSULTATIO XLII.

De Madarosi.

Affectum quo Civis noster Ferrariensis tentatur, ex scripto mihi oblato clarissimè intellexi. Madarosis enim propriè vocatur à Medicis, hoc est, defluvium pilorum palpebrarum ortum in nostro Patientē per febrem malignam superatam. Oritur autem hic affectus à viscosis, & acribus humoribus ad ciliorum radices confluentibus, atque radices pilorum erodentibus, quod sæpè accidit post hujusmodi febres mali moris, ut in nostro casu. Morbus autem non est periculosus, sed tantum in facie deformitatem quandam affert, ut in casu præsentī, undè cū corpus supponatur perfectè purgatum, poterit adhiberi sequens unguentum, quo feliciter illinivit palpebras *Petrus Forestus* suo tempore, ut ipse fatetur in *libro de morbis ocul., & palpeb. R. Stercoris Leporis, & Stercoris Hirci, ana, ʒ. i., Corticis Avellanæ ustæ, ʒ. iiij. pinguedinis Ursi, quantum satis, fiat S. A. Unguentum.* Avellanam enim ustam & cum adipe Ursino incorporatam facere nasci pilos aiunt multi. Decoctum *Roris marini* cum vino commendat *Joh. Michael* in *sua Chirurg. Cap. 19.* Succum *Nicotianæ* illitum mirum in modum pilos sistere ait *Joh. Stephanus* in *sua Cosmet.* Cineres genitalis *Asini, pulverem granorum Juniperi, Amygdalas amaras, pulverem murium domesticorum ustorum, & medullam cervinam* laudant Scriptores: è quibus remediis assumat Medicus assistens illud, quod magis sibi placeat. Antequam paginam claudam mihi significatur, Excellentissimum Dominum Assistentem optare habere notitiam de Trichiasi, & scire quid propriè sub hoc nomine veniat? Ad quod breviter respondeo, hoc vocabulum significare pilarem morbum, quando nimirum cum crassa urina veluti pili unà exeunt, qualia

qualia corpora à sedimento crasso, & viscoso possunt concre-
re. Ab aliis tamen dicitur affectio palpebrarum, cum pili inuti-
les, & pungentes innascuntur. Alii tandem volunt esse affectum
quem movet pilus in nutrice cum poculo haustus, & hic non
sedatur, donec pilus, vel pressus spontè exeat, vel cum lacte ex-
fugatur, & vulgò dicitur *Mal del Pelo*. Hinc Medicus assistens,
qui oculatus est testis, qui videt morbi hujus effectus, qui Clini-
cus semper adest, & planè scit quid agendum; agat quod ex arte
est, juxtà morbi indicata. Ego interim &c.

CONSULTATIO XLIII.

De Ophthalmia.

Affectus præter naturam, quo Perillustris Civis noster Fer-
rariensis detinetur, nullus alius est, nisi qui communiter à
Medicis Ophthalmia nuncupatur; adnatæ enim, seu albæ oculi
tunicæ inflammatio adest cum rubore, ardore, dolore, ac lachry-
mis; immò palpebræ quoque inflatæ, ac inflammatæ conspiciun-
tur; adest cibi fastidium, sed pauca febris. Morbus hic à Græ-
cis *ὀφθαλμία*, *Ophthalmia*, dicitur, à Latinis verò oculorum Inflam-
matio, quæ definiri potest, fixatio sanguinis in oculi adnata tuni-
ca cum dolore ab acribus particulis in cruore ipso delitescenti-
bus excitato. Pars affecta est oculus ipse, & in specie tunica
adnata cum palpebris ipsis ad exclusionem aliarum oculi tunicarum
quæ meo videri immunes sunt: notum est enim, Anatome duce,
oculum plures tunicas habere. Causa proxima sunt particulæ a-
cres in sanguine existentes, quæ delatæ cum impetu ad partem
affectam ibi irrumpunt, & consistunt: Remota verò reperiri po-
test in mala victus ratione prægressâ, & præsertim in nimia spiri-
tus vini ingurgitatione vitiosâ; tali enim potu frequenter delec-
tari Patientem nostrum à Domesticis suis, & amicis audiui: Qua-
tenus verò particulæ acres deferuntur ad vascula lachrymalia, hu-
morem ibi detentum eliciunt: Prognosis istius affectionis est,
morbum hunc, etsi dolorosum, tamen non esse lethalem, & plus
doloris, quam periculi habere: si autem diù perseveraret, & adhi-

bitis ex arte remediis adhuc pertinax esset, tunc graves inducere posset effectus, ipsamque cœcitatem causare: Indicationes curativæ sunt, depurare cruorem à particulis acribus, ibi stagnantes sanguinis moleculas dissipare, atque partes ipsius oculi affectas corroborare; quibus ut satisfiat ad præsidia accedere oportet remediorum. Chirurgicus fons primo in limine nobilissimum remediorum genus, nimirum Venæ sectionem, suppeditat, sine qua nullam fuisse curatam ophthalmiam ait *Joh. Michaëlis in Prax. Clinic. special. cap. 7.* educatur ergo sanguinis libra una è cephalica brachii dextri: Insuper cucurbitulæ scarificatæ adhibendæ sunt, quæ magni erunt usûs, ut & fricationes, & clysteria. Ex fonte Pharmaceutico mihi se offert lenitivum ad alvum solvendam; inde laudarem *serum caprillum colatum* per plures dies, in quo prius dispersæ sint aliquæ *guttæ spiritûs salis Ammoniaci*. Vesperè *emulsionem quatuor seminum frigidorum majorum* commendarem ad hoc, ut spicula particularum acrium, à quibus tristis oritur sensatio, obtundantur: Ante somnum conveniet cochleare unum sequentis *Conservæ R. Conservæ Anthos, Euphrasie, Florum Tunicæ, Betonicæ, ana, ʒ. j. Misce.* Quin etiam masticatoria, & tabaci usus proponendus erit: Oculi quoque abluantur *aqua Fœniculorum, florum rubi albi, Euphrasie*, quibus *pulvis salis Saturni, Croci metallorum* vel saltem *Tutie præparatæ*, vel *flores Zinck* addantur: *Aquam panis* ad tres solum guttas in oculos instillandam laudat *Malpighius*. Circa diætam, Ægrotus noster congruâ utatur victûs ratione, & omninò se abstineat à vino; parcum sit prandium, & cœna parcissima; & uno verbo victus sit tenuis. Hæc autem pauca habebam pro salute Civis nostri Ophthalmici, quæ à Deo O. M. salutaria exopto.

Eventus.

Multis ex istis adhibitis remediis XX. dierum spatio multum Æger utilitatis percepit, atque mutato aëre optimè sanatus fuit.

CONSULTATIO XLIV.

De Suffusione.

EX his, quæ pro Nobilissimo Viro nostro Patientē luculenter, nec non prudentissimè scripta sunt à Clarissimo Medico suo ordinario, in eam sententiam facilè descendo: Virum hunc Illustrem suffusione laborare; visus enim oculi sinistri obtenebratus est, & valdè impeditus in concipiendis distinctè objectis visibilibus, immò nubecula quædam ante oculum ipsum apparet, quæ de die in diem augetur, quinetiam in oculo dextro prodromus alterius nubeculæ incipit manifestari. Affectio hæc suffusio nuncupatur, & vulgò *Cataracta* dicitur, quæ definitur, juxta *Malpighium*, congestio quædam fluidi in solidum, & opacum corpus in aqueo humore concretum, quo rectus luminis transitus in interiora oculi impeditur, & successivè actus videndi tollitur. Causa istius affectus est humor crassus, & lentus, qui derivat ab ipsarum tunicarum oculi vasis: locus affectus est totum illud spatium, quod intercedit inter corneam, & crystallinum, quia in toto illo spatio potest concreescere suffusionis materies; quia verò incongrui, ac crassi istius humoris distillatio incipit in dextro oculo, sic nebula principium emergit. Vitæ autem genus, & præsertim nimia applicatio, & immodicum studium, ut audio, in nostro nobili Ægrotante, hoc malum excitavit; à nervorum enim nimia irritatione, fluidorum motus vitiat fuit, & per consequens Ventriculi coctio non ritè absoluta; sicque inquinato chylo, sanguis fuit infectus, & cumcrementa non sint eliminata circulationis medio, in partem languidam oculi per vasa tunicarum ejus irruere in partem affectam. Ad Prognosim quod attinet, notandum cunctationem in curatione istius morbi esse periculofam; neglecta enim, sive protracta curatione timendum ne cæcitas adveniat; jure & merito igitur Nobilissimus noster Ægrotus præsentem affectum non parvi facit, & timet, ne hæc incipiens suffusio majora mala minetur, quæ tamen potest digeri suadente *Galeno in Method.*, nec sine spe hanc esse affectionem docuit *Joh. For-tis in suis Consult.* Ut citò igitur curatio absolvatur, indicationes Me-

dicæ erunt considerandæ, quæ, meo videri, sunt tollere illos viscidos, & tenaces humores in oculo existentes, depurare fluida ab inquinamentis, firmare partem affectam, & totum purgare caput; monuit enim *Galenus in Meth.* non licere oculum curare ante caput, neque caput ante totum corpus. Ad satisfaciendum igitur istis indicationibus curatio debet institui per consueta Medecinæ brachia, nempe per Pharmaciam, Chirurgiam, & Diætam: Et quoad primam conveniet alvum lenire bis in mense *Pilulis de Succino Cratonis*, quarum descriptio rectè, & concinnè habetur apud *Malpighium in Consult.* 25. de cætero caveat Æger à vehementibus solutivis, ne major fiat colliquatio humorum, & eorum motus maxima concitatio: Convenient ad plures dies *succi depurati Sonchi, Cichorei, & Borraginis cum sero Caprino colato; Conservæ Betonicæ, & Euphrasie* utiles erunt antè, & post cœnam. Ad partem affectam externè sequentia propono; *urinam pueri, pulverem florum Zinci in aqua Fœniculi, pulverem croci metallorum in aqua florum Rubi albi, & sequentem pulverem in aqua Euphrasie* propositam à *Joh. Michaëli* in sua *Prax. Clinica generali*; & *Aquæ Chelidonie*, ʒ. ij. *Vitrioli albi, Tutie præparatæ, Sacchari cand. ana*, ʒ. j. *Vitri antimonii in tenuissimum pulverem redacti parum, & misce pro usu.* Sunt qui felle & pinguedinem mustelæ *Piscis* commendant, immò *D. Osvaldus* aquam specificam in hoc affectu parat ex *ovis formicarum & felle mustelæ piscis*. A Chirurgico fonte poterit desumi Venæ sectio semel tantum in pede instituenda, & cucurbitulæ scarificatæ. Frequentes sint frictiones dorso faciendæ, & vespere ante cœnam lotiones pedum cum aqua tepida. Dictis omnibus addenda erit congrua victûs ratio, ita ut caveat oportet nobilis Ægrotus noster ab aëris inclementia, ab eduliis vaporosis, & frigidioribus, & præsertim leguminibus. Abstineat à vino generoso, ab exercitio post cibum, & à somno diurno: fugiat pariter comotationes; sed alacri vivat animo; vacet à curis, & studio: Condimenta acida, austera, & piperata suspecta habeat: tandemque Veneris usum evitet, & abhorreat. Et hæc à me dicenda erant in proposito casu.

Eventus.

Proposita remedia ex parte fuere adhibita, ita Excellentissimo Medico Curante concludente, & ita quadraginta dierum spatio Nobilissimus Patiens pristinam fanitatem refarcivit; nunc sanus vivit.

CONSULTATIO XLV.

De Suffusione spuria.

Nobilis Civis annorum ætatis XLIII. post Febrem Quartanam pertinacem, conqueritur de quadam caligine oculorum, & visus diminutione, & paulò post de omnimoda ejusdem sensus abolitione, adeò ut, nec adstantes, nec colores discernere possit, atamen recedente paulatim Quartana, oculorum obtenebratio pariter diminuitur. Nunc, ut visum omninò recuperet, consilium petit.

Talis morbus, vel potius symptoma olim observatum fuit à Clariss. *Waldschmidio*, & dici potest Suffusio symptomatica, & spuria, & solet comitari febriles paroxysmos. Hoc autem derivare potest à nimia dilatatione pororum vasorum oculorum; illà quippe dilatatione vasorum, non solum subtiles sanguinis partes, sed & crassæ intrant in oculos, & humores, quæ illos alterant, & lædunt; verùm cùm illæ partes sint pauciores, &, ut ait citatus *Waldschmidius*, adhuc satis fluxiles, sic facilè discutuntur, & dissipantur; undè curatio facilis est, nam absente febre, tale symptoma per se cessare debet. Partem tamen affectam corroborare debemus, & omninò inhibere redditum Quartanæ Febris. Sequentia igitur adhiberi poterunt: *Vinum Ophthalmicum Plempii*, cui addatur modicum *Cre-moris Tartari*, *Croci metallorum in aqua Euphrasie*, & *florum Rubi albi*; *flores Zinci*, *Tutia præparata*, *Crocus cum aqua Fœniculi* plurimum valent. Appositio Cucurbitularum scarificatarum valde utilis est, ut aiunt multi. Alvus lubrica servetur, morbis enim oculorum affectis alvi profluvio corripì bonum ait *Hippocrates*. Quibus
omni-

omnibus sit adnexa conveniens vivendi ratio, quæ sit ciborum bonæ, ac facilis coctionis; & hæc omnia in hujus nostri Civis salutem D. O. M. concedente cedant.

CONSULTATIO XLVI.

De Amblyopia.

EX consilio Dom. Medici domestici ad nos delato, & ex ipsius verbis Dom. Patientis accepimus, affectionem curandam esse *Ἀμβλυωπίαν* à multis *Ἀμαύρωσιν* dictam, à Latinis *Obscuritatem*, cum nulla manifesta affectio in oculis in conspectum prodeat, sed pupilla pura, atque incolumis respiciatur; & tamen Illustris Patiens obscuritate in oculo afficiatur.

Hic affectus est totius lucis in oculo impedimentum, & fit cum oculi lux extinguatur ex defectu spirituum, quorum defectu necessario frigent, & rigent oculi, & ut plurimum oritur à nervorum opticorum obstructione imperfecta; quod si obstructio perfecta esset, totalis visus deperditio haberetur. Causa itaque hujus affectionis est crassus, & viscosus humor illapsus in nervos ad visionem facientes, ex quo spiritus ad visionem celebrandam non possunt delegari; nec solum carentia spirituum hujus morbi est causa, sed multò magis impeditur visio, quia species pertransire non possunt. Itaque si Ægrotus ab hujusmodi vitio curari debet, visciditatem illam nervos obstruentes tollere oportet, & quoniam jam non perfecta est obstructio, quatenus scilicet visio non est abolita, sed periculum sit ne augeatur, & ad perfectam Amaurosim, seu omnimodam cœcitatem fiat transitus, ideò quantò citius curatio subeunda; quam quidem perfectè consequi arduum esse timeo; quoniam in occulto pars affecta jacet, & partes oculorum sunt admodum exiles, ac delicatæ. Sed ad curationem vsniamus, & primò à Pharmacia desumenda erit communis purgatio, quæ haberi poterit medio *pilularum Cochiarum, Aggregatarum, Lucis, ana, ʒ.ʒ. Misce, fiant Pilulæ VI.* quæ assumantur cum juscule mane jejuno stomacho. Purgato corpore, Phlebotomia instituatur in brachio dextro, inde ad usum decocti sequentis deveniendum erit. *℞. Ligni Sassa-*

Sassafras, *Chinæ*, *Lentisci*, *Salsæparillæ*, *ligni Quercini*, ana, ʒ. i. incisa divide in XV. partes æquales, quarum una quovis mane bulliat in aqua *Fœniculi*, & coletur atque jejuno stomacho sumatur. Collyria quoque erunt usurpanda, confecta ex aqua florum *Rubi albi*, *Cheledonæ*, *Euphrasiæ*, ac *Sief albi sine opio*; cucurbitulæ scarificatæ scapulis apponendæ. Pariter vinum *Euphrasiatum* potandum in principio mensæ, vel mane jejuno Ventriculo, cujus descriptio sequens est; ℞. *Foliorum Euphrasiæ siccæ*, ʒ. j. *Radici Fœniculi*, ʒ. ij. *Foliorum Cariophyllatæ*, ʒ. vj. *Betonicæ*, *Verbenæ*, *Majoranæ*, ana, ʒ. ʒ. incidantur, & in doliolo collocentur; affunde vini albi generosi mensuras XII. vel vindemiarum tempore affunde mustum recens, & finito effervesce; poterit & ad gratiam addi *Cinnamomum*. Nonnulli fonticulum aperiri in brachio jubent, sperantes multum levaminis. Balneum aquæ tepidæ ad crura, & pedes ante somnum sunt qui laudant ad visum acuendum, quod balneum Phlebotomiam siccam dixit *Clar. Dom. Jo. Masseneau* in sua *Medic. Natur. cap. 120.* Masticatoria, & Errhina in usum etiam ducenda, quatenus tenax per os, & nares humor excernitur, & licet materiam conjunctam non tollant, deflectunt tamen humores ad palatum, & sic à parte affecta trahunt, cum nervi optici ab inferiori cerebri parte oriantur; unde masticatoria, saltem ratione vicinitatis, convenire videntur. *Nicotianæ* usum non improbo, imò abluere oculum spiritu vini valdè conferre observavi. An autem ablutio oculorum sit facienda calida, an frigida? respondeo mihi arridere potius calidum fotum, quam frigidum, autoritate *Hippocratis* fretus, qui scribit calidum oculis convenire, & *Galenus* oculis frigidum mordacem esse dixit in *lib. 4. de simpl. Med.* Hinc *Fabricius Hildanus* ex lotionem aquæ frigidæ nobili cuidam debilitatum, & obscuratum visum fuisse notavit. His omnibus accedat idonea vivendi ratio morbo, & illius causæ adversa, juxta qualitatem, & quantitatem. Læto Æger sit animo, tristitia enim nihil prodest, sed nocere poterit. Quæ omnia Præstantiss. Dom. Curantis consilio, ac prudentiæ subjecta volo.

Eventus.

Proposita remedia ex parte fuerunt adhibita, & Pateriens melius se habere incepit, mox aëre mutato perfectè convaluit.

CONSULTATIO XLVII.

De Visione imminuta.

Illustrissimus Comes annum agens 33. nonnullis abhinc annis de Visione imminuta dolet, atque conqueritur, ita ut objecta etiam proxima ferè non discernat; ideò Medicum auxilium postulat.

Iste morbus per se jam patet, & Visio imminuta vocatur, cujus causa erit vitium pupillæ, & crystallini humoris, debitam luminis admissionem varians, ratione exuberantis humoris aquei, qui antè corneam tunicam eminere facit, undè in nostro Nobili Patientè oculi prominentes observantur; & *Cl. Malpighius in Consult. 26.* docuit illos, qui longius non distinguunt objecta, prominos oculos habere: Remotæ verò causæ dyscrasiam humorum pro fomite agnoscunt, undè debilitatis oculi partibus, vitiantur illius humores; & hoc in casu nostro à nimio studio, & applicatione provenire puto, quemadmodum etiam alii Medici ante me crediderunt, dicendo post vehementem applicationem, & diuturnum studium hunc affectum accidisse. Ad Prognosim quod concernit, iste morbus certè non est mortalis, attamen periculum cæcitatis minatur, ideòque ad citam curationem deveniendum antequam affectus iste altius radicetur. Indicationes igitur erunt, exuberantem aqueum humorem minuere, humorum dyscrasiam corrigere, & partes oculi debilitatas corroborare; quæ omnia, ut celeriter assequantur, opinor, quoad Chirurgiam, cum *Clariss. D. Joh. Forti in Consult.* nullam sanguinis missionem prodesse posse; utiles tamen erunt frictiones dorso à nucha incipientes, clysteres, & frequentes lotiones pedum aqua calida ante cœnam faciendæ: Sunt qui aurium extremitatis perforationem, ut usurpatur in foeminis

minis venustatis gratia, commendant. Ex Pharmacia primò levem primarum viarum expiationem faciendam sola potione ex *Mana clarificata* suaderem, inde pro alterantibus ad quinque dies uterer *jusculo* in quo bullierint *folia Betonicae, Cichorei, Borraginis* ad sufficientem mensuram: Inde sequentem pulverem à *Montagnana* commendatum ante cibum ad mensuram medii cochlearis exhiberem ad multos dies. ℞. *Macis*, ʒ. i. *Euphrasie*, ʒ. iiij. *Misce fiat Pulvis subtilis S. A.* Bonus etiam erit odor frequens *Majoranae*; *Conservae Euphrasie, Anthos, Betonicae* utiles erunt, sicuti decoctum *radicis Caryophyllatae, Rutae, Chelidoniae, Verbenae, florum Cyani, Anthos, & seminum Fœniculi*; Valdè juvabit oculos madefacere aqua sequenti videlicet. ℞. *Aquae Rosarum*, ʒ. i. *Salis Ammoniaci*, ʒ. i., *Sacchari cand.* ʒ. i. *Vitrioli albi* ʒ. ʒ. *Albuminis ovi*, ʒ. ʒ. *Misce*, probè agitando in pelvi aurichalcea. Omnino postea existimo, vitreorum conspiciendorum usum convenientem, in hoc casu prodesse plurimum, & hoc duplici de causa, primò similitudine quadam substantiæ oculos reficiunt, & in statu suo conservant, secundò quia radios, quibus visio perficitur, dispergi non ità subito sinunt. Tandem congrua victûs ratione opus erit; *Hordeum*, & *Oryzam* commendo, carnes suillæ prohibentur; *Vinum* sit medicatum *Ligno Rorismarini, Lentisco, & Quercino*: cœna sit levis; fugiendus est somnus diurnus: Alvus fervetur lubrica, & animo læto sit æger; sic enim Deo favente melius in dies ut spero se habebit.

Eventus.

Optima vivendi ratione observata, multisque ex præscriptis remediis adhibitis non tantum in pejus visionis vitium non cecidit Ægrotus noster; verum sensibiliter visum recuperavit, & semper melius in dies se habet.

CONSULTATIO XLVIII.

De Surditate.

EX enarratis in consultatione diligentissima Excellentissimi D. Curantis, Viri equidem Præstantissimi, colligo, Reverendum Dominum surditate laborare: Incepit enim mense Maii conqueri de tinnitu, ac fonitu aurium, quibus accessit dolor cum auditûs imminutione, tandemque omninò surdus evasit; nunc de agendis pro salute consulit.

Morbus hic manifestus est, & surditas vocatur, Græcè *Κόφωσις* *Kophosis*. Provenit hic affectus à deficiente spiritus animalis per nervum acusticum affluxu, qui tollitur, ut plurimum, à materia viscida, & crassa super tympanum stagnante. *Villisius* putat à tympani relaxatione; *Clariss. D. Valsalva Amicus meus* semper cōlendus in surditate invenit totum tympanum ab informibus fibrosis veluti excrescentiis occupatum. In præsentī verò nostro Ægro tante causam, materiam crassam super tympani membranam agnosco, quæ sonum impediendo auditum tollat; immò puto, nervum ipsum auditorium obstructum esse à viscido humore, unde spiritui animali transitus intercludatur. Ad Prognosim quod attinet, primò dico, surditatem hanc morbum esse chronicum, & difficile curatu; unde surditatem affectum esse, qui rarò curationem admittat, scripsit *Joh. Fortis in Consultat.* Attamen quia in nostro Patientē Ætas consistit, & vires validæ sunt, salus erit speranda: quocircà indicationes sunt considerandæ, quæ videntur esse, restitutio influxus spiritus animalis ad aurium organa interna ut sequatur auditus, ablatio humoris crassi supra tympanum morantis, revulsio ipsius liquoris peccantis à parte affecta, & demum partem laborantem corroborare, quæ omnia ut faciliter assequantur, ad Pharmaciam, Chirurgiam, & Diætam est deveniendum: Et primò quoad Pharmaciam, debet alvus solvi *portionē* nostra *Magistrali solutiva ad libram semis*, indè, quotidie alterans exhiberi, quod sit jusculum carnis, in quo prius bullierint *folia Endiviæ, Borraginis, Betonicæ, & Cichorei*. Postea deveniendum

dum erit ad usum decocti sudorifici in hunc modum parandi: *℞.* *Ligni Visci Quercini, medullæ Guaiaci, Salsaparillæ electæ, ana, ʒ. ij. aquæ communis, Lib. VIII. incisa misceantur & infundantur per horas XXI., inde bulliant ad consumptionem tertiæ partis, & colatura fervetur pro quinque vicibus, hora una sumenda ante ingressum hypocausti; & hujus decocti usus per viginti dies fervetur. Con- servæ capitales in usu sint, ut Betonica, Salvia, Tunica, Liliorum convallium, Anthos &c. Errhinum pariter tanquam utile propo- no, quod remedium scripsit olim in surditate Joh. Fortis, & se- quens est: *℞.* *Pulveris Majoranæ, Ireos Florentinæ, ana, ʒ. ij. Nigellæ ʒ. j. misce. Oleum auribus instillandum commendatur à Joh. Mi- chaëli, quod præparatur ex vermibus repertis in corticibus ligni Quercini. Granum unum Moschi optimi in bombace permixtum auribus indatur, quod remedii genus à Foresto laudatur. Succus Hederæ terrestris depuratus cum vino albo potenti instillatus mirifi- cè commendatur à Zecchio in consult. & à Burneto in Thes. medic. Balnea sulphurea poterunt usurpari suadente Riverio. Expertus non semel fui fellis Bovis usum, adipem Anguillæ, & allium coctum in auribus ponendum; Chirurgia necessariam exhibebit sanguinis missionem in brachio dextro, & Hirudines sedalibus Venis appli- candas, & quatenus alvus non respondeat, Clysteria proderunt communia, ac frictiones dorso sub vespere faciendæ juvabunt. Diæta denique dictis omnibus correspondeat, & præsertim Ager caveat ab alimentis vaporosis, ab aromatibus, Allio, Cepis, Fœ- niculis, Apio, Lactuca; sicuti etiam à vinis generosis: cœna sit parca. Exercitium moderatum proderit ante cibum.**

CONSULTATIO XLIX.

De Surditate.

NON obscuri nominis Vir annorum ætatis XLVII. bonæ tem- periei, modò Vertigine, modò capitis dolore laboravit, exinde in aurium tinnitum, tandemque in Surditatem incidit, quæ à multis diebus eum vexat, absque febre, & ullo alio corporis sui incommodo: nunc medicam opem desiderat.

Morbus iste Surditas nuncupatur, & Græcè dicitur κώφωσις; & definitur abolitus, vel valdè imminutus auditus: cujus affectionis causa in nostro Cive est, meo videri, defectus spiritus animalis per nervum acusticum affluxûs, quo internè auditus peragitur; si enim proveniret vel a tympano vel aliis partibus istius organi, debuisset præcedere dolor, tumor, & ulcus in parte, quod non accidit; ideòque putandum causam hujus affectionis ab interno provenire, quatenus jam caput suam valetudinem ostendebat, antecedentibus Vertigine, Cephalæa, ac aurium tinnitu: Cùm autem duplex sit hic affectus, alius in fieri, & fugax, atque levis, alter habitualis, stabilis, ac fixus, qui est penè incurabilis; ideò in prima classe ponendus hic, de quo agimus, & per consequens sanabilis, maximè quia altas non egit radices. Accuratè igitur erit ineunda curatio, & primò purgandum communiter erit corpus, inde capitis intemperies tollenda, nervus a viscida materia spiritus impediante liberandus, ac denique pars affecta corroboranda. Quæ ut assequamur, primo è Chirurgico fonte Venæ sectio instituenda in brachio dextro, & educendæ erunt uncia decem sanguinis, quam etiam commendavit *Joh. Fortis in suis Consult. cent. I. cons. 88.* Hirudines etiam ad hæmorrhoides utiles erunt, & ultimo cauterium in brachio apponendum laudo. Frictiones, & frequentes pedum lotiones in aqua tepida faciendas commendo. Ex Pharmacia verò, desumantur primò *Potio Clarificata ex Manna*, vel *Cassia*; pro alterantibus utatur *decocto Betonicæ, Primulæ veris & Endiviæ*: Inde ad fortiora deveniendum, ut ad *decoctum ex Salsaparilla electa, Visco Quercino, ligno Sassafras, foliis Roris-marini, Betonicæ*, & si tali tempore sudare in hypocausto vellet, erit utile. Topica etiam non inutilia erunt, ut *Moschus in bom-bace mixtus, succus hederæ depuratus cum vino albo generoso instillatus. Spiritus Vini* in quo *Elleborus albus* infusus sit magnam habet efficaciam, suadente *Lazaro Riverio*: *Oleum Castorei* præterea, *oleum Amygdalarum amararum, oleum ex semine Been, Petroleum, Cepam coctam sub cineribus, oleum de spica* poterunt experiri, utpote commendata remedia topica a variis Medicinæ Magistris: Insuper *Majoranæ succum* in aurem instillatum commendat *Donzellus*, & summis laudibus extollit. Addatur insuper congrua victus ratio

CONSULTATIO L.

De Hypocophosi.

Affectum, quo pertinaciter diu Illustris Civis torquetur, esse Hypocophosim clarissimè apparet ex morbi historia diligenter exarata, atque mihi nuper transmissa, ita ut de morbi essentia, & quidditate vix quidquam dubitari possit: Æger enim conqueritur de auditu gravi, ac difficili. Iste morbus Græcè vocatur *υποκοφωσις*, Latinè subsurditas, sive clarius difficultas auditûs: quæ differt a surditate gradu solum: Causam istius morbi, dicerent Veteres, esse humidam intemperiem tympani, & nervi auditorii, excitatam ab humoribus frigidis, crassis, ac pituitosis ad aures decumbentibus, qui audiendi functionem impediunt: Ego tamen oriri talem affectum puto ex obstructione nervi auditorii, quatenus lympa tenuis sese insinuat tubulis minutissimis nervi auditorii, unde coagulatur, incrassescit, & ita spiritus animalis influxus prohibetur. Iste morbus per se non est periculosus, sed si altius confirmetur, poterit in apertam surditatem transire. Debemus itaque, quantò citius fieri possit, curationem aggredi, quæ utique peragetur confugiendo ad tres consuetas Medicinæ Practicæ Classes, nimirum ad Pharmaciam, Chirurgiam, & Diætam: Et quoad primam, universalia in usum ducenda, ut purgantia, diuretica, ac diaphoretica; poterit enim primò uti *Syrupo Magistrali Solutivo ad 3. VI.* adde in infusione *Agarici Trochiscati 3. ij* ad alvum laxandam; inde pro alterantibus exhibeantur iuscula, in quibus bullierint *folia Salvie, Betonicæ, Primulæ veris & Acetosæ*: vespere autem *pulvis Oculorum Cancris præparatorum, & Stibium Diaphoreticum.* Decoctum *Salsæparillæ, radicis Chinæ, & Visci Quericin* ad multos dies juvabit. Externè verò applicari poterit *oleum Been, Fel Bovis, adeps Anguillæ, Essentia Castorei.* D. *Waldschmidius* laudat gossypium auribus impositum imbutum *spiritu Formicarum*: Emplastrum de *Betonica* Capiti impositum com-

commendo: *Succus cepæ* in aures instillatus aliquando opem tulit; sicuti *aqua Reginae Hungariae*, & *Spiritus Vini* teste *Frambesario*. Fomenta ex *Absinthio*, *Majorana*, *Origano*, *Stæchade*, & similibus aliquem præstant usum. Suffumigia quoque adhiberi solent a pluribus Medicinæ Professoribus parata ex *Succino*, *Majorana*, *Serpillo*, *Absinthio*, *Origano* &c. Ex Chirurgia unicam Venæ sectionem instituerem in brachio dextro ad unc. X. sanguinis hauriendas; fricationes, & curcubitulæ scarificatæ utiles erunt, sicuti pediluvia sub vesperam exercenda aliqui sunt, qui præscribunt. In omnibus porro aurium affectibus suadente *Valdschmidio* conveniunt Fonticuli, licet sint nonnulli Medici, qui cauteria damnent in quocunque morbo; attamen si hoc remedii genus arrideat Excellentiss. Dom. Curanti, fiat. Diæta demùm sit accommodata, & Vinum medicatum sit *Sassafras*, *Quercino*, & herbis capitalibus. Deus autem Patienti nostro præsto sit.

CONSULTATIO LI.

De Ozæna.

ET si Civis Illustris anteaactis temporibus adversâ, eâque variâ valetudine fuerit perturbatus; attamen sanus factus est, nec aliud patitur incommodum, quam Ozænam in naribus, à qua liberari desiderans meum poscit consilium.

Hic morbus Ozæna dicitur, & est ulcus narium putridum, tætri odoris halitum emittens, & definiri potest, exulceratio plerumque maligna interna, vel externa nasi cum fœtore, & saniei profluvio, magis, vel minus purulentæ, cujus causa est ichor lymphaticus acrior, & corrosivus partes narium depascens, unde adstantibus tætri spiritus contagione molestus est Æger; immò ipse sibi grave olet: quod si Patiens Lue Venerea fuerit antea vexatus, tunc curatu difficile erit ulcus, & timendum ne corrumpat cartilagineas, & partes narium osseas, quemadmodùm ego pluries observavi in variis Lue Gallica affectis, quod tamen in nostro casu haud timendum, dummodò fuerit à Lue supradictâ immunis. Iste morbus periculosus est, primò ob diuturnam fluxionem, secundò

cundò ob periculum erosionis ossium narium; hinc *Peccettius* ait, omnia ulcera narium curatu esse difficilia, quia ut plurimum fiunt cacoethæ & ob humiditatem assiduè ad partem defluentem, & *Corn. Celsus* de Ozæna verba faciens inquit: *sciri quidem debet vix huic malo succurri.* Nihilominus tamen quædam tentanda erunt, ut sanitas acquiratur. Indicationes curativæ sunt, peccantes humores corrigere, partem affectam corroborare, & ad naturalem statum reducere; quæ ut assequantur ad tres praxeos Medicæ fontes devenire oportet; & primò quod spectat ad Pharmaciam, primæ viæ expurgentur *Manna*, vel *Syrupo Magistrali Solutivo*, inde sequenri apozemate pro alterantibus quotidie utatur; ℞. *Radici Cichorei, & Graminis, Foliorum Betonicæ, Primulæ Veris, Agrimonie, Seminis Fœniculi*, decoque in aqua *Hordei, & coletur*; cui decocto addatur ℥. i. ℞. *syrupi de Cichoreo cum Rhabarbaro.* Corpore sic purgato post phlebotomiam, exhiberi poterit decoctum *Salsæparillæ, Sassafras, & radici Chinæ.* Ad ulcus postea apponi poterit sequens remedium, ℞. *Succi Plantaginis, Geranii, aquæ Ranarum-ana, ℥. j. Misce.* *Galenus Calaminthæ succum præscripsit, & Manardus noster ad hanc affectionem urinam Asini apposuit, idemque laudant Pareus, Mercurialis, & Burnetus.* Si autem pertinaciter sequeretur affectio præsens, utatur aqua sublimata, qua ulcus abluendum ter in die, cujus descriptio talis est; ℞. *Aquæ Plantaginis, ℥. iiij. sublimati crudi pulverisati, gr. xij.* bulliant in phiala vitrea ad mediæ partis consumptionem: potest autem augeri, vel minui Sublimati quantitas, prout fortius, vel debilius medicamentum voluerit haberi. Talis autem formula describitur a *Laz. Riverio in sua prax. lib. 4.* Ulcere porrò probè deterfo, ad illius exsiccationem veniendum, ad quod confert *pulvis Rosarum rubrarum.* Multi sanationem Ozænæ ponunt in Aqua Vitæ. Victus sit ex carnibus optimi succi, recentibus ovis; post cibum semper sumat *conservam Rosarum*, & pro potu utatur vino albo optimè diluto. Sic enim spero, ut *Patiens noster* a fœda Ozæna liberetur. Quod faxit D. O. M., ut ex corde precor.

CONSULTATIO LII.

De Ozæna.

Magnus Medicorum Princeps *Hippocrates lib. de Arte* scripsit, Medicinæ Professores, si in externarum partium morborum cognitione fallantur, nullam meriri excusationem, quia eorum essentia oculis ipsis patet, ut in casu nostro: nemo enim est, qui ambigat Civem nostrum ulcere pessimo narium vexari: Æger ipse sibi grave olet, & adstantibus tetri spiritûs contagione molestus existit. Hic affectus Ozæna vocatur, quæ nihil aliud est, quam exulceratio maligna interna narium cum fœtore, & profluvio saniei, usque adhuc sine corruptione ossæarum nasi partium: cujus causa est acidum quoddam acre nares erodens, & sanguinem ex arteriolis effluentem; non solum in pus vertens & corrumpens, sed intolerabilem fœtorem produciens: undè præcipuum symptoma, quod in nostro Patientè observatur, est fœtor narium; qui contingit, quatenus aër exspiratione mediâ expressus è pulmone, dum angustias narium ulceratarum pervadit, & secum trahit halitus putridos separatos à loculis glandularum nasi: & aliquandò dependet hoc vitium ab ipsa narium structura, sicque in depressis naribus facile contingit; aliquandò verò à vitio totius corporis, ut in casu nostro. Ad Prognosim quod attinet: hæc ulcera difficulter curantur, undè narium pinnae, interstitiumque, vel ipsa etiam ossa corrumpi solent. Si verò procederet à Lue Venerea, quod non credo, tunc esset penè incurabilis, nisi Celtica Lues simul edomaretur. In Ozæna autem præsentì curanda agere debemus, ut ulterius prohibeatur materiæ vitiosæ accretio: Institutâ debitâ victus ratione, purgatione, venæ sectione, & capitis corroboratione tollenda est humorum putredo. Et primò alvus exoneranda erit medicamento leniente, verbi gratia, *Potione ex Cassia clarificata*; deinde pro alterante utatur *jure pulli Chalybeato*, in quo *folia Borriginis, Melissæ, Absinthii, Cichorei* ebullierint. *Serum Caprinum* colatum laudat *Malpighius*: masticatoria prodesse poterunt. Venæ sectio semel tantum

inf-

instituat: abluatur pars affecta *aqua chalybeata*, & *vino austero*, in quibus *folia Rosarum*, *Lentisci* macerata sint. Ulcus sequenti remedio attingatur suadente *Dolæo*: *℞. Myrrhæ, Calchitidis, ana, 3. v. Aluminis scissilis, gallarum immaturarum, squammæ æris, ana, 3. ij., Aluminis rupei, 3. j.* Coquantur in sufficienti quantitate Aceti in vase æneo; & ferventur ad usum. *Asini lotium* attractum laudat *Mercurialis*: *Aquam Viridem Th: Burnetus Succus Solani, Geranii, & Sempervivi* utilis erit. Ego per mensem *aquam Pomponatii sibiata* exhiberem, ex qua magna erit expectanda utilitas. Victus ratio sit attenuans, parum carnibus utatur *Æger* noster, & motu locali multum exerceatur. Et hæc pauca sint à me dicta pro integra nostri Patientis salute.

CONSULTATIO LIII.

De Narium Hæmorrhagia.

Mulier XXXIX. annorum, Vidua, temperie bonâ prædita, ad actiones omnes tam animales, quam vitales promptissima, unde potius virilem, quam fœmineum animum prodit: licet parcè semper per uterum expurgata, attamen fœcunda, nam tres habet filios; nonnullis abhinc mensibus frequenti Narium Hæmorrhagia corripitur, modo citiùs, modo tardiùs sistente, cum modico capitis dolore, aurium tinnitu, ac faciei rubore; Consilium poscit, ut à tali affectione liberetur.

Morbus iste definitur, immodica, & præternaturalis sanguinis è naribus profusio, apertis, ruptis, vel exesis Venis, aut Arteriis eo desinentibus; eas autem aperit per anastomosim copia nimia cruoris, acrimonia ejusdem per diæresim, ob vasorum verò tenuitatem, & eorum tunicæ raritatem per diapedesim exit cruor; sicque tripliciter potest contingere sanguinis Hæmorrhagia: in casu autem nostro per anastomosim sanguinem exire puto, quatenus ex nimia copia exit sanguis in nostra Patiente, idcirco benè *Galenus*, ait profluvia sanguinis semper fieri, vel affecto cruore, vel vase; Quapropter sanguinis effusionem semper esse præter naturam, exceptis Menstrualibus, & Hæmorrhoidalibus, si tamen moderatæ

fuerint istæ fluxiones : Et *Hippocrates in aphorism.* ait : sanguinem supra efferri qualemunque semper malum esse. Sistendæ ergo sunt istæ sanguinis effusiones ; incrassandus cruor , & ad partes Uteri deducendus : quæ ut acquirantur, ad consuetos Medicæ praxeos fontes deveniendum erit; & primò Venæ instituatursectio in pede, & præsertim in actu ipsius Hæmorrhagiæ, sic enim magis operatur. Sunt qui cucurbitulas laudant scarificatas, quas non improbo : si opus sit alvum solvere, advertendum cum *Joh. Forti* abstinendum esse ab Aloëticis, cum hæc habeant facultatem aperiendi orificia Venarum; sicque uti poterit *Floribus Cassiæ*, vel *Floribus Persicorum*. Exhiberi poterit insuper succus *Urticæ*, *Tinctura Coralliorum in aqua Plantaginis*, & *retulæ Diatragacanthi cum bolo*. Prodesse poterunt pilulæ *Helvetii*, *Terra sigillata Magni Ducis*, *Crocus Martis adstringens*, & pulvis *Sympatheticus*, ac *Terra Lemnia*; & ista assumantur cum decoctione *Plantaginis*. *Cineres Chartæ albæ* combustæ in nares immissæ laudantur à *Foresto*. *Anacellema* sequens fronti imponatur. R. *Aquæ Rosarum*, ʒ. iiij. *Aceti Rosati*, ʒ. j. *boli Armenæ*, ʒ. j. *Misce*, & frigide adhibeatur. Poterit etiam fronti applicari *Aqua chalybeata*. Sunt qui ligaturas faciunt, & contorquent minimum digitum in manu. *Usneam Cranii humani* commendat *Rob. Boyleus in lib. de util. Philos natur.* & me olim observasse recordor, efficacissimum cataplasma sequens fronti, & temporibus admotum. R. *Gypsi cum aceto subacti ad crassitiem duorum digitorum* Q. S. *Aqua Spermatiss Ranarum cum syrupo Coralliorum* frigide epota juvabit. Stupa insuper frequenter sequenti aquâ madefacta naribus indatur, R. *Aceti Fortissimi*, *Crocî martis*, *Cholcotaris*, de primo, ʒ. j. de aliis ʒ. j. *Laudanum opiatum ad gr. ij.* exhiberi poterit, quando affectus iste esset contumacissimus. A vino abstineat, & ab omnibus, vel actu, vel potentiâ calidis; item arcenda Tussis, vociferatio, colloquium, ambulatio, atque omnis motio corporis, quibus addenda congrua victus ratio, bibendo aquam *Lentisci*. Læto sit animo, & in Deo speret, ipse enim omnes languores solus sanat.

CONSULTATIO LIV.

De Narium Hæmorrhagia.

CIvis quidam noster Ferrariensis, ætatis annorum 37., temperiei plethoricæ, conqueritur de frequenti Narium Hæmorrhagiâ, & nuperrimè in tanta quantitate sanguis per nares prodivit, ut ferè librarum sex pondus æquaret; nunc opem Medicam postulat.

Est itaque præsens affectio immodica, & præternaturalis sanguinis è naribus profusio apertis Venis, aut arterioli in nares desinentibus; eas porrò aperit per anastomosim sanguinis copia, ut in præsentī casu, in quo adest plethora, non enim puto per diæresim, aut diapedesim sanguinem in nostro Cive exire, sed tantum per aperta vasorum oscula. In hac affectione res est plena periculi; quia nisi sistatur cruor, Ægroti vita periclitatur; ideò, quanto citius fieri potest, sanguis erit retinendus, & inde curandum, ne iterum vasis apertis exeat. Statim igitur Vena incidatur in manu, inde in pede, si tamen vires consent; & postea ad specifica deveniendum erit. *Stercus* igitur *Asininum* recens cum *Bolo Armena* mixtum, naribus appositum prodest, si *Petro Foresto* fides habenda. Apponatur fronti sequens remedium; & *Aquæ Rosarum* ʒ. v. *Aceti rosati* ʒ. iiij. *Boli Armenæ*, ʒ. i. *Misce*, frigida cum panno lineo fronti alligetur; Multi digitum annularem cum auriculari constringunt: Alii partes genitales, ad sistendum sanguinem è naribus profluentem, aquâ frigidâ abluunt suadente *Cratone*. Bonum insuper erit *usnëam cranii humani* adhibere. Profunt etiam frictiones; *Oxycratum* per nares frequenter attractum, teste *Riverio*; *Aqua frigida* in faciem conspersa; panni linei aceto fortissimo madefacti fronti appositi frequenter; Cataplasma ex gypso, & aceto confectum; gossypium atramento infectum; pulvis pilorum leporis, *Vitriolum rubificatum*, succus *Urticæ*. *Jaspidem* collo appensum juvare scribit *Anselm. Boetius de lapid., & gemm.* Si verò sanguinis exitus non sistatur; cucurbitulæ cum magna flamma scapulis, cervici, natibus, & coxis erunt applicandæ. Cibi sint incrassantes, & pauci nutrimenti, & sub forma liquida exhibe-

antur, ut sunt *juscula hordeata*; masticatio enim Hæmorrhagiam promovet; si autem vires sint debiles, *panatellæ* cum *ovis* exhibendæ, in quibus *amylum*, aut *gummi Arabicum* dissolvatur. Hinc D. O. M. precor, ut hæc à me proposita sint proficua, & salutaria.

Eventus.

Non omnia, sed aliqua dumtaxat prædictorum remediorum fuere adhibita, at die morbi quarta superveniente Diarrhœa convaluit æger, nec amplius Narium Hæmorrhagiam passus est; nunc sanus vivit.

CONSULTATIO LV.

De Ptyalismo.

Nobilissima Mulier, ætatis annorum LI. Vidua à multo tempore, in omnibus actionibus suis generosa, & audax, salivatione frequenti afficitur, ita ut locum, in quo manet, brevi salivali humore conspersum videat, & adstantes non sine admiratione conspiciant; ad quam avertendam affectionem consilium Medicum poscit.

Morbus iste Græcè πτυαλισμός, *Ptyalismus* dicitur, & est crebra oris salivatio, & sputatio; quæ oritur à serositate copiosa, & lymphæ glandularum præsertim salivalium, excedente, ductusque salivales reddente patentiores; de quo morbo pluries *Hippocrates* mentionem fecit, ut observavit *Foesius*. Est symptoma in excretis considerabile; pendens à lymphæ affluenter impartita partibus salivæ secretionem dicatis, ut sunt glandulæ salivales, & præcipuè parotides, à quibus, per salivales ductus, in palatum saliva ipsa deducitur, quæ ad glandulas per arterias derivat: Quoties ergo ab istis copiosè communicatur serosus humor, salivatio etiam copiosa contingit, quia salinæ particulæ in massa cruoris existentes, fusione, seu corrosione nimiam humorum serositatem pariunt. Debemus igitur in hoc casu providere; & prævidere, provisio exposcit

cit curationem, prævisio studet arcere imminetia, & majora mala, quæ minatur impuritas præsens totius massæ cruoris; fumus enim in casu timoris morbi majoris. Ut autem curatio ritè instituat, examinandæ sunt indicationes, quæ meo videri, consistunt in dulcificatione sanguinis introducendâ, salinis particulis erosivis eliminandis, uno verbo massam cruoris ad pristinum statum restituendo. Quæ ut assequantur ad Pharmaciam, Chirurgiam, ac Diætam recurrendum. Quoad primam, pro primis alterantibus uti poterit jusculo vituli, in quo bullierint *folia Cichorei, Endiviæ, & Borraginis*, additis aliquibus guttulis *spiritus salis niri dulcificati*; elapsis aliquibus diebusumat *Ægra potionem ex Cassiæ clarificatæ*, 3. VI. *Tincturam Rosarum* commendat *Pomp. Saccus* in suis Consult. Ego laudo *Elixir. Proprietatis Paracelsi* ad roborandum ventriculum, ut etiam *species Diamargariti, & Sal Absinthii: Succum depuratum Cichorei, Borraginis, & Agrimonie* utiles erunt, sicuti *decoctum Salsæparillæ, & Visci Quercini, & conserva Aciditatis Citri*. Ex Chirurgiâ, unam tantum Venæ sectionem in salvatella manus dextræ fumerem ad septem uncias sanguinis extrahendas. Quibus omnibus congrua victus ratio addatur: utatur in cibo, succo *Granatorum, Ribes, Omphacio, Aceto*: demum *aquam Brandulæ* propono ad ducendum per diuresim materiam lymphaticam & serosam. Cibaria sint facilis concoctionis, & optimi nutrimenti; uno verbo, victûs ratio medicaminum præscriptorum virtuti correspondeat: & hæc Deo Auspice in salutem ægrotantis cedant.

Eventus.

Adhibitis multis ex prædictis remediis, & idoneâ vivendi ratione, post duos menses superveniente demum Diarrhœa Ægra nostra convaluit. Nunc sana vivit.

CONSULTATIO LVI.

De Stupore Dentium.

DEsideras consilium ad tollendum stuporem Dentium pertinacem in quodam Illustri Civè affini tuo dilectissimo.

Dentium stupor est sensus depravatus, quo in dentibus percipitur incommoda cujusdam adstrictionis molestia citra naturæ consuetudinem: ab aliquibus dicitur dentes ipsos affici; attamen non omnis illorum substantia, sed solum expansiones nervosæ, & membranosæ in radicibus dentium, vel in ipsis gingivis adstrictorio quodam motu affliguntur; & revera talem stuporem inducunt omnia acido-austera ipsis dentibus admota, ita vomitus acidæ pituitæ, sic spiritus omnes acidi, fructus acerbi, qui succo austero-adstrictorio pollent, talem affectum producant: Quod si, ut in casu nostro, frequens stupor dentium occurrat sine causa externa, hoc provenit ab humore salivali austeriore, & minatur periculum, ne tandem dentes carie afficiantur; immò etiam corruptâ ipsâ gingivâ vacillent. Ad curationem igitur quod spectat, proderunt omnia illa, quæ austeros succos peccantes absorbere, & edulcorare valent; undè dentes primò quotidie fricari possunt *Portulaca, Malva, Parietaria, pulvere Liquiritiæ, Mucilagine Seminis Cydoniorum, pulvere Oculorum Cancræ, & Unicornu fossili*: & quia timeo massam humorum peccare; ideò prius communiter purgato corpore, ad aquas thermales bibendas confugere opus erit; sicuti commendo usum *lactis Asinini*, vel saltem *Caprini* cum debito Diætæ regimine à prudentia tua præscribendo. *Vinum sit dulce*; immò statim à prandio cyathum aquæ fontis bibat. A studio, & applicatione abstineat, & post cibum ab illis omninò fugiat; nec se lecto committat, nisi elapsa una saltem hora à cibi assumptione. Hæc pauca &c.

CONSULTATIO LVII.

De Angina.

Nobilissima Mulier annorum ætatis 39. bonæ temperiei, repente incidit in magnam gutturis inflammationem, adeò ut hujus partis regio adeò intumuerit, ut ne verbum quidem proloqui posset, & ferè suffocaretur, tumore in faucibus manifestè apparente. Auxilium poscit.

Morbus hic manifestus est, & Angina à Medicis nuncupatur, & est terrificum, & lethale faucium symptoma ob interceptionem officii ad vitam tuendam necessarii. Dicitur autem Angina ab angendo, quòd angat guttur: definiri potest angustia faucium cum spirandi, & deglutiendi difficultate, proveniens ab inflammatione faucium. Oritur ex nimio influxu cruoris ad gutturis partes, ibique stagnantis. Hæc affectio periculosissima est; si verò collum externè intumescere incipiat, salus speranda erit; *Hippocrates enim in Aphorism. 37. sect. VI. ait: ab angina correpto, si tumor fiat in collo, bonum: & ratio in promptu est, quia foras morbus vertitur.* Indicationes sunt, fixatum sanguinem dissolvere, revellere, partes inflammatas relaxare, tandemque partes affectas corroborare, quibus ut satisfiat; primò monet *Galenus* statim è Cephalica brachii sanguinem oportere educere, ne *Æger* suffocetur, nec semel aperire convenit brachii Venam, sed bis, & ter, si opus fuerit; immò sectionem venarum sub lingua commendarem, & fricationes, & cucurbitulas scarificatas: Si alvus fuerit adstricta, Clysteres laudo communes: Utatur deinde nostra Nobilissima Patiens *Emulsionibus seminum Peponis factarum in aqua Portulacæ addito modico salis Prunellæ, & syrypo Violarum.* Gargarismata præscripta ab Excellentissimo Dom. Medico suo ordinario optimi erunt usus, & valdè proficua. *Aqua cordialis Saxonie* commendatur à *Joh. Michaëli* in sua praxi. Externè juvabit etiam emplastrum ex nido hirundinum S. A. paratum. Victus tandem exquisitè tenuis; & sufficiet sola *Ptisana Hordeacea*, vel *panatella* cocta in emulsione seminum *Melonis*: abstineat semper à Vino. Et hæc

Josephi Lanzoni Opera. Tom. II. Q sunt,

sunt, quæ circa acutissimum hunc morbum dicere potui. Deus interim huic nostræ Patienti succurrat, sic enim tutò, citòque medica præsidia operabuntur.

Eventus.

Adhibitis auxiliis propositis, immò insuper sectis jugularibus venis, die quarta morbi melius se habere incepit; inflammatio imminuta fuit, & septima die perfectè convaluit.

CONSULTATIO LVIII.

De Raucedine.

CIvis Perillustris superioribus diebus post nimiam incalescentiam de repentè incidit in raucedinem, quæ pertinaciter durat adhuc post duas à primo aggressu hebdomadas; & licèt aliqua sint experta remedia, tamen adhuc raucus opem medicam postulat.

Affectus iste per se jam patet manifestè, & *βράνχις* græcè dicitur, Latinè *raucedo*, & raucitas cum vocis asperitate: definitur species catharri fauces, guttur, & asperam arteriam afficientis, cum vocis insolita, & non naturali gravitate, & asperitate. Locus affectus gutturis partes internæ sunt: Causa est nimia humiditas membranam asperæ arteriæ irrigans, sicque ab illapsu catarrhi larynx, nimio magis perfunditur, qui per accidens separatur ob nimium colorem ut in casu nostro. Ad Prognosim quod attinet, dico hunc affectum de facili sanabilem esse, si pertinaciter ad menses non duret, sin autem ad plures menses cum tussi sequatur, timendum erit ne corrosio in trachæa succedat, ex qua Phthisis oriri potest, ut in adolescentula olim observavi, quod tamen in nostro Patiente Deus avertat: Indicationes erunt tollere nimiam illam humiditatem laryngem infarcentem, atque partem affectam corroborare, nec non calorem fluidorum contemperare; quæ ut assequamur, primò ad Pharmaciam est deveniendum; quocircà primæ erunt expiandæ viæ lenienti aliquo

quo medicamine, ut verbi gratia *potione ex Manna clarificata*, indè commendarem usum *Syrupi Violarum cœlest.*; de *Erysimo Lobelii*, de *liquiritia*; si hæc non profuerint exhiberi poterit *Oleum Amygdalarum dulcium recenter expressum Saccharo fino cum Sylvius* commendat. *Spiritus salis Ammoniaci* exhibendum in dies in potu ordinario ad aliquot guttas: *Syrupi de Peto* usus erit proficius; sicuti *balsamus sulphuris*; insuper *Eclegma* sequens non semel feliciter sum expertus: & *Looch sani, & experti*, ʒ. ij. *Looch de Pino*, ʒ. j. *Spermatis Ceti non rancidi*, ʒ. ʒ. ʒ. ʒ. *Misce, & cum syrupo de liquiritia q. s. fiat Eclegma*. Si adhuc perseveraret raucedo, ad *lactis Asinini* usum cum *pulvere Sacchari fini* per viginti dies erit deveniendum. E Chirurgia unicam venæ sectionem celebrandam in brachii dextri vena communi assumerem; sicuti frictiones vespere ad dorsum faciendas: & si alvus non respondeat clysteribus utendum erit: his autem omnibus accedat idonea vivendi ratio, in qua major pars curationis est posita; quæ omnia procul dubio sufficient ad recuperandam nostri Patientis valetudinem, ubi Deus fuerit propitius, ut precor ex corde.

Eventus.

Usurpata magna parte propositorum remediorum, post mensem accedente Diarrhœa trium dierum spatio perdurante, raucedo sensim mitigata fuit, indeque sanitatem integram Civis noster adeptus fuit.

CONSULTATIO LIX.

De Raucedine.

Raucedine Puella detinetur à duobus mensibus, & vix, cum loquitur, intelligitur, non sine erosione amygdalarum propter humorem falsum, & acrem in internas faucium partes decidentem.

Hæc affectio Raucedo à Medicis dicitur, & est vocis insolita, & nonnaturalis gravitas, & asperitas, ortum habens à nimia humiditate membranarum asperam arteriam constituentium, à lymphâ

ibi delabente, ut frequenter accidit in gravedine. Hæc autem lymphæ in præsentî Puella scatet particulis falsis, acribus, & pungentibus. Quàm celerius fieri possit iste affectus est curandus, ne forsan in Phthisim incidat, ut observavi in alia Adolescentula annorum XVIII. quæ Raucedine diutissimè laboravit, undè ulcus ortum in trachæâ insanabile in Phthisim delapsum, Ægram occidit. Talem igitur lympham non tantum corrigere, sed revellere oportet, & evacuare. Ut rectè curatio instituatur, leviter purgato prius corpore oleo *Amygdalarum dulcium* recenter expresso, ad usum lactis *Asinini* deveniendum per mensem. Interea etiam infra diem, & præsertim vespere bonum erit assumere *Looch sani, & experti*, 3. ij. *Looch de Pino*, 3. j. *Spermatis Ceti*, 3. j. cum syrupo de *Liquiritia*, misce & fumatur ad cochlearia. Commendo syrupum de *Erysimo Lobelii*, qui Auctor scribit, se istius syrupi usu Juvenculam decennali raucedine laborantem curavisse; quo circa apud nostros Pharmacopæos semper prostat talis syrupus. Sunt aliqui, qui acetum scilliticum laudant; Ego verò longè à tali remedio manerem, ne aciditas acri lymphæ adderetur, & esset addere calcar calcaribus: sicuti etiam non commendo setaceum laudatum, & propositum ab *Hildano cent. 6. obs. 24. Ferculum Saxonie* prodesse posse puto, immò addo, edoctus à *Sylvio de le Boë*, spiritum *Salis Ammoniaci* in potu ordinario ad aliquot guttas exhibitum posse juvare; Syrupum *Raphani*, & oleum *Sacchari confectum ex spiritu Vini*, & pulvere *Sacchari fini S. A.* parati sunt nonnulli, qui laudant; ut & decoctum *Raparum* frequenter bibitum. Succus *Liquiritiæ*, & rotulæ sequentes proderunt; & *Salis Prunellæ*, 3. j. *Tartari Vitriolati*, 3. j. *Styracis*, 3. j. *Sacchari dissoluti cum vino albo dulci*, 3. ij. misce & *S. A.* fiant Rotulæ ad ignem. Lambitivum etiam sequens commendatur à *Joh. Forti in Consult. cent. 2.* & *Succi Caulium depurati*, mellis *Hispanici, ana*, 3. iij. misce ad ignem; post cujus assumptionem os abluatur aqua *Hordei* in qua sit dissolutum sal *Prunellæ*. Venæ sectionem nocuam esse in Raucedine scripsit *Joh. Schmidius in Misc. Cur. Dec. 1. ann. 9. & 10.* & hujus loco decoctum radicis *Chinæ* commendat. Pulvis *Oculorum Cancri præparatorum* præscribendus erit, multum enim levaminis erit. Purgationes laxativas in Raucedine, ut & in aliis pectoris morbis noxias esse docuit *Waldschmidius*, & ego semper negligendas esse suadeo; sicuti potius sudorifera convenire pu-

to, & opiata fugienda. Sunt qui fonticulum aperiendum esse suadent, si morbus pertinax fuerit, neque præscriptis cedat remediis. Totum enim negotium istius affectionis consistit in lymphæ peccantis correctione. His omnibus autem congrua addatur victus ratio, dictis remediis proportionata, ita ut à cibis nimis humectantibus se abstineat nostra Puella, & specialiter à vino generoso. Quæ dicta pro salute nostræ Patientis sufficiant.

Eventus.

Non omnia, sed aliqua prædictorum remediorum sunt usurpata, & intra mensem pristina sanitas est recuperata; nunc sana vivit.

CONSULTATIO LX.

De Phthisi.

A Docta, & eleganti relatione Illustris Medicinæ Doctoris, cui peritiæ commendata est salus Clarissimæ Fœminæ Mantuanæ, faciliter conjicitur, eam Phthisi jam consummata laborare; Tussi enim vexatur ferè continua, & noctu magis molesta, cum sputo purulento, respiratione difficili, & incalescentia post cibum: ei rubent genæ, totum corpus consumitur, pili defluunt; & nocte sudat, & debilitatur in dies. Nunc metu malî gravioris Medicam expetit opem.

Phthisim esse præsentem affectum ex dictis colligo, qui morbus definitur, Corporis tabes, & consumptio colliquativa cum Tussi, sputo purulento, aliisque symptomatibus, proveniens ab ulcere Pulmonum cum febre lenta, & virium extenuatione. Causa istius malæ affectionis est lymphæ salsa, & acris, quæ laudabilem consistentiam cruoris foedat, & ineptum reddit ad nutritionem, immò ad Pulmonem delata ibi erosionem inducit, & ita apparet partem affectam propriè esse Pulmonem, cum massa ejusdem sanguinis. Ad Prognosim quod attinet, licèt doceat *Galenus* deploratos non esse attingendos, sed deferendos, attamen quia impium est, Ægrotos solo relinquere Prognostico, & mo-

nente *Celso*, melius est anceps experiri remedium, quam nullum: Ideò primò, quid sit sperandum de tali Muliere, postea quid agendum, ut salutem illa restituatur, dicendum erit. Certum igitur est morbum præsentem, cùm jam altas egerit radices, esse periculofum, & valdè timendum, ne insuperabilis sit; attamen quia ætas non est ad Senectutem, ope remediorum aliquid boni sperandum, maximè quia audio à Domesticis ipsam Patientem facile tolerare remedia, & tali Ventriculo præditam esse, ut nulla respuat medicamina, vomitum nescia: & ideò alacri animo ad Medicum auxilium accelerandum erit, ut optatam acquiramus valetudinem, quam Deus benignè concedere dignetur. Ad hanc igitur curationem instituendam faciunt tres consueti Medicinæ fontes nempe Diæteticus, Pharmaceuticus, & Chirurgicus; à quo ultimo ut exordiar, primò examinandæ sunt indicationes, quæ, meo videri, sunt sanguinem, & vitia lymphæ corrigere, Pulmonum ulcus sanare, ac vires conservare: ut hæc autem habeantur, ex Chirurgia nullam assumerem Venæ sectionem, ait enim *Mercatus*, sanguinis missionem rarò in tabe locum habere, maximè ulcere jam factò. Clysteres tamen utiles erunt, cùm scilicet alvus fuerit adstricta. Ad Pharmaciā quod attinet, primò leniter purgato corpore, usum *Asinini lactis cum Saccharo* ad mensem commendo cum usu quotidiano *conservæ Rosarum addito Butyro Sulphuris*, & *Ferculo Saxoniano* in cibis sumendis: *Syrupus ex succo Hederæ Terrestris* mirificè commendatur a *Quercetano*, cujus descriptio sequens est. R. *Succi Hederæ Terrestris*, lib. duas & semis, digeratur, ut purificetur ad ignem B. M., huic succo depurato addatur *Sacchari Rosati*, lib. j. *Penidiati*, lib. semis, coque in *Syrupo S. A.*, cujus sumat *Æger* ad cochlearia; & huic Syropo nonnulli addunt *flores Sulphuris*: *Rob. Boyle* plurimum extollit balsamum Sulphuris crassum, cujus descriptio habetur apud *Thom. Burnetum* in *Thesauro Medic. Pract.* lib. 14. Rotulæ pariter erunt præscribendæ, & in ore detinendæ confectæ ex *Butyro Sulphuris cum Saccharo aqua Violarum dissoluto*. *Decoctum* pariter *caudarum & chelarum Cancrorum* in aqua *Hordei* cum quantitate sufficiente *Sacchari* exhibendum laudo. Balneum aquæ dulcis laudant multi Medici; verum quia sumus in tempore anni ad
huc

huc frigido, & vires ægrotæ sunt debiles, ideò tali balneo substitui poterit inunctio universalis cum oleo *Amygdalarum dulcium*, & unguento *Rosato*, & *Malvino*. De Diæta demum aliquid nunc dicere convenit, nullus enim morbus sine hujus recto usu sanatur. Ad appetitum igitur in nostra Ægrotante prostratum, ut à Domesticis audio, quodammodo excitandum non puto convenientius remedium esse, quam *Elixir Proprietatis ad gutt. V.* ante cibum una circiter hora sumptum in Vino: Pro potu licet *Sylvius de le Boë* commendet Vinum generosum, attamen ego Vinum tenue subdulce laudo; & cùm circa alimentorum usum tria semper observari debeant, nimirum tempus, quantitas, & qualitas; ideò in quantitate modica cibi esse debent, & tales, ut vires non solum conservare, verùm augere possint; idcirco partitis vicibus nutrire conveniet, & ita tempus partiri debet, ut novum alimentum non exhibeatur, nisi antea sumptum, concoctum, & distributum sit, evitando semper accessionis primordia: quoad qualitatem, cibi sint facilis coctionis, paucique excrementi; *Hordeum*, *Carnes Pullorum*, *Vituli*, *Tesudinum*, *caudas Gammarorum fluviatilium*, *Ranas* commendo. Stillatum è carnibus, refrigerantibus herbis alteratum utile erit: Somnus tam nocturnus quam diurnus permittendus, & fugienda animi pathemata. Et ista sunt, quæ circa morbum Clariss. Fœminæ mea potest tenuitas adducere, ea submittendo censuræ, ac judicio aliorum Medicorum. Facit interim Deus, ut optimè omnia cedant ad salutem.

CONSULTATIO LXI.

De Sputo copioso & Macie ferè universali.

Tuam, Excellentissime Domine, in medendo peritiam, atque in scribendo præstantiam ex literis ad me datis apertè collegi, & simul infelicem salutis statum Reverendi Domini Sacerdotis annorum ætatis 35. qui multis abhinc mensibus copioso sputo, & quidem subsalso cum emaciatione penè universali sui corporis, molestè afficitur; immò, quod pejus est, modicè febricitat sub vespere cum mordaci incalescentia, & tussicula nocturna;

na; & quod de ejus adversa valetudine scribis, id totum idem ego ipse confirmo sequentibus literis.

Reverendus igitur Sacerdos copiosam habet salivam falso-acrem confluentem à toto corpore, quatenus omnes humores vitiati ad crasim acido-acrem vertunt, & per consequens inepti ad nutritionem reddit, maciem inducunt; Tussis enim, febris, & totius corporis macies accidunt, quia sanguis salinis particulis saturatus, deportatus ad salivales glandulas, irritatione excitata, salivationem inducit, & Tussim; sicque febris pariter suscitatur per hoc, quod vitiata compage sanguinis, motus ejusdem fermentativus augetur: Vitium autem tale ortum habuisse, tanquam à causa remota, à prava vivendi ratione, & ab erroribus in rebus nonnaturalibus judico. Si Prognosis petatur, dico hunc esse morbum pertinacem, adeoque periculosum, altas enim egit radices, & vix tollendas; Sacerdos enim iste Hectica laborat febre jam confirmata, unde macies, & tabes habetur, ex quibus nihil boni sperandum, attamen quia est in ætate media, & vires adhuc consistunt, adhibenda erunt Medica auxilia, à quibus Deo juvante, salus derivare poterit, quam, ut obtineamus, indicationes veniunt examinandæ, quæ, meo videri, sunt istæ, nempe sanguinem dulcificare, exinde sputationem sistere, ac viscera interna corroborare; quæ ut habeantur impetrare convenit præsidia Pharmaciæ, Chirurgiæ, ac Diætæ; ex quarum prima leniri poterit alvus oleo *Amygdalarum dulcium sine igne extracta*, cavendo semper à Scammoneatis solutivis; insuper laudarem usum *lactis Asinæ cum modico Sacchari* juxta solitum ad Mensem: præterea uti poterit *pulvere oculorum Cancris præparatorum & pulvere Haly* in cibo. Balneum insuper aquæ dulcis utile erit, sicuti *conserva Rosarum, Ptisana Hordeacea, Emulsiones quatuor seminum frigidorum majorum cum rasura Matris Perlarum*: Sequentes tabellas commendat *Malpighius in Consult. 4. Oculorum Cancris præparatorum, florum sulphuris, salis Prunellæ, ana, partes æquales: Misce & cum Saccharo, & aqua Violarum* fiant tabellæ S. A. & irrorentur guttis aliquot balsami *Perviani*. Ex Chirurgia leves tantum fricationes faciendas cum oleo *Amygdalarum dulcium*, & Clysteres ex eodem oleo, vel Butyro, ac jure Hordeaceo desumerem, & circa Venæ sectionem non nisi

si leviter venam secarem in manu, vel pede, ad cruorem solummodò visendum, ac ventilandum. Diæta demum prudenter sit instituta; abstineat ab acribus, acidis, & falsis, & à varietate ciborum, ova recentia convenient, carnes pullorum, Vituli, Testudinum, Ranarum, Viperarum, & caudæ Gammarrorum utiles erunt; vinum sit tenue, & aquæ Nucerinæ maritatum. A curis vacet, iram tanquam pestem fugiat. Atque hæc pauca sint dicta ad confirmationem omnium eorum quæ proposita fuere à Docto Viro curante, & ordinario Medico Reverendi nostri Patientis. Faxit Deus &c.

Eventus.

Ut ex ultimis ad me datis Litteris colligo, Virum hunc Reverendum his adhibitis remediis in meliorem salutis statum revocatum esse, & sperare pristinam corporis incolumitatem, ex quo possit ad longum tempus bona valetudine frui.

CONSULTATIO LXII.

De Pleuritide.

Proponitur casus viri Ferrariensis Illustrissimi, qui talis est. N. ætatis annorum 40. sedentariæ, ac otiosæ vitæ deditus, diebus elapsis hyemalibus, domum revertens ab itinere defatigatus non exiguam quantitatem vini Malvatici, ad restaurandas vires, ut aiebat ipse, assumpsit; quo facto horror totum invadit corpus, lecto se componit ad sumnum, post duas horas dolorem pectoris sentit in parte dextra pectoris, cum tussicula, & febre, expuit sanguinem non sine viriūm debilitate, & siti magna, auxilium postulat Medicum.

Morbus iste à signis diagnosticis in historia superiori exaratis nihil aliud est, quam πλινγίτις, Pleuritis, quæ definiri potest, inflammatio Pleuræ cum acuta febre, Tussi, spirandi difficultate, dolore dependens à fixatione cruoris in parte Pleuræ, à qua fixatione acrior factus sanguis fibras vellicat, & cruciatum producit. Ex quo patet partem affectam esse membranam costas succingentem.

Hic obiter notandum, nonnullos esse Medicinæ Magistros, qui non Pleuram, sed partem Pulmonis in hoc morbo esse partem affectam docent, cum enim totus Pulmo inflammatur; Peripneumonia nuncupatur, cum verò pars tantum; Pleuritis dicitur, quod in sectione cadaverum demonstravit *Bonetus in sepulchr. Anatom.* Ego autem non nego, posse à Pleura inflammationem communicari ad lobum Pulmonis vicinum, sed per hoc non est, quod præcipua Pleuritidis sedes non sit Pleura, utpotè quia in Pleuritide adest dolor punctorius acutus; ast inflammato etiam toto Pulmone, ut in Peripneumonia licet sæva, nullus punctorius dolor præsentitur, sed solummodò difficultas adest respirandi, cum febre acuta, rubore genarum &c. In hoc igitur nostro ægroto solam affici Pleuram in dextra parte puto, nec adhuc esse Pulmoni communicatam inflammationem. Causa istius affectus est fixatio, & coagulatio sanguinis in parte Pleuræ, ex qua fixatione evanescunt partes volatiles, acidæ, & salinas temperare solitæ, unde fixatæ particule, acriores factæ, cuspidibus suis pungendo fibras Pleuræ, excitant dolorem punctorium; Sic enim sanguis ex nimio itinere, & nimio potu vini generosi, nimium commotus fuit, tanquam causa antecedens, & remota; hinc est quod facile est evasatus, sicuti nimii fluctus, extra fluminis ripas propellunt aquam; sæpè enim talem affectum tum animi tum corporis commotiones vehementes produciunt. Perspectâ igitur causâ, ad Prognosim gradum faciamus: Observandum ergo an in principio hujus morbi sputa apparuerint, quod si omninò defecerint, aut pauca fuerint superstiti dolore lateris punctorio, tunc sumus in casu atroci, & res est plena periculi; Pariter, si in principio, quod tamen historia non dicit, sputa fuerint cruenta, vel flava, aut nigra, tunc pariter malum, & pessimum erit, juxta commune suffragium Doctorum. Observandus pariter est pulsus, nam fuerit parvus, crebrior, & durus, mortem portendet, nullum enim Pleuriticum cum tali pulsu sanatum vidisse aiebat *Dolæus*, licet Ego justè fateri possim nonnullos Pleuriticos tali morbo correptos, ac tali pulsu associatos è mortis faucibus evasisse. Si dolor, & spirandi difficultas in nostro Ægroto non fuerint valdè molestæ spes erit salutis; si sputum sanguinolentum multum exhibit, quod sanè observandum erit signum periculosum: Et quia in historia mentio fit de san-

sanguinis expuitione, idcirco animadvertendum, si enim modica fuerit in quantitate, bonum erit, & citò morbus terminabit; si autem in multa quantitate, periculum est ne Æger pereat: Si superveniret Diarrhæa malum signum erit, suadente, *Hippocrate in Aphor. 16. Sect. VI.*, & malum etiam erit si à Pleuritide fieret transitus ad Peripneumoniam; tunc enim inflammatio ad Pulmonem accederet, quæ quidem licet meo videri, ferè semper conjungatur Pleuritidi; atamen in hoc casu, Pleuritidem legitimam esse, id est Pleuræ inflammationem tantummodo in nostro Patientē, sine ulla Pulmonis læsione, usque adhuc tamen, judico; & hoc dictum sit ad ægrotantis solamen, & ad spem hauriendam salutis probabilis; maximè quia in corpore sano accidit morbus, & non cachectico, tunc enim magis fore periculosa Pleuritidem docuit *Riverius*. Debet demum observari, an ex sputo strepitus in pectore sonet, an vultus demissus sit, & an oculus caligine obductus; quæ si adsint, mors erit expectanda, ut monuit *Hippocrates in Coacis*. Visa Prognosi, ad indicationes examinandas gradum faciamus, quæ, prout desumuntur à causis, tales sunt: Primò sanguis minui debet, ejusque motus, quo impetuosè ad partem affectam ruit, corrigatur; præterea materiæ peccantis expectoratio promoveri debet, febrile fermentum, ac incendium extinguere, & edomari, atque demum vires debent conservari. Quibus indicationibus satisfactorius, suaderem primò, ut præmisso clystere communi emolliente, absque ulla mora instituatur Venæ sectio in vena brachii partis affectæ; & hæc operatio tanquam utilis repetatur in manu, & brachio opposito, quatenus morbus incrudescat, semper enim ego putavi sanguinis missionem præstantissimum esse remedium in tali casu. Ex Pharmaceutico fonte pulveres sequentes desumi poterunt.

℞. Pulveris Oculorum Cancris præparatorum, dentis Apri præparati, Mandibulæ Lucii piscis, ana ʒ. j. Misce divide in V. partes æquales, & assumantur mane, & vespere cum aqua sequenti ℞. Aquæ Cardui Benedicti, Papaveris Erratici, ana, lib. i. & edulcoretur cum modico Syrupi Papaveris Rhæados. Commendo etiam pulverem sanguinis Hirci præparati Gelatinam Cornu Cervi Elect. pector. aquam, Hordei destillatam, Emulsionem quatuor seminum frigidorum majorum. Inungi poterit pars affecta bis in die oleo Cucurbitonis, quod hîc Ferrariæ egregiè conficitur, & vulgò oleum antipleuriticum nuncupatur

cupatur. Panem recentem è cibano extractum per medium difsecatum, & immixtum Theriaca, calidèque applicatum parti dolenti laudat *Digbi*; vel cepæ cum lacte ad putris consistentiam coctæ, parti affectæ apponendæ, utiles erunt juxta *Dolæum*; Si urgeat Vigiliæ, modicum *Syrupi de Papavere* exhiberi poterit. Cavendum tamen ab opiatibus vehementioribus, in hoc enim affectu perniciofa esse ajebat *Riverius*, sputum enim retinent, & coarctant pectus, undè non rarò præceps exitium consequitur: Porro Eclegmatta supino corpore sumenda erunt, quia sic melius internas pectoris partes subeunt. Progrediente morbo ad corroborandas vires sequens juvabit remedium. R. *Conservæ florum Violarum*, ʒ. i. *florum Borraginis*, & *Rosarum*, ana, ʒ. ʒ. *confectionis Alchermes* ʒ. ij. *specierum Dia margariti frigidi*, & *Diatragacanthi frigidi*, ana, ʒ. j. *conservæ nymphææ ad pondus omnium*, Misce fiat *Electuarium S. A.* quotatur frequenter ex cochleari. Notandum denique purgationem per alvum non convenire, nisi in declinatione; cùm enim malum sit, si Diarrhæa Pleuriticis superveniat, ita pariter malum erit, si arte alvi fluxus frequens excitetur. Ad Diætam tandem pervenire debemus, & ita aër sit temperatè calidus; pessimus enim est frigidus, hic enim virosas suas particulas aculeatas per corporis porositates immittit, quæ sanguini associatæ eundem magis coagulant, ideòque frigidum aërem pectori inimicum esse docuit *Hippocrates*. Cibus sit levis, ac tenuis, ut sunt *juscula Gallinarum*, *cremor Ptiisanæ*: vitari debent acida, salsa, acerba, & aromatizata. Potus sit decoctum conveniens, ut verbi gratiâ ex *radice Liquiritiæ*, *Scorzoneræ*, *Hordei*, & *Floribus Papaveris erratici*. *Emulsiones quatuor seminum frigidorum majorum* utiles erunt: à Vino omninò abstinendum, *Brasavolus* enim noster *Ferrariensis* ait, præstantissimum esse venenum in morbo laterali, præsertim in principio: *Gelatina Cornu Cervi* sit in usu frequenti: dulcia potius, quam acida exhibeantur, & potus sit semper tepidiusculus, frigidus enim poterit pectori nocere. Somnus protrahi poterit; vigiliæ enim nimix humores dissipando nocent, Circa alvi excretionem, melius est alvum suppressam habere, quam laxam ut suprâ etiam innui in præsentî Consultatione; & hæc erant à me dicenda in casu proposito, quæ omnia, ut Summus Deus nostro Patienti salutaria reddat, enixè rogo.

Even-

Eventus.

Optima vivendi ratione observata, & multis ex propositis remediis adhibitis, Nobilem nostrum Ægrotum post diem decimam quartam omninò sanitati revocatum vidimus, æterno aspirante, & favente Numine, nunc sanus vivit.

CONSULTATIO LXIII.

De Empyemate.

Adolescens Nobilis boni corporis habitûs post multos errores in victu, & maximè post copiosum Aquæ vitæ potum hyemali tempore, exquisito affectu Pleuritico in dextra pectoris parte corripitur; qua de causa remedia secundùm artem adhibita sunt; materiam autem parvam, nonnihil cruentam, expuit, ac excrevit; attamen dolor lateris punctorius, & febris aliquatenus mitigata est; ita ut Æger noster è lecto surgere potuerit, & per cubiculum ambulare; post autem viginti tres dies à prima morbi invasione supervenit rigor totius corporis cum febris, quæ sub vesperam ingravescit; dolor pectoris non punctorius, sed gravativus affligit, respiratio non sine difficultate procedit, frequentissima est Tussis, pauci tamen sunt scretus; Lypothymia succedunt cum sudatiunculis, materia verò, quæ excernitur, in modica tamen quantitate, graveolens, & purulenta apparet; pejora timens, & cupiens salutem recuperare, de agendis consulit, atque poscit auxilium.

Morbus iste, quo scilicet Adolescens noster Ægrotans conflictatur est Empyema ex prægressa Pleuritide, juxtà verò latinum sermonem suppuratio, vel collectio puris nuncupatur, & definitur; puris in Thoracis capacitatem collectio, in cujus illuvie mergitur Pulmo. Pars affecta, & subjectum hujus morbi est cavitas Thoracis, quæ componitur ex costis, musculis intercostalibus, mediastino, Diaphragmate, claviculis, Vertebriis, Sterno, & Pleura, in qua cavitate Pulmones sunt. Causa autem proxima est materies putrida in ipsa Thoracis capacitatem collecta: remota verò, ac mediata est

præcedens Pleuritis, quæ excitato Phlegmone, & suppurato, ac disrupto, pus in cavum Thoracis demittit. Quoad Prognosim, affectus iste est valdè periculosus, & in Phthisim terminare solet secundum Hippocratem, in *Æphorism. 15. Sect. V.* Ast quia in Adolescente hic morbus est, & vires adhuc consistunt, spes salutis affulgere videtur, maximè si citò aptis remediis succurratur; quod ut fiat primò examinandæ sunt indicationes Medicæ, antequam præsidia Medicinalia præscribantur. Intentio ergo præcipua in hoc nostro casu est puris quam celerrima evacuatio; vel per Tussim, vel per urinas, ait enim *Galenus de loc. affect.*, se vidisse Pulmonis vomicas per urinam expurgatas: Ulterius debet massa sanguinis ad statum naturalem reduci, & partes affectæ corroborari, undè collapsæ vires restituantur. Ad Medicinæ fontes est deveniendum. Quoad Diætam, cibi sint boni succi, facilis concoctionis, ut *juscula ex carne Vituli*; immo ipsa caro *Vituli, Gallinæ, Caponum, lactis usum*, præsertim *Asinæ*, cum *Saccharo* concedi poterit; cum valdè nutriat ac facultate abstergente polleat: Pro potu utatur *Æger decocto Hordei*. Somnus, & Vigiliæ sint moderatæ, & in utrisque justus observetur modus. Alvus denique semper aperta servetur, maximè si materia ad alrum vergat. Ex Pharmacia multa sumi poterunt remedia: Primò potionem sequentem commendo. & Syrupi *Althææ*, *Oxymellis Sacharini*, *Mannæ electæ*, ana, ʒ. ij., cum aquæ *Tussilaginis* Quantitate sufficienti, *Misce*, fiat potio; indè sequens lambitivum usurpandum erit. & *Hissopi, Prasii, Pulegii Calamenthæ*, ana, ʒug. j. *Liquiritiæ Iridis, Scillæ, Helenii, Nucleorum Pineorum*, ana, ʒ. semis, biduo macerentur in aqua *Tussilaginis*, & Aceto, mox expressioni addatur mellis optimi Q. S. ad *Oxymellis consistentiam*. Si autem placeat Medico assistenti materiam peccantem ducere extra corpus per vias urinæ, tunc commendarem usum *Terebinthinæ cum succo condensato Liquiritiæ* ad conficiendum bolum quovis mane jejuno stomacho sumendum, successivè bibendo decoctionem *Chinæ, Salsaparillæ, radicis Asparagorum, Fæniculorum, & Petroselini*. Si sitis urgeat; interdium sumatur sequens Emulsio. & *Amygdalarum dulcium excorticatarum* ʒ. semis, *seminum quatuor frigidorum majorum*, ana, ʒ. semis, *Aquæ Violarum, Farfaræ*, ana, ʒ. quinque *misce*, & fiat S. A. emulsio, cui adde pulveris *Oculorum Cancri præparatorum* ʒ. ij. & edulcoretur cum modica quantitate Syrupi *Althææ Fernelii*

Fernelii Conserva Rosarum sit in usu quovis vespere, quod remedium commendatur à *Claudina*, & *Burneto*. Ex Chirurgia demum nihil de sectione Venæ dicendum, verum tota consideratio vertitur circa Paracenthesim faciendam tam commendatam à Magistris, quæ quidem Antiquis satis frequens, & usitata fuit nostro autem tempore rara, & valcè periculosa; ast quia in Adolescente sumus, & conjectari possumus, Pulmones, & organa respirationis ita corrupta non esse, ut nulla spes salutis effulgeat, immò vires adhuc sunt validæ ad suslinendam Thoracis sectionem secundum artem faciendam, unde commodum aliquod ex ea sperari potest, ideò Paracenthesim maturè, quantum possibile sit, instituendam suadeo, antequam Pulmo à sanie corrumpatur, & vires prosteruantur. Si petatur autem locus aperitionis, dico eum debere esse inter quintam, & sextam costam, nè foras læsio fiat in nervea substantia Diaphragmatis, ut olim docuit *Hipocrates lib. 3. de morb.*: ad latus autem fiat quatuor, aut quinque digitis à sternum. Ut verò cautè incisio fiat, locus prius atramento est notandus, & foramen indè fiat secundum ductum obliquum fibrarum, ac exiguum, inde argenteam fistulam foramini exactè immittere opus erit, per quam fiat puris educio; dum autem sectio peragitur, Æger noster non statim inspiret ne elevati Pulmones lædantur; at quotidie uncias duas tantum puris educere conveniet; ait enim *Hippocrates* mori illos, à quibus totum pus omnino effluerit: Si verò non rectè sanies profluat, in latus affectum decumbat Æger, & Tussim moveat, & si ob nimiam visciditatem non profluat in cavitationem Thoracis medicamenta sequentia injiciantur & *Seri lactis Caprini*, ʒ. XVIII. *mellis rosati*, ʒ. iiij., *Succi Chelidonii*, ʒ. VIII. *Misce* Ægrotus autem sumat quotidie sequentem potionem & *Radici Consolidæ majoris*, ʒ. j., *foliorum Betonicæ, Agrimonie, Vineæ Pervinæ, Pimpinellæ, ana, man: semis, florum trium Cordialium, pugill. ij. sem: num Hyperici Cardui benedicti, Urticæ, ana, ʒ. semis. Coquantur ex Hydromelle, & colatura servetur ad usum.* Hoc enim remedium describitur à *Paulo Barbetta in Chirurg.* Et hæc sunt, quæ nunc habui proponenda pro salute Ægroti nostri Deum autem interim precabor, ut in illius salutem cedant.

Eventus.

Quamvis multa ex propositis auxiliis anhibita fuerint, Æger tamen semper in pejorem conditionem cedebat, & quadragesima à Consultatione die, dum mane facies redditurus esset, syncope Phthisicus interiit.

CONSULTATIO. LXIV.

De Orthopnœa.

Vir quidam Sexagenarius post longum hyemis tempus hujus anni 1716. Tussi valdè molesta laborare incipit, ac difficulter respirare, cui respirandi difficultati sonitus primò, mox stertor accessit, immò ad talem statum reductus est, ut non nisi sedens, & erecta cervice respirare, ac quiescere possit, cum pulsu parvo, & debili; sputi aliquando viscida, ac crassi excernuntur non sine difficultate. Nunc consilium postulat pro curatione.

Affectus iste Asthma Orthopnoicum dicitur, & definiri potest, quod sit difficilis, & crebra respiratio cum febre modica, cum sonitu, & strepitu à Bronchiorum, & Cellularum Pulmonis obstructione orta. Pars affecta Pulmo est; multi accusant Diaphragma, & musculos costas elevantes. Causa est Lympha crassa, ac viscosa, Bronchiis, ac cællulis Pulmonum hærens, & ibi tenaciter impacta. Affectio autem hæc periculosa est, per hanc enim impeditur actio vitæ necessaria, vita enim sine respiratione non durat, & suffocatio certa imminet cum Mortis certitudine; immo facilè iste morbus in Hydropem transit, & Cachexiam. Difficilis porrò in curatione erit hic affectus, quia in Senæ existit; attamen nonnulla suppeditabimus remedia, ad hoc, ut melius se habeat, & salutem recuperet Sexagenarius noster Patiens. Indicationes igitur in nostro casu erunt, tollere lympham crassam in Pulmone stagnantem, depurare cruorem à visciditate prædominante, illam derivare maximè per urinæ vias, & corroborare partem affectam. Pro quibus habendis ad Medicum apparatus confugere oportet,

ut quantò citius possit, salus nostro Patienti restituatur, si fieri queat. Ad Diætam itaque quod concernit, cibus sit calefaciens & attenuans, ne crassescat materia, *carnes* conveniunt *Gallarum*, *Pullorum* &c. Fugiantur omnia edulia crassum lentumque succum procreantia, ut caro suilla, Legumina, Caseus, Lac. & similia: *Vinum* sit tenue, & medicatum pectoralibus herbis; conducunt *Amigdalæ*, *Vua passæ*, & *Ficus*. Somnus sit moderatus, & nocturnus; vitetur autem, si possit fieri, diurnus: Alvus lubrica fervetur. Ex Chirurgia nihil sumatur præter usum Clysterum, quatenus alvus suppressa fuerit; in hoc enim casu, nihil valere, Phlebotomiam puto, nisi fortè ad educendam partem sanguinis meliorem cum Ægroti detrimento. Meliora itaque, ex copiosiora remedia dabit nostro Patienti Pharmacia, ex qua pro communi alvi lenitione sumi poterit, vel *Cassia cum Cremore Tartari*, vel *Oleum recens Amygdalarum dulcium cum modico Sacchari fini*: insuper laudo usum *Seri Caprini* colati ad plures dies cum *bolo confecto ex Terebinthinâ naturali, & non lota*: Juvabit etiam *spiritus salis Armoniaci in Syrupo de Althæa*, vel in *jusculo Pulli alterato Hedera terrestri, cum pulvere Millepedum præparatorum*, ad urinam ciendam, per diuresim enim rectè pectus exoneratur. Usus frequentem *Syrupi de Peto, & de Helenio Horatii Augenii*, cujus descriptio prostat apud *Dolæum*, commendo, pluries expertus in Praxi faciendâ. In Paroxysmo exhiberi poterit sequens lambitivum ad cochlearia. ℞ *Gummi Ammoniaci*, ʒ. j. *Oxymellis Scillitici* ʒ. ij. *Syrupi de Marrubio*, ʒ. j. *Florum Sulph.*, ʒ. ij. *Misce Sperma Ceti, & essentia Helenii* in potu commendantur extra Paroxysmum à *Joh. Michaëli in Prax. Gener.* Poterit etiam cum fructu exhiberi semicochlear pro vice sequentis Julapii ℞ *Spiritus Anisi*, part. ij. *Mellis scillitici*, part. j. *aquæ Cinamomi*, parum *Misce fiat Julapium S. A.* Laudatur insuper *Elixir Proprietatis Paracelsi*, quod remedii genus à *Joh. Helmontio* summis laudibus extollitur pro curandis Asthmate, Epilepsia, Paralyti, Tabe &c.; hoc verò remedium exhibuit *Philipp. Grülingius* in *aqua Tussilaginis*. Usus denique *Lactis Asinæ* ad multos dies valdè prodesse posse credo. Pauca hæc dicebam pro salute nostri Patientis, eaque libenter subjicio Doctis-

Josephi Lanzoni Opera. Tom. II. S *fimo-*

simorum Medicorum judicio; & faxit interim Deus Omnipotens, ut omnia cedant in ejus absolutam valetudinem.

Eventus.

Licèt fuerint proposita remedia diligenter administrata, nihilominus Ægrotus noster semper in pejus lapsus est, ac tandem sævo adveniente Asthmatis hujus Paroxysmo suffocatus interiit.

CONSULTATIO LXV.

De Tussi.

Nobilis Vidua 33. annum agens mediocris habitûs ad gratiam tendentis, post gravedinem, & mensium suppressionem per tres integros menses, Tussi corripitur valdè molesta, quæ horis maximè vespertinis exacerbatur, & præsertim post coenam cum magna sputorum copia; & cum diu nihil conferentibus auxiliis, hoc malum toleret, ad me tandem venit, rem exponit, & consilium quærit.

Morbus hic manifestè patet, & pertinax, ac molesta Tussis nuncupatur, quæ definiri potest, exspiratio vehemens, crebrior, inæqualis, & sonora cum partium musculosarum exspirationi potissimum destinatarum, Thoracis, Laryngis, & Abdominis motu spasmodico facta, cum excretionem alicujus materiæ excrementitiæ à molesti cujusdam objecti irritatione proveniens: ex qua definitione, seu potius descriptione præsentem Tussim humidam esse patet. Pars affecta Pulmo est: Causa pendet à vitio lymphæ, quæ ex Pulmone in asperam arteriam translata Tussim producit, lymphæ enim è glandulis copiosius effusa Pulmonem, Fauces, & Tracheam occupat; hinc nimia aciditate sua, quam per moram acquisivit, partes nervosas irritando, Tussim excitat molestatam. Hanc autem causam principium habuisse autumo ex fluctuante lymphæ, & sanguine in utero ob mensium suppressionem stagnante, nec non humoribus acidis in ventriculo existentibus. Nunc pergamus ad Prognosim. Videtur porro iste affectus ut

plu-

plurimum levis, verum quia pertinax est in nostra Nobili Patientē, & cum magna contumacia, ideò timendum ne in pejorem morbum transeat; monet enim *Dolæus*, Tussim diu perseverantem ad Phthysim Ægrum ducere posse, nec tam facilem curationem admittere: quia verò hæc est cum facili, & prompta materiæ expulsiōe, sperandum erit, salutem citò acquiri posse, ut ex corde precor. Indicationes curativæ in nostro hoc casu sunt corrigere lympham, eamque ad crasim naturalem reducere, & ad quantitatem discretam revocare, fluxum menstrualementem restituere atque uterum, pectus, & caput corroborare; quæ ut acquirantur, sequentia propono. Primò, ad Diætam quod attinet, vitetur, aër impurus, nebulosus, & vaporibus humidis repletus; cibus, & potus sint temperati; fugiantur edulia acria, acida, & salsa, ex horum enim particulis vellicatio fit, & erosio partium pectoris accidit, undè major Tussis excitari poterit: Potus poterit esse *decoctum Hordei cum passulis vel Vinum tenue, ac dulce*: vitetur autem frigida potio; ex hac enim excitari Tussim sæpè observavi. Motus, & quies mediocres sint, sicuti somnus, ac vigilia; exulet mœror, & hilariter vivat. Circa curam Pharmaceuticam, primò utendum erit pro præparatibus *Syrupo de Hysso, de Liquiritia, & de Capillis Veneris*, indè ad communes expiandas vias, & alvum solvendam poterit tutò exhiberi *oleum Amigdalorum dulcium recenter expressum cum Saccharo ad pondus unciarum quinque*: postea exhiberem ad plures dies *decoctum Rapa- rum cum Saccharo candido; & Butyro, vel oleo Amygdalarum dulcium recenter expresso. Balsamum Sulphuris* commendatur à *Boyle de util. Philos. experim.* *Sperma Ceti cum Syrupode Althæa* optimum esse pluries expertus fui, & maximè si assumatur sub vespere; notat enim *Joh. Michaëlis in Praxi*, in qualibet Tussi medicamenta optimè tempore somni exhiberi posse, & semper cum fructu: *Conservæ* pariter *Rosarum, Malvæ, & Nymphææ* in usu sint: addantur etiam sæpè remedia uterina, & præsertim concitantia catameniorum fluxum consuetum: quod si adhuc perseveraret hæc affectio ad usum *Lactis Asinini* ad mensem devenirem. *Rotulæ* sequentes in usu sint familiari. R. *Extracti Helenii* ʒ. ij. *flo- rum sulphuris*, ʒ. semis, *Specierum Diaireos* ʒ. i. misce & cum suf-

ficienti quantitate Sacchari, & aquæ Violarum fiant Rotulæ S. A. Emulsionibus etiam quatuor Seminum frigidorum majorum factis in aqua Farfaræ uti poterit interdium ad sitim extinguendam, atque causam molestæ Tussis diluendam: Tandem laudarem in victu usum ferculi Saxoniani. Ex Chirurgia demum sumi poterit Venæ sectio in dextro pede, non semel, sed bis ad libram unam Sanguinis hauriendam pro qualibet vice, & hoc ad provocandum motum menstrualem, & ad deonerandam massam cruoris ab impuritatibus in ipsa introductis à mensium suppressione. Frictiones pariter erunt proficuae in partibus corporis inferioribus, ut & etiam clysteres, si alvus non respondeat, atque hæc utinam conferant.

Eventus.

Proposita auxilia penè omnia adhibita fuere, & instituta conveniens vivendi forma, & post triginta dies Tussis cessavit, menses rediere, & Deo adjuvante Patiens nostra sana evasit.

CONSULTATIO LXVI.

De Tussi contumaci, ac ferina in Puella.

DUlcissimam Filiolam tuam ætatis annorum VII. gravi, ac pertinaci admodum Tussi crudeliter vexari nuncias.

Est Tussis inter morbos, qui pueros infestant ponenda, quæ describi potest cum *Villisio*: exspiratio vehemens, crebrior, inæqualis, & sonora cum partium musculosarum expirationi destinarum, Thoracis, Laryngis, Lumborum, & Abdominis spasmodico velut motu facta, cum, vel sine excretionem alicujus materie excrementitiæ à molesti cujusdam objecti, aut expulsionem è pulmonibus per Trachææ ductus urgentis irritatione proveniens: ex qua Tussis descriptione duplex ejus oritur differentia, nempe humida, & sicca; prima cum materiæ catarrhalis excretionem; altera sine materia. An verò Tussis tuæ Filiolæ sit vel sicca, vel humida, non indicas; & sanè malum hoc ab Hippocrate in cen-

su morborum, qui pueros infestare solent numeratur, & in Filia tua à Catarrho ex sacra Palladis arce in subiectos pulmones depluo, ortûs sui primordia derivare videntur. Tussis ergò istius causa est quidquid asperam arteriam irritare potest: ex coacervatis enim cruditatibus in stomacho Filiolæ tuæ, exinde acidis factis, & ad partes respirationi dicatas delatis fit illa vellicatio, quæ immediatè Tussim facit, quam concomitare solent vigilæ, difficilis respiratio, vomitus, hernia, suffocatio, & aliquando mors ipsa, quam tamen in casu nostro Deus avertat, & arceat. Curatio igitur consistit, meo videri, in hoc, ut materies acido-viscida in ventriculo, vel alibi latens emendetur, & evacuetur. Quod attinet ad Pharmaciam, primò valet jusculum decoctionis raparum cum saccharo sæpè porrectum. Ut communiter ventriculus evacuetur, utatur duabus unciiis *Mannæ electæ in aqua Violarum dissolutæ*; Clysteres etiam ex lacte vaccino parati utiles esse poterunt. Laudo *sperma Ceti recens, pulverem Oculorum Cancris præparatorum, Gelatinam Cornu Cervi, Saccharum penidiatum, Pomum dulce excavatum repletum Saccharo candido albissimo*, additis tribus granis *Croci Orientalis, oleum recens Amygdalarum dulcium, syrupum de Hyssoppo, Rotulas Diacodion, Looch de Pulmone Vulpium, & de passulis*. Inungatur sub vesperam pectus *unguento de Althæa*: pedum lotio plurimùm juvare ait *Joh. Franc. Lovv. ab Erlsfelt de morb. infant. cap. 49*. Insuper sunt, qui commendant sequentia, quorum aliqua, si placet, probaveris; videlicet *oleum Vitelli crudi cum Saccharo sumptum; Succum Tussilaginis, syrupum de Portulaca, plumeam pellem cygni adaptatam pectori; oleum Sacchari, balsamum sulphuris, & succum Pulegii ad cochlearia, Mercurialis Fontanellam*, in brachio aperire docet; Alii Venæ sectionem præscribunt; quam si tuus Medicus ordinarius approbet, consulo. His autem omnibus accedat idonea vivendi ratio ipsi morbo accommodata.

CONSULTATIO LXVII.

De Sputo Sanguinis.

JUvenis admodum Illustris biliosa temperie præditus, & paucis abhinc mensibus ruborem in genis ferre passus, ex nimis laboribus, ac vigiliis in molestem Tussim incidit, ex qua Sanguinem per os rejicere incepit ad plures uncias, spumantem ac vividum, & tota sequenti die in tali periculoso affectu perseveravit; immò summo mane tertiæ diei recrudit morbus, & cruor rursus cum Tussi in majori copia est excretus. Nunc, ut à præsentī liberetur affectu petit consilium medicum.

Non solum cruoris per os eruptio, sed & ejusdem cum Tussi molesta rejectio, cum florida spumositate, atque non modica quantitate, jam satis apertè ostendunt affectionem hanc *αμόπτυσιν*, hæmoptysin, esse, de cujus natura, causis, & curatione in præsentiarum sit sermo, ut Deo adjuvante sanitati Æger noster restituatur. Definatur ergo hic affectus, Sanguinis per os cum Tussi citra inflammationem rejectio, ortum habens à Pulmonalium vasorum aperitione, seu erosione; ex quo apparet partem affectam esse Pulmonem cum suis vasis, cellulis, membranis &c. Causa istius affectionis dependere videtur à redundantia Sanguinis in vasa Pulmonum rapti, ibique Pulmonalium arteriarum orificia aperientis, sed etiam diæresim inducentis. Quia verò Æger de salute sua sollicitus eventum morbi desiderat, exprimendum à nobis erit nostrum Prognosticum primò, ab Hippocrate desumptum, ait enim *Celebris hic Præceptor in Aphor. 25. Sect. IV.* Sanguinem supernè exire malum esse, nam læsa Pulmonis vasa, difficulter sunt sanabilia, ex quo ulcus immedicabile, & tabes oriuntur; non tamen omnis spes est amittenda salutis, non enim res est conclamata uti esset si puris sputum adesset, à quo infallibiliter Phthisis oriretur, quemadmodum docuit citatus Hippocrates in *Aphor. 16. Sect. VII.* Ne autem empyricè procedamus, indicationes Medicæ sunt examinandæ, quæ, meo videri, tres sunt; curatoria, præservatoria, & vitalis; primò aperta vasa claudenda, & obturanda sunt; secundò sanguis copia, & motus peccans corrigendus;

duſ; tertio vires reſtaurandæ ſunt, ac firmandæ, & ita Æger ſaluti reſtituendus; ad quarum indicationum ſatiſfactionem facient tres conſueti Medici fontes, ſcilicet Chirurgicus, Pharmaceuticus, & Diæteticus; è quorum primo præſto eſſe poteſt validiſſimum illud remedium, in quovis Sanguinis exitu expediens, videlicet Venæ Sectio, quæ ſtatim adminiſtranda in brachio dextro, & etiam in pede, ut revulſio ſit efficacior: Utiles etiam erunt fric-
tiones, ligaturæ, & cucurbitulæ ſcarificatæ dorſo, & coxis applicandæ; quod ſi alvus non reſpondeat, ſæpe Clyſteribus communibus erit ſollicitanda. Pharmacia dabit primò ad communes expiandas vias flores *Caffiæ noviter extractæ* ad ʒ. j. cum modico *Cremoris Tartari*; Ad Cruorem acrem, & fervidum temperandum utiles erunt *tinctura florum Papaveris erratici*, *Syrupus Myrtinus*, *Conſerva Roſarum*, *Cydoniorum* & ſequens *Julapium à Michaëli* commendatum R. *Aquæ Portulacæ*, *Papaveris Rhæados*, ana, ʒ. VI. *Sanguinis Draconis in lachrymas tenuiſſimè lævigati* ʒ. j., *Syrupi Papaveris erratici*, de *Rofis ſiccis*, ana, ʒ. j. R. *Miſce fiat S. A. Julapium*. Proderunt quoque *Emulſiones quatuor ſeminum frigidorum majorum* factæ in aqua *Plantaginis*, quibus addantur *pulvis Oculorum Cancris præparatorum* & *terræ Sigillatæ*. *Electuarium ſequens ſummopere laudat WValdschmidius*, & ego non ſemel expertus fui: R. *Conſervæ Roſarum antiquarum*, ʒ. iiij., *pulveris radicis Conſolidæ utriuſque*, *ſeminis Portulacæ*, *Maſtriches*, *Boli Armenæ*, *Tragacanthi*, ana, ʒ. R. *Miſce cum ſyrupo de Symphito fiat Electuarium molle*, S. A., de quo frequenter Æger aſſumat. Uſum *Lactis Aſinini* commendo, vel ejus loco *Caprini* ad multos dies cum pulvere *Sacchari ſini* jux-
tâ conſuetum morem. Ulterius ex hiberi poterit *pulvis Opii aduſti cum Succo Urticæ*, *Sal. Centinodii*, *ſpiritus Vitrioli officinarum*, quæ remedia commendantur à *Clarifs. D. Joh. Hieronymo Zannichellio* Amico meo plurimum honorando in ſuo *Promptuario remediorum* *Rotulæ adſtringentes Diatragachanthi* cum bolo pariter convenient; ſicuti *pilulæ Helvetii* toties à me feliciter expertæ. Diætâ denique omnibus ſuccedit quam Ægrotus noſter diligenter obſervare debet: Cibus ergò ſit tenuis, & vi glutinoſa pollens, ut *cremor Hordei*, *Oryza in lacte cocta*: *Carnes Vituli Agnorum* & *Caponum* optimi erunt uſus, ſicuti *Lactuca*, *Portulaca*,
Cicho-

Cichoreum. Vinum sit aquosum: Somnus, & Vigilia non excedant mediocritatem: motus nimios pectoris fugiat, & ab ira vehementi abstineat. Faxit modò Deus, ut omnia cedant in perfectam salutem nostri Juvenis, ut ex corde precor.

Eventus.

Ferè omnia prædicta remedia diligentissimè fuère usurpata, & sic duorum mensium spatio pristina sanitati est revocatus, nunc verò sanus vivit.

C O N S U L T A T I O LXVIII.

De Sputo Sanguinis qualibet Luatione.

EX Epistola Medicinali egregiè exarata, & diligenter à me lecta, atque considerata, collegi Reverendam Monialem periodico Sanguinis Sputo in singulo novilunio affectam esse; quolibet enim mense à Pulmone per sputum cruenta habetur excretio; & istius pariter causam tangit prædicta Epistola.

Probabile est, imminuta Menstruali per uterum purgatione, refluxum ab eodem cruorem Pulmonis vasa subire, eaque aperire, & in Tracheam penetrando, cum sputo exire, undè affectio ista succedit; vigente enim catameniorum tempore Sanguinis copia in uteri vasa impingit, sed resistentibus fibris horum vasorum, fermentatio augetur, & motu inverso à sanguine vis infertur partibus superioribus, & præsertim reticularibus Pulmonum vasculis, quorum oscula tenella laxantur, & aperiuntur, & exindè cum Tussi fit Sanguinis sputum. Pars igitur affecta est Pulmo, & uterus respectivè: quod si quærat, cur Sanguinis excretio solum per aliquot dies perduret in Lunæ primordiis, respondendum, hoc evenire, quia imminuta Sanguinis copia, & ejus orgasmo cessante, cessat & motus violentus ad Pulmonis vasa, & ita naturalis mixtura cruori restituitur, & sanitas usque ad alium mensem habetur, donec scilicet de novo genita materies prava, sanguinem ad uteri vasa præcipitet, à quorum resistentia iterum ad Pulmonem

monem propulsio fit, undè iterum sanguineum redditur sputum. Quid autem sperandum de hoc affectu si petatur, dico, morbum esse periculofum, quia Sanguis ab inferioribus partibus ad superiores, & principes irruit; imò metus est, ne substantiam ipsius Pulmonis lædat; atque corrumpat, ex quo ulcus, & per consequens Phthisis insanabilis haberetur: Sanguine præterea per os exire semper malum portendere tradidère Doctores, & semper aliquid timoris afferre cruorem per superiora emanantem expertus dico. Quia verò causa in nostro casu est manifesta, & à denegata perennitate menstruæ purgationis derivat, ideò hac restituta aliquid boni sperandum erit, maximè quia in ætate vegeta est nostra Reverenda Monialis. Indicationes autem in isto casu erunt promovere naturalem per uterum excretionem, auferendo impedimenta in vasis, & sanguineam massam depurando; inde Pulmonem firmare, & ejusdem substantiam corroborare: quæ ut celeriter assequantur, hæc observanda, & exequenda puto. Primò quod spectat ad vivendi modum, hilariter vivat, & localiter moderatè se exerceat; caveat à rebus acidis, acribus, ac falsis; Carnes sint facilis coctionis, & commendantur absque ullo condimento; Cœna sit levis; Somnus, & vigilia modum non excedant: A Leguminibus, & piscibus, præsertim sale conditis, abstineat, & irasci credat profanum, ut verbis utar scholæ Salerni: *Vinum alteratum* sit infusione *foliorum Absinthii*, & sit *tenuè*; & pariter condire iuscula *Sale Absinthii* multum utilitatis afferret, sic enim cruor insensibiliter accommodatur. Proderunt etiam *Emulsiones quatuor seminum frigidorum majorum*, & *serum lactis Vaccini destillati cum Cichoraceis*. Ex Chirurgia desumi poterit Venæ sectio celebranda in pede præsertim ante novilunium, præterea concurbitulæ scarificatæ applicari poterunt coxis; & si alvus non respondeat, aliquibus clysteribus erit utendum circa: verò cauterium commendatum ab alio Excellenti Viro, Ego justè assero, per ipsum corruptum tantum alimentum partis, in qua fuisset confectum, excerni; quatenus pars est exulcerata, & ad saniem disposita; undè de hoc nihil. Frictiones per aliquot dies ante Lunam novam meliores, ac utiliores fore judico, maximè si inferioribus corporis partibus fiant. Pharmacia denique dabit, primò ad communes expiandas vias, ali-

quod blandum pharmacum, ut verbia gratia oleum *Amygdalarum dulcium sine igne extractum*, vel flores *Cassiae recentis cum modico cremore Tartari*: quibus remediis alvo sollicitata, veniendum erit ad usum *jusculi pullorum alterati foliis Borraginis, Endiviae, radicibus Graminis, Asparagi, Petroselini, Apii, ac foliis Capillorum Veneris, & Artemisiae* cum quo juscule sic medicato assumere poterit Monialis nostra *Spiritum Salis Ammoniaci ad aliquot guttas, & hoc per XII. dies*; deinde commendo usum *seri Caprini depurati, cum tinctura Martis: Pulveres oculorum Cancri praeparatorum, & Antimonii Diaphoretici* utiles erunt; ut & *conservæ Nymphae, & florum Malvæ*; neque displicebit usus *elixiris Proprietatis Paracelsi* ad aliquot dies sumendi in juscule mane jejuno stomacho: his enim omnibus, ac primum Dei beneficio, spero futurum, ut Reverenda Patiens ad meliorem vitae statum reducatur, ut ex corde precor.

Eventus.

Remedia proposita ex parte adhibita tantum fuerunt, & melius se habere incepit Monialis nostra, immò semper in melius vergendo saluti fuit restituta, nec amplius sputum Sanguinis passa, perennem in mensruis purgationem experta feliciter convaluit: Nunc Deo favente sana, vegeta, ac robusta vivit.

CONSULTATIO LXIX.

De Cordis Palpitatione ex Iracundia.

Nobilis Matrona ætatis annorum quadraginta, biliosæ temperiei, vidua, menstruali orbata fluxu, trium filiorum parens, quotiescumque per iracundiæ excandescentiam animo commoveatur, & irascitur, illicò facies rubore profunditur, pulsus inæqualiter movetur, & palpitatione valdè molesta ad multum tempus perdurante afficitur, & aliquoties Syncope tentatur. Similem affectionem in quadam nobilissima Vidua, se observasse narrat *Balth. Timæus lib. 2. cas. 16.* Ego verò super hoc casu quid sentiam breviter exponam, ut Medico assistenti, & ægrotae consanguineis satisfaciam.

Pal-

Palpitatio igitur cordis genericè sumpta definitur à Medicis, motus cordis depravatus, quo ille musculus impetu præternaturali pulsus, & ita ad ipsas costas appellitur, ut indè incommodum ægri sentiant: in casu autem nostro excitatur ob iram, quatenus agitati per excandescentiam spiritus vitales effervescent, & inæquali motu cor ipsum afficiunt; hinc rubet facies, & corpus penè totum incalescit, quia cruor, & ipsi spiritus impetuosè ab interiori corporis parte ad exteriorem deferuntur; illicò hoc autem accidit, ob motum celerem biliosi sulphuris; nam aliqui Philosophi putavêre, iram esse bilem circa Cor accensam; ideò meritò Clariss. *Zuvingerus* in sua *Praxi Medica* ait, ex ira vehementi sæpè oriri Cordis Palpitationem, sicuti etiam ex terrore, metu, ac tristitia magna, & maximè ubi mensium fluxus non adest, ut in casu nostro. Hic porrò affectus non est contemnendus, ut potè qui non difficulter in peiores potest transire affectiones, ut in febrem lentam, Atrophiam, & ipsam Syncopem, nec non Apoplexiam. Ad nostram Patientem curandum quod attinet, primò agendum, ut præceps in iram animus contra excandescentiæ impetum, quantum possibile sit, præmuniatur, quod potius ex morali Philosophia, quàm à Medicina sperandum est. Optima ergo erit mansuetudo, ac tolerantia, ac Prudentia; istæ enim virtutes cùm iracundiam arceant, hinc est, ut etiam Cordis Palpitationem tollant; quia verò Medicus se præstare debet ad curationem morborum; ideò in præsentiarum aliquid de præservatione, & curatione dicendum. Ad moderandam igitur bilem, & illam evacuandam, suadeo primò communem totius corporis evacuationem, quæ haberi poterit ope *potionis ex Cassia clarificata*, & ope alterantium paratorum *ex Cichoreo, Endivia, Borragine, pulvere Antimonii diaphoretici & Oculorum præparatorum*. Venæ sectio instituatur in pede dextro ad unicas X. sanguinis extrahendas: *Succos Sonchi, Cichorei, ac Endiviæ* ad plures dies laudo, sicuti omnia illa, quæ bilis effervescentiam temperant. Æstivo tempore usum *aquarum Thermalium* suadeo, sicuti balneum aquæ dulcis nostri Eridani. Quando verò adest paroxysmus hujus Palpitationis, sequenti uti poterit remedio: *Rx Syrupi de Coralliis rubris, 3. j. Aquæ Cordialis Saxoniae, 3. ij., totius Citri, 3. j. aquæ Cinnamomi, 3. ʒ., Jul. Gemm. sine Opio 3. j. Miscè. Regioni Cordis extra apponatur sequens Epithema; Rx Aquæ Rosarum,*

3. vj., *Aceti Rosacei simplicis*, 3. j., *specierum Cordialium pro Epithemate*, 3. j. *Misce.* Naribus etiam odoramenta ex aceto forti, vel balsamo Apoplectico, sive *aqua Reginae Hungariae*, & quinta essentia Rorismarini admoveantur. Animus ad tranquillitatem, & hilaritatem excitandus erit; & his omnibus congrua addatur victus ratio, sine qua nihil, undè de hac sit valdè sollicita, quoad quantitatem, & qualitatem ciborum; & hujusmodi diætæ ratio Præstantissimi Medici accuratissimæ prudentiæ remittitur, cui ideò omnia, & alteranda, immutanda libenter & relinquo. Summus denique Deus omnia præscripta salutaria reddat.

CONSULTATIO LXX.

De Turbatione Præcordiorum, & Pulsu magno, & irregulari.

Affectus præternaturam, à quibus Vir Illustris, ut colligo ex doctissima Epistola Excellentissimi Domini Curantis, sollicitatur, sunt præter summam vigiliam, Præcordiorum turbationes, Pulsus irregularis, magnus, ac impetuosus, non sine actionum læsione; quare quid sentio breviter, ac sincerè juxta meum consuetum morem exponam.

Istæ affectiones oriuntur, tanquam à prima scaturigine, à visceribus imi ventris; quatenus enervatis ipsorum fermentis, prima concoctio rectè non perficitur, undè chylosa substantia malæ conditionis, & sylvestris naturæ habetur; ex quo fit, ut cruoris massa vitietur, nec sufficienter edulcoretur, uti pariter reliqua fluida ad vitam conservandam necessaria; undè omnes humores acriores, & acidiores evadunt, qui transeuntes per cordis sinus irritant fibras illius regii visceris; ex qua irritatione oritur illa frequens, & immodica turbatio Præcordiorum quæ nostrum vexat Patientem, & præsertim accidit motus Cordis, & arteriarum vehementior consuetò, undè pulsus magnus, impetuosus, & irregularis habetur. Ad Prognosim quod spectat, dico morbum hunc sanabilem esse: ex vitio enim humorum dependet, non solidorum; facilius enim fluida, quam solida corriguntur; ulterius ætas cum sit florida, ac natura Ægroti robusta, ope mediorum salus spera-

sperari licebit; si verò contumaciora evaderent symptomata, & nihil conferrent præsidia, tunc timendum esset, ne Syncope, & mors improvise succederet, quod tamen Deus avertat: Ut autem curatio ritè procedat, indicationes sunt examinandæ, quæ, meo videri, sunt, corrigere, quantum possibile sit, primam concoctionem, depurando fermenta, & sanguinem ad bonam crasim restituere, atque viscera exindè corroborare; quæ ut assequantur, expiatis primò communibus viis aliquo lenienti medicamine, puta *electuario lenitivo*, vel *Potione ex Manna*, quam dabit Pharmacia; & ulterius præstabit usum *seri Caprini depurati* ad aliquot dies, cui additæ sint nonnullæ guttæ *tincturæ chalybis*; præter hæc juvabunt *pulvis oculorum Cancris præparatorum*, *Coralliorum alborum præparatorum*, *Sal Absinthii*, & quovis vespere *Conserva Rosarum & Borraginis*. Ex Chirurgia, si alvus adstricta sit, solvi poterit ope Clysterum communium, vel confectorum ex lacte Vaccino, & Saccharo quantum fatis. Sanguis è vena communi brachii sinistri mittatur ad libram unam; & quatenus pertinacia affectionis hujus sequeretur, Venæ sectionem in dextro pede repeterem. Quod attinet ad externa auxilia, Epithemata regioni Cordis apposta commendo, ut & balneum aquæ nostri Eridani ad plures dies. His omnibus accedat idonea vivendi ratio, quæ tenuis sit, & pro potu *aquam Hordei* exhiberem, quæ omnia à me ruditer, ac breviter exarata in Viri Illustris salutem, & incolumitatem cedant, ut ex corde precor.

Eventus.

Proposita auxilia Medica omnia diligentia, & studio administrata fuerunt, ac optimâ vivendi ratione observatâ, quadraginta dierum intervallo perfectè convaluit.

CONSULTATIO LXXI.

De Cordis Palpitatione.

CERTUM est Perillustrem nostrum Civem, de quo petitur consilium, à multis mensibus per intervalla quædam, quintum

ferè mensem attingentia, laborare cordis Palpitatione; quotiescumque enim per excandescentiam, etiam levem, animo commovetur, illicò facies, aliàs pallida, rubore suffunditur, arteriæ inæqualiter, & inordinatè moventur, ipsaque Cordis regio quasi contremiscit, & palpitat.

Affectus hic Palpitatio Cordis nuncupatur, & definitur immoderata, & violenta Cordis concussio, quod sibi molestum est studentis excutere, mediante motu convulsivo; spasmodicè enim fibræ ipsius Cordis vellicantur, & contrahuntur: Differt porrò morbus iste à Passione Cardiaca, hæc etenim oris ventriculi affectio est; noster autem morbus ipsius Cordis, & arteriarum: Quia verò Cor afficitur idiopathicè, ideò subjectum præsentis affectionis est Cor, cum suo pericardio: Oritur à Sanguinis Visciditate, qui Sanguis viscidus in rarefactione sua occupat majus spatium, ex quo Cordis parietes valdè dilatantur, undè necesse est, ut Cordi, & arteriis quædam vis inferatur, & per consequens Palpitatio oriatur. Nunc ordine consultationis servato, Prognosim videamus. In genere igitur iste morbus periculosus est, quia pars affecta est nobilis, & officina Spiritus Vitalis, ex qua ad universum corpus Sanguis, & calor distribuitur; ulterius periculo semper plena est hæc affectio, quia plerumque in Syncopem lethalem degenerare solet suadente *Dolæo in Prax. lib. 2. cap. 5.* Periculum autem certum est repentinæ mortis si iste affectus diutius affligat, sæpiusque redeat: Attamen in nostro casu non omninò est desperandum, dum vires Ægri sunt validæ, ac ætas consistens, & maximè eo quia potest corrigi visciditas materiæ morbificæ: quo factò, motus naturalis Cordi restitueretur, & per consequens salutem Æger noster recuperaret, ut spero. Indicationes igitur curativæ in hoc casu sunt, visciditatem in sanguine tollere, discutere, vel revellere; atque tandem Cor ipsum corroborare, ad quæ assequenda ad Chirurgiam, Pharmaciam, Diætam recurrendum. Sit itaque Diæta moderata, & alimenta exhibeantur, quæ probum, ac laudabilem Sanguinem valeant generare, & non viscidum, tenuem, ferosum, falsum, & acrem, & quò alimenta simpliciora, eò meliora evadent, teste latino Hippocrate *Celso*. Juscula igitur condiantur, croco, & cinnamomo; radices aperientes *Asparagi, Fœniculi, cortex Capparidis* convenient;

venient ; *Chocolata* in usu sit, non abusu ; fugiantur cibi craffi , & flatulenti, falſi, & acidi ; fructus hortenfes, carnes fumo induratae, & ſalitæ. Potus ſit *vinum tenue*, odoratum, aqua tamen dilutum: fugiatur è contra *Vinum* generoſum ſulphure multo turgidum, ex quo furor Cruori conciliatur, & per conſequens Cor ad motum extraordinarium ſtimulatur ; optimè enim *Helmontius* ait, helluones palpitatione Cordis ſæpè tentari. Somnus, & Vigilia ſint moderata, docet enim *Hippocrates in Aphor. 3. Sect. II.* ſomnum, & vigiliam modum excedentem morboſam eſſe. Alvus ſemper lubrica ſervetur, & ſemel in die fæces egerat, ſi non ſpontè, ope *paſſularum*, & *prunorum decoctorum cum Saccharo*. Pharmacia primò leniens dabit conſuetum ex *Electuario lenitivo*, cum *cremore Tartari* ad conficiendos bolos ſecundum artem, ut primæ viæ mundentur, & à ſaburris ibi morantibus liberentur ; vitanda erunt omnia ſaccharata, & ſucci herbarum eligendi hunc in modum præſcripti jam à celebri *Joh. Forti in Consult. & Succi depurati Cichorei, Borriginis, Sonchi, ana, ʒ. j., Salis Prunellæ, ʒ. ʒ. decocti in jure pulli Malvæ, Violarum, Meliffæ, Agrimonie, Pentaphylli, ʒ. v., Miſce pro ſyrupo, & ſic pro aliis ; inde uſum ſeri Caprini depurati* commendo ad XV. dies, quatuor horis ante prandium ad unc. XX. *Aqua cordis Cervi* multum utilitatis præſtabit, ſicuti externè ſequens Epithema. & *Aquæ Meliffæ, Borriginis, ana, lib. ſemis, aquæ Roſarum, ʒ. iiij. Pulveris Caryophyllorum, Cinnamomi, ligni Aloës, corticis Citri, ana, ʒ. ʒ., Seminis Ocymi, ʒ. i., Croci, gran. v. vini odoriferi, ʒ. iiij. Miſce fiat Epithema cordiale*: Poſſunt etiam externè applicari ſacculi è *Meliſſa, floribus Lavendulæ, Borriginis, Bug'oſſæ*, & aliis cordialibus; proderit quoque aqua Cordialis Saxoniæ cum *Tinctura coralliorum*, & *Confectione Alchermes*. Uſum lactis commendare videtur *Joh. Fortis in ſuis Consult.* per dies 40., quatuor, vel quinque horis ante prandium, ſtatim mulcti, cum conſueta quantitate *Sacchari fini pulverizati*: poterit etiam utiliter externè regio Cordis illiniri *Oleo* noſtro contra peſtem, vulgò *del Caſtagna* nuncupato, vino generoſo diſſoluto. Sequens aqua cum ſequenti pulvere valdè proficua fuit in quodam Rever. Sacerdote ſæva Cordis Palpitatione affecto, & à me feliciter liberato, videlicet. & *Aquæ Totius Citri, Meliffæ, Borriginis, ana, ʒ. iiij., Cin-*

nam-

namomi, 3. j. Jul. Gemm. S. O. 3. j., Misce. & Pulveris Margaritarum præparatarum, Eboris præparati, Cornu Cervi iusti, Corallii albi præparati, ana, 3. 6. Smaragdi præparati, 3. j. Misce, divide in iij partes æquales; & assumatur die, ac vespere. Chirurgia tandem dabit Venæ Sectionem in Mediana Sinistri brachii, ad educendum sanguinem ad uncias decem: ulterius commendo Phlebotomiam in pede, ac cucurbitulas scarificatas dorso affixas suadente Rhase cum Dolæo. Clysterum usus utilis erit, quatenus alvus per se non respondeat. Quæ omnia Nobilissimo nostro Civi salutaria precor.

Eventus.

Proposita remedia fuerunt ex parte adhibita, & mutato aëre, Æger salutis perfectæ fuit restitutus, atque sanus nunc in Patria vivit.

CONSULTATIO LXXII.

De Syncope.

CAsus, super quem meum petitur consilium, talis est, Juvenis 31. annorum, Nobilis, tenuiori victui assuetus, cum sodalibus rus petit, & ad venationem se componit; ob ingentem tempestatem, & fulmine in terram lapso, fœnilque proximo accenso, vehementer territus, concidit sine sensu, & motu, & ferè nulla respiratione. Facies pallet, pulsus penè nullus, cum sudore frigido, non sine difficultate exercitatus, membrorum frigiditatem, & debilitatem patitur immodicam, & altera die idem redit symptoma, immò post cœnam denuò concidit: Nunc Medicam postulat operam.

Morbus hic Syncope nuncupatur à Doctoribus & dicitur præceps virium lapsio; ab aliis solutio naturæ vocatur; estque animi deliquium omnibus aliis fortius, & periculosius, illudque comitari solent illa eadem symptomata, quæ in nostro Juvene perspicimus, frigiditas nempe totius corporis ob nativum calorem exsolutum; frigidus sudor, qui syncopticus propterea nuncupatur; pulsus defectio; ac sensus, motusque privatio. *Amalth. Cast. Brun.* Subjectum principale

capitale hujus affectûs est Cor, non excluso sanguine, sunt enim Cor, & Sanguis causæ sociæ. Causa porrò immediata istius morbi est circulatio Sanguinis inhibita, & defectus influxus cruoris ex sinistro Cordis ventriculo per arterias in partes. Iste autem defectus non est quidem totalis, aliàs mortem induceret repentinam, tantus tamen est, ut vitalem facultatem turbare valeat, & vires exsolvere, totumque corpus suo defraudare vigore. Causa verò mediata proximior est impedita vitalium spirituum genesis: Causa remota fuit terror ob ingentem tempestatem, & casum fulminis; in subito enim terrore spiritus unà cum Sanguine ad Cor subito revocantur, & membra omnia destituunt, undè Sanguinis motio quasi sistitur, & circularis motus ad tempus ferè cessat; & sic flammula vitalis quasi obruitur, & penè extingui videtur. Ad Prognosim quod attinet, dico, omne animi deliquium gravissimum malum esse, mortis enim præ se fert speciem; ulterius, quia pars princeps afficitur, ideò gravis morbus iste apparet; aiebat enim *Hippocrates in Aphorism. 41. Sect. II.* illos derepentè mori, qui sæpè & vehementer sine causa manifesta animo linquuntur: non desperandum tamen in casu nostro, quia in Juvene, & sano; & quia toties revixit, indicium naturæ resistentis: Quocirca indicationes Medicæ sunt videndæ ut curatio de facili habeatur: hæc autem sunt, restituere motum cruori in ipso paroxysmo; extra verò paroxysmum spirituum vitalium genesis promovere, & Cor ipsum firmare; quæ ut assequantur ad Pharmaciam, Chirurgiam, & Diætam confugere oportet, ex quibus fontibus salus oriri potest: & primò quoad Pharmaciam, lenienti præmissa ad communes expiandas vias, usum suadeo aquæ Theriacalis cum aqua Cinnamomi, & modico olei succini albi, sicuti pulverem Margaritarum præparatarum & Corallia præparata. Præterea commendantur conservæ totius Citri, Rosarum, Confectio Alchermes cum aqua Cordiali Saxonie, cordis Cervi, Melissæ, Borriginis, & similibus: Assumptionem Succorum Fumariæ, Agrimonie, Cichorei, Borriginis ad ʒ. iiij. quavis mane jejuno stomacho, & id per dies x. immò decoctum leve Salsæparillæ commendando: Proderunt etiam species Diamargaritarum & Emulsiones quatuor seminum frigidorum majorum factæ in aqua Borriginis: Spiritus Rosarum, quatenus Cor, & Cerebrum recreans, commendatur à Sennerto, & Boneto, sicuti à Sylvio de le Boë olea aromatica, & salia volatilia;

sed maximè oleosa: Elixir Vitæ, & oleum Cinnamomi valdè præstare in curatione hujus affectus ait *Glabachius in sua Praxi Med.* In paroxysmo labia sale, aqua falsa, aut Urina ipsa, si aliud non suppetat, laventur, & fricentur, ex suasione *Michaëlis*; immò aquâ frigidâ facies inspergatur, & acetum naribus admoveatur. Ex Chirurgia verò sumatur Venæ sectio, tam in, quàm extrà paroxysmum, vel in brachio, vel in pede instituenda, ut citò promoveatur sanguinis motus localis. Insuper Clysteres utiles erunt, ut & fricationes cum modico oleo Amygdalarum dulcium faciendæ dorso; omnia hæc, ut semper magis humorum motus concitetur. Diæta tandem his omnibus succedat, & cibus sit temperatus, boni succi, pro meliore spirituum generatione, ut *carnes Vitulorum, Caponum & similibus. Vina rubra* commendare videtur *Galenus*, quia citò replent corpora evacuata; *juscula* pariter *Pullorum* prius concisorum, & contusorum exhibenda laudo; ait enim *Hippocrates* facilis esse corpora potu refici, quam cibo, potulenta enim in chylum facili pronitate mutantur, & cordi citò communicant refectiorem, & licet non nutriant, ut solida, superant tamen nutriendi celeritate: Somnus sit brevis, & capite elevato: alvus lubrica servetur quotidie arte sollicitanda, nisi spontè respondeat: Fugiat Æger potiones nive, vel glacie refrigeratas; curas animi tollat: & sic omnibus istis ritè observatis summo adjuvante Archiatro salutem pristinam Juvenis noster recuperabit.

Eventus.

Opportunis temporibus usurpata fuere multa ex dictis remediis, & accedente aëris mutatione pristinæ sanitati Æger fuit restitutus, nunc sanus vivit.

CONSULTATIO LXXIII.

De Animi Deliquio.

A Dolefcentula Romandiola ætatis annorum 17. boni corporis habitûs, à multo tempore imminutionem appetitûs passa, fa,

sa, derepentè in præcipitem virium defectum incidit, ex quo ferè mortua cadit; paulò post revocatur ad vitam, nonnullis elapsis horis malum repetit, & ad mortis fauces accedit. Pulsus est parvus: Consilium petit.

Affectus iste est præceps virium defectus, & dicitur à *Dolæo* Microcosmi Eclypsis, ob quam Mors præforibus esse videtur. Pars affecta in tali animi deliquio est Cor ipsum, tanquam spirituum vitalium regia; dependet enim iste morbus à defectu spirituum vitalium, qui defectus quatuor modis contingere potest, vel quia spiritus non sufficienter gignuntur; vel, si geniti, de facili dissipantur; vel alterantur, & vitiantur, vel tandem suffocantur; in nostra verò Patientè, puto esse in primo casu; in hac enim Adolescentula spiritus vitales non sufficienter generantur, ex quo defectu spiritûs animalis paucitas insurgit, undè virium prostratio, & appetentia penè nulla, quo fit ut per inediam immodica corporis inanitio habeatur, & per consequens minor copia spirituum generetur, sicque languidæ vires deficiunt. Subitus autem in terram lapsus rectoribus musculorum, & totius humanæ machinæ spiritibus stationem suam relinquentibus debetur, & ita deficientibus spiritibus, omnes actiones cessant, & viva nostra Ægrota, cadaveri fermè similis est. Visa causa hujus affectionis, quæle Prognosticum statuendum sit, nunc videamus oportet, & quid præsagiendum respectu salutis, vel mortis. Dico igitur, mea, qua semper soleo, naturali ingenuitate, affectionem istam timendam esse, dum adest summa debilitas, ut Adolescentula ipsa fatetur; & magnus Præceptor *Hippocrates in Aphor. 41. Sect. II.* ait, *qui sæpe & vehementer absque causa manifesta animo linquntur, iderepentè moriuntur*; quod in casu nostro Deus avertat. Verùm quia in adolescentia sumus, de salute non desperandum.

Ut ergo methodicam curationem instituamus, examinandæ sunt indicationes, ut indè remedia opportuna præscribamus. Debemus igitur generationem spirituum promovere, ac genitos roborare, atque in posterum Ægram nostram à tali affectu præservare; quæ ut fiant ad tres consuetos Practicæ Medicinæ fontes est deveniendum; id est, ad Chirurgiam, Pharmaciam, ac Diætam; è quarum prima se sistit nobile, & generosum illud remedium, scilicet Sanguinis Missio,

quæ Hippocrate, & Galeno auctoribus assentientibus tutò celebrari potest; licet contrarium sentiant nonnulli, asserentes in nostro casu, Venam secare non licere, cùm sanguinem educendo, calor nativus magis imminuatur, spiritus dissipentur, & vires dejiciantur, quas tamen fartas rectas conservare debemus, & maximè tempore paroxysmi, quia tunc sanguinem extrahere est animam ipsam simul ejicere; nihilominus tamen cum debito moderamine sanguinem mittendum esse jam dixi, ad motum sanguinis vigorandum, ut parte ejuseducta reliquus cruor vegetior impellatur, ne subsistat: Venæ sectionem enim in grumescencia sanguinis commodum esse præsidium docuit Joh. Michaëlis in *Prax. Special.*: Cucurbitulæ etiam scarificatæ proderunt, ut & frictiones, quatenus hæc spiritus excitant, & ad exteriora revocant. Pharmaceutico ex fonte primò defumi poterit *Manna*, aut *Cassia* ad saburram vitiosorum excrementorum in primis viis stabulantium tollendam, blandè alvum exstimulando, ita ut via sternatur ad alia remedia subsecutura: Clysteres quoque ad alvum sollicitandam commendo: Mixtura sequens cochleatim assumenda laudatur à Sylvio de le Boë & *Aquæ Menthæ*, ʒ. ij, *tincturæ Cinnamomi*, ʒ. ʒ. *Olei Caryophyllorum*, gut. VI., *Syrupi Cochleariæ*, ʒ. j. *Misce.* Ita omnia spirituosa salino-volatilia, quæ flammam vitalem accendere valent, & spiritus refocillare, utiliter poterunt exhiberi, ut verbi gratia, *Aqua Cinnamomi*, totius *Citri*, *Cerasorum nigrorum*, *Confectio Alchermes*, *aqua Cordialis Saxonæ*, *Melissæ*, *pulveres Margaritarum præparatorum*, *ossis de Corde Cervi*, *Corallii rubri præparati*, & *lapidum quinque pretiosorum*, *Conservæ insuper florum Tunicæ*, & *Borraginis* utiles erunt; sicut aqua *Reginæ Hungariæ* naribus frequenter admota, & *Cordis regioni* applicita. Ad revocandam *Ægram* in actuali deliquio uti poterit *spiritu Salis Ammoniaci*, cum *spiritu Vini Camphorato*, & *oleo Succini* mixtis simul: solvere *lipothymiam balsamum succini albi* naribus illitum docuit *Dolæus*. Diæta demum moderata sit, & hanc meritò *Adolescentula* nostra observare tenetur, ne sæpius, & gravius, ut antea, tali morbo affligi velit: Cibus igitur sit temperatus, & boni succi pro majore spirituum generatione, ut *carnes Vituli*, *Caponum*, *Hordeum*; juscula condiri poterunt *Croco*, & *Cinnamomo*, vel *Macis* pulvere: Vinum sit tenue, & dulce, odoratum, & restituens spiritus vitales. Vitandi sunt Cibi dif-

ficilis

facilis concoctionis: Quies præferenda exercitiis. Hisce autem singulis ritè observatis brevi spero remissurum fore præsentem animi deliquium summo adjuvante Archiatro ter Optimo, & Maximo, ut ex corde precor.

Eventus.

Vix medicamina aliqua ex propositis experta fuêre; & superveniente Diarrhœa biliosa cum nonnullis torminibus Ventris, Animi Deliquium cessavit, & Adolescentula nostra omninò salutem recuperavit; nunc Deo adjuvante sana vivit.

CONSULTATIO LXXIV.

De Hydrope Pulmonis.

EX valdè compendiosa, & brevi historia morbi Nobilissimi nostri Patientis colligi facile potest, Ægrum, cujus salus optatur, affectum esse Hydrope Pulmonum, cui accedit difficilis respiratio, & crurum ac pedum tumor; qui affectus originem suam agnoscit à soluta compage totius cruoris facta ab exaltatione salinarum particularum erodentium, unde humorum massa colliquatur, & in circulando motu labefactato stagnat hinc illinc serositatis portio, & exindè fit tumor, & primò quidem in Pulmone; in hoc enim totus sanguis effluit; & cùm chylosa substantia non debitè uniatur cruori, sed à salibus sylvestribus supradictis in lympham colliquetur, quæ extravasata Pulmonis substantiam in tumorem attollit, indè spirandi difficultas insequitur; & ita etiam ex eadem causa crurum, ac pedum oritur intumescencia morbose, qualis apparet in nostro casu. Prognosis in casu nostro non adeò felix est, pars enim principalis afficitur, & respiratio læditur, actio tam necessaria vitæ humanæ; præterquam quod admodum difficile evadit restituere læsam totius corporis Oeconomiam, & præcipuè Pulmonis, & totius Pectoris: Attamen quia vires adhuc vigent, & melius est anceps experiri remedium quam nullum, ideo examinandæ sunt indicationes, ut curatio ope remediorum

recta, ut fieri debet, instituatur. Indicationes igitur erunt, tollere congestionem humorum in Thorace factam, derivare ichores ad vias urinarias, corrigere sanguinis massam salia infringendo, ac demum viscera interna corroborare; quæ omnia, & singula ut nos habeamus, & per consequens, ut opem nostro Ægroto feramus, saltem ad mitiganda Symptomata, ad tres consuetos Medicinæ fontes devenire expedit, videlicet ad Chirurgiam, Pharmaciam, & Diætam. Et ut ordiamur à prima, nihil ex hac ego fumerem nisi Clysteres ad alvum sollicitandam, quatenus opus esset, & hos conficerem ex lacte Vaccino, & Saccharo rubro quantum satis, vel ex decoctione emolliente cum oleo Amygdalarum dulcium. Pharmaciam primò dabit pro lenitivo *oleum recenter expressum Amygdalarum dulcium ad uncias quinque*; deinde ad facilitandam respirationem, & urinæ vias aperiendas uti poterit *spiritu Terebinthinæ*, vel *spiritu Salis dulcis cum jussculo chalybeato*, in quo prius bullierint *radices Althææ, Graminis, Petroselini, Asparagorum, Fæniculi*, & hoc per plures dies; quod si moveatur urina, tunc spes salutis affulget, & statim cogitandum erit de restituenda nativa cruoris compage, quod præstabit, suadente *Malpighio*, *tinctura Chalybis*, cum *jussculo Pullorum alterato foliis Absinthii, Marrubii*, & hoc sumendo ad plures dies, accedentibus etiam istis pulveribus. *℞ Pulveris Oculorum Cancris præparatorum, Antimonii diaphoretici, Salis Prunellæ, Cornu Cervi usti, ana, 3. j.* Misce divide in VII. partes æquales; Interdum autem adhibeantur sequentes tabellæ *℞ Seminis Althææ, 3. j. florum sulphuris, 3. ℞., Sacchari candidi, q. s., & cum sufficienti quantitate aquæ Violarum fiant secundum artem tabellæ.* Quod si respiratio difficilis urgeat, tunc poterit exhiberi *Syrupus de Ibisco, & de Hyssopo*, quibus Syrupis addi utiliter poterit *Spiritus Salis Ammoniaci*. Diætâ tandem sit moderata, & juxta Medicas leges instituta; omnis enim medela irrita est, nisi accommodata vivendi ratio observetur. Cibi igitur sint euchymi, quales sunt *carnes optimæ elixatæ, ova recentia: Vinum tenue sit, & alteratum foliis Absinthii*; jusscula pariter saliantur sale istius herbæ salutaris in accommodandis fermentis. Sollicitudines, & animæ curæ fugiantur, animus sit hilaris, & sperans salutem. Ad tumorem crurum, ac pedum proderit balneum ex urina Puelli cum Sale Prunellæ; quibus omnibus assistat Clementia Divina, sine qua nihil.

Even-

Eventus.

Et si proposita remedia, cum aliis etiam ab aliis Medicinæ Doctõ-
ribus præscriptis magna cum diligentia adhibita fuerint, nihilomi-
nus Æger semper in pejus lapsus est, & post mensem à Consulta-
tione miserabiliter suffocatus interiit.

CONSULTATIO LXXV.

De Cardialgia.

IN quacumque consultatione, quod primum considerandum ve-
nit est idea morbi, quam in Illustrissimo Juvene nullam aliam ef-
se puto, quam Cardialgia; etymon si spectetur, Cordis dolorem si-
gnificat; est enim hic morbus molesta Stomachi, seu orificii supe-
rioris Ventriculi affectio, neque solum Stomachus dolore afficitur,
sed totum Ventriculum malè haberi puto, cum totus sensu sit præ-
ditus, licet in orificio superiori dolor sit acutior ob copiosiores ner-
vos, qui diffunduntur per eam partem; & iste morbus à multis
Syncope Cardiaca appellatur: describi autem potest, quod sit ve-
hementissimus dolor Stomachi, sive orificii Ventriculi superioris
cum gravissimis symptomatibus, nempe Cordis palpitatione, ani-
mi deliquio, nausea, vomendi conatu vehementiori, immoderatis
sudoribus, necnon febre symptomatica: provenit autem à solutio-
ne continui per cuspides particularum succi acerrimi, quæ lanci-
nando, & mordendo fibras nerveas Ventriculi dolorem immanem
excitant; undè apparet partem affectam esse Ventrículum, & in
specie orificium ejus superius; cum enim non rarò ex mala, & in-
convenienti mixtura succi pancreatici, & biliosi cum præterfluente
cibo dolorifica excitetur fermentatio, ob quam Duodenum Intes-
tinum acrem, & lancinantem dolorem patitur, ideò simul cum Ven-
triculo in Cardialgia Duodenum esse affectum puto; dolor enim in
nostro casu non tantum in Stomacho præsentitur, verum etiam in
proxima inferiori dextra parte, ut ex historia morbi colligo. Acce-
damus nunc ad Prognosim: Dico autem morbum esse timendum,
ob

ob exquisitum enim sensum Ventriculi dolores sunt magni faciendi, & maximè ob imminentem Lipothymiam, Cor enim faciliter in consensum trahitur; si verò partium externarum frigus accedat unà cum febris, de inflammatione timendum, & gravius erit malum. Quod si febris cessaverit securior erit affectus, & faciliter per vomitum terminabit. Indicationes porrò curativæ in nostro casu erunt, tollere succos illos acerrimos, vel saltem eos corrigere, & cicurare, eorumque particularum lancinantium cuspides infringere, ac hebetare, atque demum Ventriculi, ac Duodeni Intestini fibras, & tunicas roborare, quæ ut commodè fiant, ad tres Medicinæ fontes consuetos deveniendum est, videlicet ad Diætam, Chirurgiam, & Pharmaciam: ex hæc igitur primò, si febris cessaverit, poterit sumi lenitivum ad ducenda per alvum recrementa peccantia; quod si febris continuet, abstinendum à purganti medicamine, ne fortassè ab Erysipelate inductus dolor exasperetur, & necem afferat; quapropter curanda erit præsens Cardialgia potius remediis acritudinem succorum præternaturalium temperantibus, ut & anodynis: Sequens pulvis in usu sit: *R. Pulveris Eboris, Oculorum Cancris præparatorum, Corallii rubri præparati, ana, 3. ij., Santali rubri, Cinnamomi, ana, 3. ʒ.* Misce & dosis sit semi drachma pro qualibet vice: assumatur autem dictus pulvis cum aqua sequenti: *R. Aquæ Fæniculi, Menthæ, ana, 3. j., aquæ Cinnamomi, 3. vi., Syrupi de Menta, & Cydoniorum, ana, 3. ʒ.* misce. Commendabilis etiam est Pulvis Stomacchius Poterii, & Laudanum opiatum. Nonnulli laudant Elixir Proprietatis Paracelsi: alii tincturam succini, salem Absinthii, salem Tartari; confectiōnem Alchermes, & Chocolatam. Sequentem mixturam cochleatim assumptam mirificè præstare expertus scribo, videlicet. *R. Pulveris Crystalli Montanæ præparatæ, 3. j. Theriacæ optimæ, 3. j. Confectionis de Hyacintho, 3. j., Balsami Peruviani; 3. j. Pulveris Croci, 3. j., Oculorum Cancris præparatorum, Margaritarum præparatarum, ana, 3. ʒ. Terræ Siggillatæ, 3. j., conservæ Absinthii, Anthos, Rosarum, totius Citri, ana, 3. ij.* Misce, & cum Syrupo de Agresta quantum satis fiat Electuarium molle S. A. Externè etiam proderit emplastrum de crusta panis, & de Palmulis Galeni: potest etiam foveri pars affecta cum aqua Regina Hungariæ. Dolaus laudat mixturam suam balsamicam ex succolata, oleo Nucis Moschatae expresso, & balsamo Peruviano, Cinnamomo,

momo, & vino Malvatico paratam, quæ Ventriculi regioni applicari debet. A Chirurgia verò, si febris non cessaverit, & morbus incrudescat, ob metum inflammationis instituenda erit Phlebotomia in brachio dextero ad uncias decem Sanguinis effodiendas, ut sic deonerata natura (ut loquar verbis *Galen*) Æger noster facilius insurgat in morbum: Frictiones ad dorsum, & Clysmata ad divertendas materias acres peccantes, ac Ventriculi fibris inimicas, & eas per alvum ducendas, valdè commendo. Ad Diætam tandem quod spectat, cibus sit facilis digestionis, fermentationis: poterit quoque condiri variis aromaticis, ut verbi gratia *Thymo, Majorana, Aniso*, & aliis hujusmodi innocentibus herbis: vitare debet Ægrotus noster cibos acres, nimium salitos, legumina, & hortenses fructus; fugiantur pariter dulcia, & pingua, quæ sæpè acorem contrahunt, & causam morbi augere valent. Potus sit vinum probæ notæ in modica tamen quantitate: Somnus poterit utiliter conciliari, adhibendo etiam *Opiata*, quatenus opus fuerit. Quod deum excreta, & retenta concernit, curandum, ut alvus quotidie respondeat, fæces enim alvinæ, ut ait *Dolæus*, præternaturam retentæ putridos, & acres vapores ad Stomachum mittunt, & acorem concipiunt, undè, & per consensum harum partium Stomachus ipse maximè inverti potest, & hinc majores molestiæ oriri possunt; Animi sit læti, & tranquilli, ac angue, & cane pejus fugiat mœrorem, ne fortè Sanguini balsamica consistentia tollatur, undè acris, & effectus factus ipse cruor, fermentum Ventriculi corrumpat, & vitiet. Ira pariter rationis fræno moderetur. Deus tandem nostro Patienti generosè succurrat, sic enim tutò, citòque, & non injucundè præsidia Medica operabuntur.

Eventus.

Et si multa ex propositis remediis, immò alia plura fuerint adhibita, non potuit tamen Nobilissimus Juvenis evadere, quin morbo crescente in meliorem vitam obdormierit; aperto cadavere penè sphacelatas Ventriculi tunicas interiores, & præsertim in parte superiori Medicus observavit.

CONSULTATIO LXXVI.

De Fame, & Siti Læsa.

JAM transierunt viginti dies, quibus Reverendissimus Abbas plethoricus annorum XLIX. post Febrem Tertianam feliciter superatam, Fame, ac Siti læsa afficitur, non modò verùm cibum, & potum non expetit, sed etiam averfatur; immò ad aspectum, & nomen ipsum ciborum Nausea corripitur; quod autem nobtabile est, illum sine cibo, & potu vixisse per biduum restantur Domestici. Nunc ut saluti restituatur opem Medicam implorat.

Famem, & Sitim læsas esse in præsentì Ægroto clarissimè apparet, & evidenti constat observatione; cùm enim multipliciter lædi possint istæ actiones; unde quadrupliciter Fames, ac Sitis fit præternaturalis, nimirum aucta, & nimia; abolita quæ *Ανορεξία* Anorexia græcè dicitur; imminuta, quæ in casu nostro; ac demum depravata, *Μαλακία* Malacia: Hinc est quod Reverendissimus Abbas tertiâ læsione Famis, & Sitis affectus sit, cujus morbi causam antiqui Galenici ad deficientem succionis sensum in Stomacho retulerunt; naturalem enim famem fieri putabant ab ejusmodi succionem, ex prævia in omnibus partibus corporis consumptione; verùm cùm causam legitimam ego agnoscam succum quendam acidum in Ventriculo exsudantem à glandulis ipsius Ventriculi: hinc est, quod, vel ob absentiam istius liquoris, vel ob privationem acidarum particularum in eo, Fames deficiat, & iste morbus infurgat; constipatis namque poris glandularum, tale fermentum negari potest, vel saltem vitari, & elanguescere, maximè si permisceatur cum aliis humoribus ab aliis visceribus confluentibus; unde ejus particulæ hebetentur, & infringantur: potest etiam minorari fames, eò quod fibræ tunicæ internæ Ventriculi glutinosâ, tenacique substantiâ oblitæ sint; quo fit, ut non de facili admittant irritationem à particulis fermenti acidi habendam, ex qua præcisè Fames dependet. Cessata verò Fame, & per consequens cibus non assumptis Sitim etiam abesse convenit; si quis enim

enim non comedit, bibere haud potest. Pars igitur affecta est Ventriculus cum Fermento famem excitante, quod vel deficit, vel malè se habet. Ad Prognosim autem quod attinet, licet plerumque nullum minetur periculum, attamen si diù duraverit talis affectio poterit alios parere morbos, ut Syncopem Animi deliquium, summum languorem, atque universalem Atrophiam, ex qua infallibiliter mors sequeretur. Quantocitiùs igitur fieri possit, ad curationem est deveniendum, ad quam assequendam prius considerandæ sunt indicationes, quæ, meo videri, sunt, restitutio fermenti stomachalis ad justam suam acidam crasim, & remotio glutinosæ substantiæ supradictum fermentum inviscantis, atque hebetantis acutiem particularum acidarum, indè corroboratio tunicarum Ventriculi ipsius. Quæ ut fiant ad Diætam, Chirurgiam, ac Pharmaciam devenire oportet & ut ab hac novissimâ exordiar; primò conveniet alvum lenire, & sic remove impuritates in Ventriculo peccantes; hocque commodè fieri poterit, vel floribus *Cassiae cum Tamarindis*, & *Cremore Tartari*, vel optima *Manna Calabrina*; mox *Elixirè Proprietatis* utendum erit, & *Spiritu Vitrioli in aqua Menthae*. *Ang. Sala* conficit aquam spirituosam *Menthae* ex ejus foliis, spiritu vini, & aqua communi cum saccharo, quam mirabilem dicit in appetitu promovendo, & adjuvanda concoctione. Poterit insuper efficaciam *Oxymellis* experiri, & vini, in quo fuerit infusum *Absinthium*, *Rosmarinum*, *Hyssopus*, *Salvia*, & *Calamintha*. Externè fiat Epithema ex vino *Cretensi*, aceto, cum crusta Panis, aspersa prius pulvere *Cinnamomi*, & *Caryophyllorum*. *Species Aromaticæ Rosatæ* commendantur à multis; immò mihi fassus fuit Sculus quidam Mercator se appetitum prostratum pluries vicisse, ac Famem revocasse solo usu calidi potus *Cassæ* absque pulvere Sacchari ad plures dies. Ex Chirurgia nihil, nisi febris accedat; quo casu Phlebotomia opus erit. Diæta demum succedit, quæ sit moderata, cibi sint boni succi; juscula condiantur Cinnamomo; vinum sit odoratum, & alteratum modo supradicto; aër sit serenus, lucidus, & temperatus; animi pathemata graviora proscribantur; modus in somno, & vigilia servandus. Quibus omnibus Dei auxilio fretus, spero futurum, ut egregius Patiens possit curari à præsentī morbo.

Eventus.

Usurpata in parte proposita auxilia Reverendissum Abbatem in meliorem salutis statum reduxerunt; donec tandem mutata regione, & ardente Syrio, usu balnei aquæ dulcis currentis nostri Eridani per plures dies sub vesperam omninò salutem recuperavit, ac Famem, & Sitis juxtà Naturæ leges rediêre. Nunc sanus vivit, bene comedit, melius potat, ac optimè concoquit.

CONSULTATIO LXXVII.

De Inappetentia.

Nobilis Juvenis ætatis annorum XXVII. corporis, & animi candore à natura donatus, potui frigido diebus canicularibus largius indulgit, ex quo cibi fastidio, & summâ inappetentiâ affectus est; unde Medicam opem implorat.

Iste affectus vocatur Inappetentia, seu cibi fastidium, à Græcis *Ανορεξία* dicitur, & consistit in actione Ventriculi ferè abolitâ, ac valdè imminutâ. Causa hujus morbi, juxtà Galenicos, refertur ad deficientem suctionis sensum in orificio superiori Ventriculi, cum Famem fieri credant ab ejusmodi suctione, ex præviâ in omnibus partibus corporis consumptione. Deficere autem hunc succum in Stomacho putant Galenici à crudis, crassisque humoribus in Ventriculo stagnantibus, vel etiam à toto illuc confluentibus. Ego verò puto, præsentem affectum, ex defectu succi cujusdam acido-acris in Ventriculo stabulantis, & Famem excitantis, provenire; vel si non omninò hic succus deficit, saltem dilutior, & hebetior in hoc morbo evadit, unde elanguet, nec potest vellere Stomachi fibrillas, ex qua naturali vellicatione, & irritatione Famem oriri credo, quæ aciditas, non tantum Fami est necessaria, quam ciborum dissolutioni; & provenit à glandulis in Ventriculo stantibus. Quod ad Prognosim spectat, quemadmodum bonus appetitus est laudabilis, ita è contrâ inappetentia est mala, præsertim in Juyene; quia in hac ætate plus dissipatur, & disperditur.

ditur, ideòque majori indiget restoratione. Quia verò in nostro casu abest febris, non adeò est periculosa; ait enim *Riverius*, *cibi fastidium malum, & cum febre pejus*. Ut deveniamus ad curationem, corrigendum erit vitium liquoris acidi in Ventriculo stabulantis, ejusque liquidum ad naturalem statum ducendum, atque totus Ventriculus corroborandus. Ad quæ assequenda, ad Chirurgiam, Pharmaciam, & Diætam deveniendum erit. Venæ sectio in hoc affectu non convenit, causa enim hujus morbi non est in cruore, nec in ejus abundantia, vel vitio. Aliqui Clysteres, tantummodo si alvi suppressio adsit, utiles erunt, ut & pedum lotio facta cum aqua tepida sub vesperam. Ventriculum lenire oportebit *Ptisana solutiva*, vel *pilulis Gelii*; postea exhibeantur *Sal Absinthii*, *Syrupus Cydoniorum*, de *Acetositate Citri*, de *Agresta*, & de *Mentha*. *Elixir Proprietatis Paracelsi* laudatur à nonnullis, cujus gutt. x. in vino Hispanico poterunt utiliter exhiberi. Usum vini calidi *Costæus* commendat, & *Zedoariam Harttmannus*. Inter externa sequens unguentum præscribo: R. *Olei Rosati*, *Myrtkini*, *Cydoniorum aceto Rosaceo lotorum*, ana, ʒ. ij. *Santalorum omnium*, *Corallii rubri*, *Coriandri præparati*, *Rosarum rubrarum*, ana, ʒ. j. *Granorum Kermes*, *Spodii*, ana, ʒ. ʒ. *Ceræ albæ* Q. S. *Misce*, fiat linimentum; quo sæpè inungatur Ventriculi regio. *Balsamum Peruvianum* etiam adhiberi poterit, quod etiam laudavit *Clariss. Mangetus* in *Bibliot. Med. Pract. lib. 1.* In Diæta aer sit temperatus, cibus concoctus facilis, & corruptioni minus obnoxius. Vinum sit tenue; mœror vitetur; & acetaria ad excitandam appetentiam frequenter usurpari poterunt.

CONSULTATIO LXXVIII.

De Pica, seu Malacia.

PUella Ferrariensis annorum duodecim, pallida, & gracilis, lapillos, cretam, carbones, immò calcem ipsam comedit; ita ut muros cubiculi calce illitos, crusta spoliaret non sine voluptate; Mater enim ejus pluries ad verbera usque correxit, incassum. Adhuc autem frequentes expuitiones, Ventriculi morsus, & anxietates.

tates totius corporis œconomiam turbantes. Mater consilium Medicum poscit.

Ex hac verò brevi, sed clara morbi istius historia apertè colligitur, puellam hanc Pica laborare, qui morbus à multis Malacia etiam dicitur, & definitur: appetitus depravatus, & vitiosus rerum ad nutritionem ineptarum, aut certe incongruarum, vel quoad quantitatem, vel qualitatem, cum languore, anxietate, & Ventriculi morfu, ut in casu nostro. *Amalth. Cast. Brun.* Pars affecta Ventriculus est, & præsertim orificium ejus superius, ubi enim residet appetitus naturalis, ibi etiam depravatio ejusdem manebit. Si rectè verò consideretur hæc affectio suadentibus *Dolæo, & Ettmullero* Practicis famatissimis, simul cum Ventriculo affici Phantasiam colligetur, nam cum à fermento Stomachus vellicatur, singulari affectu Patiens defertur in varia, ut sunt carbonēs, cretam, lapillos &c. sed fermentum præcisè non determinat hoc, vel illud, sed Phantasia: utique igitur, & cum Ventriculo Phantasia erit affecta. Causa autem proxima erit vitiatum spirituum motus, quatenus Phantasiæ munia turbat; quæ causa tanquam subiectum radicationis agnoscit Ventriculi fermentum vitiatum; occasionalis verò causa, vel, ut alii dicunt, remota, sunt omnia ea, quæ fermentum digestivum depravare valent; undè in casu nostro vitio fermenti affecti, & turbati spiritus animales ad quædam impropria, & inusitata, imò nocua edulia dirigunt Phantasiam, undè depravatus supervenit appetitus: Spuitiones autem frequentes, anxietates, & Ventriculi morfus oriuntur à peculiari acredine ipsius fermenti; illius enim particulæ acriores factæ, cuspidibus suis irritando, & pungendo fibras Ventriculi, prædicta symptomata inducunt: & quia nervum etiam sextæ conjugationis lædunt, hinc est quod anxietates fiunt, quatenus Cor, & Cerebrum afficiuntur; undè inordinato Sanguinis, & spirituum influxu, corporis rectam œconomiam perturbant. Hoc malum periculo non vacat, & sæpè in Cacochymiam, Hydropem, & alios morbos degenerat; si enim malum diù duraverit, fieri non poterit, quin pravi humores, ac morbi pertinaces indè nascantur. Tempestivè igitur ad curationem est deveniendum; & primò Stomachus erit evacuandus, secundo fermentum vitiatum ad naturalem statum reducendum, & demum ipse Ventriculus appropriatis roboran-

borandus, & spiritus animalis motus compescendus. Primò itaque tale præscribatur vomitorium: *℞ Jusculi Gallinæ cum oleo Olivarum, & aceto, & modico vini albi*; quo assumpto vomitus accidet cum humoris in Ventriculo existentis evacuatione: indè alterans sequens propinetur. *℞ Herbæ Melissæ, Rutæ, Betonicæ, Origani ana, M. j. ℞. decoque in quantitate sufficienti aquæ Hordei*; inde fiat colatura, cui adde *Syrupi de Mentha, Betonica, & Oxymellis, ana, ʒ ℞. Misce, fiat Apozema* pro quatuor dosibus manè, & vesperè sumendis. Exhibeantur quoque pilulæ de Tribus cum Rhabarbaro; postea ad corroborationem Ventriculi utatur speciebus *Diamargaritarum, sale Absinthii, specifico stomachico Poterii*: Mirabilem vim habere in hoc sanando affectu scribit *Thom Burnetus in Thesaur. Medic. pulverem seminis Ammeos* assumptum ad plures dies ad semidrachmæ pondus, nam patientes, ait citatus Autor, vel liberantur prorsus, vel saltem melius se habent: *Mithridatium*, ac *Theriacam Andromachi* nonnulli commendant, quod innuit quoque *Bonetus in suo Mercur. Compital. lib. I*; Sequens pulvis assumptus sub finem pastûs proponitur, & laudatur à *Clariss. Muralto in Miscellan. Curios. Dec. 2. ann. 7. obs. 22. ℞ Pulveris Viperini, seminis Fœniculi, Anisorum, ana, ʒ ℞. corticis exterioris Citri siccati, & Cinnamomi, ana, ʒ. ij. Caryophyllorum, & Macis, ana, ʒ ℞. omnia pulverizata æquali pondere Sacchari misceantur*. Externè illiniatur regio Stomachi sequenti linimento: *℞ Olei Cydoniorum, Nardini, Mastiches, ana, ʒ ℞. Misce fiat linimentum S. A.* Multi etiam ceratum Stomachale apponunt super corio extensum, quod nec laudo, nec vitupero: & hæc pro Pharmacia dicta sint. Nunc ad Chirurgiam gradum faciamus, à qua solummodò Phlebotomiam sumendam puto, una tantum admissa Venæ sectione in brachio, vel pede ad pondus Sanguinis unciarum sex. Ad Diætam verò quod attinet, cibi offerantur varii, qui Patienti sint grati ad imaginationem à rebus alienis avocandam; commendatur usus *Capparorum, Olivarum* conditarum, *Succi Limoniorum, & Granatorum, Ribes, & aliorum hujusmodi*; immò *Amylum* quoque laudatur ab *Herrico Regio Medicat. lib. 3.* quia acrimoniam humorum de facili temperat. Potus tandem sit vinum generosum, & adstringens; sicque spero, ut Puella nostra liberetur ab hoc affectu, quod ipsi à præpotente Deo obnixè precor.

CONSULTATIO LXXIX.

De Dyspepsia.

V Ir ætatis annorum XXXIII. temperiei biliosæ, post varios errores in rebus nonnaturalibus, incidit in pertinacem Ventriculi dolorem, cui aliquandò succedit vomitus copiosæ materiæ pravo colore infectæ, & una inter alias vice accessit animi deliquium, & lapsus. Purgato corpore, dolor Stomachi adauctus est, cum alvi stypticitate: nunc perdurante affectione auxilium postulat.

Affectio hæc *Δυσπεψία* à Græcis dicitur, & significat difficultatem concoctionis in ipso Ventriculo, undè *Galenus* tribuit hoc vocabulum depravatæ alimenti coctioni, sive alimentorum in Ventriculo corruptelæ, & est symptoma naturalis actionis depravatæ. Causatur autem cùm alimenta in qualitatem à naturâ alienam commutantur, ob vitium fermenti naturaliter in Ventriculo stabulantis: hic autem morbus, ut ejiciatur, exactâ curatione, & diligentia indiget, & maximè, quia affectio præsens altas egit radices; quod si negligatur, poterit in contumaciorem transire morbum, qui remedia etiamsi validiora contemnens in interitum terminabit. Ut curatio verò instituatur primæ viæ leniter erunt purgandæ, fermentum Ventriculi ad naturalem crasim reducendum, & Ventriculus roborandus: Quibus intentionibus ut satisfaciamus, leviora primò sunt adhibenda remedia, quia fortiora potius Ventriculum lædent, ac morbum ipsum irritabunt. Assumere igitur Patiens poterit *Cassiam*, & *Pulpam Tamarindorum* ad leviter alvum movendam, inde acida temperata propinanda erunt, & sequentia laudat *Dolæus*: R. *Elixir Proprietatis Paracelsi*, ʒ. j., *Spiritus Salis dulcis*, *Salis Ammoniaci*, ana, ʒ ss. *Misce* Dosis sit gutt. XV. Profunt etiam *Salia Absinthii*, *Centaurii minoris*, *Specificum Stomachicum Poterii*. *Emulsiones* etiam utiles erunt, sicuti & *species Diamargarit*. Externè inungatur Stomachi regio *Oleo Absinthii*, *Mastic.* ana Q. S., & vespere abluantur pedes aqua calida, in qua bullierint *folia Salicis*, *Malvæ*, *Violarum*, ana, Q. S. De Venæ sectione nihil. Optima ob-

fer-

servanda est insuper victus ratio : abstineat Æger ab acidis , à dulcibus , à Piscibus , à Caseo , à Leguminibus , à Nucibus &c. ab Allio , Ceba , & aromatibus. Vinum tenue concedatur , cœna semper sit parca , somno indulgeat , corpus jejuno Ventriculo exerceatur ; suadente *Joh. Forti in Consult.* Hilariter tandem vivat cum spe salutis recuperandæ ; solitudinem fugiat , & genialem quærat conversationem.

Eventus.

Nonnullis ex præscriptis remediis usurpatis , mutato Cœlo pristinam recuperavit salutem.

CONSULTATIO LXXX.

De Singultu.

Affectio longinqui temporis , qua Illustris Civis Bergomensis non rarò perturbatur , Singultus est absque febre , ut colligo ex erudita relatione Excellentissimi Dom. Medici sui ordinarii mihi per literas humaniter transmissa.

Hic ergo affectus *Ανγμόε* Græcè dicitur , & definitur , motus convulsivus interpolatus Diaphragmatis , trahens in consensum Ventriculum , vicinasque partes : ideò *Dolæus* pro subiecto conjunxit Stomachum secundum nervos , & suas fibrillas , tunicamque cum Diaphragmate communem ; certum enim est inter se invicem compati Septum transversum , & Ventriculum , cùm hic juxtà Stomachum ei alligetur , & hæreat , atque ab eodem extimam tunicam mutuetur : ideòque *Villifus* tùm Ventriculum , tùm Diaphragma affici in Singultu docuit ; immò *Franciscus de le Boë Sylvius* ait , irritationem in Singultu ut plurimum esse in orificio superiori Ventriculi , ac exindè trahi in consensum Diaphragma : Sic ergo utramque partem affici in tali affectu existimo. In causa assignanda supervacaneum puto , eam ex inanitione , & repletionè , ut aiunt multi , desumere ; veram enim proximam causam solam vellicationem constituo ; halitus enim , & flatus acris ab humoribus in

corpore nostri Patientis existentibus elevatus suis particulis subtilissimis, & acutis feriendo fibras, & Diaphragmatis, & Ventriculi, motum convulsivum, id est, Singultum excitat. Quoad externam causam accusari poterit abusus Aromatum in Ægro nostro, quia uti audio, summoperè delectatur Chocolata, & omnibus piperatis, & acribus, quæ particulis suis irritantibus Singultum de facili excitant. Prognosim verò quod concernit; morbum hunc per se parùm mali portendere assero; si autem frequentior fieret, & febris accederet, tunc esset periculosus ob metum inflammationis; undè *Hippocrates in Coac.* ait: *Si quis in laboriosa febre singultiat, morbo laborat pessimo: inimmò dicit Valesius se nullum vidisse servatum febre ardente correptum, cui Singultus supervenerit; idemque Riverius confirmat.* Indicationes autem curativæ in nostro casu erunt, ut particulæ irritantes removeantur, vel saltem obtundantur, sive ad Ventriculum, sive ad Diaphragma illæ pertineant; & postea ut corroborentur partes affectæ, & præsertim fibræ Ventriculi, & Diaphragmatis; quæ ut fiant, quam celerrimè dare manus oportet tribus Medicinæ Practicæ fontibus, nimirum Pharmacis, Chirurgiæ, ac Diætæ, ut sic citò, tutò, & jucundè, quod Medici est opus, Ægrotus noster curetur. Incipiendo igitur à prima, *Pilulas Aloëticas* laudo, ad communes expiandas vias, & particulas in orificio superiore Ventriculi stabulantes abigendas; bibatur ulterius *aqua Menthæ, & decoctum Hordei*, cui tantillum *Cinnamomi*, vel *Galangæ* additum sit; Utiles post modum erunt *pulveres Cornu Cervi usti, Eboris, Crystallus Montana præparata, Specificum stomachicum Poterii, terra sigillata*, quibus in dies uti poterit juxtà normam, & dosim præscribendam à Medico suo ordinario, cui prudentiæ me remitto: Sequentem bolum à D. *Timæo* olim præscriptum, & à me pluries feliciter usurpatum commendo: *℞ Theriacæ Andromachi, ʒ. ij. Ligni Aloës ʒ. j., Olei Macis, gutt. ij. Laudani Opiati, gr. j., Misce fiat bolus, & deauratur.* *Tartarum Vitriolatum cum vino Absinthii* sumptum laudant nonnulli; sicuti etiam *aquam stillatitiam Nucum viridium cum Raphano in aceto prius maceratarum, confectionem Alchermes, decoctum Anethi, Philonium Romanum, syrupum Menthæ, Aristolochiam*

*chiam rotundam cum aqua potam; & emulsiones quatuor seminum frigidorum majorum. Externè verò existimatur amuletum à multis Castoreum, & Cuminum linteo inditum, & carpo sinistrae manus alligatum: Sennertus laudat Cataplasma ex fermento cum spiritu Vini camphorato, & pipere &c. Aromatica laudat *Waldschmidius in Monit. Medicis*: insuper Theriacam externè satisfacere posse docuere multi. Ex Chirurgia fricationes, & Cucurbitulae scarificatae sumendae sunt; & si febris acciderit, Phlebotomia repetita uti etiam bonum erit ad avertendam internam inflammationem Ventriculi, & Diaphragmatis: lotiones pedum utiles erunt, ut & excitatio sternutationis; quippe quae sistit Singultum, ut saepe observavi in Praxi facienda. Dieta demum sit moderata, & cibi facilis concoctionis, boni succi, ideòque vitandi erunt saliti, aromatizati, acres, fumo, & sale conditi, praesertim caro suilla: Vinum potens fugiatur, nec nisi aqua temperatum concedatur; Somnus sit moderatus, & decubitus in latera fiat vitato supino situ: motus pariter sit moderatus, & modum non excedat: alvus quotidie respondeat, si fieri possit. Fugiantur denique omnia frigida, acida, flatulenta, & acria; & per consequens repeto quod supra dixi de Vino; vel illud aqua dilutum, & cicuratum solummodò concedatur, vel omninò exulet, nervis enim est inimicum, undè *Waldschmidius in Monit. Medic.* aiebat pro regula esse, Vinum in omnibus morbis nervinis spasmodicis convulsivis non convenire; ideò potus ordinarius esse poterit decoctum Hordei cum modico Cinnamomi, vel aqua Nucarina in qua infusa sit Salsaparilla optima minutim incisa.*

Eventus.

Aliqua pars praedictorum auxiliorum adhibita fuit, & de raro singultire observatus est Aeger; immò mutato aëre, & sequendo usum praedictorum remediorum omninò convaluit.

CONSULTATIO LXXXI.

De Singultu Frequentissimo.

QUOD consilium meum tantoperè exoptes, id amoris tui, non meriti mei est pignus; opto quidem ut feliciter pro tua salute, Illustriss. Domine, operam meam locare possim: audio siquidem te à longo tempore Singultibus esse obnoxium, à quibus modò haustu vini, vel aquæ, modò sternutamentis excitatis te liberas; verùm mense currenti frequentior, atque diuturnior factus Singultus te exagitat, ut vix capere possis somnum; quare meam petis audire sententiam, quæ sequens sit.

Manifestè liquet, affectionem istam Singultum esse, notissimum scilicet affectum, *Αυγμός* à Græcis dictum, qui nihil aliud est quam motus convulsivus Ventriculi studentis excutere, quod sibi est molestum. Pars autem affecta in hoc morbo est Ventriculus ipse, qui idiopathicè afficitur. Causa immediata est irritamentum factum in fibris Ventriculi, & præcipuè in illis, quæ in orificio superiori ejusdem visceris reperiuntur. Mediata verò causa est materia acris Ventriculi tunicas, & fibras irritans medio suarum particularum irritantium, quæ cuspidibus suis acutis pungunt fibrillas, ex quo convulsivus ille oritur motus, qui formaliter Singultus dicitur. Causæ porrò remotæ, ac antecedentes fortassis fuere errores in Diætâ commissi, quatenus scilicet ex vitio primæ concoctionis aliqua inquinamenta in Ventriculo coacervata sunt, quæ frequenter agitata modo supradicto, singultuosum excitant affectum præsentem; his dictis de causis, reliquum est, ut ad Prognosim gradum faciamus, ut consuetam consultandi methodum observemus. *Hippocrates* igitur, qui & fallere, & falli est nescius, teste *Macrobio in somn. Scipion.* ait, quod si sternutatio superveniat, *Æger* liberatur à Singultu, quocircà aliquo pulvere sternutatorio cum Tabaco mixto uter in die, ex cujus per nares assumptione excitata sternutatione, causa Singultûs excutiatur: quod si pertinaciter duraret ista affectio, timendum esset, ne interromperentur concoctiones, Somni,

Somni, aliæque functiones naturales œconomix nostræ animalis, undè facile in Vomitum, Cachexiam, ac internas Ventriculi inflammationes periculosas incideretur, non sine vitæ discrimine. Properandum igitur ad indicationes curativas, ut salus citò haberi possit, quæ meo videri sunt materiam irritantem à Ventriculo expellere, cuspides suarum particularum hebetare, & retundere, ac Ventriculum ipsum corroborare; quæ ut habeantur, ex Pharmaciâ, propono primò leve (aliquod lenitivum ad alvum sollicitandam, sicque per has communes vias evacuanda erit materia morbifica; hocque fieri commodè poterit vel per *Cassie flores*, vel per uncias tres *Mannæ Calabrensis* electæ in jusculo brevi dissolutæ; inde commendo *Syrupum Menthæ, & Citri, pulverem Terræ sigillatæ & crystalli Montanæ præparatæ*: Utilis erit *aqua Cordialis Saxonix cum Theriaca optima, & Specifico stomachico Poterii*; Externè juvabit *Emplastrum de baccis Lauri*, vel sequens Cataplasma; & *Fermenti acerrimi*, ʒ. iiij., *Pulveris Menthæ, seminum Cumini, Anisi, Pulveris Zedoariæ, ana*, ʒ. ij. *Aceti Q. S. fiat Cataplasma*: Quod si adhuc perseveraret talis affectio ad *Philonium Romanum*, imò ad ipsum *Laudanum Opiatum* ad pondus granorum duorum cum modico *conservæ Violarum* ad conficiendum bolum parvum, recurrerem, quod remedii genus commendant *Joh. Michaël, Gregor. Horstius, Thom. Burnetus*, & alii plures. Vomitoria laudat *Sylvius de le Boë*; hæc autem ego neque vitupero, neque laudo, & si morbus posset mitius tolli, vomitionem non experirer; alienus enim semper fui in Praxi à remediis inferentibus violentiam visceribus. Ex Chirurgia nihil propono, nisi in casu, quod febris accederet, tunc enim Venam secarem, & clysmata imponerem. Diæta demum moderata instituat; *Vinum tenue* concedatur; *Carnes Vituli, aut Pullorum*, facilis digestionis sint in usu: *Emulsiones*, & quæcumque *hordeacea* commendo ad diluendas, & inviscandas particulas acres, quæ irritando fibras Ventriculi talem affectum excitant. Extemporaneum pro Singultu remedium esse Thoracis compressionem docuit *Joh. Hartmannus in Praxi Chymiat.* Deus autem hæc omnia salutaria reddat.

Eventus.

Multa ex propositis remediis adhibita sunt à Medico Assistente ordinario, juxta suam consuetam diligentiam, tandem que superveniente Diarrhœa Singultus omninò cessavit.

CONSULTATIO LXXXII.

De Nausea, & Vomitu.

Nobilissimum Civem Nauseâ, & Vomitu, ac assiduo ciborum fastidio, ut carnum odorem vix ferre possit affici, sine tamen febre, mihi notum facit Excellentissimus Dominus Medicus ordinarius, & meum poscit consilium.

Duo igitur prava sunt symptomata Ventriculi, quæ Civem nostrum afficiunt; primum Nausea est, seu cibi fastidium, quod describi potest per propensionem, vel conatum quendam ad vomitum, irritum, cum anxietate circa præcordia, & oris salivatione: alterum autem est vomitus, qui *ἔμετος* *Emetos* græcè dicitur, qui est violenta excretio per os proveniens à motu convulsivo Ventriculi. Pars ideò affecta his in morbis est propriè Ventriculus ipse, quatenus hîc primariò læditur; causa immediata est explosio spirituum animalium in fibris tunicarum Ventriculi nunc irritatarum: mediata verò, materies quædam, & vitiosa saburra, cujus particulæ acres suis cuspidibus irritant interiorem Ventriculi tunicam, & exinde vomitum cient. Externæ causæ fuêre errores in vivendi ratione; audio enim Ægrotum nostrum maximos errores in computationibus commisisse, è quibus vitiatis concoctionibus, talia excrementa collecta in Ventriculo fuêre; quia verò eorum malitia, nondum transiit in massam humorum, hinc est, quod febris adhuc exulat; si diutius verò talis affectio perduret, sanè vitiabitur cruor, & ita febres, aliæque pravæ affectiones insurgent. Ad Prognosim verò quod attinet, affectiones istæ non sunt spernendæ, cùm concoctioni, & nutritioni non parum officiant; ideòque quam citissimè ad curationem est deveniendum, ne morbus validior evadat; adeòque indicationibus occurrendum, quæ

quæ meo videri sunt, compescere irritamenta, tollere, ac evacua-
re materias illas peccantes, atque demum Ventriculum ipsum cor-
roborare : Quæ ut fiant ad Practicæ Medicinæ fontes est devenien-
dum, ut citius, quam fieri possit, sanitas Ægro nostro restitua-
tur. Pharmacia igitur primò dabit Medicamentum leniens ad du-
cendum per alvum illam materiam, hocque esse poterit *Pulpa Ta-*
marindorum, *Cassia*, aut *Manna*, cum portione non exigua *Seri Vac-*
cini depurati : postea exhiberi poterit *pulvis Salis Absinthii ad drachm.*
semis cum cochleare uno succi mali limonii : Specificum stoma-
chicum *Poterii* utile erit, sicuti *Diascordium Fracastorii*, *Cornu Cer-*
vi ustum, & *oculi Cancrorum*, quatenus isti dulcificant materias
illas acres, & sic ineptas eas reddunt ad feriendas fibras nerveas
membranæ interioris Ventriculi : *Elixir proprietatis cum Syrupo Ab-*
sinthii, & *Menthæ* proponit *Clariss. Lucas Tozzi in sua Medicina Prac-*
tica part. 2. *Laudanum* etiam *opiatum* ad grana tria præstare mul-
tum utilitatis in contumacissimis Vomitibus, ait *Riverius*, quod
tutò potest experiri. Externè proderit *Emplastrum de Crusta Panis*
regioni Stomachi apponendum, sicut pariter *oleum Absinthii destil-*
latum; *Sacculum* pariter sequenti modo parat *Donzellius*, cujus effi-
cacious non semel probatam vidi feliciter in Vomitibus sedandis.
& *Rosarum rubrarum*, *Menthæ*, *Absinthii*, ana, *Man. j.*, *Corticis Ci-*
tri, 3. *ij*, *Corallii rubri*, *Masticis*, ana, 3. *ij*, *Aromatic. Rosat. 3. j.* *Mis-*
ce omnia, & confice S. A. *Sacculum* regioni Ventriculi applican-
dum. Si hæc autem non proderint, apponatur externè Ventriculo
panis tostus pulvere *Caryophyllorum* aspersus, aut vino *Cretico*,
& aceto madefactus. Chirurgia nihil dabit, præterquam quod, si
perseverante Vomitu, metus esset alicujus inflammationis in Sto-
macho, tunc Vena erit secanda, uti pariter si febris superveni-
ret. Diæta demum sano modo observetur; aër sit temperatus;
cibus sit paucus, boni succi, facilisque digestionis : Potus sit vi-
num tenue; somnus concilietur, si absit; & fugiantur metus ma-
joris morbi; nunquam enim vidi curatos morbos pavore, ac
tristitia. Quæ autem omnia Medici sui ordinarii prudentiæ sunt re-
mittenda.

Eventus.

Purgato corpore, aliqua ex propositis remediis adhibita fuerunt, & Deo adjuvante Civis Clariss. sanitati fuit restitus brevi novem dierum spatio: nunc sanus vivit.

CONSULTATIO LXXXIII.

De Vomitu Sanguinis.

JUvencula annorum ætatis 24. bonæ temperiei, post iram vehementem diebus canicularibus, repente pallore suffunditur, difficulter respirat, & dolorem gravativum in Ventriculi regione perferentit, post quem sub vesperam die jejunii per os sanguinem purum, grumofum tamen, per vomitum emittit non in modica quantitate; medio noctis vomitus ejusdem cruoris repetit, ad pondus libræ unius; pulsus frequens, & debilis est; extremitates corporis frigent, & Lypothymia afficitur; appetitus omninò dejectus, vires prostratæ, alvus adstricta, Catamenia nulla: Nunc petit auxilium.

Affectio, qua Juvencula nostra afficitur, ut patet ex historia, nihil aliud est, quam cruentus vomitus; malum maximè calamitosum, ut magnus *Hippocrates* indicavit in *Aphor. 25. Sect. IV.* descendendo: *Sanguinem supra ferri qualiscumque sit; malum &c.* Morbus solutæ unitatis dicitur, quatenus ejicitur per vomitum materia, quæ propriis continetur vasis, ad nutritionem, & genesim spirituum vitalium necessaria; ideòque magnus dici meretur morbus, & maximè quia adjuncta habet prava symptomata, ut sunt Lypothymia, corporis rigores &c. Causæ remotiores possunt esse ira, & menstruorum defectus, unà cum calore caniculari. Subjectum hujus affectus est Ventriculus ipse: Causa verò immediata est apertio vasis sanguiferi, quam immediatè sequitur excretio Sanguinis, cum enim hic evaserit acrior, & impetu facto ab ira, & Mensium suppressione, vasa Ventriculi dilatavit, oscula aperuit, atque istam affectionem produxit. Ad Prognosim verò quod attinet,

tinet, dicimus morbum præsentem non carere periculo, siquidem nisi talis cesset vomitio, finietur procul dubio unà cum sanguine vita, & maximè quia prava Symptomata accedunt, qualia sunt Lipothymia, rigores, pulsus debilitas, aliaque magni momenti; & nisi cesset talis vomitio, citò Ægra morietur, siquidem diu vitalis Oeconomia statum præsentem sustinere non potest. Tali igitur posito Prognostico ad curationem accedamus. Indicationes igitur curativæ sunt, tollere solutam unitatem, sanguinem ad Uteri partes avocare, eumque corrigere, vires reparare, ipsamque massam cruoris edulcorare: Quibus ut satisfiat, primò è Chirurgia sumenda erit Venæ sectio reiterata in pedibus. Utiles quoque erunt Cucurbitulæ, ac frictiones in partibus inferioribus. Ex Pharmacia sequentia remedia sumi poterunt: & *Aquæ Plantaginis*, *Bursæ Pastoris*, ana, lib. j. *Tincturæ Coralliorum*, ℥. ij. *pulveris Terræ Sigillatæ*, *Cornu Cervi usti*, ana, ʒ. j., *Syrupi Myrtini*, ʒ. j. *Misce.* de quo potu sæpè sumat. Utiles erunt *pilulæ Hæmoptoicæ Helvetii*, quibus Ego plurimas sanguinis hæmorrhagias sanatas observavi. Clysteres usurpandi erunt, multum enim præstare in cruento vomitu ait *Clar. Joh. Michaelis in sua Praxi speciali*. Laudandum est *Electuarium Diascordium Fracastorii*, ut & sequens *Electuarium* tali modo compositum. & *Conservæ Rosarum veteris*, ʒ. iiij. *pulveris Croci Martis adstringentis*, *Corallii rubri præparati*, ana, ʒ. j., *Oculorum Cancris præparatorum*, ʒ. ij., *Sanguinis Draconis in lachrymas pulverisati* ʒ. j. *Laudaniliquidi Sydenhamii*, ʒ. j., *pulveris Mastichis*, ʒ. ij., *Balsami Peruviani*, ʒ. j., *Syrupi Coralliorum* Q. S. *Misce fiat Electuarium molle S. A.*, de quo cochlear unum quavis mane jejuno Stomacho assumat. Diætâ denique optima servetur, quæ fortè dabit curationi nostræ complementum. Aromata fugiantur; cibi sint boni succi; vinum Santalo medicetur; Gelatinis utatur nostra Patiens; alvum servet solutam. Interim integram valetudinem Patienti precor, quod faxit D. O. M.

Eventus.

Licet non omnia ex propositis supra remediis administrata fuerint, attamen succedente Menstruorum fluxione Juvencula nostra omninò pristinæ sanitati restituta fuit.

CONSULTATIO LXXXIV.

De Cholera.

V Ir annorum XL., biliosi temperamenti, ardente Syrio, febris Tertiana correptus, in secunda accessione, tantam fuit passus humoris biliosi malitiam ferocem, ut concitato vomitu, ac frequenti alvi fluxu materiæ biliosæ cum magna virium jactura, summum Ægro periculum impenderet: frigebant extremitates, & pulsus erat minor, ac obscurus. Domestici consilium Medicum plurimum Medicorum petiére; meum verò hoc fuit.

Morbus iste à multis *Biliaris* dicitur, communiter verò *Cholera*, & est acuta passio cum multis vomitibus biliosis, alvique dejectionibus, cum pulsu minore, ac obscuriore. Quia verò à Practicis duplex fit iste morbus, nempe siccus, & humidus; nos in præsentī casu, pro humida Cholera stamus, quæ potest describi, humorum excrementitiorum, Bilis, ac succi Pancreatici, simul peccantium propria acredine, in intestinis tenuibus nimia effervescencia stimulans Ventriculum, ac Intestina convellens, non sine febris, pulsu parvo, summo languore, & periculo. Sedes hujus morbi, sive, ut dicunt, pars affecta est ipse Ventriculus cum Intestinis; hujus affectionis causam, humorem Biliosum dicit *Galenus*. Ego verò acres liquores pravos, sive in Ventriculo genitos ex corruptis alimentis, sive ex adjacentibus visceribus devenientes causam agnosco: qui liquores præternaturales suis particulis acribus vellicando fibras Ventriculi, & Intestinorum, vomitum, alvi fluxum, dolorem, & præcordiorum anxietatem pariunt; affecto enim Pyloro exquisitissimo sensu prædito, miserabiliter Ægrum cruciari jam patet his etiam, qui vix Medicinæ limina salutarunt. Causæ verò remotæ fuêre in nostro casu, crebræ assumptiones, ut audivi, ciborum pravæ substantiæ, scilicet hortariorum, carnis suillæ salitæ, ac præcisè Peponum sine numero, ac mensura assumptorum. Tanta verò plerumque est istius affectionis sævitia, ut brevi Ægrum possit necare, sive quod magnam hanc evacuationem vires sufferre nequeant, sive quòd laceSSita flaccescant viscera, aut inflamen-

tur,

tur, sive quòd cruor etiam ex illa magna evacuatione dissolutus, simulque infectus exhauriatur, sive quòd relaxatus denique venter nequeat egerere corruptos humores, qui propterea detenti, præcordia inquinant, ac suffocent, sive demum, ut cum *Sylvio* ait *Tozzius*, quia felleo humore inanito, vitalis cessat fermentatio, undè Mors accedit. Rectè igitur admonuit *Trallianus* in hoc morbo, exiguam, & levem quoque curandi moram pessimam semper fuisse. Cùm igitur in tali affectu cunctatio sit periculosa, quam citissimè, & festinanter erit succurrendum, nempe causæ remotione, vel saltem correctione, mox Ventriculi, Intestinorum, & virium restoratione, quæ potissimæ mihi videntur indicationes. Vocatis ergo in auxilium tribus illustribus Medicinæ fontibus, scilicet Chirurgia, Pharmacia, & Diæta; à prima sumatur Venæ sectio instituenda in brachio dextro ad uncias sex Sanguinis hauriendas ad arcendam inflammationem: Fricationes insuper instituendæ, & Clysteribus utendum erit ad alvum deonerandam à materia cholericâ, & abluenda intestina à particulis irritantibus, quæ vellicabant fibrillas intestinales. Pharmacia verò dabit primò leniens pharmacum, ad subducenda excrementa peccantia, quæ in Ventriculo prava symptomata excitabant; indè convenient *Philonium Romanum*, *Diascordium Fracastorii*, *Theriaca*, *Succus Menthæ*, *Laudanum opiatum*, *Ebur philosophicè præparatum*, *Syrupus Coralliorum*, pulvis *Crystalli Montanæ præparatæ*, & *terra Sigillata*; hæc autem remedia adhiberi debent in sua proportionata dosi, & tempore convenienti, & accommodato juxta prudentem directionem Physici ordinarii cui me remitto. Externè *balsamum* & *Emplastrum stypticum Mynsichti* juvabit; vel sequens Cataplasma regioni Stomachi apponatur. *Pulveris Menthæ*, ʒ. j. *Rosarum rubrarum*, ʒ. ʒ. *pulveris radices Tormentillæ, Bistortæ, ana*, ʒ. v. *Masticis*, ʒ. iij. *nucis Moschatæ*, ʒ. ij. *Fermenti acerrimi*, ʒ. iij, *aceti rosati*, q. s. pro consistentia Cataplasomatis. Tandem proderit *Oleum recens Amygdalarum dulcium* epotum, hoc enim acredines internas mitigare expertus dico. Diæta demum accedat idonea, & ipsius causæ morbi adversa secundum qualitatem, & quantitatem, qualis jam fuit præscripta à Doctissimo Medico curante, cui prudentiæ in omnibus me remitto.

Eventus.

Proposita auxilia omnia penè fuère adhibita, neque affectus potuit débèllari, sed semper de malo in pejus Æger ruebat; accedente autem febre, omnibusque externis partibus frigefactis, adeò ut Lypiria laborare videretur, die morbi decima sexta vitam cum morte commutavit.

CONSULTATIO LXXXV.

De Lumbricis.

Nobilis Puellus ætatis annorum X. albi coloris, fructibus, & dulcibus eduliis ferè quotidie usus, etiam jejuno Stomacho, sæpè ventris doloribus vexabatur, & per alvum vermes excrevit; nunc crebris afficitur tremoribus, ac torminibus in ventre, clamoribus in somno, dentium stridore, foetenti anhelitu, cibi fastidio, capitis gravitate: quocirca Domestici me in consilium vocant, qui sic respondeo.

Puellus iste, qui sæpe Lumbricis tentatus fuit, etiam modò Vermibus afficitur, qui licet in humano corpore ubique reperiri possint, attamen frequentius in Intestinis ut in præsentì casu, habitare videntur; Græcè *ἑλμινθες* a Medicis vocatur, & frequentius, ut in casu nostro, puellos afficiunt. Teretes Lumbrici dicuntur isti ad differentiam Ascaridum, Latorum, & Cucurbitinorum, qui alii sunt Vermes humana corpora infestantes. Pars affecta præcipuè est Intestinorum cavitas, in qua hæc grassantur animalia; originem autem suam agnoscunt, non ex putredine corruptorum, ut Galenistæ docebant, non ex feminibus cum fructibus deglutitis, sed ex aliis ejusdem generis vermibus semper in corporibus humanis, tanquam in suo centro morantibus; vera enim genesis Lumbricorum humanorum tradita fuit nuperrimè à Clarissimo D. Antonio Vallisnerio Patavini Archilycæi ornamento, ac Amico meo plurimum honorando in aureo suo opere de Vermibus humanis; cùm enim in foetibus

foetibus tùm humanis, tùm ferinis vix in lucem editis reperiantur Lumbrici, hinc est quod nobiscum nascantur oportet: Ex talibus itaque Vermibus in magna copia genitis in nostro puello, quorum copiosam generationem, conspurcamenta primarum viarum præbuere; quæ ob errores in victu facta sunt, causa istius affectionis orta est. Visâ causâ ad Prognosim gradum faciamus; & primò, hic affectus non est contemnendus, quia perniciofa sæpè infert symptomata, nonnunquam enim ori Ventriculi infixi Vermes Lithymiam inducere valent, tracto in consensum corde; & plures pueros tali morbo denatos me vidisse recordor: citò ergo medicamina offerre conveniet, ut salus acquiratur: Indicationes igitur Medicæ erunt vermes necare, eos expellere, novam eorum productionem prohibere, ac Ventriculum, & Intestina corroborare; quæ ut fiant, ex Pharmaciâ primò sumatur medicina leniens ad Ventriculum, & Intestina deoneranda ab excrementis, in quibus Lumbrici luxuriant; poterit autem pro hac intentione exhiberi *Syrupus Aureus solutivus ad uncias tres*; inde proderunt sequentia. *Semen Santonici Saccharo incrustatum*; *Corallina*; *pulvis corticum Malorum aureorum, seminis Tanaceti*; & *aqua Graminis* in qua agitatus prius sit Mercurius crudus, quo multi gloriantur securavisse Lumbricis affectos brevissimo temporis spatio absque aliquocunque remedio: nihilominus tamen, si contumaciter perseveraret affectio, *aqua Theriacalis* utilis erit, sicuti *Mercurius dulcis ad grana VI. succus Nasturtii, & decoctum radices Bryoniæ, elixir Proprietatis Paracelsi, Theriaca Andromachi, Terra Sigillata Magni Ducis*; & *oleum nostrum Contra-pestem* vulgò dictum *del Castagna*, tam intus, quam extrà adhibitum. *Pulverem Chinæ Chinæ* in vino generoso contra Vermes optimum esse pluries observavi, quod etiam innuit D. Franciscus Torti Archiater Mutinensis Celeberrimus in suo egregio *Tractatu de China Chinæ* tanta sui gloria evulgato. *Semina Portulacæ* commendat Arnald. de Villanova; narrat enim puerum, dum esset in mortis periculo constitutus propter Lumbricorum multitudinem Semi drachmam pulveris seminum Portulacæ cum lacte assumpsisse, atque Vermes multos emisisse, sicque fuisse liberatum. Externè illiniri poterit Abdominis regio oleo, quod præparant Patavii Monachi Cassinenses ex diversis

herbis. Emplastrum sequens pariter apponatur. & *Farinæ Lupini, pulveris Centaurii minoris, pulveris florum stæchados, ana, 3. r. Aloës, fellis Tauri, ana, 3. ij. Misce & cum oleo Absinthii q. s. fiat emplastrum S. A.* Petroleum etiam utile erit si inungatur. Ex Chirurgia nihil, nisi febris accideret, inflammationis nuntia; ex Vermibus enim magna potest haberi in Ventriculo, ac Intestinis irritatio, unde faciliter inflammatio succederet: in tali itaque casu leviter Venam secare conveniet, quod tamen prudentiæ Medici sui ordinarii linquendum puto. Clysteres locum habebunt frequenter, & præsertim confecti ex lacte Vaccino, & Saccharo rubro S. A. Diæta demum inspicienda est, quæ debet esse moderata; juscula sint *Vituli, & Caponum; vinum sit tenue; ova recentia, & carnes pullorum laudo; succum Limoniorum, & Coriandrum approbo; nonnulli Medici Acetum, Sal, Allium, Cepas, & Agrestam exhibent; verùm istis, tanquam irritantibus Vermes ipsos, non uterer, nam majore molestia tunc poterunt os Ventriculi, & tunicas Intestinales commordere, ac graviter lædere, quod non sine damno Ægroti accideret; quocircà blandioribus alimentis esse procedendum puto, ut sanitas cum facilitate habeatur. Inter cætera verò Deum sibi Puellus noster fautorem habeat, sic namque citò, tutò, & jucundè valebit, ut spero.*

Eventus.

Adhibitis multis ex propositis remediis Puer visus est aliquantisper sublevari, & accedente Diarrhœa, multisque Vermibus excretis sanitatem recuperavit, & nunc optima valetudine fru-
tur.

CONSULTATIO LXXXVI.

De Dolore Iliaco.

T Raditæ mihi fuere literæ tuæ, Excellentissime Vir, quibus refers Magnificum Mercatorem morbo pessimo laborare, scilicet passione Iliaca; etenim obstructione alvi tentatur pertinaci, ita ut nihil excernere possit. Dolor adest in toto Abdomine, cum anxietate insigni, ita ut in lecto quiescere haud possit; his Vomitus accedit, & Nausea; primò quidem assumpta rejicit, mox varia in Ventriculo, & Intestinis contenta; hic autem meum poscit consilium.

Dico igitur affectum hunc Volvulum, seu torturam Intestino-
rum dici, vulgò *Miserere mei* ob insignem, & acutum dolorem; definiri enim, & describi potest, quod sit acerbissimus tenuiorum Intestinatorum dolor cum alvi suppressione pertinaci, & fæcum per vomitum ejectione: sic *Brasavolus* noster, nunquam vidisse Ileum absque vomitu asserit. Distinguitur à dolore Colico, è quia in illo afficiuntur crassa Intestina, in hoc vero tenuia; imò ego existimo, & crassa, & tenuia Intestina simul affici in hoc sævo morbo, quia in omnibus convulsio fit, & per consequens perverti potest peristalticus eorum motus, ex quo oriatur Ileus oportet. Pars igitur communiter affecta à Medicis dicitur regio intestinalis, nimirum Intestinum tenue omnium longissimum viginti palmos æquans: Ego verò tam tenuia, quam crassa Intestina esse dixi supra, quia convulsivus motus æquè competit Intestinis crassis, ac tenuibus. Ad felicem autem hujus morbi curationem, causam inquirere necessarium est, quæ est solutio continui in intestinalibus fibris, producta à particulis acutis irritantibus elevatis à materia aliqua, vel à fæcibus ipsis induratis in Intestinis ipsis cum metu inflammationis, atque sphaceli infallibiliter sequendi, nisi remediis promptè occurratur: puto autem in nostro casu nondum esse factam inflammationem, sed tantum ipsam in fieri esse, è quod in historia vix de febre verbum habetur, quæ procul dubio adesset, si inflammatio in Intestinis existeret: materia verò peccans
in

in nostro casu, qua particulæ irritantes elevantur, est succus glandularum intestinalium à sua naturali crasi degenerans, & in austerrum, & fonticum transiens, undè primò Intestina ipsa constringuntur, postmodum acrior redditus mittit particulas suas in porositates fibrarum, & eas perforando spasmodicum dolorem inducunt: Causa verò antecedens externa forsitan fuit error in victus ratione, si benè hæc examinetur. Prognosim quod attinet; hoc malum horrendum est, & periculo plenum, sic *Hippocrates in Aphor. 10. Sect. VII.* ait, *ab Ileo vomitus, aut singultus, aut convulsio, vel delirium, malum.* Pariter malum erit, si ventositas inferiùs per crepitum exiens valde foeteat, teste *Foresto*: Vomitus varius, ac niger, & mali odoris exitialis est; si autem frigidus sudor suboriretur, quod tamen Deus avertat, tunc *Mors* est in limine. Verùm quia non adhuc inflammatio est facta, uti supra innui, & à sola materie praternaturalis, ac flatûs causa oritur iste affectus, ideò spes aliqua apparet salutis, nec desperandum, audio enim Mercatorem nostrum esse ætatis consistentis, bonæ temperiei, & de rarò ægrotare. Indicationes ergo in nostro casu erunt succum peccantem tollere, vel saltem corrigere, fæces induratas expellere, flatus discutere, & fibris Intestinorum tonum naturalem restituere, atque Intestina corroborare, quibus satisfaciendis ad tres Medicinæ consuetos Fontes nos convertere oportet, ut salus quam citissimè à Mercatore nostro recuperetur. Ex Chirurgia igitur primò Venæ sectio desumenda erit ob metum inflammationis; fricationes pariter convenient, ut & clysteres ad alvum deonerandam, si enim vomitus cessaret, & alvinæ fæces per anum emitterentur, tunc salus Ægri esset in tutò, & mortis timor evanesceret. Ex Pharmacia plura remedia desumi poterunt, videlicet primò ad acridinem excrementorum intestinalium mitigandam sequens mixtura juvabit; *R. Aquæ Plantaginis, ℥. ij, Fœniculi, ℥. j. Confectionis de Hyacintho, Alchermes, ana, ʒ. ʒ. Laudani Opiati, gr. iij. Syrupi Papaveris albi, ℥. j. Misce*: detur autem cochleatim, & per intervalla: Globulos plumbeos non semel expertus fui, & aliquando felici eventu, hi enim deglutiti solo suo pondere materiam induratam propellunt. Clysteribus injiciendis addenda erit *essentia Castorei*, & post clysteres, suadente *Dolæo*, unciam unam *saponis Veneri in sero lactis*

lactis exhibere conveniet, quo remedio multos ab hoc tristi morbo liberatos vidisse, ait *citatus Author*. *Jusculum*, in quo bullierit *Malva*, bibendum laudo; imò cùm pertinacia morbi hæc præsidia eluderet, *argentum vivum* ad plures uncias epotandum exhiberem, ut pondere suo, & fluiditate Intestina veluti vincta expediret, ac solveret; *Volvulum* enim *hydrargyro* propinato pluries curatum fuisse, scribit *Georg. Hieron. VVeljchius in Observ.* Externè proderunt sequentia: Apponatur facculus ex suillo stercore in aceto decocto, vel tale fomentum ventri applicetur; & *Foliorum Malvæ, Althææ, Violarum, ana, manip.j. Linariæ, Florum Chamæmeli, Meliloti, Verbasci, ana, manip. semis, seminum Lini, Anisorum, Anethi, ana, ʒ. ij.* Misce decoquantur in lacte, vel si non adsit lac, in aqua communi Q. S. fiat S. A. fomentum. Convenit & decoctum *Chamomillæ, Sambuci, Anethi, Malvæ* calidè ventri apponendum: sicuti filamenta lini, aut cannabis cocta secundum nonnullos juvant, si tepida ventri applicentur. Diæta denique tenuissima sit, & quoad cibum, & potum Æger sit valdè continens. Conveniet cremor hordei, juscula Caponum, Vituli & similia. Potus sit aqua Hordei, & Emulsiones seminum Peponum; Somnus concilietur. Quæ dicta sint pro salute nostri honoratissimi Mercatoris. Faxit Deus &c.

Eventus.

Major pars remediorum propositorum adhibita fuit omni studio, ac diligentia, attamen accessit febris, & pulsus humilior est factus, sic pejoris conditionis morbus de die in diem evasus, syncope affectus, & frigido perfusus sudore decima quarta morbi die interiit Mercator noster honoratissimus, non sine consanguineorum lachrymis, atque Amicorum suspiriis.

CONSULTATIO LXXXVII.

De Doloze Colico.

CIvis Ferrariensis annorum ætatis 49. in rebus omnibus liberè vivens, non tantùm enim magna in quantitate comedit fructus crudos, gelida, & generosa potavit vina, immodica Venere etiam est usus, & sæpè iracundia est motus; hinc flatus, atque rugitus vèntris cœpère, & appetentia dejecta est; Dolor fortis in Abdomine adest cum Lymphæ expuitione frequenti, & alvi summa stypticitate; crescit immanis cruciatus cum inflatione, rugitu, ac distensione ventris infimi. Nunc inquietus, & valdè à dolore pressus opem Medicam poscit.

Ventris hic summus, ac acerbus dolor, propriè Colica vocari debet; Colon enim intestinum est pars affecta: dicitur à Medicis tristis sensatio Intestinorum, & præcipuè *Coli* cum sæcum retentione à continui solutione oriunda; & hujus talis est atrocitas, ut multi à Colica vexati, se ob dolorem confoderint, teste *Thom. Burneto in Thes. Med.* Oritur iste dolor in nostro casu non tantùm à materia, sed à flatu; mucilago enim viscida, & acida agglutinata in intestino Colon inservit pro materiali causa, unà cum flatu, qui distendit, & quasi dirumpit membranas Intestini, undè spasmodicus iste cruciatus habetur cum rugitu, & inflatione; & talis acutiei est iste affectus, ut *Galenus* asseruerit, ipsum pali infixi, vel terebræ perforantis speciem exhibere. Quoad Prognosim malum hoc est periculosum, & aliquandò lethale, sic quosdam Coli dolore vexatos animi deliquio extinctos fuisse notavit *Joh. Fortis in Cent. 2. suar. Consult. num. 92.* Insuper perseverante Colica, Iliacam passionem oriri posse timendum; undè ut hanc prævertat implorat à re Medica auxilium. Indicationes igitur curativæ sunt, removeze materiam viscidam, & acidam, nec non flatuositatem ab intestino Colo, atque roborare Intestina ipsa, immò totum restaurare corpus, quod vehementer passum est in tali affectu. Hæc verò, ut assequantur, tres Medicinæ fontes aperire convenit, qui sunt Chirurgia, Pharmacia, ac Diæta; à pri-
ma

ma igitur sumi poterit, suadente *Galeno*, cucurbitula cum multa flamma Umbilico imposita, quæ, veluti incantamentum, flatus, & materias discutiet, & sic dolorem momento sedabit, si verò ob pertinaciam doloris timor fieret ne inflammatio in ipsis Intestinis accideret, tunc Venæ sectionem instituerem in brachio dextro. Clysteres bonam præstabunt operam; sic autem poterunt parari. & *Decocti Malvæ, florum Chamæmeli, Parietariæ, lib. j. Mellis Rosati solutivi, Olei Chamæmeli, ana, ʒ. iiij. Vitelli ovorum, num. 1. Misce, fiat Clyster*; si verò opus fuerit, repetatur. E Pharmacia sumatur ad evacuandam materiam, & flatus discutiendos *Spec. Elefscoph. ad ʒ. iiij.*: non improbarem etiam oleum recens *Amygdalarum dulcium* ad alvum humectandam: Usurpentur etiam opiata, ut *Philolonium Romanum, Mithridatium ad ʒ. ʒ.*; proderit etiam confugere ad *Laudanum Nepenthes Quercetani* ad pondus gran. ij. cum modico Sacchari rosati ad bolum parvum efformandum, qui sumi poterit cum aqua totius Citri, & Cinnamomi. *Pulvis intestini Lupi* laudatur à multis tanquam specificum remedium. Externè illita proderunt olea de *Baccis Lauri, Absinthii, & Rutæ*; umbilico apponatur *Zibethum cum oleo nucis moschatæ*. Facile remedium proponit *Riverius*, quod experiri poterit statim, nempe frustum Butyri recentis assumptum cum modico vini superbibito. *Sal Gemmæ* à proprietate juvat si *Petro Foresto* credamus. *Pulvis testiculorum Equi, & sperma ceti* cum jusculo, aut vino si sumantur, prodesse poterunt. *Decoctum Veronicæ* à proprietate Colico dolori mederi testatur *Joh. Crato*, quod experiri poterit in Clysteribus. Hic autem observandum cum *Villisio* calidiora Epithemata dolores exacerbare multoties, potius quam lenire, quare in his casibus probari poterunt foci ex aqua pura frigida, vel ex solutionibus nitri, vel salis Ammoniacy. Specificum denique *Hartmannus* adhibet, quod non semel in praxi facienda expertus sum Ego, quod tale est. & *Spiritus Vini, ʒ. j. Spiritus Nitri, ʒ. ʒ., aquæ fontis, ʒ. iiij.*, inde benè tectus ad sudorem se componat Æger postquam mixturam illam assumpserit. Diæta quoque observanda est; bibat potius vinum generosum, quam aquosum. Deus autem illi præsto sit.

Eventus.

Fuère adhibita nonnulla ex propositis remedia, & brevi tempore omninò convaluit; nunc sanus vivit.

CONSULTATIO LXXXVIII.

De Retentione Alvi.

Illustrem, ac Nobilem Virum Siculum ætatis annorum LI. laborare summâ Alvi suppressione certò jam constat, siquidem, ut colligo ex historia eruditè conscripta, ipse ad multos dies nihil per alvum excernit; impositis clysteribus aliquando Alvi excrementa deponit; sed iterum ad solitam stypticitatem redit; nunc autem meam audire sententiam exoptat.

Magnus ille Medicorum Princeps *Hippocrates in Epidem.* ait, ventris torporem omnium esse confusionem, ex summa namque stypticitate derivare possunt febres ardentes, aliique acuti affectus; quos tamen in hoc nostro casu Deus avertat.

Vir igitur Illustris Alvi suppressione afficitur, quæ nihil aliud est, quam excrementorum Ventris, & præcipuè Intestinorum retentio, cujus causa est inertia bilis ob prædominium succi Pancreatici; illius enim particulæ irritare nequeunt Intestina, & per consequens eorum promovere motum, undè fæces retinentur. Pars affecta est Intestinorum tractus. Prognosim quod concernit; affectum hunc non parvi faciendum puto, utpote quia ex pertinaci Alvi Retentione multa mala oriri possunt, & in praxi facienda non semel ex ingenti Alvi suppressione fæcibus maximè induratis Iliacos affectus ortos fuisse observavi; ideò citissimè ad curationem festinandum erit, ne forte in nostro Patientè prava succedant symptomata. Indicationes itaque sunt in nostro hoc casu, reducere biliosum liquorem ad pristinum statum, fæces alvinas ab Intestinis remove, irritationem in ipsis promovendo, & demum Intestina ipsa corroborare: Quæ ut celeriter fiant ad tres Medicinæ Practicæ fontes deveniendum, ut citò, tutò, & jucundè salus haberi

haberi possit. Chirurgia igitur parum remedii dabit, præter Clysteres emollientes, ad sollicitandas fibras intestinales, & diluendas fæces. Si autem metus alicujus inflammationis in Intestinis ipsis oriatur, tunc tutò Phlebotomia instituatur in brachio sinistro: præter tamen hæc remedia nihil à Chirurgia: Fons nunc Pharmaceuticus aperiatur. Convenit igitur primò *serum lactis*, quod sua acrimonia irritat, aquositate sua diluit, & humectat: Modus verò præscribendi erit talis. *℞ Lactis Caprilli, lib. j. fiat præcipitatio cum Tamarindis, colaturæ ℞ Libr. 8., adde succorum sequentium cochlearia duo. ℞ Succo Cichorei, Endiviæ, Fumariæ; adde parum sacchari fini, & sumatur horis matutinis quotidie ad plures dies.* Potio nostra Magistralis Solutiva Catholica utilis erit; sicuti frequentem usum sub vesperam commendo *pilularum de Aloë succotrina lota in succo Rosarum.* Sit in usu *Aqua vitæ nostra solutiva*, quam pluries in alvi obstructione feliciter adhibui, cujus descriptio talis est. *℞ Pulveris Jalappæ electæ, 3. j., Cinnamomi electi, 3. ij. Corticis Citri, quantum satis, Spiritus Vini rectificati, lib. 1. Misce, fiat infusio per tres dies cineribus calidis, inde coletur, & servetur ad usum.* Dosis verò sit *uncia una* pro qualibet vice: *Pulverem Cornachini* laxativum contumacem alvi suppressionem curavisse in quodam Reverendo Sacerdote observavi; pulveris verò formula talis est. *℞ Pulveris Cremoris Tartari, à 3. j. ad 3. ii. Diagrydii sulphurati, à granis viij. ad xij. Antimonii diaphoretici, grana viij. Misce, Fiat pulvis.* Vinum sequens medicatum purgans, descriptum à Ferd. Carol. Weinhardt. in Medico officioso summoperè commendo. *℞ Foliorum Sennæ, 3. ij., Agarici trochiscati 3. 8. Turbith. optimi pulverizati, 3. ij. Nucis Moschatæ rasæ. 3. j., herba Betonica, Cardui benedicti, Agrimonie, Absinthii, Borriginis, Anthos, ana, pug. j., incisa omnia excipiantur Sindone pro lib. iiij. Vini generosi; cujus quotidie jejuno stomacho sumantur uncie quinque.* Vespere poterit etiam sumi cochlear unum *conservæ Rosarum solutivæ.* Diæta denum sit rectè instituta, & aureum illud Hippocratis præceptum observetur, *non impleri cibis oportet*; ita enim pauca excrementa producuntur: abstineat ab alimentis duris, & glutinosæ substantiæ, ut caro suilla, carnes annosæ omnes, recenter mactatæ, & volucrum aquatiliū, utpotè difficilis concoctionis, atque

distributionis ; unde semper difficilior evadet excrementorum exitus. Corporis motus est necessarius, nimia namque quiete de facili remorantur fæces, ideò horis matutinis motus est exercendus. Pro potu *vinum dulce* concedatur ; somnus, & vigilia sint moderata. Tandem læto stet animo Ægrotus noster, moderatum enim gaudium spiritus restaurat, ac alacriores reddit. Pauca hæc habebam ad confirmationem eorum, quæ ut scio à Clarissimis Viris proposita fuere in præsentī casu.

Eventus.

Multæ materiæ auxiliorum propositæ adhibitæ sunt, & instituta convenienti vivendi ratione, ac aëre mutato, & in Nobilissima Urbe Venetiarum per mensem moram faciendo, tandem quotidie alvo respondente Vir Illustris sanatus est.

CONSULTATIO LXXXIX.

De Alvi Adstrictione.

V Ir Illustris ætatis annorum XLVII. post gravem morbum alvo suppressa afficitur ad plures dies ; imò transit integra hebdomada, qua nec semel alvus deoneratur : Nunc auxilium petit.

Contumax hæc affectio alvi constipatio vocatur, & oriri forsitan potest in nostro Patientē à deficientia humoris biliosi non fluentis ad Intestina, qui valet ea stimulare, & alvum relaxare : in morbo enim ante habito, ut mihi narratum fuit, per frequentem vomitum, & alvi fluxum magna quantitas humoris biliosi excreta fuit, unde exinanita fellis vesicula non potest ad Intestina demittere particulas illas, quæ cuspidibus suis vellicare, ac irritare valeant fibras Intestinorum, ex qua irritatione oritur excrementorum projectio per rectum Intestinum facienda. Curari autem debet ista affectio, humectando non solum Intestinorum fibras, sed eas stimulando, ut fæcum habeatur exclusio ; sic à Chirurgia nihil nisi Clysteres sumendi erunt : Venæ sectio enim in hoc casu

casu inutilis, immò noxia est; relaxatio enim alvi tantum requiritur, & fæcum eductio, quod Pharmacia præstabit. Assumat igitur Æger *oleum Amygdalarum dulcium* recentè expressum cum Saccharo Q. S. Aliqui conficiunt *oleum ex Amygdalis dulcibus*, & seminibus quatuor frigidis majoribus, ana, partes æquales ex quibus permixtis, atque contusis exprimitur *oleum S. A.* quo sæpè Æger utatur; & hoc *oleum* assiduè cochleatim assumptum, alvum lubricam in aliquibus facere notavi. *Urticam tenellam* oleo, & fæle coditam alvum laxare ait *Forestus*. Torreatur mica panis, ait *Borellus in obs.* oleo irroretur, & mane deglutiatur, ita alvus solvetur. Multi nudo pede super humo deambulant, & ita ventrem solvunt, & hujus rei historiam refert *Brasavolus* noster de *Med. purg.* ait enim *Borsium Ducem Ferrariensem* pertinaci alvi retentione laborantem curatum fuisse à *Savonarola Medico* tunc celebri, obambulatione super pavimento marmoreo, aqua frigida madefacto; quo facto alvus est soluta: verum *Brasavolus* ipse hoc periculosum auxilium vocat, quia tormina potest inducere; ideòque ad alia pharmaceutica auxilia veniendum. *Essentiam salis Tartari cum spiritu vini* extractam, & ad consistentiam redactam ad gutt. VI. in haustulo vini vesperè horis duabus ante cœnam sumendam ad multas vices, bonam, ait *Joh. Harttmannus in sua Praxi*. Ego sequenti *Electuario* feliciter usus fui in pluribus stypticitate alvi correptis. & *Electuarii de Prunis cum Manna, Cassiæ recentè extractæ, Electuarii de Succo Rosarum*, ana, 3. vj. *Specierum Diasennæ* 3. iij., *pulveris Cinnamomi*, 3. ss. *Misce cum Syrupo Violaceo solutivo* Q. S. fiat *Electuarium S. A.* de quo assumi debet unum cochleare quovis mane jejuno stomacho. *Pilulas Gellii*, de *Aloë*, & alias hujusmodi pilulas solventes in usu esse apud multos legi. *Prunas Massilienses*, & *Conservam Rosarum solutivam*, & *flores Persicorum* adhibent alii. Ego frequenter utor *Aqua Vitæ* meæ solutiva cujus descriptio habetur in *Prodromo Pharmacopææ Ferrariensis* pag. 181. & in Consultatione præcedenti.

Cæterum hæc affectio parum periculi minatur, siquidem apud *Th. Burnetum in Thesaur. suo Pract.* legitur de Fœmina, quæ nisi vigesimâ die alvinas fæces deponebat, & de Sacerdote, qui post vi-

gesi-

gesimum quartum diem alvum exonerabat, nec quidquam incommodi inde sentiebant : ut etiam accidit in Juvene, de quo historiam scripsi Ego in *Miscell. Acad. Curios. ann. 9. Dec. 11. pag. 78.* Decoctum Ceparum commendat *Samuel Ledelius* ad alvum sollicitandam. Quibus omnibus addatur congrua victus ratio à Viro Excellentissimo adstante præscribenda, cujus prudentiæ omnia committo.

CONSULTATIO XC.

De Lienteria.

H Onestissima Fœmina hyemali tempore post varios in vivendi ratione commissos errores à Domesticis observata est male se habere, & sæpius quam par foret alvum deponere; hinc successit contumax alvi fluxus, tribus horis distans à cibo, quandoque ab eo statim, juxta esculentorum crasim, dejectionesque sæpius noctu, quam diu fiunt absque tamen intestinorum dolore; adsunt murmura in intestinis, & excreta albicant, spumescunt, & foetent, ac aliquandò alimenta parum mutata permixta habent. Medicum nunc petit auxilium.

Morbus iste lævitas intestinorum dicitur, à multis Cœliaca passio, ab aliis *Lienteria* seu *Leienteria* quæ est species alvi fluxus præter naturam, in quo cruda chylosa, aut etiam planè non chylosa rejiciuntur; unde, *Galeno* teste, *Lienteria* vocatur celer esculentorum, potulentorumque exitus, quo talia dejiciuntur, qualia ferè fuere devorata. Circa hujus morbi causam nonnulli imbecillitatem Ventriculi accusant, ita ut coquere, & retinere cibos nequeat, alii à Venis lacteis obstructis pendere autumant; multi glandulas Mesenterii crassiori Chylo turgidas hunc affectum producere dicunt; nec desunt, qui Lienem, Jecur, ac Pancreas, quatenus malè se habentia inculpant; aliique tandem ex intemperie Ventriculi oriri volunt: Verùm Ego dico ex quacumque causa fieri posse hunc affectum, quæ tamen causa pariat cibi indigestionem, aut privatam distributionem confecti chyli. In hac tamen nostra Muliere causam esse cogito laxitatem ejusdem Ventriculi; rectus enim

enim fibrarum tonus amissus est, & dissolvens succus hebescit, Intestina pariter laxa fiunt, flaccescunt venæ lacteæ, & glandulæ Mesenterii, non sine debilitate Bilis Hepaticæ, ac succi Pancreatici, qui humores debitam non peragunt fermentationem, unde Lienteria nascitur. Visâ causâ, ad Prognosim gradum faciamus. Quanti autem periculi sit iste affectus satis liquet ex eo, quod sensim vires deperduntur, & si chronicus hic morbus evadat mortem minabitur; aliquandò in Hydropem transit; si verò acidus ructus superveniat signum erit salutis, docet enim *Hippocrates in aphor. 1. Sect. IV.* bonum esse si in lævitatibus Intestinorum ructus acidus superveniat, qui prius non extiterit; indicat enim inchoari ciborum rectam concoctionem, quam à succo acido proficisci tradunt Doctores. Ut autem recta instituat curatio, examinandæ sunt indicationes, quæ in nostro casu sunt Ventriculum roborare, fermentationem rectam ciborum promovere, acuere succos hebetes, tonum fibris restituere, venis lacteis, ac glandulis, necnon reddere justam suam crasim bili Hepaticæ, ac Pancreatico succo. Ad quæ habenda primò lenitivum aliquod blandum è Pharmacia assumatur ad removendas saburras in Ventriculo morantes, ac fermentum Stomachi conspurcantes, inde aromata omnia laudo, & potissimum subamara ad corroborandas fibras Ventriculi, ac Intestinorum: *Bolus Armena, Terra sigillata, Cornu Cervi ustum, Corallium, Theriaca, & succus Cydoniorum* optima sunt. *Diascordium Fracastorii* commendatur à *de le Boë Sylvio*: Ego laudo *confectionem Hyacinthinam, & Mithridatium*. Quæstionem movent aliqui Practici, an scilicet evacuatio materiæ peccantis in hoc affectu per superiora, an per inferiora conveniat. *Rhases* enim commendat vomitum, *Hippocrates autem in aphor. 12. sect. IV.* contrarium docens, ait in ventris lævitatibus hyeme supra purgare malum: Difficultatem autem solvit *Rolfincius* dicendo, quod si materies peccans contineatur in Intestinis, illa per alvum sit evacuanda; quæ verò in Ventriculo, per vomitum; in nostro porrò casu tantummodo leniente uterer medicamine, ut alvus sollicitetur ad saburras contumaces tollendas; ut etiam innui suprâ. Usum lactis ab alio Medico commendatum non approbo, quia alvum subducit jam fluidam, & ejus vim refrigerantem suspectam esse in hoc

Josephi Lanzoni Opera. Tom. II. B b mor-

morbo credo. Alterantia semper sint confecta ex *Absinthio*, *Mentha*, & *Pulegio*, istorumque defectu poterunt substitui eorum folia. Externè confert *emplastrum ex Tacamahaca*, *Mastiche*, & *crusta Panis*; advertendum autem, ut ponatur acetum, vel aliquid tenuium partium, ut penetrare faciant adstringentia, & terrea, quæ sibi aditum præcludunt constringendo, & sæpè ventris fluxum augment, quia constipata cute, & partibus superioribus comprimendo expellunt; quam ob causam laudo additionem *Spicæ*, vel *Cinnamomi* in pauca tamen quantitate, ita ut medicamenta crassiora penetrare valeant, & Ventriculum juvent. Ex Chirurgia nihil, si febris absit; quod si calorem febrilem senserit nostra Patiens, tunc Venam secare conveniet. Diæta demum ritè se habeat, & Ægra nostra cibo minimè gravetur, sed pauca exhibeantur, & grata Ventriculo: liquor expressus ex carnibus assis cum aromatibus, & succo Cydoniorum utilis erit. Sanatum se vidisse Lientericum graviter affectum sumpta *Halece* salita aceto inspersa ait *Lucas Tozzi*. Quibus ritè observatis salus erit speranda.

Eventus.

Proposita Medicamenta omni studio, ac diligentia adhibita fuere, adjuncta idonea vivendi ratione; & intra paucos dies Deo adjuvante Hæc Mulier sanitatem recuperavit: nunc sana vivit.

CONSULTATIO XCI.

De Lienteria.

N Eminem vestrum latet, o Percelebres Medicinæ Doctores, honestissimum hunc Virum, qui ad pristinam sanitatem sibi restituendam hîc nos convocavit, alvi profluvio, quod Lienteria dicitur, laborare, quæ nihil aliud est, quam alvi fluxus præter naturam, in quo cruda, chylosa, imò etiam planè non chylicata rejiciuntur, proveniens tum a fermenti in Ventriculo nimia aciditate, tum a succo Pancreatis vitiato, quæ irritando fibras Ventriculi,

triculi, & Intestinorum alvi excretionem frequentem inducunt, etiam si ciborum concoctio nondum sit peracta, unde edulia semiconcocta secernuntur, ut in casu nostro. Hujus causa dependet à vitio fermenti acidi Ventriculi, & à succo Pancreatis ad nimiam acredinem exaltato, unà cum imbecilla ejusdem Ventriculi constitutione, & Chyli imperfecta, malaque distributione. Quod ad Prognosim attinet, quia Æger frequenter animo deficit, præsertim dejecturus, ideò periculo prorsus non vacat & quò tardius, eò difficilior sanabitur; & malum certè non contemnendum, quia universo corpori nutrimentum subtrahit; ast cum in nostro casu simus in Viro quadragenario, forti, & bono temperamento prædito; ideò speranda venit salus, & maximè quia Medicinæ practicæ obtemperantissimus est. Ad corrigenda porrò fermenta supradicta, ac viscera corroboranda; præstabit primò uti *Syrupo Cydoniorum, pulvere Coralliorum rubrorum præparatorum*; & externè juvabit ungere Ventriculi regionem *oleo Mastiches, Cydoniorum, & Nardi*, uti monet *Felix Platerus*. *Pulverem radice Tormentillæ* commendant nonnulli: *frustula Rhabarbari* masticata non sine fructu expertus vidi. *Terram Catechu, Theriacam, balsamum Peruvianum*, ut & *Electuarium Diascordium Fracastorii* cum *Dolæo* laudarem, multum enim levaminis afferre poterunt. Multi *Chocolatam* exhibent, nec Ego eam improbo: *Serum lactis, & Emulsionem ex quatuor seminibus frigidis majoribus* juvabunt. Ex Chirurgia nihil desumendum erit. Victus tenuior esse debet, euchymus, nec corruptu facilis; contrarius quippe non modò talem affectionem generabit, sed etiam genitam augebit. Vinum aromaticum non nocebit, moderatè tamen sumptum. Hæc autem breviter de dignotione, prænotatione, & curatione præpositæ affectionis lentericæ dicta sint, in confirmationem eorum, quæ tam sapienter ab Excellentissimis Dominis meis exarata fuerunt, quibus me remitto.

CONSULTATIO XCII.

De Diarrhœa.

G Ratissimæ mihi fuerunt literæ tuæ, Excellentissime Vir, & tantum abest, ut earum afficiar tædio, ut ansam mihi dari cupiam, qua possit tenuitas mea cedere in emolumentum Illustris illius Civis, de cujus morbo meum petis consilium.

Hic enim, ut audio ex humanissima tua epistola, frequentissimo alvi fluxu tentatur, sine febris; excrementa varia sunt, nunquam tamen cruenta; aliquandò adest dolor Ventris, & aliquando dejectiones frequentes quidem sunt, sed tamen sine doloribus, quod autem opem meam poscit est pertinacia hujus affectus; transacti enim sunt plures dies, & tamen sequitur Alvi fluxus.

Manifestissimum est Civem nostrum Diarrhœa affici, quæ alvi fluxus est, distinctus à Dysenteria, & definiri, ac describi potest, quod sit largior, frequens, & diuturna excretio fluidorum, serosorum, & biliosorum excrementorum cum utilibus permixtorum magis vel minus acrium, undè modò tormina, modò non, absque febre. Hic autem affectus ex erroribus in victu commissis ortum habuit, ut puto ex cibis mali succi largiter ingestis, & faciliter corruptibilibus. Pars affecta est Ventriculus cum Intestinis: At quia magni momenti est in morbum curatione eorum causas cognoscere; ideò nunc causa istius affectionis est indaganda, quæ meo videri oritur à vitiosa succorum pravorum in Ventriculo, ac Intestinarum effervescentia, ratione bilis acrioris, & salinæ, cujus particulæ fibras illorum viscerum stimulant, undè frequens Alvi fluxus habetur; concedere autem nequeo, istos humores acres à Sanguine separari, & per vasa in Intestina, ac Ventriculum præcipitari; quia, si prius conspurcata esset sanguinea massa, procul dubio febris adesset, qua mediante, veluti certa, & necessaria quadam fermentatione, & effervescentiâ, prava illa materia separaretur, & ad Intestina devolveret. Nunc ad Prognosim accedamus, hanc enim Medicinæ partem Medico esse necessariam Hippocrates in præmio *Prognosticorum* suorum asserit: Observandum igitur est, an mutatio

excre-

excrementorum se vertat in melius, aut in deterius, quod si primum, bonum erit, & salutare; si verò secundum, periculum portendet: Si excreta fuerint alba, spumosa, & graveolentia, tunc morbus esset non contemnendus. De Salute verò sperandum est, tum quia fumus in ætate consistenti, tum quia corpus Patientis sanum est, & viscera vitium non habent. Indicationes porrò curativæ sunt compescere excrementitiorum succorum effervescentiam, omniaque recrementa funditus eradicare, atque Ventriculum, & Intestina tandem corroborare: Quæ ut assequantur, ad Diætam recurrendum, Chirurgiam, atque Pharmaciam. Ut à prima exordiamur; aër sit temperatus; frigidus enim potius Diarrhœam promovet; cibi sint laudabilis succi, & in modica assumantur quantitate semper aromatizati; horaria, acida, & cruda fugiantur: Fungi nocent, undè meritò *Seneca* eos venena voluptuaria vocat. Legumina omnia nocua sunt, sicut pingua, & dulcia; hæc enim in se acidum habent occultum, & corrosivum, à quo fibræ Intestinarum faciliter irritantur, undè alvi fluxio insequitur. Potus moderatus sit, & vinum generosum concedatur, vel Granatorum, vel Cydoniorum. Somnus concilietur, iste enim omnes evacuationes compescit, præter sudorem; arceantur animi pathemata, & ad hilaritatem potius componat animum Patiens. Ex Chirurgico fonte, nihil nisi fricationes leves dorso faciendæ sumantur. Pharmacia demum totam implebit paginam, ipsa enim in nostro casu claves curationis habet: Sit ergo primus *Syrupus Aureus Rosatus cum Rhabarbaro torrefacto* ad eliminanda excrementa effervescentia in Ventriculo, ac Intestinis, & Diarrhœam excitantia; hoc autem facto proderit usus mixturæ sequentis. & *Diascordii Fracastorii*, ʒ. j. ʒ. , *Confectionis de Hyacintho*, ʒ. j. , *Syrupi Myrthini*, ʒ. j. , *Aquæ Cinnamomi*, ʒ. ʒ. atque *Plantaginis*, ʒ. ij. *Misce*, & cochleatim exhibeatur: hinc ad opiata fideliter recurrendum, verbi gratia ad *Philonium Romanum*, ad *Laudanum opiatum*, ad *Mithridatium*, & *Theriacam*: adstringentia juvabunt, ut sunt *Cornu Cervi ustum*, *Terra Sigillata*, *Bolus Armena*, *Corallium rubrum*. semina *Plantaginis*, *Gummi Arabicum*, *Mastiches*, *Sanguis Draconis in lachryma*, & *balsamum Peruvianum*: *Ceram albam* malo cydonio inditam, simulque excoctam efficacem esse expertus assero: *Tinctura*

tura Martis optima est, sicuti sequens Cataplasma Ventriculi regioni imponendum, & *Emplastri de Crusta Panis*, ʒ. iiij. *Fermenti acerrimi*, ʒ. j., *pulveris Menthæ, Absinthii, ana*, ʒ. ij., *Rosarum rubrarum*, ʒ. ʒ. *corticum Granatorum, Balaustiorum, ana*, ʒ. j. *Misce, & cum aceto rosato fiat* S. A. Cataplasma : Decoctum Granorum Juniperi in vino paratum valdè conferre me legisse recordor apud *Thesaur. Medic. Pract. Thom. Burneti lib. 4.* Plures commendant caseum antiquum. Quibus ritè adhibitis salus erit speranda, ut ex corde precor.

Eventus.

Auxilia non omnia, quæ in Consilio leguntur, sed ex parte tantum adhibita fuere, & Patiens Divino favente Numine, post decimam quintam diem sanitatem recuperavit.

CONSULTATIO. XCIII.

De Dysenteria.

NUllam ætatem ab ullo morbo liberam ait in *Consil. 21. Frideric. Lossius Medicus sua tempestate præstantissimus*, sed omnes cujuscumque ætatis mortales morborum tyrannidi æquè subiectos esse; videmus siquidem gravissimas affectiones non tantum adultos, sed tenellos etiam infantes crudeliter vexare. Ita accidit nunc in Puero Nobilissimo hujusce Civitatis honestissimæ familiæ ætatis annorum sex, qui tempore æstivo feбри primò correptus fuit cum ardentissima siti, mox alvi fluxu afficitur cum aliquali dolore; crescit Diarrhœa, & mutata facie Dysenteria apparuit; tormina enim adsunt; alvi frequens excretio, cruenta, cum Tenesmo, & virium prostratione. Domestici auxilium poscunt, & meum consilium expectant.

Celsus sub *Torminum* nomine hunc morbum accepit, *Galenus* autem Intestinorum difficultatem dixit. Dysenteria verò communiter nuncupatur, pessimus scilicet ille affectus, qui conjunctam habet essentialiter alvi excretionem præternaturalem, frequentem, cruen-

cruentam, interdum aqueam, interdum strigmentosam, aut purulentam cum dolore, Tenefino, aliisque pravis Symptomatibus unà cum febris, cujus sedes est cavitas Intestinorum exulceratorum. Istius diræ, & atrocis affectionis causam esse cogito exulcerationem Intestinorum, & vasculorum eorundem corrosionem propter acrimoniam sanguinis, bilis, pancreatici succi, & lymphæ; quo fit, ut etiam febris excitetur: Causæ verò remotæ fuerunt cibi pravi & insoliti, unà cum magno ætatis calore; ex particulis verò acribus assidue irritantibus fibras crassorum etiam Intestinorum Tenefimus oritur tanquam comes inseparabilis hujus morbi; quo fit, ut Puellus noster tam crebrò cogatur desiderare, irritò sæpè conatu. Circa Prognosim advertendum, quod si adsit cibi fastidium, malum erit indicium, & pejus erit, si veluti carunculæ dejiciantur, & excrementa sint ramentosa, maximè quia *Hippocrates* in Senibus, & Pueris hunc affectum esse magis perniciosum ait, quam in Hom nibus mediæ ætatis: Si sudores frigidi apparuerint, mors erit timenda, sicuti si superveniat singultus, & mentis alienatio; quæ omnia tamen Deus avertat ad Puelli salutem. Indicationes sunt dulcificare humores, ulcerationes Intestinorum sanare, & vascula corrofa reparare, nec non fibras intestinales, & glandulas corroborare, quæ ut celeriter assequantur ad Medicinam Practicam confugiendum est quam citissimè, ut salus, si fieri possit, habeatur. A Pharmacia igitur inchoando; alvi fluxum statim non esse inhibendum, & sistendum assero, ne fortè in pejus ruat Æger: *Tamarindis* ergo cum *Rhabarbaro* torrefacto primò utendum, & clysteribus ex lacte *Vaccino* paratis frequenter Intestina laventur, sic enim temperabitur humorum acredo in ipsis Intestinis, unde cauciatus fient minores; postea *Laudanum liquidum Sydenhamii* propinetur, unà cum pulveribus *Margaritarum præparatarum*, radicis *Contrayervæ*, *Terræ Sigillatæ*, *Crystalli Montanæ præparatæ*, & *Cornu Cervi usti*; Emulsio sequens utilis erit, R. *Seminum quatuor frigidorum Majorum*, ana, ʒ. ij. *Papaveris albi*, ʒ. iiij. *Plantaginis* ʒ. j. *Amygdalarum dulcium* ʒ. ij. *aquæ Plantaginis*, lib. i. *Misce fiat S. A.* Emulsio; cui adde pulveris *Terræ Sigillatæ*, *Cornu Cervi usti*, ana, ʒ. ij. *Aquæ Cinnamomi*, ʒ. j. *Julep. Gemm. parum*; *Misce*, pro aliquot vic-

vicibus. *Tincturam Catechu* laudat *Dolæus*; & radicem *Ypecacuanha* dictam, proponunt alii; verum quia fumus in Puello, hoc remedium, nisi in modica dosi exhiberem, quia sæpe vomitum movet acerbum. Quod si urgeat semper magis Tenesmus, fiat suffimentum de Verbasco juxta descriptionem *Dolæi*. Proderit quoque unguentum ex Butyro non salito cum Alcohol lapidis scissilis, quo pars Recti intestini Puello nostro illinatur, atque sæpè foveatur calido lacte Vaccino. Ex Chirurgia modicum Sanguinis hauriatur à Vena Salvatella manus dextræ; præter hoc autem nihil. Diæta demum nunc visitanda, quamobrem aër cubiculi primò sit moderatus, nec enim debet esse nimis frigidus, nec nimis calidus, uterque enim nocet; imò cubiculi aër debet purgari: Cibus rectè instituatur, & esse poterit *Prisana Hordei*, *Ova*, *Oryza*, *caro Vitulina*; Potus sit *aqua Hordei Chalybeata*, in qua semper stet infusum *Cornu Cervi raspatum*; fugiendum est Vinum; ab hoc enim majores fierent fermentationes, & augerentur effervescentiæ. Observandum tamen cum *Waldschmidio* in hoc morbo multum, non multa, à Medico esse præscribenda. Quæ omnia, ut sint proficua Puello nostro Dysenterico Deum tanquam supremum Medicum precor.

Eventus.

Ferè omnia proposita auxilia fuerunt adhibita neque morbus potuit debellari, imò crescentibus Symptomatibus pravis, id est Singultu, & Convulsione, atque pertinaciter durante alvi fluxu cruento, sudore frigido accedente, die morbi decima octava Puer miserabiliter periit, non sine Parentum lachrymis, & universo Familiæ dolore.

CONSULTATIO XCIV.

De Fluxu Hepatico.

PErgratæ mihi fuerunt literæ tuæ, *Excellentissime Domine*, ac tantum abest, ut earum afficiar tædio, quin potius ansam dari mihi cupio, quo possit, tenuis licet, opera mea cedere in tuum emolumentum, si fieri possit, uberrimum. Audio igitur te meum petere consilium super casu sequenti.

Reverendus Religiosus temperamenti sanguinei, boni corporis habitus, ætatis annorum 47. vernali tempore, post æquinoctium variis commissis in victu erroribus, sæva animi pathemata passus est, & præsertim forti agitatus fuit bile, & iracundia vexatus, de repente incidit in febrem cum dolore in regione hypochondriorum dextrâ valdè acuto, cui accessit nausea, & summa virium debilitas cum alvi fluxu primò bilioso, mox liquido dilutè rubro instar loturæ carnis: ope remediorum febris mitigata est, & cætera symptomata penè cessaverunt, præter tamen alvi fluxum ferè saniosum, & sanguinolentum, qualis appareret aqua, in qua nuper mactata caro abluta esset; nunc vigesimum enumerat diem Reverendus Ægrotans, & Medicam flagitat opem.

Hanc affectionem esse Hepaticum Fluxum asserere auderem licet dubitent plures Doctores, talem dari morbum & *Sylvius* præcisè ait, se nunquam talem affectum vidisse; attamen non semel in praxi Medica facienda, & præsertim in Xenodochio S. Mariæ Novellæ Ferrariæ, meæ curæ commisso, talem curavi passionem; idcirco quid de hoc Ægro sentio candidè exponam; Fluxus igitur iste Hepaticus nuncupatur, & est dejectio indolens humoris cruenti ichorosi, & foetidi ab Hepatis vitio ortum habens: Pars autem affecta primò est Jecur, inde Intestina ipsa: Causa proxima in ipso Hepate perquirenda est; aluit verò Hepar Sanguis arteriosus, qui per arteriæ Cœliacæ ramum dextrum affluit, aliunde autem uti Venæ Portarum furculi concava Jecoris irrigent, ita Venæ Cavæ radices ejus concava perreptant; accedunt insuper animales spiritus,

Josephi Lanzoni Opera. Tom. II. C c quos

quos per nervulos singulares à plexu costalium accipit illud viscus. Cruor ergo hîc filtratur, & transcolatur ad Cavæ truncum ascendentem. Bilis etiam ab Hepate derivat in Duodenum, & Lymphæ receptaculum commune huc confluit. Verosimile igitur est vasa omnia in Jecore relaxari, ut & glandulas Intestinorum, & vasa lymphatica, quæ extillant lympham non bene à Sanguine secretam, adeoque rubore suffusam in cavitatem Intestinorum; insuper per arterias Cœliacas, è quibus Splenicæ, & Mesentericæ deducuntur, Sanguis ipse multa lymphâ saturatus in crassa Intestina deferatur, qui mox per alvum exiens carniû loturam æmulatur: Causæ autem remotæ fuere animi gravia pathemata, & errores in victûs ratione; ista enim disponunt humores nostri humani corporis ad vitiosam crasim, unde effectus redditus, & suo glutine orbatus cruor, similia, & graviora mala producit. Prognosim nunc, id est Morbi exitum, adeamus; hæc enim pars Consultationis, est illa, quam magis optant Domestici, Ægrorumque Amici, optantes ferè semper exitum fortunatum; quæ tamen pars videtur Medico difficilior, utpotè super rem venturam versans, de futuro enim non datur veritas determinata; attamen modò aliquid de morbi eventu asserere convenit, ut plena sit Consultationis pagina: non illicò igitur de salute erit desperandum, maximè si citò curationem admoveamus; periculo autem non caret hic morbus cùm pars affecta sit princeps; & cùm neglectus fuerit iste affectus, de facili potest transire in Hydropem, & Cachexiam &c. quod tamen Deus avertat. Quocirca Jecoris Venarum obstructions tollendæ sunt, glandulæ, vasa lymphatica accommodanda; Hepatis robur restituendus: humores ad debitam crasim reducendi, & concoctiones juvandæ: quæ ut habeantur; conveniet primò medicamen, quod habeat vim aperiendi non sine modica adstrictione, ut est *conserva Rosarum antiquarum cum corallio rubro præparato & Cornu Cervi usto; Species Diarrhodon Abbatis, Elixir Proprietatis Paracelsi, succus Absinthii, & Aloes* utiliter adhiberi poterunt: *Hepar Lupi* aliqui Medici extollunt, illudque præparatum exhibent: Aromata, quocunque modo exhibeantur, utilia erunt, ut *Cinnamomum, Galanga, Piper & similia. Vinum Absinthii* exhibeatur unà cum *Electuario è baccis Juniperi.* Diuretica, & sudorifica, quæ alkali pluri-

plurimo constant, optimi erunt usus; Narcotica, si fuerint moderata, & mixta roborantibus, juvabunt; sicuti nocebunt cathartica valentiora, à quibus ferè semper abstinerem; potest tamen dari semidrachma *Rhei pulverisati* in modum pilulæ cum *Syrupo de Rosis siccis*. Externè porrò ad Hepatis regionem, & Intestinorum applicatum proderit sequens linimentum: & *Olei Absinthii, Cydoniorum, Amygdalarum amararum, ana, ʒ. j. ʒ. ʒ.*; *florum Chamæmeli, summitatum Absinthii, Agrimonie, ana, pug. j.* *Masticis, Nucis Moschatae, Caryophyllorum, ana, ʒ. j.*; *aquæ Absinthii, Aceti, ana, ℥. S. fiat decoctio, & coletur pro linimento*: si autem timeatur de Jecoris inflammatione, tunc instituenda erit Venæ sectio, habito tamen respectu ad vires Ægroti, si enim nimis debilis foret, omitenda. Omnibus istis addatur congrua victus ratio; parcius enim, sed optimis alimentis vescatur, & moderatè bibat; *aqua Nuceri-na* optima erit, quatenus quodammodo adstringens: Quæ omnia sint à me scripta ad confirmationem eorum, quæ ab aliis Viris doctissimis tum administrata fuerunt, tum administranda in posterum erunt pro Patientis nostri salute. Faxit Deus &c.

Eventus.

Plurima ex præscriptis remediis adhibita sunt, & tamen Rever. Religiosus semper in pejus ruebat; alius Medicus Decoctum *Ligni Guaiaci*, & *Salsæparillæ* exhibuit, sed incassum; Cachecticus enim factus, & postmodum Hydropicus, post duos menses vitam cum morte commutavit.

CONSULTATIO XCV.

De Tenesmo.

EX nimia antecedente comestione fructuum, & nimia incalescentiâ, incidit primò in turpem Diarrhœam, inde in Tenesmum Nobilis Juvenis ætatis annorum XXVIII. qui ut à tali liberetur molestia nunc auxilium Medicum postulat.

Est autem Tenesmus, sive ut alii legunt Teinesmos, nihil aliud, quam assiduum ferè per alvum excernendi desiderium urgens, cum dolore præsertim in extrema Ani parte, cum pauca excretionem mucosa, subcruenta; cujus immediata causa sunt reliquiae acrim vitiosarum portionum intra Intestinum Rectum, & ad Sphincterem inhærentes, & exulcerantes; & istæ productæ fuerunt à Diarrhœâ transactâ non omninò expurgatâ. Causa verò remota fuit calor nimius, sicut fructuum nimia comestio: ex corruptione enim talium alimentorum vitiosi acres succi geniti sunt, qui ad Intestina præcipitati Diarrhœam produxêre; inde adhærentes tunicis Intestini Recti, Tenesmum excitare valuerunt: Natura siquidem videtur superiora Intestina in Intestinum Rectum exonerare, quod ob spirituum inopiam, & tonum labefactatum, illud, quod molestum est, foras eliminare nequit, undè irritatio sequitur, & Tenesmus inducitur, qui Recti Intestini Dysenteria dicitur à *Joh. Forti in Cons. Cent. II.* Quoad Prognosim, *Hippocrates* lethalem non esse ait, & *Celsus* semper hunc affectum parvi fecit: attamen citò curandus, nec diutius est negligendus, quia poterit in Fistulam incurabilem terminare, vel saltem fibris corrosis in involuntariam fæcum dejectionem degenerare. Detergere ergo oportet, & eliminare mucosas illas acres materias inhærentes Recto Intestino, dolores mulcere, ac Intestinum ipsum roborare. Quæ ut assequantur, devenire opus erit ad Chirurgiâ, Pharmaciâ, & Diætâ. Et ut à prima exordiar, utilem judico aperire Venam brachii dextri ad minuendum calorem, & impediendam inflammationem, quæ ex particulis acribus posset excitari in Intestino Recto, licèt *Galenus* in cura hujus affectus nullam mentionem fecerit de Sanguinis missione; quia inquit *Lælius à Fonte*, argumentum à parte negativa desumptum nihil concludit; nec obstat pariter, quod fluente alvo Vena non sit secanda, quia tunc intelligitur cum alvus vehementer fluit, non quando adest vehemens stimulus, & parva excretio, ut in Tenesmo. Certum tamen est, majora remedia desumi à Pharmaciâ: & primò exhibeantur *Tamarindi cum aqua Tetucciana ad Dies quatuor primo ad lib. V., secundo ad VI. tertio ad VII., & quarto ad VIII.,* quo remedio feliciter usus fuit *Joh. Fortis in Consult. Succus depuratus Cichorei ad plures dies*

dies utilis erit : injiciatur in anum *succus Plantaginis* cum decoctione *Tapsi barbati* in vino facta. Fomentum ex decoctione *Verbasci*, & *Plantaginis* commendant aliqui; sicut *aquam fabrorum*. Analeptica verò sunt præscribenda, quia crescentibus viribus desiderium cacandi decrescit, & advertatur, quod omnia illa externa, quæ Ano induntur, plus irritant; ut testatur *Waldschmidius* in *suis Monit. Med.* Ideòque accedat idonea vivendi ratio, morbo, & ejus causæ adversa præscribenda à Doctiss. Curante.

Eventus.

Penè omnia proposita auxilia adhibita fuère, & vigesima die Æger perfectè saluti fuit restitutus.

C O N S U L T A T I O XCVI.

De Ani Prolapsu.

PUellus annorum ætatis quatuor, post multum esum Uvarum recentium, incidit in Diarrhœam, indè in Tenesmum, mox in Ani procidentiam pertinacem; terminatâ enim Diarrhœâ, & Tenesimo, adhuc prolapsus Ani perdurat; quæ affectio nihil aliud est, quàm extremæ partis Intestini recti foras facta prominentia, aut prolapsus unâ cum musculo sphinctere, qui est morbus in situ, quia Intestinum rectum, quod deberet intus latere, foras progreditur. Istius affectus causa in hoc Infante fuit Diarrhœa, & Tenesmus; irritatis enim, & relaxatis fibris, Ani prolapsus factus est; malum, quod præsertim accidit pueris, ut notat *Galenus* 9. *secund. Loc. & Mercurialis lib. 1. de Morb. Puer. Cap. X.* Locus affectus est musculus ille factus à natura ad Intestinum rectum retinendum. Bonum autem pro hoc Puella est, intestinum non esse inflammatum, & quia recens est hic prolapsus, ideoque facilis curationis, ut notavit *Avicenna cum Mercuriali*. Indicatio curativa consistit in reductione Intestini ad proprium locum, & in retentione, ne rursus cadat: quod assequi potest fovendo primò Intestinum prolapsu-

sum decocto *Malvæ* adjecto *butyro*, inde *vino calido generoso rubro*, & *chalybeato*. Aliqui laudant decoctionem *radicis Prunellæ sylvestris in aqua*. Repositione autem facta, adstringentibus est utendum, ne iterum recidat; & poterit sequens adhiberi remedium præscriptum à *Clarissimo Ersfeld* in suo *lib. de morb. infant. cap. 62.* R. *Rosarum rubrarum, Balaustiorum, nucis Cupressi, corticis Granatorum, ana, ʒ. ʒ. Sumach. Thuris, Mastiches, ana, ʒ. ij.* coquantur in *vino austero*, & *spongia madida* anus subcalidè foveatur, & absoluta fomentatione sequens pulvis *gossypio* exceptus ano imponatur. R. *Florum Rosarum rubrarum, Balaustiorum, ana, ʒ. ʒ. Thuris, Mastiches, Myrrhæ, ana, ʒ. i.* M. fiat pulvis, vel ex tali pulvere fiat suffitus. Proderunt etiam *aquæ chalybeatæ*, ut illa *fabrorum* in quibus bullita sint *folia quercus, plantaginis, bursæ pastorum, consolidæ, balaustiorum, millefolii & flores acaciæ*. Laudantur etiam *fumus Genistæ cumbustæ*, si ano excipiat, *crocus Martis adstringens, Cornu Cervi ustum, plumbum ustum*: sunt qui offi sacro imponunt *Emplastrum Sagapeni & Opoponacis*: decoctum *radicis prunellæ sylvestris in aqua* exhibet *Burnetus*. Pulverem *scarabæi* in stercore equino nati commendat in sua *Praxi Hartmannus*: & alii *sanguinem Draconis in lachrymis, Terram sigillatam Magni Ducis, Corallium rubrum præparatum, ac terram nucerinam*. Si autem timor inflammationis accidat, tunc *Venæ sectione* in brachio utendum. Curandum est, ut *Puer dormiat supinus, & cruribus, ac coxis elevatis*. Cibi sint sicci, & abstinendum à fructibus, & herbis, & ab omnibus alvum solventibus, quapropter solutiva purgatio minimè convenit: In omnibus porro remediis faciendis, obtemperet *Puer Medico assistenti*, cujus prudentiæ cuncta à me superius præscripta committo.

Eventus.

Pluribus ex remediis præscriptis lege Artis adhibitis, brevi temporis intervallo *Puellus salutis fuit restitutus, nec amplius procidentiam Intestini recti passus*.

CONSULTATIO XCVII.

De Fluxu Hæmorrhoidum.

TAmetsi hoc tempore negotiis variis implicatus sim, nihilominus tibi, Vir Excellentiss. quem magno prosequor amore, satisfacere brevi consultatione decrevi: Quocirca quid de Hæmorrhoidali fluxu Reverendi Sacerdotis Amici tui ætatis annorum LV. sentiam, & quæ remedia præscriberem, exarare decerno.

Manifestò igitur patet hic morbus, & ex erudita tua epistola colligitur, Ægrum nostrum vexari Hæmorrhoidum fluxu, singulis enim diebus libram modò minorem, modò majorem sanguinis profundit, non sine magno virium detrimento. Pars affecta ex se jam liquet, Hæmorrhoidales quippe Venæ locus morbi sunt. Causa verò immediata est anastomosis istorum vasorum, quatenus aperta liberum dant exitum cruori, qui cùm sit ferosior, & acris, irritando oscula vasorum Hæmorrhoidaliùm aperturam eorum inducit, quæ licet tenuis sit, attamen, quia subtilis, ac ferosior sanguis existit, foras emittitur non sine patientis incommodo ac salutis detrimento. Pars affecta per se jam liquet, est enim massa cruoris, & vasa Hæmorrhoidalia. Indicationes sunt incrassare, ac dulcificare cruorem, necnon claudere orificia vasorum dictorum, atque oscula ipsa corroborare. Antequam verò remedia proponam aliquid circa Prognosim dicam; timendum itaque, si morbus iste diu perseveret, ne Ægrotus incidat in Tabem, aut Hydropem, Hippocrates enim tale infortunium prædicit; & licet ipse Magister doceat, Fluxum Hæmorrhoidum à multis morbis liberare, id tamen intelligi debet, si morbis illis superveniat, & juxtà naturæ limites procedat; cùm verò neque morbis supervenit, imò ipse Fluxus Hæmorrhoidalis morbus evadit, tunc timendum, ne in Hydropem transeat, ut pluries observavi, & præsertim in Excellentiss. nostro Medico Hippolito à Monetis, qui post longum, atque pertinacem Hæmorrhoidalem Fluxum, tandem in malum corporis habitum, & exinde in Hydropem incidit, à quo

quo morbo necatus est. Ne igitur aliquid majoris momenti nostro Ægroto accidat, opportunè occurrendum erit, ut salus habeatur; quapropter suaderem, aperiri Venam brachii dextri ad uncias sex sanguinis educendas revulsione gratia: Cucurbitulas Hypochondriis applicatas laudat *Joh. Fortis*; & lotiones manuum frequentes aqua frigida utiles erunt. Præter ista à Chirurgico fonte nihil. Pharmacia dabit primò medicamen lenitivum ad communes expiandas vias, puta *oleum Amygdalarum dulcium*, vel *Syrupum Rosatum Auratum solutivum*, vel *Flores Cassiæ recentis*, inde tria semina *Genistæ* quotidie mane sumenda iussu *Reiner. Solenandri*. *Succum Urticæ* commendo, sicuti pulverem *Corallii rubri præparati*, *Terræ sigillatæ*, *Boli Armenæ Orientalis*, ac pilulas *Helvetii* contra quoslibet sanguinis fluxus: optimus etiam erit *opii usti* usus, & *pulveris Bufonis combusti* super *Hæmorrhoidas* impositi; sequens linimentum juvabit: & *Pulveris radices Scrophulariæ 3. j. ℞. olei Liniariæ, & ceræ, Q. S. fiat S. A. linimentum*. Si hoc non proderit cataplasma sequens admoveatur partibus affectis: & *Boli Armenæ, Aloes, Mastiches, Thuris, sanguinis Draconis, ana, 3. ℞. Myrobalanorum Indorum, & Gallarum, ana, 3. j. subigantur cum albumine ovi, & succo Plantaginis, ac fiat S. A. Cataplasma*. A Proprietate quadam, cingulum ex foliis recentibus *Hellebori nigri* nudo corpori circumdatum plurimum valere tradidit *Hartmannus in Prax.* quod remedii genus feliciter expertam se fuisse mihi facta est *Honestæ* quædam *Matrona Ferrariensis*. *Pinguedo Anguillæ* commendatur à multis, & ab aliis *tela Aranei, Pulvis pilorum Leporis*, atque *Fungus*, qui *crepitus Lupi* nominatur; verum quia in uno subiecto optimum est unum remedium, quod in alio corpore alterius Ægroti nil valet, imò nocet; ideò multa proposui, ut non juvante uno, ad aliud tendamus; à juvantibus enim, & lædentibus desumuntur indicationes. Diæta demum observetur accuratè, idcirco *Patiens* caveat ab aère frigidiorè, alatur ptisana, probis carnibus, & ovis recentibus; bibat de vino sequenti: & *Rasuræ Lentisci, 3. ij. infunde in lib. XII. vini generosi Ferrariensis in loco tepido per horas 24. inde coletur, & servetur ad usum*; postea in omnibus aliis rebus nonnaturalibus mediocritatem servet, & *Deus Optimus Maximus* illi præsto sit.

Eventus.

Fuit secta Vena, & multa ex propositis remediis adhibita magnam utilitatem attulerunt, & post dies 17. perfectè convaluit.

CONSULTATIO XCVIII.

De Hæmorrhoidum Fluxu.

Per illustres Civis affectio, ut, ex his quæ retulit Dominatio tua, clarè patet, est fluxio Sanguinis præternaturalis ex Hæmorrhoidibus; cruoris enim fit diuturna profusio, & maximè in egerendi conatu; cui accedit virium prostratio, & malus corporis habitus. Ex quibus colligitur Virum Illustrem Fluxu Hæmorrhoidali laborare, ut signa manifestant sequentia, nimirum Sanguinis cum fæcibus, vel ante, vel post excretionem earum, exitus; virium lapsus, crurum languor, cachecticus Corporis color inclinans ad subviridem colorem, quæ omnia sunt signa propria Hæmorrhoidalis Fluxionis, ut præcisè monet *Joh. Christ. Frommannus in suo Tractatu de Hæmorrhoidibus*. Cùm igitur Sanguis nimia serositate scateat, atque, ut ita dicam, aquosus, & lymphaticus factus sit, hinc evenit, quod per anastomoses Venarum Hæmorrhoidaliū exeat, sicque hanc excitet affectionem. Licet autem aliqui putent fluxionem Hæmorrhoidalem à multis morbis immunes nos facere, tamen Ego morbum esse periculosum assero, utpote qui si pertinaciter vexet, in Cachexiam, ac Hydropem degenerare potest; unde mors certa, quemadmodum observavi pluries accidisse in praxi facienda. Verùm quia sumus in consistente ætate, & vires Ægri sunt validæ, ideò de salute non desperandum, imò, quantò citius possit, curatio erit instituenda, ne fluxus iste Hæmorrhoidalis confirmetur. Primò igitur ad communem corporis expiationem, purgatio levis est instituenda, vel *potione ex Manna clarificata*, vel *Syrupo Aureo Solutivo Rosato*. Alterantia erunt *juscula Pulli*, in quibus bullierint *folia Cichorei, Betonice,*

Josephi Lanzoni Opera. Tom. II. D d *nicæ,*

nica, & *Plantaginis*, addito pulvere *Cornu Cervi* usti ad 3. j. Ex Pharmaceutico fonte pariter defumenda erunt adstringentia, & specifica remedia ab Auctoribus Medicinæ proposita, & præcipuè pulvis *Croci Martis* adstringentis, *Terræ sigillatæ Magni Ducis*, *Corallii rubri*; *Succus Urticæ urentis*, *Succus Plantaginis*, cortices *Pomorum Granatorum*, semina *Genistæ* commendata à Reinero Solenandro in suis Consiliis Sect. 4. & Burneto lib. 8. Infra diem uti poterit decoctione sequenti, id est, & Decocti radices *Consolidæ*, *Bistortæ*, *Tormentillæ*, *Scrophulariæ*, cui adde modicum *Diascordii Fracastorii*, parum *Camphoræ*, & *Syrupum Coralliorum*. Ante cibum per horam sequentem pulverem exhibuit non sine fructu D. Pompeius Sacchus Archiater Parmensis: & *Terræ Sigillatæ*, ʒ. ʒ. *Corallii præparati*, ʒ. j. lapid. *Hæmatidis præparati*, ʒ. ʒ. misce & assumatur cum aqua *Plantaginis*, & *Portulacæ*. Fiat fots cum vino adstringenti, in quo ebullierint folia *Tapsi barbati*, *Myrthi*, *Sumach.*, *Balaustia*, & radices *Scrophulariæ*, & *Consolidæ contusæ*. Suffumigium ex *Sulphure*, *Masticæ*, & *Rosis rubris* juvare poterit, vel saltem non nocere. *Philonium Persicum* assumptum cum succo *Plantaginis* commendat Donzellus in Theat. Pharmaceutico. Ex Chirurgico fonte *Venæ Sectio* etiam repetita juvabit ex utroque brachio. Injections per syringam in anum fieri possunt ex succo *Plantaginis*, & modico pilularum *Helvetii* ad fluxum Sanguinis cohibendum, vel aqua ferrata. His omnibus accedat bona victus ratio, & vinum sit album, ac tenue; juscula sint gelatinosa ad incrassandum cruorem. Hæc est mea sententia, quam libenter submitto Dominationis tuæ Excellentissimæ judicio.

CONSULTATIO XCIX.

De Doloꝛe Hæmorrhoidum.

Religioſus pius, ac venerandus, ætatis annorum XLVI., boni corporis habitus, frequenter corripitur dolore Hæmorrhoidum acerbo cum tumore inſigni, ac inflammatione, à quo frequenti incommodo, & cruciatu liberari deſiderans medicam opem implorat. Hæc affectio dicitur triſtis ſenſatio in Venis Hæmorrhoidalibus, quæ tument cum magno dolore; hic autem tumor fit à majori Sanguinis fluxu, quantitate, & qualitate peccantis, qui ſi exitum non inveniatur, & Venarum dictarum extremitates aperire nequeat, in eiſdem congeritur, eaſque replendo tumorem excitat cum inflammatione, & dolore, qui acerbitate ſua Ægrum torquet, ut in caſu noſtro. Signa diagnoftica per ſe aperta ſunt, ſiquidem ex tumore in ani extremitatibus apparente cum dolore, & rubore cognoscitur: Verùm quod ad Prognofim attinet; illæ ut plurimùm non ſunt periculofæ; aliquandò tamen tam gravem inflammationem concipiunt, ut Gangrænæ periculum portendere poſſint: Quod ſi Hæmorrhoides ſuppurentur, metus erit de fiſtula curatu difficili ob partis mollitiem, & ſummam humiditatem; & difficulter curantur, quando affectio eſt confirmata; nihilominus auxilium Ægris nunquam eſt denegandum, & idcirco nonnulla erunt agenda à me aliàs non inutiliter experta, & infraſcripto ordine executioni mandanda. Primò igitur primæ viæ liberandæ erunt à communibus, & univerſalibus excrementis: ſecundò humorum quantitas minuenda, & eorum acrimonia demulcenda: tertio demum tumentes Hæmorrhoides reſecandæ, ac reprimendæ, & partes affectæ corroborandæ. Ad primam itaque intentionem poterit exhiberi lenitivum ad alvum deonerandam, vel *potio Solutiva Magiſtralis* noſtra, vel *flores Caſſiæ recentè extractæ*, vel *Manna Electa* ſuperbidendo *ſerum Vaccinum*, prout naturaliter à lacte ſeparatur, colatum ſolummodo, non verò depuratum, vel deſtillatum. Pro alteranti aſſumat Æger *decoctum foliorum Cichorei*,

rei, Borruginis, Malvæ; & inter omnia curandum, ut alvus semper lubrica fervetur ob minorem doloris acerbitem. Vena secetur non semel tantum, sed bis ad Sanguinem minuendum. Ad topica verò quod spectat, *Forestus* laudat *oleum Vitelli Ovorum*. Ego *adipem Ranarum, & Butyrum lotum in aqua Malvæ, Unguentum Populeonis*; *Rodericus à Fonseca balsamum Sulphuris* laudat: *Joh. Fortis* sequens unguentum commendat: & *Unguenti albi, 3.j., Populeonis, 3.ij. Olei Nerupharini, 3. s., Violacei, 3.ij., Opii, Camphoræ, ana, 3.iiij. Lichargyrii, 3.i.* Misce in mortario plumbeo, & fiat unguentum. Cataplasma etiam ex medulla Panis albi in lacte cocti, addendo *oleum Rosatum, & Vitellum Ovorum* utile erit. Herbam *Linariam, & Scrophulariam* miris laudibus extollunt nonnulli; & Ego radicem *Scrophulariæ* pro amuleto appositam dorso non semel juvasse observavi: Si verò experiri velit *Ægrotus noster* meum Unguentum, quo feliciter usus sum in praxi facienda, sequens erit. & *Cepæ sub cineribus coctæ, 3.ij. Unquenti Populeonis, 3.j., Olei Linis 3. s. Vitelli Ovorum, 3.ij., salis Saturni pulverisati, 3.j. extracti Opii, 3.j. adipis Ranarum, 3.iiij.* Misce: fiat linimentum S. A., & bene misceatur, in mortario plumbeo. *Wolfgangus Hoeserus* sequens remedium præscribit. & *Millepedum q. s. Misce cum pulpa Pomorum coctorum, & applicetur bis in die cum linteo mane, & vespere. Portulaca* contusa, & applicita dolorem mitigat; sicuti *mucilago seminis Psyllii cum oleo Violaceo*. Dictis verò addatur congrua victus ratio, abstinendo ab acribus, acidis, & falsis, ab aromatibus, vino generoso, à nimio motu tum corporis, tum animi, & præ cæteris alvus lubrica fervetur cibis humectantibus, & utendo ante cœnam *conserva Florum Cassiæ ad 3.j.* quæ omnia ut proficua sint Deum enixè precor.

Eventus.

Multa ex præscriptis usurpata fuere remedia, & Deo adjuvante sanitatem recuperavit, nisi quod semel, aut bis in anno aliquem *Hæmorrhoidum* dolorem, tamen mitem, sentit.

CONSULTATIO C.

De Ascite.

Nuper accepi epistolam tuam, *Excellentissime Domine*, ex qua tuam erga me benevolentiam colligo, unà cum historia morbi magni cujusdam Civis, & Amici tui, super qua meam flagitas sententiam.

Ut ergo tibi, quem ex corde diligo, morem geram, & tuæ voluntati promptè satisficiam, brevissimè quid sentiam de tali affectione exarabo, & ut ordinatè procedam, methodum consultationis sequar, ut sic nihil deferam in hujus morbi consideratione. Apertissimè igitur patet, ex doctissima morbi historia, affectum, quo detinetur Civis iste ætatis annorum 62., esse Hydropem Ascitem; adest enim intumescencia ventris inferioris, crurum, & scroti, aliis partibus penè emaciatis cum siti intensa, ac respirandi difficultate, ita ut, nisi sedens extra cubile, quietem vix habeat, quæ omnia Ascitem indicant. Hydrops igitur à Latinis aqua intercus dicitur, cum totus venter, instar utris pleni, turgeat, & definitur; Abdominis tumor à lymphatico humore in infimi ventris capacitate collecto ortum trahens, cui & femorum, & pedum, ac scroti, ut in casu nostro, tumor accedit. Partem autem affectam esse totam Abdominis regionem, de facili conjicitur, utpote in hac parte causa efficiens, & materialis habetur. Causa hujus morbi immediata est humor aquosus à propriis ductibus prodiens, & se in Abdominis cavitatem effundens, certè enim lymphatici ductus in culpa sunt, ob ipsorum vel rarefactionem, vel rupturam, & profectò aiebat Clarissimus Dominus meus *Anton. Dominicus Gotti Medicus Florentinus* in sua *Exercit. de Hydrope* egregiè quidem conscripta; ab hujus modi ductibus vel rarefactis, vel ruptis Hydropem excitari posse nemo est, qui in dubium revocet, tunc enim lymphæ in illis contenta, vel exsudans, vel diffuens in Abdominis cavitatem ruit, eamque immaniter implet. Accedunt viscerum obstructions, ut

D d 3

Lienis,

Lienis, & Hepatis, ex quibus pars etiam Sanguinis exsudat aquosa, unde augetur Hydrops; & hinc est, quod *Hippocrates de loc. affect.* ait, *quibusdam Spleneticis progressu temporis in Hydropem morbus degenerat*; siquidem indurescente Liene ex congestione crassiorum humorum, vasa lymphatica comprimuntur, ac propterea humorem suum continere non valent, ac tandem disrupta copiosè lympham eructant, quæ in Abdominis cavum secedens Hydropem inducit. Ad Prognosim morbi istius quod concernit, notandum, quia, ut ex epistola colligo, Tussis jam accessit, morbum jam penè esse incurabilem, indicat enim humorum acredinem falsam, quod etiam innuere videtur sitis assidua, ac molestissima, quæ Ægrum nostrum miserabiliter torquet, ac vexat; & tantò magis periculosus est præsens Hydrops, quia, ut audio, rubicundus est urinæ color, pulsus citatus, corpus emaciatur, virium adest lapsus, signa enim ista lethalia esse docuit *insignis Dolæus*; verùm quia melius est anceps experiri remedium, quam nullum, & sortem nostram tentare convenit; idcirco ad curationem properandum, nè soli tantum Prognostico relinquamus Ægrotum. Indicationes igitur sunt in nostro casu, viscerum tonum restituere, vasa lymphatica claudere, & materiam extravasatam evacuare, ac demum viscera, præsertim infimi ventris, corroborare, quæ ut habeantur ad tres consuetos Medicinæ fontes recurrendum erit; & primò quoad Diætam, cibi sint facilis coctionis; assa præferantur elixis, vitentur acida, falsa, & glutinosa, quæ obstructions augere valent; & fugiantur omnia legumina; potus sit modicus, & sit vinum generosum foliis Absinthii medicatum; procul sit autem spiritus vini; parcissimus autem sit cibus, & potus; observationes enim testantur plurimæ, Hydropicos multos sola potûs abstinentia pristinæ sanitati fuisse restitutos; & Ego justè fateri possum, Dom. Joh. Baptistam Gattelli Medicum Argentanum, meum discipulum, solâ potus abstinentiâ, & usu *pilularum ex Gummi Ammoniaco aceto soluto* ab Hydrope liberatum fuisse. Somnus sit moderatus, & nocturnus. Animi passiones vitandæ sunt, & absit mœror; ait enim *Helmontius*, se Hydropem ex longo mœrore derivatum observasse. Excreta porro, ac retenta sint naturæ convenientia, & in Deo tantum ponat Ægrotus noster spem suam, ab eo enim omnis medela,

Ex

Ex Chirurgia nihil. A Pharmacia multa defumi possunt remedia; & primò, ut communes evacuentur viæ, Clysteres opportuni erunt, & externè cataplasmata ex *stercore columbino, vaccino, caprino, sulphure, Cymino cum oleo Anethi, & Rosarum S. A.* confecta utilia erunt. Diuretica laudantur, sicuti potus Urinæ pueri sani quovis mane jejuno stomacho, *Elixir Proprietatis* boni erit usus, sicut *spiritus salis Ammoniaci, & spiritus Tartari* in jusculo aperitivo assumendi. *Pulverem Millepedum* commendo, & paracenthesim improbo, cum enim per me morbus sit confirmatus, viscera vitata, ac vasa lymphatica sint disrupta, hinc est, quod materialis causa tantum per illam operationem tolleretur; at fons, & origo Morbi nequaquam, undè Æger citius periret, quæ omnia currenti calamo exaravi, ut tibi, Excellentissime Domine, satisfacerem. Faxit Deus, ut omnia cedant in Patientis nostri utilitatem. Tu interim Vale.

Eventus.

Multa ex præscriptis remediis diligentissime fuerunt administrata, verum semper crescente morbo, cruribusque apertis è quibus aliqua portio lymphaticæ materiæ exivit sine ullo levamine, tandem accedente respirandi magna difficultate Æger vitam cum morte commutavit. Aperto cadavere ex Abdomine effluxit magna quantitas aquæ viridis foetidæ; Omentum erat putrefactum, Peritonæum absumptum; Jecur durum, & pustulis plenum: in Vesicula fellis penè nihil; Lien ferè ad nihilum redactus; Pulmones maculis nigris deturpati; Cor autem, & reliqua non erant male constituta.

CONSULTATIO CI.

De Tympanitide.

Licet non accurata ad me pervenerit historia morbi Illustris Civis Mantuani ætatis annorum XXXIX. attamen pro eo, quod ego conjectari possum, morbum ipsum, ejusque causas indagare cogar, ac ejusdem curationem instituiam.

Affectio igitur, qua opprimitur Nobilis noster Patiens est, meo videri, Tympanitis, quæ species est Hydropis sicca; in qua flatus totam abdominis regionem tumentem facit: improprie autem dicitur Hydrops, quia nulla peccat aqua, sed tantum flatus. Definiri ergo potest, cum *Villisio*, abdominis tumor fixus, durus, constans, à pullatione sonitum reddens, à partium, & viscerum membranceorum inflatione ortus; cujus causam non flatum esse voluit citatus *Villisius*, sed oriri ex spiritibus animalibus spasmodico motu agitatiss, & in fibras abdominis copiâ nimiam redactis, ibidemque succi nervei obstruentis vitio à recessu impeditis, cui affectioni consequenter flatuum à locis vicinis aggestio velut complementum accedit: flatus autem ut plurimum inter Mesenterii, & Intestinarum tunicas stabulat propter calorem debilem: causam verò remotam accuso Hypochondriorum affectiones, quibus à duobus annis Patiens noster obnoxius fuit: accedit enim, docente *Joh. Forti*, ut quibus Ventriculi, & Hypochondriorum dolores fiunt, qui nec medicinis, nec aliter solvuntur, in siccum hydropem firmentur, undè hypochondriacus affectus, flatulentus à *Galeno* vocatur, & semper ructus, ac crepitus Ventris erumpit, borborygmi, & rugitus obmurmurant. Licet *Valdschmidius* velit Tympanitidem nunquam inveniri sine Ascite, quia nunquam flatus reperiuntur sine lymphâ, & sero, adeoque distensio in musculis abdominis est major, & ipsi magis rigescunt, quia magis distenduntur. Facies tamen in Tympanitide, ut in nostro Ægrotante, non valdè recedit à statu naturali, nec est tam exsucca, & deformis, ut in Ascite; sed respira-

piratio est difficilis, crebra, & anhelosa, quatenus Diaphragma in suo motu impeditur. Verùm quia Ægrotus noster est robustus, & abest febris, aderit spes salutis, quæ ut assequatur opus est recurrere ad Diætam, Pharmaciam, & Chirurgiam. Et ut ab hac postremâ exordiar, non est, quod de missione Sanguinis cogitemus, licet *Avicenna* in omni Hydrope illam concedat, quod tamen ego non approbo. Omnia igitur speranda sunt à Pharmaciâ; & primò expiandæ sunt primæ viæ aliquo leni medicamento, postea quovis mane exhiberi poterunt uncia duæ *Syrupi Ferneliani* cum uno cyatho vini albi generosi; mox ad *aquas Tetuccianas* deveniendum erit per septem dies incipiendo à lib. iv. & progrediendo usque ad lib. vij. cum vehiculo *Syrupi Aurei solutivi*. *Sal Absinthii*, *Syrupum de choreo cum Rhabarbaro Villisus* laudat: & observandum, spirituosâ, ac volatilia summoperè in Tympanitidis curatione valere. *Lixivium ex vino albo generoso, & cineribus Genistæ* expertus propono. Inter externa conveniunt frictiones, linimenta, fots, & balnea tum sicca, tum humida. *Pilulas de Gummi Ammoniaco Dolæus* laudat; alii *tincturam Martis*; *Elixir Proprietatis Paracelsi*, *emplastrum de baccis Lauri*, & *pueri urinam cum sale Prunellæ Harttmannus* extollit laudibus. Hinc observandum cum *Villisio* debere uti moderatè discutientibus, alioquin graviter lædunt; & *aquam Theriacalem* magni facit *Joh. Fortis*. Perforat abdomen ad flatu extrahendos *Franc. Sylvius de le Boë*, quod ad eruditionem sit dictum, non quod ego tale remedium approbem. Quod spectat ad Diætam ambiens frigidum damnatur, victusque sit calefaciens, attenuans, exsiccans, & medius inter crassum, ac tenuem: panis sit biscoctus, vinum sit paucum, ac antiquum; ambulatio non nocebit. Et hæc in casu præsentis sufficiant.

Eventus.

Univerfa ferè proposita auxilia incassum adhibita sunt; immò in singulos dies succrescente morbo, tandem post tres menses interiit.

CONSULTATIO CII.

De Anasarca.

A Bundè satis de morbo, quo detinetur Perilluſtris Patiens, in Consultatione Medici ſui ordinarii actum eſt, ita ut mihi nihil dicendum ſit, ſed tantum ſilentio confirmare quæ ab illo dicta fuêre; verùm quia interrogatus, ad Domesticorum ſatisfactionem reſpondere aliquid mihi convenit; idcirco pauca hæc ad confirmationem eorum, quæ dicta ab alio Medicinæ Celeberrimo Profeſſore ſunt, breviffimè exarabo. Ex quo igitur à multo tempore intumeſcentia univerſali detinetur Ægrotus noſter cum læſione actionum, ideò Leucophlegmaticus confirmatus Anaſarca laborat, qui morbus Hydropis ſpecies eſt, & definitur: intumeſcentia in toto corpore, veſtigium impreſſi digiti retinens, cum reſpiratione difficili, aliisſque ſymptomatibus Cachexiam comitantibus: *Amalth. Caſt. Brun.* Originem habet à ſucci nutritii, & lymphæ aquoſa impuritate excedente, & ſtagnante, & id tanquam à cauſa antecedenti provenit ab obſtructionibus viſcerum infimi ventris, ut Lienis, Hepatis, & Glandularum; non defæcatis enim humoribus, impuritates illæ emergunt, quæ velut cauſa materialis hanc Hydropis ſpeciem inducunt. Morbus iſte, quia confirmatus, difficilis eſt curationis; attamen quia melius eſt anceps remedium experiri, quam nullum, aliquid de ejus curatione exarabo. Sic indicationes erunt, concoctiones reſtituere, viſcerum obſtructiones tollere, impuritates aqueas abſumere, & evacuare, tonum viſceribus naturalem donare, ac corpus univerſum corroborare; quæ ut fiant ad tres Medicinæ fontes devenire convenit. Ex Chirurgia nihil prorſus aſſumendum puto, ne debilitatis viribus, ac depauperatis ſpiritibus vitalibus cauſa morbi cum majori vigore procedat cum Patientis detrimento. Pharmacia igitur conferet omnia, à quibus erit ſperanda ſalus; & ſic, quia audio, multa jam adhibita eſſe præſidia pharmaceutica; ideò nonnulla proponam ad Ægri noſtri levamen. *Pulverem Millepedum præparatorum* commendo quovis mane

mane jejuno stomacho assumendum cum jusculo aperitivo, in quo fuerit aliqua portio *Syrupi de Althæa Fernelii*, ad urinæ vias aperiendas, ut deoneretur ab ichore aqueo extravasato natura. In usu pariter esse poterunt *Pilulæ ex Ammoniaco*, & *Syrupus Cachecticus Fernelii*, sicuti *urina Puelli sani ad uncias quinque* quovis mane duabus horis ante cibum, cui additæ sint nonnullæ guttulæ *Elixiris Proprietatis Paracelsi*. *Sal Absinthii* commendatur à multis, & *Spiritus salis dulcis*; Clyster ex urina conflatus, & vinum in quo infusa sint sequentia, *radicis Ireos Florentinæ*, *radicum Salsæparillæ*, *Chinæ*, ana, *partes æquales*. Diæta tandem illa ipsa continuetur, quæ præscripta est à Doctiss. Dom. Medico suo Ordinario. Faxit. Deus &c.

Eventus.

Licet omni diligentia fuissent penè omnia prædicta remedia in usum ducta; tamen semper de malo in pejus ruebat Ægrotus; ita ut labentibus viribus, sudore frigido correptus, & pulsu penè deperdito, tandem interiit.

CONSULTATIO CIII.

De Ictero.

Quod Perillustris Dominus N. N. Civis Anconitanus annorum ætatis 52. detineatur Ictericitia flava non est difficile cognitu, quia oculo apertè color ejus cutis aureus apparet, qui morbus post dolorem ventris, ac febrem ortus fuit; de cujus affectûs curatione nunc meum petitur Consilium.

Est igitur hæc affectio Icterus, vel Ictericitia flava, quæ à multis dicitur morbus Regius, & est in toto ambitu corporis externo coloris nativi in flavum mutatio, proveniens à retentæ Bilis flavæ diffusionem facta ex obstructione vasorum ipsius Bilis. Pars igitur affecta est Jecur cum tota Sanguinis Massa, ac totius corporis cute. Istius porro morbi causa probabilis est obstructio facta in porulis glandularum Jecoris, una cum obstructione vasorum

Bilis, undè hæc Sanguini mixta, aliorum viscerum fermenta confurcat, & mediante circulo cruoris totum tingit cutem, & fœdum inducit colorem, quia verò Bilis necessaria est ad perficiendam primam concoctionem, hinc est quod hac deficiente, debita alimentorum attritio, Chyli dulcificatio, ac excrementorum præcipitatio non succedunt, undè inquinatus postea Chylosus succus, cruorem contaminat, & per consequens reliquos humores, ex quo oriri possunt febres, aliique majores morbi: Et Ego justè fateri possum ex longa, & contumaci Ictericitia ortum fuisse Hydropem in fœmina consistentis ætatis. Ad Prognosim quod concernit, dico, quia ista Ictericitia post febrem, ac dolorem accidit, & nunc est sine febre, de facili posse curari; docebat enim *Riverius* curatu faciliorem esse Ictericum ab obstructione, quam ab inflammatione, vel Hepatis Scirrho, quæ mala in nostro casu certè non sunt. Speret igitur Æger noster salutem, quæ citò administratis remediis præscribendis adveniet. Indicationes occurrunt tollendi obstructiones, juvandi Bilis motum ad Intestina, cruorem depurandi, & roborandi viscerum tonum, & fermenta; quibus satisfacere debemus recurrendo primò ad Pharmaciam; ad communes enim expiandas vias pro leniente usurpari poterit *Potio ex Cassia*, vel *Manna clarificata*. Clysteres etiam parati ex urina ad modum præscriptum à *Malpighio in Consult.* laudantur. Bibantur juscula alterata radicibus *Petroselinii*, *Asparagi*, & *Chalybe* cum *Sale Absinthii*, & insuper addi poterunt guttulæ aliquot *Spiritus Salis Ammoniaci*, & hoc ad plures dies manè jejuno stomacho. Post hoc uti poterit succis *Cichorei*, *Borraginis*; *Absinthii*, ana, ʒ. j. pro vice, quibus addi poterit bolus confectus ex *Croco Martis aperitivo*, & *Syrupo de duabus radicibus*; *Extractum Rhabarbari* proderit, sicuti comestio quotidiana pugilli unius *Absinthii*. *Syrupum Marrubii* commendant multi; Ego verò nunquam tale remedium expertus fui. *Urinam pueri sani* ad uncias iiij. epotam mane, Ventriculo jejuno, adversus Ictericum plurimùm valere legi apud *Th. Burnetum Thesaur. Med. Pract.* Si pertinaciter hic affectus perduraret, & proposita eluderet remedia, tunc confugerem ad pulverem sequentem diutius assumendum; scilicet ʒ. Rhei optimi, ʒ. j. Albi græci, ʒ. ij. *Lumbricorum terrestrium siccatorum*, ʒ. ʒ. *Specierum Diarrhodon.* ʒ. j. ʒ.

j. s. Cinnamomi electi, ʒ. ij. Sacchari fini, ʒ. ij. Misce, fiat Pulvis S. A. : dosis sit ʒ. j. Sequentes porrò tabellæ utiles erunt. R. Salis Absinthii, Cardui Benedicti, Antimonii Diaphoretici, Cornu Cervi usti, Oculorum Cancræ præparatorum, ana, partes æquales. Misce fiat Pulvis, irroretur Spiritu Salis Ammoniaci Q. S. inde cum Saccharo, & aqua Cichorei Q. S. fiat S. A. rotulæ assumendæ interdium. Ex Chirurgia nihil; dum tamen febris absit; si verò febres oriantur, tunc licebit Venam secare, ad mitigandam cruoris effervescentiam. Ad Diætam demum quod attinet, cum cibo Æger utatur rasura Eboris, & cibaria Croco, & Cinnamomo condita sint, sicuti juscula, & carnes Sale Absinthii. Chalybs, & coma Absinthii communis seu Romani infundantur vino; & si febris accidat, tunc utendum erit aquâ alteratâ Chalybe, vel extinctione lapidum, quibus ignis elicitur, in qua tamen prius bullierint Liquiritia, & Fragaria. Cibus sit facilis coctionis, attenuans; abstineat ab austerris, ac acidis; læto stet animo, & salutem optatam speret, ac pro certa habeat. Pauca ista scribebam pro salute Perillustri nostri Ægrotantis in confirmationem omnium eorum, quæ dicta, & facta, ac facienda sunt à Sapientissimo ejus Clinico, cujus prudentiæ me totum remitto. Faxit Deus &c.

Eventus.

Nonnulla ex præscriptis remediis fuere adhibita, & Æger noster melius se habere incepit, & sensibiliter meliorem accipere colorem, tandemque sequuta Diarrhœa quatuor dierum spatio perdurante omninò sanitari restitutus, nuncque sanus æterno favente Numine vivit.

CONSULTATIO CIV.

De Lienis Tumore.

Laborat Civis noster Ferrariensis intumescentiâ Lienis cum levi tumore non admodum duro, hoc enim dignoscitur ratione gravitatis in sinistro Hypochondrio cum dolore gravativo, præsertim à longa ambulatione, & colore faciei livido. Pars igitur affecta est Lien, quatenus obstructione laborans præsentem affectionem parit; quæ ideò accidit, quia cruor ab arteria propulsus in Splenis Cellulis stagnans, amissa fluiditate, faciliter non reponitur per Venam Splenicam, sed ibi morando molem ejus visceris auget, membranas Cellulas distendendo, & idcirco involucria continentia reddit tensa, ac elevata; Sistitur autem faciliter Sanguis in Liene magis, quam in aliis visceribus, per hoc, quod Lien constat carneis fibris, & lacertis, sicuti in auriculis cordis, ut receptus cruor à loco laxiore extrusus, & in arctam Venam Splenicam expressus, suum iter de facili progrediatur: Etenim docebat *Malpighius*, impulsus ab arteria communicatum Sanguini in lato sinu recepto, extinguere; undè necessarius est novus motus expressivus ope fibrarum celebratus, & quasi cordis additamentum, ut circularis motus perpetuetur. Tonicus igitur motus lacertorum in casu nostro impeditur, propria vitiata structura ob copiam ichoris imbibiti, sicque Sanguis non exprimitur, undè fixatio, ac intumescencia oritur; idemque maximè accidit immutatâ Sanguinis naturâ; deficientibus enim volatilibus particulis, & luxuriantibus ichoribus acidis, ex mora partes sibi intimè hærentes fluiditate orbantur, & sic in ipsis cellulis ejusdem Lienis intumescenciam pariunt. Visâ causâ, ad Prognosim gradum faciamus. Dico igitur, debere, citius ac fieri possit, curationem institui; si enim pertinax fieret hæc affectio, periculum esset, ne progressu temporis in Scirrhum degeneraret, solet enim obstructio Lienis prodromus esse Cachexiæ, Ictericæ nigræ, & Hydropis; hinc aiebat *Hippocrates*, obstructiones Lienis periculo non vacare; immò advertit *Joh. Fortis*; hunc mor-

morbum semper longum esse, nisi fortè superveniat Dysenteria, qua Splenici liberantur, quemadmodum innuit *Hippocrates in Epidem.* Medicæ porrò indicationes sunt, tollere vitium humorum, deobstruere Lienis cellulas, facilitare motum ipsis cruoris, & partem ipsam affectam corroborare. Curatio igitur instituat per tres consuetos Medicinæ fontes: & ut exordiar à Chirurgia, nullam nisi unicam tantum, & levem instituerem Vênæ sectionem, neque eam repeterem nisi in casu inflammationis ejusdem visceris affecti, vel febris alicujus vehementis, quæ succederet uti observavi nupeprimè in quodam Lienoso, cui derepente ardens febris successit, à qua occisus fuit parvo temporis spatio. Ex Pharmacia primò leniens medicamen blandum exhibeatur, verbi gratiâ, *Oleum Amygdalarum dulcium recenter expressum*, vel *Pillulæ Gellii*, vel *Cassia* ipsa; inde uti poterit *jusculo* in quo bullierint *radices Graminis, Asparagi, & folia Absinthii*, ac *Chalybe*, unâ cum bolo antecedenti conflato ex *sale Tamarisci, Croco Martis aperienti, & Tartaro Vitriolato cum Syrupo de duabus radicibus* ad conficiendum S. A. bolum auratum sumendum quovis mane jejuno stomacho per XII. dies. Postea per multos dies utendum erit remedio urinam movente, suadente *Celso*, videlicet *Therebentina lota in aqua Malvæ 3. ss. cum gran. vij. salis Ammoniaci, & tantundem Tartari Vitriolati* ad conficiendum bolum auratum S. A. quovis manè assumendum jejuno Stomacho, superbibendo jusculum alteratum *foliis Malvæ, Capillorum Veneris, & quatuor Radicibus aperientibus*. Externè proderit *oleum Capparidis*, vel *unguentum de Bryonia*, aut *emplastrum de Cicuta*, vel *ceratum de Ammoniaco aceto dissoluto*. Victus ratio sit attenuans; acetaria omnia commendat *Joh. Fortis*. Capparum usu mulierem sanatam à Lienis tumore ait *Forestus*. *Aqua Fabrorum* utilis solet esse. Vinum sit Chalybeatum; Somnus meridianus fugiatur; Motus, & exercitatio juvabit; alvus sit lubrica, absit tristitia, & inæror, & hilariter vivat: quæ omnia administrata à prudente ejus Clinico, finem optatum in nostro Cive consequi poterunt.

Eventus.

Multa ex propositis remediis summo studio, ac diligentia adhibita

bita fuerunt, & accedente aëris mutatione, Venetias enim petiit Civis noster, ubi per plures menses moratus perfectè convaluit; nunc reversus in Patriam sanus vivit.

CONSULTATIO CV.

De Scirrhuso Lienis Tumore.

Mercator quidam ad me confugit conquerens de Lienis Tumore, quem multo tempore gestat, ipsumque non exiguae molis, & durum manu mea deprehendi, undè Tumescencia Scirrhusa judicata fuit; pro qua curanda sic loquor.

Certum est Scirrhum hunc esse Lienis Tumorem durum, indolentem, in illius visceris glandulis obortum, proveniente à succi lymphatici atrabilaris acido-austeri subsidentia, & collectione; undè liquet essentia, & causa morbi. Cum enim Sanguis per arteriam Splenicam in Lienis cellulas perpetuò eructetur; ibique alterationem, ut verbis utar *Clariss. Malpighii*, & fortè attritionem recipiat ab effuso à propriis glandulis lienari succo, ut refluus in Jecur, & inde in universum corpus, bilis, & reliquorum fermentorum separationem nbn parùm adjuvet. Labefactato igitur Lienis fermento, & ejusdem motu interceptis ichoribus sanguis stagnat, & hujus visceris spatia distendit. Morbus iste periculo non vacat, quia ad Hydropem viam sternit, & Cachexiam inducit. Indicationes porro in tali affectu curando sunt, tollere coagulationem jam factam, emolliendo, & attenuando, & viscera corroborando. Pro quibus implendis, à levi corporis communi expiatione incipiendum est, primò *Syrupo Magistrali Solutivo*; inde pro alterantibus utendum jusculis *Chalybe* alteratis, & foliis *Fumariæ*, *Malvæ*, & *Syrupo de V. radicibus*, addito modico *Salis Prunellæ*. *Succi depurati Cichorei*, & *Absinthii Romani* laudantur à *Malpighio*. *Syrupum de Althæa Fernelii* commendat *Joh. Fortis*. Ego pilulas de *Ammoniaco Quercetani* feliciter expertus sum. Ex Chirurgia unicam tantum venæ sectionem in manu sinistra proponerem. *Emplastrum de Cicuta* externæ parti applicitum commendarem, sicuti *unguentum de Bryonia*:

nia: Ceratum pro Splene, nec non salia sequentia inernè adhibeantur: & *Salis Tartari*, *Absinthii*, *Ceterach*; & alia hujusmodi. Ulteriùs victus ratio sit congrua, vitet carnes suillas, leporinas, & anseres, pisces cænosos, brassicas, legumina: vinum alteretur Chalybe, & summitatibus Absinthii pontici, & juscula ipsa sale Absinthii condiantur: uno verbo sint facilis coctionis, id est, pullo- rum, hædorum, vituli, & similium. Abstineat Æger noster ab acidis, & austeris; hæc enim morbum augere possunt. Motum localem laudo, & ipsi salutem opto.

CONSULTATIO CVI.

De Lienis Scirrho.

UT accepi ex Epistola elegantissima Excellentiss. D. Medici Ordinarii, facile liquet conjectari naturam morbi, quo detinetur Reverendus Ægrotans, Scirrho scilicet Lienis; insignis enim hujus Visceris tumor adest, durus, & indolens, cum manifesta actionum læsione, adeò ut timeat Æger, ne in pessimum incidat Hydropem, quod sanè timendum. Ast quia meum consilium requiritur, idcirco pauca hæc exaravi.

Cùm per se manifesta sit hæc affectio, ideò non immorabor in idea morbi investiganda, solummodò autem in ejus generatione nonnulla differam, ut ita melius Consultationis methodus servetur. Ex fixato igitur, ac coagulato sanguine in cellulis Splenis, hanc ortam fuisse affectionem assero; cùm enim indefinenter cruor per arteriam Splenicam in cellulas ipsius Lienis transmittatur, & ibi alterationem, seu attritionem quandam, teste *Malpighio*, recipiat à glandularum Lienarium succo; undè refluus Sanguis in Jecur, & exinde in corpus universum, fellis, & aliorum corporis humani fermentorum separationem non parùm adjuvet; hinc est, ut in nostro casu, labefactato Splenis succo, & ejus tonico motu retardato, Sanguis non tam facili extra demittitur, unde restagnat, atque distendit interstitia partis, sicque impedita transcolatione totum compatitur corpus, & præsertim durus habetur, contumax, ac

indolens Lienis tumor, qui à Medicis Scirrhus vocatur. Antequam autem indicationes examinemus, aliquid circa Prognosim addere mihi liceat, cum hæc sit illa Consultationis pars magis grata desiderio Ægroti, & Consanguineorum. Dico igitur meo consueto candore, & naturali loquendi libertate, prout Medicis convenit, cum Galeno, Scirrhum insensibilem curationem non recipere, & maximè quando est inveteratus, tunc enim periculum est, ne in Hydropem incidat Æger, ut etiam timuit Riverius; ideòque affectum hunc valdè timendum esse pnto, de raro enim sanatos tales vidi Ægrotos. Pro tollendo autem morbo, indicationes curativæ erunt, tollere coagulationem, & congestionem humorum in Liene jam factam, ideòque emollire, ac attenuare conveniet, sanguineam massam edulcorare, ac viscus affectum, nempe Lienem, corroborare atque firmare; quæ ut assequantur, ad consuetos Practicæ Medicinæ fontes devenire oportet; & ut à Pharmaciâ incipiam, primò sumenda levis corporis expurgatio, quæ haberi poterit *simplici uncia florum Cassiæ cum modico Cremoris Tartari* ad bolos conficiendos, superbibendo *jusculum Pulli chalybeatum*, & tepidum; vel si bolos respuat, *potio Magistralis Solutiva* substituatur; inde per multos dies usurpari poterunt aperitiva, ut *Pilulæ de Ammoniaco aceto soluto*, superbibendo *jusculum* in quo bullierint *radices Aspargi, Fœniculi, & Petroselini*, additis aliquot guttulis *tincturæ Martis*, & modico *syrupo de quinque Radicibus aperitivis*, & *Sale Prunellæ*. Sequens opiata laudatur à Riverio, cujus cochleare unum ante cœnam poterit assumi. R. *Gummi Ammoniaci, Opoponacis, & Bdellii, ana, 3. ij.* dissolvantur in vino albo, colentur, & coquantur; deinde adde *confectionis Hamech, & Diaphœnici, ana, 3. ij. pilularum fœrid., 3. j. 8.* Misce, fiat opiata, cui addantur *viginti grana Mercurii dulcis*, & tandem cum *conservæ Absinthii, unc. v.* misceatur. Sunt aliqui, qui usum *succorum Cichorei, Absinthii*, & aliarum herbarum commendant; verum quia modò sumus in Autumno tale remedium non approbo. Externè proderit *Emplastrum de Cicuta, & Nicotiana unâ cum spiritu D. Geylfsii* secundum descriptionem factam à *Waldschmidio*, quæ talis est. ʒ *Spiritus Granorum Juniperi, lib. ij. Nasturtii contusi, man. iiij.* infunde die, ac nocte; inde des-

tilla

tilla; Spiritui destillato infunderadicum *Consolidæ majoris*, part. ij. *Scrophulariæ*, part. j., & *tertia vice destilla*. Unguentum nostrum ab *Amato Lusitano* laudatum usurpari poterit, quod sic paratur. ʒ Olei *Communis*, lib. iij., *Medullæ Crurum Bovis*, lib. j., *Butyri recentis* ʒ. vj., *Succi Bryoniæ*, & *Cyclaminis*, ana, lib. j: bulliant omnia simul lento igne ferè ad consumptionem succorum; colaturæ adde *Ceræ citrinæ*, ʒ. vij. *Ceterach*, *Corticum Capparidis*, *Tamarisci*, *seminis Agni Casti*, ana, ʒ. iij. *Misce fiat S. A.* Unguentum. Apponi etiam utiliter poterit Ceratum pro Splene in penè omnibus Antidotariis descriptum. E Chirurgia, nisi fortè febris accederet, nihil sumendum puto. Venæ sectio enim in Scirrhis affectibus potius nocet, quam prodest, quatenus educit Sanguinem bonum, ac tenuem, causam verò morbi in affecta parte relinquit. Ad Diætam denique quod attinet; cibi sint facilis coctionis, sic *Pulli*, *Vituli caro*, *Columbi*, & similium animalium optimi erit usus. Vitentur Anates, Pavones, Pisces, & *Suilla caro*: obstineat Æger noster ab acidis, & austerris; à studio, & curis; ac motu locali utatur, valdè enim prodest ad tollendas obstructions omnes. Pauca verò hæc currenti calamo scribebam, quæ ut cedant in levamen Patientis enixè Deum rogo, sine cujus auxilio nihil.

Eventus.

Omnia supradicta remedia diligentissimè usurpata fuere præter alia etiam ab aliis Medicis proposita; verum incassum omnia, nam semper in pejus ruebat Ægrotans, tandemque in Hydropem incidit, quo confirmato, ultimum clausit diem, vitam cum morte commutando.

CONSULTATIO CVII.

De Affectione Hypochondriaca.

A Deò doctè, ac exactè casum Nobilissimi Viri, literis tuis ad me datis exarasti, Excellentissime Domine, ut apertissimè colligatur, eum laborare Hypochondriacâ Affectione cum nonnullis obstructionibus in visceribus infimi ventris: Ventris enim adsunt distensiones, & anxietates, Hypochondriorum rugitus, frequens vomitus, & sputio, timor adest morbi majoris, metus sine causa, & præsertim salutis, tremor, & animi consternatio, cum obstructionibus in Abdomine, & aliquando cum febre: Quia verò postulas meam de hoc affectu audire sententiam, ideò sequens Consilium tibi festinanter trado.

Hujus morbi, jam ex signis prædictis, patet idea; est enim Hypochondriacus Affectus, variis stipatus symptomatibus; enervato quippe tono Ventriculi ut cum *Clariss. Malpighio* loquar, mutatisque fermentis à glandulis Oris, Ventriculi, ac Intestinorum eructatis, primæ coctiones vitiantur, cujus errata non emendantur in sequentibus, undè vitiato chylo, sanguis pariter, lympa, alii- que humores contaminantur, ex quo prava nutritio, obstructiones glandularum, febres, anxietates, vomitus, flatusque oriuntur; & quia ex prædictis conspurcata est massa sanguinis, idcirco sæpè ejusdem immodica fermentatio, quæ formaliter febris est, accenditur. Pars itaque affecta Ventriculus est, ut antiquitus voluit *Diocles*, & recenter *Highmorus*, quippe ingesti cibi debito calore foveri, fermento comminui, & ad Intestina propelli vix possunt ob fibrarum nimiam debilitatem. Prognosim quod concernit dico, hunc morbum difficilis esse curationis, & *Clariss. Mangetus in Biblioth. Medic.* scripsit: *Ab Hypochondriacis libera nos Domine.* Speranda tamen hujus affectionis, utpotè non inveteratæ, salus, si Patiens Medicis præceptis obtemperabit, nec liberiori vivendi norma morbum fovebit. Tentanda igitur curatio à nobis erit, ad quam rectè instituendam prius indicationes erunt.

erunt considerandæ, quæ, meo videri, sunt, evacuare materias in Ventriculo peccantes, viscerum tollere obstructions, fibras corroborare, glandulas ad statum naturalem reducere, ac Ventriculum ipsum firmare; quæ ut habeantur materiam Medicam suggerent usitati illi fontes, Chirurgicus nempe, Pharmaceuticus, ac Diæteticus; ex quorum primo, nisi forte Patiens noster esset plethoricus, aut calor, & febris vehementer urgeret, Venæ sectio vix locum habebit; pro hac verò poterit usum Hirudinum sedalibus venis Medicus assistens experiri, quod remedii genus optimum esse multi Medicorum asseverant; de Frictionibus, ac Fonticulis nihil; Clysteres si alvus adstricta fuerit adhibeantur. Pharmaceuticus fons primò exhibebit mite aliquod lenitivum, puta *Oleum Amygdalarum dulcium sine igne*, vel *Cassia*, vel *Manna*, aut *Electuarium lenitivum cum modico Cremoris Tartari*, & hoc ad Ventriculum deonerandum ab illis recrementis, quæ primam concoctionem vitiant: Indè præstabit usus *succorum Endiviæ, Borraginis* ad plures dies ad uncias tres quovis mane, superbibendo jusculum pullorum, in quo bullierint *folia Borraginis, Cichorei, Petroselini*, & *modicum Rhabarbari*. Abstinentum autem erit à Saccharatis, ac Mellitis, sicut & à valde acidis, cum illa inflent viscera, humorum fermentationem majorem inducant, atque fermenta semper majus conspurcent, & glandulas infarciant, cujus opinionis quoque fuit *Joh. Fortis Cent. 3. cons. 7.* Utiles erunt *Pulveres Cremoris Tartari Vitriolati, Antimonii Diaphoretici, ac croci Martis aperitivi* propriis dosibus exhibiti, ut verbi gratia, scrup. ij. pro vice. *Serum Caprinum* depuratum commendo cum *pulvere Oculorum Cancri præparatorum* ad plures dies mane jejuno stomacho ad unc. VIII. respectu feri, & 3. j. respectu pulveris. *Tinctura Martis* bonum præstabit effectum sicuti etiam *Specificum stomachicum Poterii*. Externè proderit *Oleum de Absinthio, & de Mentha* regioni Ventriculi applicitum. Vinum medicetur *Chalybe, & Absinthio*, cujus sale juscula, & carnes condiantur; cæterum victus ratio rectè instituenda erit à te, *Excellentiss. Vir*, cujus prudentiæ me remitto; hoc tantum monendo, condituram, & varietatem ciborum esse vitandam; laudo tamen localem motum, ut sic facilius transpiratio excitetur, quæ summoperè proderit, & ut etiam bona digestio per-

ficiatur, quæ tantoperè in hac affectione est necessaria. Et hæc sunt, quæ currenti calamo ad salutem Nobilissimi Viri scribebam. Faxit Deus &c.

Eventus.

Fuerunt penè omnia proposita remedia summa vigilantia, atque diligentia Excellent. D. Curantis adhibita; imò balneum aquæ currentis per plures dies administratum, sicque demum accedente aëris mutatione post longum tempus pristinam recuperavit Ægrotus noster sanitatem.

CONSULTATIO CVIII.

De Affectione Hypochondriaca.

VExatur Nobilis Patiens, ut ex his, quæ non minus eleganter, quàm eruditè scripsit Dominatio tua Excellentissima, cognoscere potui, Hypochondriacâ Affectione; timor enim adest, mœstia insolita, fuscus faciei color, & tensio in Hypochondrio dextro, cum metu mortis, tanquam si ad Inferos Æger fuisset cœnaturus; modò se Pleuriticum putat, modò febricitare se judicat; nunc pertinaciter alimenta ipsa respuit, nunc edulia etsi nociva postulat; nunc alget, nunc uritur, nunc luges, modò ridet; omnia signa Hypochondriacæ Affectionis, super quam Ægritudinem quod sentio liberè, & ut meum est, exponam.

In primis igitur hæc Affectio morbus est complicatus dependens ut plurimùm ex vitio imaginationis, & obstructione glandularum, & vasculorum in Hypochondriis, cum copiosa flatulentia, murmure, ructibus, spuitione frequenti, ex quibus colligitur fermenta primarum viarum esse vitiosa, & cruorem, ac succum nervorum impuritate laborare; sequitur delirium leve, quatenus spiritus animales non lucidi, & agiles, sed tenebrosi, ac tardi producantur: accedit quod inquinatus succus nerveus, ut verbis

utar

utur *Cl. Malpighii* scatens acidis salibus, non omnimoda volatilitate gaudet, ex quo supradicta symptomata oriuntur; acida porro inquinamenta, & mediante chylo cruori communicata, & per arterias corticalibus glandulis subministrata, earum porulos plus justo aperientia essentialem in ipsis labem constituunt. Ante Indicationes Prognosim videamus, & quid sperandum, vel timendum de hac Melancholica Affectione dicamus. *Joh. Fortis in suis Consultat.* ait Melancholicos facili negotio fieri Epilepticos, & Ego illos faciliter Maniacos evadere posse puto. *Clariss.* tamen *Franc. Redi in 4. tomo suorum operum pag. 306.* loquendo de Hypochondriaca, sic ait: *lasci imperversar quanto sa, non le dia retta, ei non può mica ammazzarla; non l, ha ammazzata sin'ora, non lo farà nè anco per l'auvenire; si diffenda col corraggio, & emendi la fantasia &c.* *Dolaus* autem chronicum morbum esse Melancholiam ait, & curatu difficilem, & meritò vocari flagellum, & opprobium Medicorum. Medicæ Indicationes sunt depurare humores ab acidis salibus, tollere irritamenta in Cerebro, spiritus animales lucidos reddere, & viscera corroborare: Quæ ut assequantur, & curatio ritè instituat; primò lenienda est alvus *Syrupo Aureo solutivo*, vel *floribus Cassiæ*; & fugiendum à Catharticis, quia hæc magis lædunt, quam prosint. Clysteres emollientes usurpandi erunt, quatenus isti (sunt verba *Clariss. Redi*) spazzano la Stalla, senza scomporre la culina. Usus succorum depuratorum *Endiviæ, Cichorei, Fumariæ* & similium quovis mane ad dies decem commendo, quibus addatur *Tinctura Martis*. *Serum Caprinum* depuratum, ad mensem multæ erit utilitatis. De Venæ sectione nihil. *Vinum* alteretur infusione *Chalybis*. *Potus Thee* utilis erit. Frictiones ad totum corpus utiles erunt, suadente *Malpighio*. Usus lactis *Asinini* cum modico *Sacchari* pulverisati quovis mane ad mensem commendo, expertus in variis tali morbo affectis; ut & balneum aquæ dulcis, & præsertim in nostro Pado diebus canicularibus, quando sol assas coquit messes juxta *Martialem*. Vacet à curis, & studio. Victus ratio sit illa proposita à Dom. tua Excellentissima quam approbo, sicuti localem motum, & aëris mutationem. Quæ pauca sint à me dicta ad confirma-

tionem omnium, quæ eruditè in tua epistola exarasti : tibi que me, & meum submitto consilium.

Eventus.

Ex parte proposita auxilia administrata fuerunt, & præsertim lac, & balneum, quibus factis Venetias profectus, & illac jucundè, & hilariter cum fociis genialibus vivens, omninò pristinæ sanitati restitutus fuit.

CONSULTATIO CIX.

De Flatu Dolorifico.

Reverendus Sacerdos, ætatis annorum LVII. temperie phlegmatico-melancholica præditus, sæpè conqueritur de anxietate, cordis palpitatione, aliqua vertigine, cum dolore in Abdomine vago, ac cruciatu in tibiâ dextrâ per semihoram, inde hic ascendit ad dorsum prorependo, mox transit in brachium, nunc in humerò affligit, & hinc inde velut de loco in locum sedem mutat; cibi adest fastidium, alvus tarda. Auxilium petit.

Benè consideratis signis, quæ in historiâ referuntur, conjicitur morbum hunc esse flatulentum affectum, & definiri potest: inflatio cum dolore orta à vaporibus extravasatis in partibus corporis oberrantibus; unde patet esse congeriem halituum vel vaporum veluti quadam membrana inclusorum, modò in una, modò in alia corporis parte infestantium, ut in nostro hoc casu; & producit, dum alimenta in visceribus subacta, & digesta a fermentis, & calore ipsorum dissolvuntur, effluvia inde quam plurima eleventur, quæ si spatium liberum obtinerent, in auras evanescerent; verum, ut ait *Villisius*, ea in membranâ conclusa, & simul aggesta, vaporum congeriem, quasi ventum, constituunt, unde hac illac flatus evagatur, ac varias corporis partes cruciat; quare ponitur hic morbus in classe solutionis continui. Quoad
signa

signa Prognostica, quia sumus in casu, in quo morbus altas nondum egit radices, & non est ætas in gravi senectute posita, ideò spes apparet salutis. Quapropter præsidia ex triplici auxiliorum penu depromantur, nempe Chirurgico, Diætetico, ac Pharmaceutico; & ut ab isto exordiar, debent desumi remedia causam morbi debellantia, ut sunt humores vitiosos evacuantia, obstructions referantia, vapores, & flatus discutientia, & vires restaurantia. Ad alvum exonerandam, & primas vias detergendas bonum erit exhibere *portionis Magistralis solutivæ*, ℥. vj. addendo in *infusione Rhabarbari electi*, ℥. j. Pro alterantibus utendum erit *decocto Fumariæ, Petroselini, & Betonicæ cum radicibus Asparagi, Graminis, Fœniculi*, additis *seminibus Citri contusis*, & aliquot guttulis *Elixiris Proprietatis Paracelsi*. Si Alvus ritè non respondeat Clysteres in usum ducendi, & præsertim carminativi, ac discutientes: poterit etiam uti sequenti aqua cujus cochlearia frequenter sumenda & *Aquæ Melissæ, Totius Citri, ana*, ℥. v., *aquæ Cinnamomi*, ℥. ij. *Spiritus Chalcanthi*, ℥. j., *Syrupi de Corticibus Citri*, quantum satis ad gratum saporem. *Species Diamargariti, & rotulæ Diarrhodon Abbatis* utiles erunt. Partes affectæ inungi poterunt oleo *Absinthii, & Laurino*. Chirurgia nihil, meo videri, præstare poterit, cum non videam, quid ex Venæ sectionis usu in casu nostro sperari possit; idemque dicendum de aliis Chirurgicis operationibus. His omnibus accedat vivendi ratio accommodata, adversa ipsi morbo, & causæ morbificæ; & ita Deo favente, melius in dies se habebit, ut spero.

Eventus.

Optima vivendi ratione servata, & omnibus præscriptis remediis exactè admotis XXX. dierum spatio convaluit; nunc mutato Cœlo sanus vivit, & Deo benedicit.

CONSULTATIO CX.

De Nostalgia.

Adolescens Neapolitanus, postquam Ferrariam delatus fuit à suis Parentibus, tristitia penè assidua correptus, morbo sequenti afficitur; tentatur enim magna præcordiorum anxietate, nunc cum frigore, modò cum præternaturali calore, & dejecta appetentia, cum frequenti vigilia, ac virium deperditione. Ego in auxilium vocatus, Patientem gementem invenio, & de magna cordis anxietate dolentem, non sine febre: Peto à Parentibus causam: isti desiderare ipsum Patriam suam respondent; sæpè interrogatum de amicis, atque Virgine amata, suspiria profundere, & summo de iisdem desiderio teneri; & hæc omnia cum læsione actionum.

Morbus hic à celeberrimis *Hardero*, & *Valentino Nostalgia* *Nostalgia* nuncupatur; hæc enim symptomata oriuntur à desiderio redeundi in Patriam. Nostalgia siquidem definitur, intensus præcordiorum dolor cum marcore, debilitate, & summo in patriam redeundi desiderio, cum febre à turbulento motu spirituum, plexuumque nervosorum tensione proveniens cum actionum læsione. Subjectum istius morbi, seu pars affecta est ipsum Cerebrum, & præsertim albi corporum striatorum tractus, & tubuli centri ovalis, non sine ore Ventriculi ratione nervorum; ex quo Nostalgiam speciem esse Cardialgiæ volunt nonnulli; in hoc enim morbo insigniter affici os Ventriculi apparet, undè anxietates præcordiorum, & prostratio appetitus oriuntur; fit enim in hoc affectu magnus spirituum tumultus in cerebro, & pyloro, unde insequitur Spasmodia immanis, quæ in illa anxietate præsentitur. Causa proxima est turbulentus animalium spirituum motus, & tensio plexuum nerveorum Stomachi; chylicatio autem minus perfectè peracta ob assiduam meditationem loco chyli laudabilis, humores acidos, & viscidos exhibuit, qui non tantum febrem, sed vellendo nervosos plexus causam materiale constituant, ex qua omnes

nes emergunt nostri affectus passiones, & omnia enarrata in casu symptomata: Elapsæ autem cruditates in primis viis, & intestina, & plexum mesenterii magnum, & fibrarum crispaturam vellicando, horripilationem, & frigus producant; per Meseraïca porro vasa, & ipsum quoque Thoracicum ductum, in Sanguinem delatæ ipsæ crudæ materiæ, ob particularum inæqualitatem motum præternaturalem, & per consequens febrem producant, quia teste *Michaele Bernardo Valentini in Nosocom. Academ.*, id quod in prima coctione non legitimè fit, neque in secunda, neque in tertia corrigitur. Quod jam Prognosim concernit, morbus iste, nec magni faciendus quidem, sed nec risu excipiendus; multi enim, ut ex historiis habetur, denegato in Patriam reditu, lethales affectus contraxere: Curandus ergo quam citò est hic Æger, antequam morbus magis progrediatur. Indicationes autem erunt spirituum animalium motum perturbatum emendare; tollere humores præternaturales in primis viis genitos, ac vitiosè stabulantes, undè & febribus, & molestioribus symptomatibus occurratur, quibus ut satisfaciamus ad Pharmaciam, Chirurgiam, ac Diætam deveniendum: è quarum prima leniens medicamentum desumi poterit ad communes expurgandas vias à vitiosa materia ibi stagnante, atque concoctiones vitianti; nihil autem refert, si hoc fuerit, *Manna*, vel *Cassia*, *Oleum Amygdalarum dulcium*, vel simplex *Cremoris Tartari Pulvis* ad unc. unam sumendus in aqua *Borraginis* mane jejuno stomacho: indè pro alterantibus, ac refrigerantibus uti poterit Æger noster *jusculis Caponum*, in quibus bullierint *folia Cichorei*, *Endiviæ*, *Malvæ*, *Acetosæ*, & *Borraginis*, additis guttulis aliquot *Spiritus Salis Ammoniaci*, & hoc ad plures dies: *pulveres* etiam *oculorum Cancris præparatorum* utiles erunt, ut & *Antimonium diaphoreticum*, & *Confectio de Hyacintho sine Moscho*. Ad vigilias nimias tollendas juvabunt *Emulsiones Papaverinæ*: Usus *seri Vaccini destillati cum Cichoreaceis* multum posse prodesse sum arbitratus. Ex Chirurgia sumantur Clysteres ex lacte, & saccharo rubro confecti ad alvum sollicitandam: utilis erit Phlebotomia in brachio lævo; atque hirudines sedalibus venis appositæ aliquid levaminis esse poterunt: Frictiones, atque cucurbitulæ scarificatæ, quatenus morbus pertinaciter sequatur, adhibendæ sunt cum spe boni eventus,

tus. Diæta demum sit tenuis, cibi sint boni succi, & facilis coctionis; abstinence à vino, & potus sit aqua Nucerina; Corpus, si vires ferant, blandis exerceatur deambulationibus, & lætis confabulationibus Æger detineatur; immò si poterit ad patrios lares remittatur; Patriæ enim, Amicorum, & amatæ Virginis restitutio erit certa salus nostri Patientis; dummodò tamen vires permittant itineris labores: Atque hæc omnia à me ruditer exarata Medici præsentis prudentiæ remitto.

Eventus.

Nonnulla ex propositis remediis fuere adhibita, febre remittente, & symptomatum acutie mitigata ad Patriam reversus, citò convaluit.

C O N S U L T A T I O C X I .

De Scorbuto.

ARdua sanè provincia est, ac difficultatibus involuta distincta cognitio, atque perfecta curatio morbi, quo afficitur Nobilis Vir annorum ætatis 49.: Hic enim, ut audio, ab Excellentiss. Medico, pravo victu utens, de obtuso Hypochondrii dolore conqueritur, succedente totius corporis lassitudine ferè spontanea; accedunt Odontalgia, dolor capitis, & cutis coloris mutatio ad atrum, & fuscum, hinc Dentes vacillant, Gingivæ sanguinem fundunt; imò ipsæ in parte putredinosæ, ac ulceratæ apparent: Ptyalismus penè continuus cum ructu, ac crurum, & pedum intumescencia: Pulsus est parvus, & inæqualis, respiratio non perennis, & facilis: Tussis frequens cum excretionem viscidæ, ac tenacis materiæ odoris ingrati: Maculæ lividæ huc illuc dispersæ in ambitu corporis conspiciuntur: Prostratio appetitus, Lypothymia frequens, & incipiens Atrophia; omnia hæc constituunt compositum morbi, quo afficitur Nobilis noster Pater, pro cuius salute meum optatur Consilium.

Cum

Cùm verò nominis disquisitione, juxta *divinum Platonem*, sit doctrinæ principium, ideò nomen affectionis hujus prius examinare conveniet, antequam ad causam, prognosim, & curationem deveniamus, ut certa methodo procedamus. Hunc morbum Scorbutum dici pro certo habeo, quem novam esse affectionem nonnulli Medicorum tradunt; licet Ego Scorbutum etiam *Hippocrati* innotuisse credam, cujus sub nomine *magni lienis* meminit; nec ab affectu procul abfuit morbus ille, qui in exercitu Romano, cui pro Cæsare Augusto præerat *Ælius Gallus*, in Arabiam tunc temporis grassabatur, quem *Strabo in Geograph. lib. 6. describit*. Morbus iste Septentrionalis dicitur, quia Populis, & Maris Baltici accolis familiaris, & ferè Endemius; at nunc adeo latè se diffundit, ut apud nos Italos etiam non infrequenter appareat: Describitur autem quod sit congeries plurium symptomatum omnis generis, proveniens à morbo complicato cum obstructione viscerum, vasorum, & glandularum, & vitio humorum. *Amalth. Cast. Brun.* Morbum hunc contagiosum esse apertè liquet, cùm è parentibus aliquandò liberis tradatur cum semine, ac lacte; tacitè quoque serpit ejus insidiosum virus, vel medio poculorum, lecti, sudoris, salivæ, & contactûs; aliquandò verò ex vitio viscerum, & humorum oriri potest ex intrinseco, ut in nostro hoc casu. Causa externa, sive remotior hujus affectûs fuit vitium in cibo, & potu; ex alimentis enim crassis, viscidis, & terrestribus, quæ nec facile digeruntur, nec ad statum summæ fluxilitatis citò perducuntur, vitiantur fluida, & solida quoque; acida quippe esitata Chylum, & Sanguinem acore sylvestri imbuunt, unde obstructio viscerum, & vasorum, & lymphæ corruptio, & acrimonia enascitur; ex quibus ulcuscula, intumescentiæ, maculæ in cute, Lypothymia, aliaque cum febre symptomata oriuntur, quæ in morbi hujus historia fuerunt enarrata. Prognosim nunc videamus; si ergo recens sit hæc affectio, facilis erit curatio, si autem confirmata, & altas egerit radices, tunc penè incurabilis erit morbus; maximè, quia adsunt lividæ maculæ, quæ semper mali ominis sunt: nihilominus tamen Ægrotum nostrum bene sperare volumus, eò quia huic morbo convenientia præscribentur, adeoque si non in totum juvari, saltem ad longius tempus remediis, ac diæta conveniente sustentari

posse spero. Indicationes igitur erunt, humores omnes depravatos accommodare, & à salibus acidis erodentibus eos liberare, exulcerationes in gingivis sanare, obstructions referare, symptomata mitigare, totumque corpus roborare. Remedia porrò istis indicationibus subordinata desumuntur ex triplici fonte, Diætetico nempe, Chirurgico, & Pharmaceutico, ad quorum primum pertinent res nonnaturales, ut sunt aër, cibus, potus, somnus, vigilia, motus, quies, excreta, retenta, & animi pathemata: Et ut exordia à primo, aër sit purus, tenuis, & temperatus, 2^o. vitentur cibi crudi, crassi, & visceri, difficilis concoctionis; edantur *carnes Gallinae, Caponis, Vituli &c.* Carnes sale conditæ, & fumo exsiccatae, ut & pisces, arceantur; potus sit *vinum tenue* bene defæcatum *Absinthio conditum*. Exulent aquæ crudæ, stagnantes, putridæ, ad præparanda juscula, quibus uti debet Æger noster. 3^o. Vigiliæ immodicæ nocebunt, & fugiatur somnus statim à pastu 4^o. Motus juvabit moderatus, otium enim ignavum calorem nativum, & languidum reddit, undè concoctiones fiunt deteriores. 5^o. Alvus sit libera, & nisi spontè solvatur, arte subducatur, 6^o. Animi pathemata, hoc est, ira, timor, anxietas, cane pejus, & angue fugiantur. Ex Chirurgia Venæ sectio sumatur administranda in brachio dextro, si vires ferant; in modica verò quantitate Sanguis erit educendus, ne fortè vires deperdantur; Cucurbitulæ quoque leviter scarificatæ proderunt; & si alvus erit tentanda, clysmata convenient. Pharmacia tandem pro salute hujus nostri Patientis exhibere poterit, primò tenue lenitivum ad primas deonerandas vias ab inquinamentis, ut sic concoctio ciborum melius, atque jucundius incedat; tale autem remedium poterit esse, vel *Electuarium Lenitivum*, vel *Cassia*, vel *Manna* ipsa, aut *oleum Amygdalarum dulcium* recenter expressum ad unc. quinque; mox pro præparantibus uti poterit jusculis, in quibus bullierint *radices Cichorei, Petroselini, Fœniculi, Cortices Capparidis, & Tamarisci*; sumantur autem mane jejuno stomacho cum *Syrupi de Cochlearia uncia una*. Seri præterea *Asinini* usum commendo ad viginti dies unà cum *succo depurato Urticæ, Farfaræ, Cochleariæ, & pulvere Oculorum Cancris præparatorum* ad edulcorandos humores: laudo insuper *Martis tincturam, & Antimonium Diaphoreticum* ad scrup. j.; sub vesperam *Pilulas tartareas*

rareas Quercetani exhibent nonnulli cum *vino antiscorbutico Mynstethi*. Externè illiniri poterit Ventriculi regio oleo expresso *Nucis moschatae*, imò totum abdomen inungi poterit oleo de *Absinthio*. Duo denique remedia propono, quibus bis ego feliciter usus fui in curatione scorbuti recentis; unum erit vinum antiscorbuticum sequentis formulæ: & *Foliorum Cochleariæ*, *Man.* ʒ. v. *Rasuræ Raphani Sylvestris*, ʒ. ʒ. v. Ponantur in vase idoneo cum vini albi generosi lib. xj., vas inde obturatum servetur in loco frigido, & vinum effundatur clarum, quoties opus erit. Alterum remedium est aqua antiscorbutica *Sennerti*, quæ talis est: & *Corticum Tamarisci*, *Fraxini*, *radicis Capparidis*, *Polypodii*, *Radicum quinque aperientium*, ana, ʒ. j. *Gentianæ*, ʒ. vi., *Helenii*, *Corticis Citri*, ana, ʒ. iiij. *Chamædrios*, *Chamæpytios*, *Cardui benedicti*, ana, *Man.* j. *Trochiscorum de Absinthio*, de *Capparide*, ana, ʒ. j. *Seminis erucæ*, ʒ. ʒ. contendantur, & adde *radicis Raphani Sylvestris* lib. j. ʒ. *Nasturtii aquatici*, *Cochleariæ*, *Beccabungæ*, *Fumariæ*, ana, lib. iiij., & cum prioribus contundendo misceantur, & S. A. digerantur, & affuso *Vini generosi*, *aquæ cuscutæ*, *cardui Sancti*, ana, Q. S. Destillentur, & servetur ad usum aqua, quæ exit. Pauca hæc sint à me dicta pro confirmatione eorum, quæ à Doctioribus Vivis, ad curationem istius morbi dicentur, quorum iudicio me in totum remitto. Faxit Deus, ut omnia cedant in Ægroti nostri salutem, & utilitatem.

Eventus.

Proposita auxilia penè omnia fuerunt adhibita, nec affectus potuit debellari, imò semper de malo in pejus ruendo, tandem Hydropicus factus periit.

CONSULTATIO CXII.

De Nephritide.

EX his, quæ de adversa Illustris Viri valetudine dicta sunt ab Excellentissimis Viris, ingenio, & conjectura assequi facile licet,

licet, Patientem nostrum Nephritide laborare, siquidem modò gravativo, modò tensivo, ac modò lancinante dolore circa Renum regionem cum frequenti rubri sabuli excretionem cum lotio vexatur; præterea notatur cruris dextri, in quo latere præsertim dolor sentitur, stupor dolorificus cum nausea, & totius corporis lassitudine. Definitur autem iste morbus, sensus tristis, & molestus Renum, partiumque illis adjacentium, proveniens à solutione continui partium nervosarum, facta à materia scabra, & aspera, sabulo nimirum, & calculis, & exinde facta dolorosa crispatione fibrillarum Renum, & Ureterum; quod aliquandò verò provenit, ut etiam in nostro casu, à lymphâ acriore nerveas partes vellente. Partes affectæ sunt Renes, Urethra, Ureteres, & ipsa Vesica, in istis enim partibus solutio continui accidit, unde atrocissimus insurgit dolor. Causa est lymphâ acidâ acris, & modò coagulans, quæ dum in Renibus, & aliis partibus vicinis continetur, Renes contrahuntur spasmodicè; huic causæ ansam dedit hæreditaria dispositio, quatenus ejus genitor Nephritide sæpè tentabatur, ex quo morbo decessit. Ad Prognosim quod attinet, notandum primò cum *Dolæo*, gravem huic morbum esse, maximè quando hæreditarius est, inprimis verò in Sene, ut ait *Hippocrates in Aphorism.*: Bonum autem signum erit, si urina ab initio mingatur tenuis, & alba; postea verò crassa, & in fundo matulæ arenulæ appareant; indicat enim calculosas concreciones solutas esse, & sic salutem sperari posse, saltem in morbo præsentem, quia tale signum apparet, ut ex relatione Excellentiss. Virorum constat. Curativæ porro indicationes erunt corrigere acido-acrem lympham, educere materias tartareas peccantes, & partes affectas corroborare, ut recidiva impediatur; Quæ ut fiant, ad Diætam, Chirurgiam, & Pharmaciam confugere convenit, tanquam ad Artis nostræ principalia instrumenta. Aër ergo sit temperatus, & lucidus; Cibi sint boni succi, & facilis digestionis; laudantur carnes Caponum, Gallinarum, Agnorum, & Bovum juniorum, ova recentia; Caseus vitandus est, sicuti & carnes Leporis, & suillæ sale præsertim conditæ, ac fumo induratæ, aves aquaticæ, Anseres, & Anates, Anguillæ &c. Potus sit Vinum tenue, & alteratum foliis *Veronicæ*, & ligno *Nephritico*. Motus corporis sit mediocris; Somnus vitetur meri-

meridianus; alvus sit laxa, & aperta, & si talis non existeret arte sollicitanda erit; omnes autem animi motus vitentur, ut sunt Ira, Melancholia, Timor, imò studium ipsum vitetur, ait enim Clariss. Joh. Michaelis, *Lucubrationes esse communes vitæ humanæ insidiatores*. Cane igitur pejus, & angue supradicta vitari debent in præsentī affectione. E Chirurgia sumenda erit Phlebotomia, celebranda in pede, & si febris accederet, iteranda, ut & si dolor urgeret, ob metum inflammationis. Pharmaciam quod attinet, primò ad saburras in primis viis existentes eliminandas potione ex *Cassia clarificata* utendum erit; inde quovis mane exhibeatur jusculum, in quo bullierint *radices Cichorei, Hordeum, radices Petroselinii, Asparagi, flores Alkekengi, & semina Peponis incisa*, hoc autem assumatur cum sequentibus pulveribus: & *Rasuræ Eboris, Oculorum Cancris præparatorum*, ana, ʒ.ij. sequendo ad plures dies. Emulsiones quatuor seminum frigidorum majorum utiles erunt; succus inspissatus *Portulacæ* ad modum pilularum assumptus laudatur à multis, quod remedii genus commendavit etiam Crato trium Imperatorum Medicus insignis, & sua tempestate Clarissimus: oleum *Amygdalarum dulcium* recenter expressum assidue usurpatum, & assumptum mirifice prodest, sicuti syrupus de *Althæa Fernellii, aqua Linariæ, Alkekengi, Hederæ arboreæ, florum Malvæ, & Anonidis*, necnon spiritus *Vitrioli, & Tartarus Vitriolatus*: Conserva etiam sequens addi poterit ad cochleare unum quovis vespere ad multos dies: & *Conservæ Rosarum, Malvæ, Nymphææ, Borraginis*, ana, ʒ.ij. Externè etiam proderit cataplasma sequens. & *Radicum Althææ, Liliorum alborum*, ana, ʒ.v., coque in aquæ *Malvæ* quantitate sufficienti: in pulvem redactis adde *farinæ Hordei*, ʒ.ij. *Vitellorum ovorum*, num. V. *Croci orientalis* ʒ. j. *Olei Chamomillæ* quantum satis. Misce; fiat Cataplasma parti dolenti applicandum. Et hæc sunt, quæ dicenda erant pro salute Patientis nostri Illustris Nephritide affecti. Utinam omnia cedant ad ejus salutem, sicuti ex corde precor Deum Omnipotentem, ut longitudine dierum repleat illum.

Eventus.

Multa ex præscriptis remediis usurpata fuere, & tandem ad potum aquæ Brandulæ in Mutinensi ditione Æger remissus est, unde salutem recuperavit; nunc sanus vivit, & Deo gratias agit.

CONSULTATIO. CXIII.

De Calculo Renum.

Honestus quidam Civis annorum ætatis LI. temperie calidâ, & siccâ donatus, dolorem fixum circa lumborum regionem patitur cum urinâ tenui, aquosâ, & paucâ; arenularum autem copiam cum lotio antea excrevit; cibi fastidium adest cum stupore dextri cruris, & aliquandò dolor vehemens, ac pungitivus invadit patientem, ut se penè mori sentiat, cum alvi stypticitate; ex quibus colligo, hunc Virum Illustrem Renum Calculo laborare; apertè enim hoc docent signa prædicta.

Morbus hic definitur à Doctoribus: solutio continui in Renum substantia ab inhærente materia aspera, & scabra, unde dolorosa habetur crispatio fibrillarum Renum, & Ureterum. Pars igitur affecta in præsentī morbo sunt Renes, ab harum enim partium sensibilibus continui solutione oritur dolor ille violentus, ac vehemens supradictus. Licet autem Galenici velint hujus morbi causam esse humorem crassum, & lentum à calore in lapidem exsiccatum; attamen Ego puto esse acidum coagulans in Renibus hospitans, ex quo lapilli conficiuntur, siquidem, suadente *Etimulero*, hoc acidum vitiosum in urina occurrit sibi obvio alkali volatili, quocum coagulatur mutuò in concrementum arenosum, siquidem simul levem terrestrem substantiam urinæ permixtam arripit; atque sic in durum filicem invicem abeunt; quod autem ab acido fiat calculus, patet, inquit *Luc. Tozzi*, cùm experiamur quotidie, liquores fere universos acidam participantem conditionem in res crassiusculas, mucosasque instillatos momento ferè temporis præcipi-

capitare compactiores illarum partes in arenulas, aut sabulum, id quod in oleo Tartari, Mercurii, vel Terebinthi potissimum licet videre, si fortè superaffundatur spiritus Vitrioli, aut alius acidus liquor; & eò magis hoc constabit, si, teste *Helmontio*, in urina sanorum latet quidpiam analogum spiritui Vini, quod promovet concretionem lapideam in Renibus; immò à chylo, & à cibo ipso, quo vescimur, terream amurcam, seu tartarum relinqui, undè Calculi in Renibus enascantur. Iste autem affectus periculosus est, tum ob dolores, tum ob vitiatam urinæ secretionem, & inflammationis metum; quod si accidant sudores frigidi in extremitatibus corporis, dum dolor calculi urget, mortem minantur. Indicationes curativæ in hoc morbo sunt, calculos infringere, & ad exitum promovere, dolores sedare, præcavere ne amplius lapilli generentur, vel si gignantur, citò, ne majores fiant, secernantur: Ut autem his indicationibus satisfiat, duplex cura instituatur, una nempe in paroxysmo, altera extra illum: in prima cavendum ne diuretica sint validiora, sed moderata ob metum irritationis, & per consequens inflammationis, ideòque egregiè scripsit *Ettmullerus*, *quo gravior dolor in paroxysmo est, eo mitiora sunt adhibenda diuretica, ne partes exasperentur*: Sic poterunt exhiberi remedia ex *Althæa*, oleum *Amygdalarum dulcium* recenter expressum, & similia, non tantum quia laxant vias, sed etiam quia acridinem tollunt, & inde natos dolores leniunt. Si urgeant febris, & dolor, ob metum inflammationis, *Venæ sectionem* in pede partis affectæ commendo, & clysterem emollientem, unà cum emollienti fomento ad *Renes*; & quia præsentē *Calculo*, & dolore nephritico urgente, *urina acrior* solet secerni, ex qua dolores exacerbantur; inde erunt adhibenda remedia urinæ acrimoniam retundentia, & consequenter dolorem minuentia, ut verbi gratia *Emulsionēs quatuor seminum frigidorum majorum factæ in aqua Malvæ addito pulvere oculorum Cancris præparatorum cum modico Sacchari*. Extra verò paroxysmum utendum est remediis, quæ acidum urinarum, & primarum viarum corrigant, absorbeant, & evacuent; quo circà primò exhiberi poterit *florum Cassiæ noviter extract. ʒ. j. cum pulveris Cremoris Tartari ʒ. iij, & pulvere Liquiritiæ Q. S.* Sicque alvo soluta, *Therebentina Veneta* exhibeatur, quæ omnem movebit lapidem, & omnibus penè indicationibus ipsa sola occurr-

ret. Utilia eruat ad conterendum Calculum, *Adiantum*, *Chærefolium*; *Hedera terrestris*, *Soxifragia*, *Mikum Solis*, *Petroselinum*, *Raphanus*, *Cepa*, dummodo ex his parentur decoctiones frequenter usurpandæ. Nonnulli laudant *Spiritum Salis Ammoniaci*, *Spiritum Urinæ*, pulverem radicis *Ononidis*, *Testas Ovorum calcinatas*, quæ omnia experiri poterunt. *Aquam Nicotianæ viridis* in potu exhibitam commendat *Zacutus Lusitanus Prax. admirand. obs. 66.* *Hircinum sanguinem* frangere, ac educere lapillos è Renibus docuit *Julius Cæsar Scaliger exerc. 344.* Coufulo comedendas jejuno stomacho quovis mane decem *Amygdalas Persicorum*, vel pulverem *Calami Aromatici* ad pondus drachmæ unius. Externè illiniri poterit Renum regio sequenti unguento: R. *Olei Violacei*, *Rosati*, ana, ʒ. j., *mulcilaginis Althææ extract.* in aqua *Lactucæ*, & *Parietariæ*, ʒ. vj., *Ceræ albæ* Q. S. fiat S. A. Linimentum, immò *Dominus Panarolus observ. 2. Pentec. 2.*, jubet inungi partem prædictam oleo *Petrolei naturali*, quod nobis è Mutinensi regione venit. Tandem usum pulveris *Millepedum* commendo ad plures dies, sicuti *aquam Tetuccianam*; quibus omnibus congrua addatur vivendi ratio; quare nec multis, nec variis cibis utatur Æger, & tempus horarum novem inter prandium, & cœnam intercedat, quæ tamen semper sit parca, & levis. A cibis verò crassi succi abstinendum, ut sunt *Carnes Suillæ*, *Bubulæ*, ac *Anguillæ*, *Tinchæ*, *Ostrea*, *Legumina*, *Caseus*. Vinum sit nigrum, non acidum, & substantiæ tenuis; Vitandus erit decubitus supinus; alvus lubrica fervetur; arceantur animi pathemata, ac latè vivat Æger. Quæ omnia à D. O. M. *Patienti nostro salutaria precamur; & hæc dicta pro ejus salute sufficiant.*

CONSULTATIO CXIV.

De Incontinentia Urinæ.

Nobilis quidam Civis ætatis annorum LXV, temperiei melancholicæ, habitus corporis macilenti, fusci coloris, gulæ delitiis deditus, & somno indulgens longiori, *Urinæ effluvium retinere*

tinere non potest, ita ut sæpè involuntariè mingat. Nunc auxilium petit.

Morbus quò afficitur Nobilis iste Civis dicitur mictio involuntaria, seu Urinæ incontinentia, & symptoma est Vesicæ, sive excretionis Urinæ læsæ, quæ invito patiente, seu præter voluntatem effluit. Provenit ergo hic affectus è Sphincteris Vesicæ tali læsione, sub qua orificium Vesicæ claudi, clausumque teneri minimè potest; istiusque causa esse poterit Urina acris, à cujus particulis fibræ sphincteris irritantur, & continuam mingendi stimulationem pariunt ope spiculorum, sive cuspidum ipsas Urinæ acris particulas componentium. In hoc nostro igitur Viro habetur stimulatio ad frequenter mingendum à nimia acredine Urinæ, undè crebrius illam emittere cogitur. Circa Prognosim dico, quia vitium est in fluido, & non in solido, puta in sphinctere; ideo posse sanari judico sola correctione lixivialis Urinæ humoris. Ad quod peragendum, prius leniter expurgatis primis viis, & sanguine è vena brachii detractò ad pondus unciarum x. ad dulcificantia, & specifica deveniendum; ideòque laudo *pulverem Oculorum Cancræ præparatorum*, & *emulsiones quatuor seminum frigidorum majorum cum Crystallo montana præparata*: Tanquam specificum commendatur *pulvis Erinaceorum combustorum*, *Mastiches*; *Tunica interna Ventriculi Gallinæ*; *Balsamum de Copaiba* laudantur à *Zuvingero in sua praxi*, ut & *Peruvianum*: *aquas Thermales* commendant alii, sicuti *mure: elixos* in cibo dados, teste *Joh. Georg. Sommero in Miscell. Acad. Curios. Decur. II. Ann. 2.* Hæc, si cum debita diligentia, & recta victus ratione fuerint adhibita, morbus removeri poterit. *Ferrariæ 14. Octobris 1728.*

Eventus.

Licet nonnulla tantùm ex præscriptis remediis fuerint adhibita, Æger omninò convaluit.

CONSULTATIO CXV.

De Ischuria.

Vir Nobilissimus, ætatis annorum LXIX. boni temperamenti, in rebus autem nonnaturalibus frequenter peccans, pronus de sua naturâ ad Arthritidem, qua non semel in anno afficitur ad plures dies, Anno 1727. mense Maio, diē nona, repente corripitur urinæ suppressione, cum dolore gravativo ad lumborum regionem, parvâ, & exiguâ comitante febre, nullus vomitus, pauca sitis. In consilium vocatus Medicus fomenta emollientia præscribit cum nonnullis diureticis remediis, Vena secatur ad arcendam inflammationem, tandem ad usum catheteris, quo urina retenta educitur, devenitur; Verùm tale tormenti, & periculi genus incassum adhibitum fuit; nam nihil urinæ in Vesica inventum, & frustra facta fuit hæc periculosa operatio: Auxilium petit.

Cùm duplex igitur sit Ischuria, alia nimirum Vesicæ, alia Renalis; &, ut dicunt Practici, alia Notha, alia Legitima; primò considerandum, quænam sit nostri Illustris Patientis urinæ suppressio; & quia adest gravativus dolor in situ renali, & cùm non adsit tumescencia in Vesicæ regione, immò cùm nullus urinæ exitus per catheterem habeatur, dicendum est, morbum præsentem Ischuriam renalem esse; quæ definitur symptoma, in quo prorsus urina supprimitur ob obstructas ab humore viscido, & crasso arterias emulgentes, atque etiam ureteres; undè impeditur quominus ad vesicam urina descendat. Probabile igitur est, inquinamenta totius corporis, quæ sæpè in Nobilissimo nostro Patientē per alvum exonerabantur, sylvestribus salibus, & vitriolatis particulis turgida, glandularum renum minimos meatus intercipere, & stagnare, undè urinæ separatio impeditur, imò ipsa viscida recrementa ureteres, & arterias etiam emulgentes infarciunt; sic lotii exitus tollitur, undè oritur Ischuria Renalis in casu nostro. Causæ remotæ istius affectionis sunt errores in rebus nonnaturalibus,

bus, in frigidissimis potionibus, vigiliis nimis &c.; juvat enim hanc affectionem crudorum humorum copia, qui naturâ vigente per laxos alvi meatus jam excernebantur, sicque retardato sanguinis motu coctiones viscerum non perficiuntur, excrementa non exeunt; undè nihil mirum, si reflui & ad urinæ vias delati, in glandulis Renum & vicinis vasculis intercipientur, & stagnent, & sic Ischuria fiat. Additur etiam quod pauca urina à sanguine secernitur, & ad vesicam non defertur propter deficientiam spirituum, qui in partes urinæ excretioni destinatas influunt; Summus enim in ætate gravi, ac senili, & advertendum cum *Waldschmidio*, malum hoc sæpè radicaliter ex ventriculo provenire ab erroribus in diætâ commissis, ut in nostro Illustri Patiente. Quoad prognosim, quia in casu nostro Ischuria provenit à viscidis humoribus obstruentibus urinarios meatus, idè benè sperandum erit; si autem, quod Deus avertat, huic affectui superveniret, vel Tenesmus, vel è naribus emitteretur odor foetidus urinosus, tunc de morte timendum, ut docuit *Dolæus*: cæterum suppressio urinæ semper est timenda; narrat enim *Ettmullerus in sua Praxi*, Romæ vidisse mortuum Principem ex nimia urinæ suppressione quam neque catheter, neque ulla alia res prolicere poterat; post cujus necem, aperto cadavere, inventus est tumor prostaticæ glandulosæ ad radicem penis sitæ: sicuti à filamentis crassis lethalem Ischuriam se vidisse, ait *Zacutus Lusitanus in prax. admir. lib. obs. 64*. Indicationes medicæ in casu nostro sunt, auferre fixationes humorum, cruditates, & inquinamenta luxuriantia, undè viarum urinæ facta libertate, lotii excretio ex naturæ legibus accadat. Ut istis rebus itaque satisfiat, ad tres consuetos Practicæ Medicinæ fontes, quantò citius fieri possit, deveniendum, ut curatio feliciter habeatur. Ex Chirurgiâ ergo desumatur Venæ sectio, quæ necessaria omninò putatur à Clariss. *Waldschmidio*, præsertim ubi vasorum distentio timetur, & ad arcendam inflammationem; institui verò commodè poterit in pede ad uncias decem sanguinis educendas. Clysteres emollientes multum præstabunt utilitatis; ut & balnea hîc quoque suam præbebunt opem, vel saltem fomenta. Nullum in casu nostro levamen expectandum venit ab usu catheteris; imò obstupesco, Medicum assistentem curationi istius Viri Illustris, absque

que ulla consideratione, inconsultò, & non ritè examinatis signis; quibus scilicet indicaretur urina in vesica, ægrotantem in periculo posuisse, cui subjacet syringæ usus; docet enim *Panarolus*, partes illas sæpè tactas, facile lædi, undè mors infertur; in retentione quippe urinæ syringa minùs dextrè immissa gravia inducit symptomata, convulsionem, inflammationem &c. ut legitur in *Mercur. Compit. Boneti. lib. ix.* Ab istius igitur instrumenti usu omninò abstinendum. A Pharmaciâ desumantur specifica, & diuretica semper mitiora, & suadente *Malpighio*, alvus leniatur ope *Conservæ florum Cassiæ*, bibantur juscula alterata foliis *Urticæ*, *Malvæ*, *Pilosellæ*, *Agrimoniæ*, radicibus *Graminis*, & *Althææ*, additis aliquot guttis *Spiritus Salis Ammoniaci*, & id ad plures dies jejuno stomacho. Exhiberi poterit pulvis *Oculorum Cancri præparatorum*, *Emulsiones seminum quatuor frigidorum Majorum ex aqua Malvæ*. *Spiritus Thebinthinæ in aqua Anonidis* commendant alii: *Samuel Formius* cerebrum *Picæ* exsiccatum, & propinatum cum vino albo, tanquam specificum laudat. *Vinum Alkekengi* probat *Arnaldus Villanovanus*; *succum Limoniorum Amatus Lusitanus*; modicum pulveris *Cantharidum* *Epiphanius Ferdinandus*; undè postea *Bartholinus cent. 5.* infusum *Cantharidum* *Ischuriæ* remedium ponit, cujus felicem successum non semel vidit; *Cantharidum* nempe *Scrup. j. redactus in pulvere*, infusus in vini generosi unc. iij. stet in infusione per dies, inde per chartam bibulam filtretur, & excolato liquore cochlear unum sumatur. *Sal volatile Succini* commendatur à *Sylvio de le Boë*. Sequens fodus tanquam validissimus commendatur à *Donzello*, quem pluries ego feliciter adhibui in urinæ suppressione curanda, & *Mentha aquatica*, corticis radicis *Raphani*, *Parietariæ*, *Mercurialis*, *Betæ*, ana, man. j. seminum *Malvæ*, *Althææ*, *Fænugræci*, baccarum *Juniperi*, ana, ʒ. j. aquæ communis Q. S. Porro cùm potus Caffè acidum quodvis, & austerum egregiè compescat, & corrigat, parem quoque inter prophylactica sibi vendicat locum teste *Waldschmidio in Prax. Med.* His autem omnibus addenda erit congrua victus ratio ab Excellentissimo Adstante præscribenda, cui omnia, non tantùm executioni mandanda, verùm & corrigenda relinquo. Deus interim vota secundet, & Illust. Viro optatam salutem concedat.

CONSULTATIO CXVI.

De Stranguria.

Mercator Ferrariensis annorum ætatis LX. laute vivens, ac sedentariam vitam agens, frequenter corripitur Urinæ stillicidio, ita ut guttatim urinam cum aliquo dolore, ac pruritu & stimulo emittat. Ut ab hac ægritudine liberetur meum petit consilium.

Affectus iste Stranguria dicitur, & definitur, Stillicidium urinæ, quando guttatim urina destillat, cum frequenti, & dolorifico ad excernendum lotium stimulo, ut in hoc nostro casu. Hujus affectionis causa est aciditas feri vellicantibus scatentis particulis, acuminibus quarum cum feriantur fibrillæ Vesicæ, & ejus partium, tristis illa oritur sensatio, & continuum meiendi desiderium, quod summoperè molestat Ægrotantem nostrum. Est autem morbus ferè similis Tenesmo, nam ut hic se habet in podice, ejusque sphinctere, ita se habet Stranguria in Vesica, ejusque musculo constrictore; cum enim succi corporis impuri ad Renes, & Vesicam confluunt serum urinarium depravant, & Stranguriam excitant; hæc enim fit, suadente *Luca Tozzio in comm. Aphor. Hipp. lib. 3. num. 31.* ab acidis acris succis, ut supra etiam Ego quoque dicebam, qui urinam ipsam acriorem reddunt, & mictui non levem afferunt molestiam, & tantò magis crescit hæc affectio, cum senilis ætatis adest imbecillitas. Visâ causâ ad Prognosim accedamus; quapropter dico cum *Dolæo* Stranguriam illam difficulter curari, quæ provenit a nimia feri, & sanguinis acrimonia; attamen, quia est sine ulcere, sperandum, ope remediorum salutem posse recuperari. Quæ ut acquiratur corrigenda, & evacuanda erit illa acido-acris materia sanguinem, ac serum vitians; inde partes Vesicæ erunt corroborandæ: quibus indicationibus ut satisfaciamus ad tres Medicinæ Practicæ fontes est deveniendum; & primò à Pharmacia communium viarum fiat expiatio ope *Florum Cassiæ cum Cremore Tartari*, ac pulvere *Liquiritiæ*

Josephi Lanzoni opera. Tom. II. I i

ritiæ ad dosim consuetam. Pro alterantibus sumatur decoctum *Malvæ* cum syrupo *Violato simplici*, decoctio *Brassicæ rubræ* facta cum jure *Vervecis*, & Emulsiones quatuor seminum frigidorum majorum, vel ꝛ Syrupi *Violati*, *Jujubini*, ana, ꝓ.ß. spiritus *Therebinthinæ*, gutt. v. aquæ *Parietariæ*, *Anonidis*, *Malvæ*, ana, ꝓ. j.ß. Misce & erit præcisè ad mitigandum dolorem. Externè vero sequenti utatur fomento: ꝛ *Florum Malvæ*, *Verbasci*, *Violarum*, *Althææ*, ana, manip. j. *Seminum Lini*, *Fænugræci*, ana, ꝓ. j. *Farinæ Fabarum*, ꝓ. ij. coque in lacte q. s. fiat Fodus. Sequens Apozema commendatur a *Dolæo*: ꝛ *Rasuræ Ligni Guaiaci*, *Sassafras*, ana, ꝓ. ij. *Salsæparillæ*, ꝓ. j. *Liquiritiæ*, ꝓ. vi. *Florum Verbasci*, *Chamomillæ*, ana, man. semis, fructuum *Alkekenghi* ꝓ. j. coque in aquæ fontis quantitate sufficienti: in colatura dissolve Syrupi *Jujubini*, ꝓ. j. Misce, fiat apozema. E Chirurgico fonte *Venæ* sectio accipiatur celebranda in pede dextro ad educendas uncias novem sanguinis, & ad alvum sollicitandam Clysteribus ex lacte utendum. Quod verò ad Diætam, cibi sint facilis digestionis, ut caro *Vituli*, *Agni*, *Pulli gallinacei*, & avicularum montanarum, ova recentia; convenient *Asparagi*, *Lupuli*, & quantitate modici, lubricantes, & boni succi. Nocent autem legumina, pisces aceto conditi, muria, & falsamenta. Potus sit vinum tenue; & hîc notandum, referente *Burneto in Thes. med. lib. 16.* vinum aliquando stranguriæ fuisse remedium. Adsit animi quies, & hæc erant dicenda in casu proposito, quæ ut sint proficua D. O. M. precor.

Eventus.

Nonnullis ex præscriptis remediis adhibitis Æger convaluit; nunc fanus vivit, & Deo benedicit.

CONSULTATIO CXVII.

De Diabete.

Sacerdos ætatis annorum LII. temperiei calidæ ; & siccæ , postquam longo tempore Scabie laborasset , & larga vini potione usus , incidit in copiosam urinam , sæpè enim mingere cepit , ita ut in die multas excederet lotium libras , & superaret in quantitate potum , quamvis iste fuerit excedens ratione sitis intensæ , quæ Ægrum etiam nunc torquet ; Adest totius corporis emaciatio , unà cum virium prostratione , & summâ debilitate ; febricula adest , aliquando capitis dolor , borborygmus in infimo ventre , vigilia , Vertigo per intervalla recurrens , sudatiunculæ ad vesperam , & aliquando tremores in cruribus. Petit auxilium.

Morbus iste Diabetes dicitur , & est Urinæ profluvium (Hydrops ad matulam ab aliis vocatur , vel Hydrops matulæ , Dipfacos , Diarrhœa in urina) cum continuo , & exuberanti per urinam redditu ejus non solum , quod bibitur , verùm plus quam potatur ; & est passio talis , qualis circa alvum Lienteria ; propterea *Aretæus* arbitratur hunc morbum esse carniū , & membrorum in urinam colliquationem , ob quam summa totius corporis macies fit , & copiosior multò urina redditur , quam potus est , & si modico tempore à meiēdo abstinuerit Æger , tumentque Lumbi , Scrotum , & Ilia : rarus quidem morbus , & à *Galenō* bis tantum visus ; nunc autem magis familiaris , nam sæpè à me visus in Praxi faciēda. Signa hujus morbi pathognomonica , sunt , assidua siccitas , urinæ copiosum profluvium , corporis extenuatio , viscerum ardor &c. ut in casu nostro ; undè clarè patet , Ægrotantem nostrum affectum esse symptomate in excretis urinosis , secundum quantitatem , naturalem excretionem excedentem. Licet autem *Paracelsus* causam hujus affectus ponat in sale resoluto , & scisso , per ingressum acuti salis ; attamen Ego pro causa proxima statuo sanguinis deliquium , sive nimiam serositatem

colliquativam, ac ejusdem compagem dissolutam, procedentem à sale sanguinem in serum præcipitante. Partes affectæ immediatæ sunt Renes, & Vesica cum utriusque intermediis, quatenus mutant cruorem in lotium lacteum cum furore Renum, ut ait *Dolæus*: à sale igitur volatili, & acri insito in humorum massa, ut colligitur à scabie antecedente, & à nimia vini assumptione, præsentem affectionem provenire puto; siquidem in me etiam experior si vinum acidulum assumo, tunc plus urinæ reddo, quàm alias. Circà Prognosim dico, hunc morbum in principio de facili sanari; inveteratum autem, & in Senibus rarò, & difficulter curari, transit enim in Hecticam, indè in mortem, quam in casu nostro Deus avertat; immò ad consolationem nostri Patientis, multoties iste morbus suadente *Dolæo*, Diæta mutata, sponte cessare solet. Indicationes erunt, Sanguinis fusionem inhibere, fusionem jam factam tollere, viscera corroborare, uno verbo, Sanguinem ad bonam crasim reducere: Quibus ut satisfiat, primò è Chirurgia Venæ sectio sumatur, quam in brachio dextro instituerem, & aliquos clysteres imponerem, si alvus esset adstricta; præter hæc è Chirurgico fonte nihil aliud acciperem, omnis enim spes salutis in Pharmacia, ac Diæta consistit. Quoad primam igitur, *tincturam Smaragdi* commendat *Harttmannus*, & alii *essentiam Croci Martis* à *Crollio* descriptam: Narcotica laudo ut sunt *Syrupus de Papavere*, *Laudanum liquidum Sydenhamii*, aliaque hujusmodi, prudenter enim hæc usurpari ait *Laz. Riverius in Praxi*, undè somnum solito longiorem cum *Foresto* præscripsit *Thom. Burnet in Thes. Med.* Sequens opiata utilis erit: & *Pulpæ Cotoneorum*, *Conservæ Consolidæ majoris*, *Rosarum veterum*, ana, ʒ. j., *Mucilaginis Tragacanthi*, & *seminis cotoneorum cum aqua Rosarum parati*, ana, ʒ. ʒ. ss., *Boli Armenæ*, *Terræ sigillatæ*, ana, ʒ. j., *Amyli* ʒ. iiij. cum *Syrupi Myrthini*, & *Papaveris*, ana, quantum, satis fiat: opiata, de qua assumat *Ægerbis* in die, & semel in nocte. Usus *lactis Asinini*, *Gelatine Cornu Cervi*, & *Emulsionum quatuor seminum frigidorum majorum* faciarum in *aqua Borruginis* pro usu quotidiano commendo, ac propono. *Cæsalpinus* inungit partes renum *Unguento Rosato*. *Pompeus Sacchus* aquam calcis proponit ad unc. V. in die ter sumendam quæ efficiacia sui Salis valeat resolvere salia sylvestria sanguinis,

ut

ut experimur in extrinsecis ulceribus, & scabie, quæ extirpantur ab hujusmodi medicamento; ad cujus exemplum alkalia volatilia, sed oleosa erunt etiam proficua, ut sunt *Oleum Cornu Cervi*, *Carabes*, & similia, cum videamus aquas fortes alkalibus demulceri. Ego autem hoc remedium nondum expertus sum, & ex mente *Dom. Sacchi* tantum propono. Mirabilis solet esse *tinctura Martis*, si *Joh. Forti* credendum in tom. 2. *Cons. cent. 3. num. 79*. Cæterum *Jucci Cichorei*, & *Sonchi depurati* requisitam Sanguinis texturam conciliabunt, & salium erodentium activitatem imminuent. *Pulpam Tamarindi* una cum *ptisanâ Hordeaceâ* bis, aut ter in hebdomada convenire ait *Malpighius*, quoniam fortasse aliquem ichorem per alvum dejiciet, simulque corroborabit. Balneum aquæ dulcis convenire potest teste *Saxonia*, & *tinctura Coralliorum* suadente *Franc. Sylvio de le Boë*. Sequens remedium præscriberem, quod summè laudat *Gul. Fabritius Hildanus*: & *Radici Tormentillæ*, *Bistortæ*, *Symphiti Majoris*, *Plantaginis*, ana, 3. ij., *foliorum Agrimonie*, *Veronicæ*, *Rosarum rubrarum*, ana, *Man. semis* coquantur in aqua ad tertiæ partis consumptionem, in colaturæ 3. ij. dissolve *Syrupi de Rosis siccis* 3. ij. *Cornu Cervi usti*, *Corallii rubri præparati*, *trochiscorum de Spodio*, ana, ʒ. j. Miscé fiat potio. Sudorem provocandum cum aqua tepida laudat *Platerus*. Tandem abstineat à vino, ejusque loco potare poterit *aquam Nucerinam Chalybeatam*, *ova sorbilia*, *olera refrigerantia*. *Celsus* æstate frigidam potionem, hyeme calidam laudare videtur. Hæc autem habebam pro salute Reverendi Sacerdotis nostri Patientis, pro cujus salute Deum rogo.

Eventus.

Licet multa ex prædictis remediis, præter alia à Medico Ordinario proposita, adhibita fuerint, crescente tamen semper corporis macie, tandem Sacerdos obiit.

CONSULTATIO CXVIII.

De Ulcere Vesicæ.

HOnesta Veneta Mulier ætatis annorum 33. bonæ temperiei, post multas febres, dolores articulares, abortum, stomachi passiones, aliaque prava symptomata, de repente tumore ad aurem sinistram afficitur cum dolore, ita ut Chirurgus parotidem citò suppurandam judicaverit; verùm contrarium accidit; nam nocte sequenti subortâ magnâ, ac turbidâ urinæ excretionē evanuit tumor, & paucis elapsis diebus, dolor in parte inferiori abdominis subortus est; unâ cum febris violentiori; post quam sequuta est saniei fœtētis cum urina excretio; ex quo in vesica ulcus; siquidem *Hippocrates in aphor. 81. Sect. IV.* ait, si quis sanguinem, aut pus minxerit, aut squammulas, & odor gravis adsit, vesicæ exulcerationem significat: de quo affectu inquit *Clariss. Joh. Fortis in Consult.* febres, dolores, vigiliæ, colliquationes, & ni rectè curetur, interitus succedere solet. Itaque ulceri quantò citiùs poterit incumbendum, ne altiores agat radices, & detergentibus, ac simul leviter cicatrizantibus utendum erit, & hoc non solum in remediis assumendis verùm etiam in vesicam injiciendis; quocircâ *Terebinthum* laudo ad 3.j. quovis manè jejuno stomacho sumendum cum potu aquæ *Hordei*, in qua prius bullierint *Salsaparillæ*, *Chinæ radix*, & *Liquiritia*, ad multos dies; Injiciatur autem aqua *Tetuccii*, vel si ista ad manus non sit, aqua in qua bullierint flores *Hyperici*, *Malvæ*, *Acaciæ*, & *Hypocistidis*, addito modico balsami de *Copaiba*: Nonnulli commendant usum aquæ Brandulæ, quæ est in *Mætinen*si ditione; Victus ratio congruens sit, media inter humectantem, & exsiccantem, præscribenda à Medicis Venetis præsentibus, atque assistentibus, quibus Excellentissimis Viris Dominis meis præstantissimis pauca hæc à me dicta corrigenda lubens committo.

CONSULTATIO CXIX.

De Pollutione Nocturna.

CIvis ætatis annorum XXVI. temperie calida, & sicca præditus, fusci coloris, gulæ deliciis deditus, somno indulgens largiori, & tabaco, ac spiritu vini abutens, imprimis insomnia venerea passus, & alto sepultus somno, notat involuntariè semen cerni bis, vel ter in hebdomada; oculi aliquandò caligant; mœstitia corripitur; ac memoria aliquantisper vacillat: cùm verò pejora timeat consilium petit.

Morbus iste à Græcis Εξονέπωσις vocatur; Pollutio verò nocturna à Latinis, sive feminis in somno excretio, & est species Gonorrhœæ, ut placet *Brunoni in Lex. Med.* Definiri autem potest excretio feminis cum voluptate dormienti, & somnianti eveniens, ejus signa pathognomica sunt somnia Venerea cum feminis excretionem. Jaculatio autem ista feminis fit imprimis, si *Alger* in dorso decumbat cum Virium imminutione, & juxtà *Bened. Sylvaticum* vocatur *Oneirogonia*, & est symptoma in exeretis ratione & malæ qualitatis seminalis materie, & ratione copię, adest enim seminalis liquoris turgescencia, fermentatio, & ad excretionem parata facilitas simul ac calor motor accesserit, & agitatio, quæ omnia maximè foventur ab ætate Juvenili; quinimò somnus longior accedit, & decumbendi modus supinus; hic enim vasa sanguinea majora incalescere facit, præcipuè post mediam noctem peracta concoctione. Animus autem in nostro Patientem est mœstus ob debilitatos, ac perturbatos animales spiritus, ab his enim naturaliter constitutis toti corpori alacritas, ac promptitudo conciliatur. Causa igitur istius affectionis consistit in nimia aperitione, & relaxatione porositarum glandularum postatarum, & testium & vesicularum seminalium versus urethram, per quas hiantes porositates seminalis materia facilè labitur; & potest etiam dari, semen esse nimis fluidum, ut per apertas porositates facilè exeat cum aliquali titillatione ob particulas salino-volatiles ejusdem seminalis materie. Nunc, ut
foli-

solitam observemus methodum consultatoriam, ad Prognosim gradum faciamus. Dico igitur, Pollutionem nocturnam ex se non admodum periculofam esse; & speciatim in nostro Juvene innoxiam Ego fore prænuncio. Indicatio curatoria suadet, roborare vasa; & porositates stringere, seminis copiam minuere, ejusque acrimoniam cicurare, & particulas salino-volatiles retundere, atque ut ita dicam edulcorare. Quæ ut habeantur ad Chirurgiam, Pharmaciam, ac Diætam confugere conveniet: & ut à prima exordiar, missionem sanguinis in brachio instituendam suadeo ad uncias decem cruoris hauriendas; & si alvus adstricta sit clysteribus humectantibus utendum erit. Cucurbitulæ scarificatæ prodesse possunt, quæ leviter ventilabunt, & ferventem cruorem temperabunt; nec ullus aderit timor, nam fumus in ætate juvenili, & in viribus satis constantibus. Ex Pharmacia primò lenienti remedio utendum ad primas expurgandas vias, ut poterunt esse *flores Cassiæ*, & *pulpa Tamarindorum*. In numero præparantium erunt juscula alterata *foliis Malvæ, Cichorei, & Endiviæ* unà cum *pulvere Oculorum Cancris præparatorum*; *Emulsiones quatuor seminum frigidorum majorum* utiles erunt. Usus *lactis Caprini* juvabit, ut & potus *aquæ Brandulæ*, quæ est in ditione Mutinensi, cùm tamen tempus proprium erit. Adhiberi insuper poterunt omnia ea, quæ intrinsecè, & extrinsecè semen extinguunt, præsertim vespere ante cœnam; primi ordinis sunt *Agnus Castus, Ruta, Ireos, semen Cannabis, Carabe, Lactuca, Portulaca &c.* Secundæ classis sunt *Unguentum Rosatum Mesues, Santalinum, Populeonis, succi sempervivi*: *Lumbis* alligatam laminam plumbeam optimam esse ait *Joh. Michaël. Prax. spec.* Nec præteriri debet, suadente *Simon. Paulli Quad. Dotan.* *fragaria* in vino rubro cocta, & pectini, & pubi imposita; efficax enim est contra nocturnam Pollutionem; quin & *Smaragdum* in annulis gestatum bonum esse aiunt nonnulli. His omnibus tandem congrua victus ratio erit addenda, quæ tamen rectè corpus valeat nutrire. Abstineat Æger à potu vini generosi, nam *sine Baccho friget Venus*: fugiat acria, salsa, flatulenta, decubitus supinum. Alvus lubrica sit, alacriter vivat; abstineat à venereis confabulationibus. Pro potu, vel aqua, vel tenui vino utatur. Somnus sit moderatus, evitet quietem nimiam; motus autem

autem modum non excedat. Amor, & libido exulet, & castitati sermones, cogitationes, oculi, & aures consacrentur. Cogitet de-
mum Juvenis noster de conjugio legitimo, ex quo certè evadet à
Pollutione nocturna immunis. Et hoc erit conveniens remedium.
Summus autem Deus omnia præscripta salutaria faciat.

Eventus.

Multa ex præscriptis remediis fuère usurpata, & viginti dierum
spatio pristinae sanitati restitutus fuit Æger.

CONSULTATIO CXX.*De Gonorrhœa.*

Adolescens annorum 21. re habita cum meretrice, paucos post
dies sensit calorem in pene, & exinde materia penè femina-
lis involuntariò exhibat cum virium prostratione, oculis concavis,
& corporis macie; ex quibus indiciis manifestè constat Adolescen-
tem hunc Gonorrhœâ virulentâ laborare, cùm adsint omnia hujus
morbi signa diagnostica; interrogatus enim Æger, respondet se
frequenti meiendi libidine torqueri cum exitu materie coloris
flavi, & subviridis, ex quo dolor in canali urinario excitatur, a-
trociùs sæviens in mictione ipsa, & in penis erectione. Causa hu-
jus morbi delitescit in partibus feminis asservationi dicatis, qua-
tenus laxitatem, & continui solutionem patiuntur; Gonorrhœa enim
dependet à Gallico fermento hausto per coïtum cum infecta mu-
liere, quæ in vagina ulcera habet. Subjectum autem hujus affe-
ctionis sunt prostates; observaverè siquidem Doctores in Gonor-
rhœâ virulenta denatis prostates glandulosas ulceratas, & quasi ex-
coriatas, cùm enim in coïtu incallescunt partes genitales, tunc
acria, ac venerea miasmata exhalant ab ulceribus vaginæ uterinæ,
& se insinuant in urethram, penetrando in prostates, hinc median-
te fermentatione inquinant lympham dictorum locorum, quæ conf-
purcata acescit, & ob virulentiam valdè à naturali statu recedit,

& sic a tali venereo ichore liquor ferè feminalis corruptus pedetentim effluens, urethram, & præputium inquinat, ex quo symptomata superius dicta oriuntur. Ad Prognosim quod attinet, dico malum hoc in principio leve esse, sed in progressu temporis, exulcerationes augendo, potest glandulas ipsas absumere; immò serpere per ipsa vasa præparantia, & testes ipsos inquinare, necnon unà cum sanguine circulando corpus universum contaminare magno cum salutis detrimento. Igitur quantò citius possit fieri, cura inchoanda est, & remedia adhibenda, in tali enim casu valdè quadrat illud Poëtæ.

Principiis obsta, sero medicina paratur.

Cùm mala per longas invaluere moras.

Indicationes ergo curativæ sunt, venereum acidum peccans corrigere, partes affectas abstergere, atque consolidare; immò massam cruoris purificare; quæ ut ritè habeantur ad consuetos Medicinæ fontes deveniendum; & primò ad Pharmaciā, ex qua valebit sequentia remedia desumere; Et primò ad communes expurgandas vias uti oportet *floribus Cassiæ ad 3. j. cum pulvere Cremoris Tartari, & Liquiritiæ cum tribus granis Mercurii dulcis optimè præparati*: Pro alteranti utatur *Æger juscule chalybeato*, in quo bullierint *Cichorei, Malvæ, & Oxalidis folia*, addendo pulverem *Salis Absinthii & oculorum Cancri præparatorum*. Emulsiones quatuor *seminum frigidorum majorum* factas in aqua *Malvæ* sæpè assumendas commendo ad diluenda salia erosiva, quæ luxuriant in Gallica lue. Sequentem bolum per quinque dies capiendum mane jejuno stomacho, expertus in facienda praxi, laudarem, ex quo mitigatas Gonorrhœas pluries vidi: R̄ *Therebinthinæ Venetæ, 3. iiij. Rhei pulverisati 3. j. fiat bolus S. A.*, & superbibatur juscule, in quo bullierint *folia Malvæ, Lactucæ, & Plantaginis*. Rotulas nostras ad Gonorrhœam usuales valdè proficuas in tali casu experientia monuit, quarum descriptio in *Miscell. Curios. Decur. III. ann. 9. pag. 267.* Verum quia perseverante morbo, & inclusi in prostatici humoris turgescencia, solutio continui fieri debet, cujus rupturæ indicium esse flavedinem, qua Gonorrhœa tingitur, asserit *Clariss. D. Jacob.*

Ver-

Vercellonus Amicus, & Patronus meus magnus cap. 3. de Mentulagra; Ideò nonnullas guttas *balsami de Copaiba* in liquore aliquo appropriato quovis mane assumendas laudarem. Caffè potum juvare posse asserit *Malpighius*. His addenda erit *aqua Stibiata*, dummodo pertinax morbus consisteret. Quoad Chirurgiam, nisi unicam Venæ sectionem in pede ad sanguinis uncias X. hauriendas, adhiberem. Victus ratio tandem rectè instituenda erit, & cum cibo *pulveres Cancrorum* fumantur ob dulcificationem humorum peccantium. Fugiat Ægrotus noster crapulam, & amet simplicitatem ciborum; abstineat à condimentis, ab acidis, & falsis; poterit tamen uti in cibo *Croci* conditura si *Malpighio* credamus in *sua Consult. 80.* Hilariter vivat, & vinum potandum paretur *foliis Salicis, & Santalo rubro*. Quæ omnia Ægro nostro salutaria precor.

Eventus.

Auxilia proposita fere omnia studio, ac diligentia administrata fuere, & post 40. dies pristina salus recuperata fuit; nunc sanus vivit.

CONSULTATIO CXXI.

De Lue Gallica.

VIr annorum 40. Gallicam contraxit Gonorrhœam, cum vagis doloribus totius corporis, & specialiter articulorum, qui dolores præsertim vespere exacerbabantur, ex quo communiter Lue Gallica affici judicatum est. Auxilium petebat.

Morbus Gallicus, qui duobus abhinc sæculis in nostra Italia strages fecit, introducitur in corpora nostra medio congressus veneri cum infectis, sive masculis, sive fœminis, & in actu concubitus corpori communicatur aura quædam maligna effluviorum acido-acrium, quæ cruorem invadens, ejusdem turbat crasim & ope suæ aciditatis aliquantulum fixando, minuit ejus motum naturalem, non tantum circularem, quantum fermentativum, qui est

motus perfectivus ejusdem, cujus medio Sanguis indefinenter agitando suas partes, semper separat particulas excrementitias, eas disponendo ad segregationem, medio successivæ percolationis, quæ fit in variis emunctoriis à natura in diversis nostri corporis partibus dispositis, & ita circulationis lege colatur, & depuratur cruor; & hæc tam necessaria functio, aut impedita, aut retardata ratione vitii cruoris, id est nimix fixationis, partes excrementitias segregandas, ac percolandas retinet in sanguinea massa, undè istæ remanentes semper magis depravant ipsius cruoris consistentiam, quæ depravatio, seu dyscrasia in dies semper crescit, & ita Sanguis semper magis à statu suo naturali deviat, adeò ut habilis amplius non fiat ad Chylum assimilandum. undè oritur Cacochymia, atque ratione fixationis semper majoris, quæ in dies fit, oritur tenuiorum partium, id est feri vitii secretio mordicantis, & corrosivi, quòd latum ad partes, & maximè ad articulos, vellicatione sua dolores atroces, & contumaces parit, & aliquandò aliqua portio ejusdem fixata ab aura acida, & maligna, quam suprà dixi, apud periostium, inducit tumores, tophos, gummata non sine gravi ægrorum molestia, & interdum sistens in partibus vel carneis, vel glandulosis, eas corrodit, & ulcera pessima inducit. Circa Prognosim notandum, talem affectionem periculo non carere, maximè si altas egerit radices, verum cùm in nostro casu Lues non sit adulta, aliquid boni sperandum erit. Ad talem superandum affectum antiqui Medicinæ Magistri longam remediorum seriem exhibuere, quæ tendit ad tollendam Cacochymiam, curantes dissolvere Sanguinis massam, eamque attenuare, & ad naturalem crasim reducere: id est liberam, & facilem, ac permeabilem illam reddere, ut sic efficere queat duos perennes suos motus, fermentativum scilicet, & circularem. Ad hoc ergo assequendum primò corpus in nostro casu communi expiatione purgandum erit, inde decoctum sudorificum adhibendum, ut scilicet Sanguis hujus ope dissolvatur, fundatur, & liquetur, quòd fanè facilius obtinetur ope sudoris; hinc postea fusus, & fluidizatus cruor facile à se expellit excrementitias particulas, ac virulentas moleculas, undè paulatim ad suam naturalem crasim restituitur & salubrem statum acquirit. Poterit ergo exhiberi *Potio Magistralis Solutiva ad uncias*
sex,

sex, inde per dies aliquot jusculis alterantibus uti; pariter Sanguinis missio erit celebranda, quatenus hæc attenuat cruorem, & promptiorem eum reddit ad motum, pariterque massa cruoris per hanc operationem minuitur, ne scilicet per calorem Vaporatorii instituendi nimis in vasis turgesceret, & dilataretur pro sui nimia attenuatione, quæ pericula arcet Venæ sectio. Mox decoctum Salæparillæ per mensem adhibendum, in cuius medio sudationes arte parandæ erunt per octo dies; inde medicamento purganti utendum, ut verbi gratia *Pulvere Hermodactylata*; quod si talibus non cedat remediis, aquam stibiatam vulgò dictam *del Pomponazio* per mensem assumat absque Vini potu; ex usu enim hujus aquæ plures Lue Venerea affectos sanatos vidi. Diæta rectè observanda erit, quam sicut cætera omnia Excellentissimi Viri Curantis optimæ administrationi committo; ut optatam sanitatem consequi noster Patiens valeat, quam ex corde à D. O. M. precor.

CONSULTATIO CXXII.

De Articulari Doloze.

EX vocali relatione Medici intelligo, D. N. N. Civem nostrum ætatis annorum XLIX. Articulari dolore interdum mitius, interdum acerbius torqueri, à quo, ut liber, ac immunis evadat, consilium petit. Doloze Articulari Ægrum nostrum corripit certum est juxtà *Hippocratem* à bile, & pituita connato, qui fluida vitare possunt. Definiri, vel potius describi potest juxta *Brunon.* in *Amalth.*, hic morbus, quod sit exquisitus dolor circa partes nervosas articulorum cum vel sine inflammatione, & tumore à solutione continui proveniens per particulas salinas diversi generis, sibi que valdè contrarias acidas fluidas succi nervosi, & lixiviosas, tartareasque succi nutritii cum sanguine arterioso delati mixtas, & effervescentes factâ: undè patet idea, & causa mali: probabile autem est, primâ coctione non ritè absolutâ, cruorem tartarea materia, & salibus sylvestribus scatentem non benè volatilizari, & successivè, ut docuit *Clariss. Malpighius* transpirationem

nem debita felicitate non subsequi, unde cùm dicta inquinamenta non sufficienter volatilizentur, necessariò in articulis intercepta subsistunt. Cùm Civem nostrum prudentem, ac obedientem habeamus curandum, nec ullus tophus hucusque in articulis coacervatus sit, ideò curatio, & præservatio speranda erit ope remediorum infra describendorum. Indicationes medicæ sunt, depurandi humores à supradictis recrementis, juvandi concoctiones, firmandi, & roborandi articulos, & prohibendi novas congestiones: Quæ ut assequantur ad Pharmaciam, Chirurgiam, ac Diætam festinandum est: & ut à prima exordiar, opus est ad alvum solvendam *speciebus Hermodactyli ad scrup. iiij.* in jusculo sumptis, quod remedii genus reiterari potest, inde enim magnam utilitatem in Arthritide vidi. *Decoctionem ex ligno Lentisci, Sassafras, radice Chinæ, & Salsaparillæ* summoperè laudo ad multos dies assumptam. *Lac* esse unicum Arthriticorum solatium aiebat *Waldschmidtus in Mon. Med.*, undè prodesse etiam poterit *Saccharum Lactis Dom. Testi* Amici mei, dum viveret, suavissimi, Venetiis denati magno Reipublicæ Medicæ damno. *Succi depurati Cichorei, Borraginis, Agrimonie ad unc. iiij.* per multos dies commendantur à *Joh. Forti*. Articuli foveantur aqua vitæ, & si dolor urgeat, inungantur oleo ex *Vitellis Ovorum*, vel *urinâ Pueri* humectentur. *Serum Caprinum* cum *sibio diaphoretico* per plures dies exhibet *Malpighius in Consult*; qui in dolore acerbissimo apponit sequens remedium: *R Aqua vitæ in qua dissolvatur Opium ad drachm. ij. & Camphoræ, drachm. semis.* Pro roborandis partibus affectis ad vinacea confugiendum, vel ad fotum ex visceribus animalium nuper mactatorum. Totius curæ negotium in diætâ consistere putat *Waldschmidtus*; ita ut ex Chirurgia vix unam missionem sanguinis tolerarem, licèt sint aliqui, qui doceant, Fonticulos etiam plures convenire. Quibus omnibus addatur commoda victus ratio, multo tempore post remedia continuanda: vitetur ciborum varietas, & nimia repletio: vinum sit album, tenue, non acidum: caveat *Æger* à carne Agnina, Leporina, Suilla, & avium in locis paludosis degentium, & ab acetariis. Fraga, Cerasa rubra, Persica, Amygdalæ recentes, Peponesque concedi possunt: Caseus omninò prohibeatur: Oryza, & Hordeum utilia sunt, ut ex oleribus Cichoreum, Bor-

rago,

rago, Brassica, Endivia &c. Cavendum ab Allio, Cepis, & aromatibus. Tandem absteineat ab applicatione, maximè repleto ventre. Hilari animo vivat.

Eventus.

Licèt proposita remedia universa adhibita sint, nihilominus Æger suis doloribus articularibus tentatur, & præsertim hyemali tempore, ita ut nec minimum levamen sentiat; & adhuc in eâdem adversa valetudine reperitur.

C O N S U L T A T I O CXXIII.

De Rheumatismo.

Affectus, qui præsentem Virum exercet, quantum conjectura assequi potui, nullus alius est, quam Rheumatismus, qui ex variis erroribus in sex rebus naturalibus ortum habuit, ut eruditè ex historia a Dominatione Vestra Excellentissima exarata, & hesternâ die mihi tradita, colligitur; super quo affectu meum petitur judicium.

Quamvis igitur latè acceptus Rheumatismus pro omni fluxione habeatur, attamen hodie restringitur ad certum aliquem affectum mixtum ex Catarrho, & Arthritide, & forte ita describi potest; quod sit dolor partium musculosarum, membranarum, glandularum, ac perioestiorum, cum febre erratica lenta, languore &c: cujus causa est Cacochymia scatens salinis particulis in cruore, & succo nerveo, & adjunctis flatibus, quæ quartam Catarrhi speciem constituunt: est autem affectio Arthritidi affinis, in qua non tantum articuli, sed etiam muscoli, eorumque membranæ atroci torquentur cruciatu, & aliquando etiam Ventriculus, Intestina, & aliæ internæ partes condolent. Quod spectat ad Prognosim, affectio hæc rarò, aut nunquam vitæ periculum affert, sed tantum infert longam molestiam, & ad plures menses perdurat, maximè si sit sine febre, ut in casu nostro. Si supervenirent sudores, bonum esset; sicuti si multæ urinæ, & crassæ prodirent. Curationem aggre-

grediamur, primò Venæ sectio instituenda in brachio dextro ad uncias decem Sanguinis extrahendas, inde evacuatio per alvum tentanda erit, vel *Syrupo Aureo Solutivo*, vel *potione ex Manna*, vel *Cassia*. Pro alterantibus autem utendum erit *decocto Borraginis*, *Betonicae*, *Graminis*, addito *Elixire Proprietatis* ad gutt. X. pro qualibet die: Hinc blanda remedia per epicrasim purgantia non sine fructu præscribenda erunt, ut sunt *Syrupus de Cichoreo cum Rhabarbaro*, *Syrupus Cachecticus Fernelii*, *pilulae Gelii*, vel *de Aloe*. Sudorifica possunt utiliter exhiberi sub vesperam, ut nocte in somno sudor promoveatur, & hoc post debitas purgationes; & esse poterit *decoctum Chinæ Chinæ*, *Salsaparillæ*, *Sassafras* &c. *Tincturam Corallii* laudat *Riverius*. Pro potu ordinario exhibeatur *Ptisana* descripta à *Domina Foucquet* in suis arcanis vel sequens aqua: & *Aqua fontis*, lib. CC. *Panis albi*, lib. viii. *Baccarum Juniperi contusarum*, lib. X. *corticem sex Limoniorum*, *ligni Quercini incisi*, ʒ. vi. infunde per xx dies, post coletur, & pro potu ordinario servetur vice vini. *Conservam Cochleariæ* præscribit *Thom. Sydenham* de morb. curat; Et *Mangetus* in *Bibliot. Med. præct. lib. 15*. Hic autem accedat idonea victus ratio, ex cibis boni succi, & jusculis consummatis, & omnia sumenda erunt in mediocri quantitate; præsertim verò aëris inclementiam vitet, & sic curari posse nostrum Nobilem Virum spero, quod illi quamprimum concedat D. O. M., ut ex corde precor.

Eventus.

Multa ex præscriptis remediis experta fuere, & præsertim *decoctum ex Salsaparilla*, & *Chinæ radice*, quibus demum favente Deo saluti fuit Æger restitutus, nunc Cœlo mutato sanus vivit.

CON-

CONSULTATIO CXXIV.

De Signo Deflorationis.

CAsum mihi proponis, Vir Illustrissime, super quo requiris quid sentiam: De Puellâ videlicet XI. annos nata, quæ defloratæ Virginitatis proprium Consobrinum accusat; commendo utique Judicem prudentem, qui in tanti criminis veritate indaganda non properet, nec faciliè credat, cùm Puellæ instabilitas, ac levitas sit parvi pendenda. In re igitur controversa interrogantur Medici, Chirurgi, & Obstetrices, quæ Puellæ hujus abdita intueantur, contrectent, & ferant judicium. Hinc aliqui Medicorum negant defloratam fuisse, at mulierculæ Obstetrices Puellæ abdita observantes, contrariæ sunt opinionis, & puellam defloratam fuisse volunt. Quæritur igitur, an Medicis, vel Obstetricibus magis sit credendum, ad verè fundandum delictum. Et hîc primò dolendum est, viles fœminas cum Medicinæ Doctoribus audere contendere, imò tanti æstimari illarum testimonium, ut Medicorum assertiones, si non convellere, saltem apud Judices in dubium revocare queat; ut hoc anno 1725. apparuit in muliere carceribus detenta ob adulterii metum, quam non esse gravidam constanter asserabant duæ viles Obstetrices, quarum judicio sistens Judex, non sine abortus periculo in carcere detentam vexabat; at domestici ejusdem me in consilium vocarunt, qui carcerem intrans eam esse gravidam comprehendi, inde data per parentes ejus fidejussione ad domum propriam deportata, post duos, aut tres menses masculam prolem peperit contra sensum Obstetricum. Mea igitur sententia est, nullam prorsus istis mulierculis dandam esse fidem, & præsertim in nostro casu. Signa enim deflorationis sunt incerta, & fallacia, ita ut si aliquis ad virginitatem dignoscendam quid certi promitteret, temeritatis notam incurreret. Signum enim præcipuum Virginitatis dicunt esse Hymen, membranam scilicet, quæ in medio cervicis uteri reperitur; quam non dari certum est, ut oculatiores Anatomici observarunt. Sciant er-

go Judices, ait *Vincent. Alfar. Crucius in cent. 4. suar. Epistol.*, hujusmodi signum nullius esse roboris, quoniam hæc membrana inter aniles fabulas est reponenda; immò referente *Graafio* si reperiretur talis membrana in aliquibus virginibus, esset contra naturam, & incisione opus esset, ad hoc ut actus generationis sine difficultate haberetur; ideòque Hymenis membranam imaginariam tantum esse scripsit *Petr. Dionis. in sua Anatom.*; quod si aliquis dicat, indicare hanc membranam Sanguinis effusionem, quæ in primo virginis congressu venereo erit, respondebo, dolorem, & Sanguinem haberi, quia penis angustam uteri vaginam extendit, & vasa per eam diramata lacerat, undè profilit cruor, de qua re *Claudianus*

Et vestes Tyrio sanguine fulgidas

Alter virgineus nobilitet cruor.

Tunc victor madido profiliat thoro

Nocturni referens vulnera prælii.

Si ergo Obstetrices ad hymenis membranam sua dirigunt judicia, colligere facile erit, vana, ac futilia esse, cum melioris notæ Anatomici nunquam talem membranam vidisse fateantur. Rectè igitur *Melch. Sebizius* docuit, nullius momenti in hac re esse Obstetricum testimonia, quia rerum anatomicarum sunt ignaræ, & nihil aliud sciunt, quam foetum excipere gremio, umbilicum scindere, & ligare, & alia levioris momenti præstare: virginitatem verò explorare difficillimum esse monuit ipse *Cujacius*, quandoquidem idem quoque confirmare videntur *Capivaccius*, *Augenius*, *Fernelius*, & alii, qui pro figmento hymen habuerunt, & dubia semper esse virginitatis signa dixerunt, communia enim sunt, & æquivoca; possunt siquidem haberi iidem effectus tam à virili pene, quam ab ipsius puellæ digitis, vel instrumento aliquo; ut notat *Zacchias lib. 9*: Quapropter audacissimi mendacii insimulandæ sunt Obstetrices, dum cognoscere volunt per quædam signa, ut ipsæ aiunt, deflorationem alicujus Virginis, contra sententiam, & auctoritatem Doctorum, inter quos præsertim videantur *Ambr. Pareus*, *Joubertus*, *Augenius*, *Codronchius*, *Valesius*, *Sanchez*, & alii plures.

res. Et profectò non potest talium Obstetricum petulantia tolerari, cum dicunt, se observasse vulvæ orificium dilatatum; à mensium enim fluxu, vel ab aliis causis extrinsecis humectari, relaxari ac dilatari potest; sicuti oblitteratio rugarum vaginæ potest evenire ex perenni fluxu mensium, quem anticipasse audio in præsentì puella undecim annorum, & mensium decem; ut ex Epistola tua, Vir Præstantissime, colligitur. Uterius explorationem Virginitatis etiam de Jure Pontificio fallacem esse, ait *Sebizius*, cum *Abbate Panormitano*; undè credendum, nullo certo signo distingui posse virgines à mulieribus; ergo pertinacis erit ingenii (sunt verba *Fortunati Fidelis de Relat. Med. lib. 2.*) tot celeberrimis Medicinæ Authoribus adversari, atque obstinatè contendere perpetuam esse cunctis Virginibus Hymenis membranam, certumque Virginitatis indicium inde sumi licere. Vanam esse etiam constat conjecturam, *Michaelis Scoti* de Virginitate probanda ex observatione naribus; manente enim, ait *Scotus*, Virginitate, cartilago pinnulæ nasi sentitur indivisibilis, sed si est violata sentitur partibilis. Pariter dico, vanum esse signum ex collo, dum enim prima nocte virgo jam nupta erat cum conjugè concubitura, antequam thalamum ingrederetur, colli ejus circumferentiam ducto filo metiebantur, manè autem, si latius collum quam ut eodem filo comprehendi posset inveniebant, defloratam jam inde concipiebant nimis creduli *Ethnici*, undè *Catullus* cecinit:

Non illam nutrix orienti luce revisens

Hesterno collum poterit circumdare filo

Fuerunt alii, qui ex urina signum deflorationis sumpserunt, sed quàm inaniter, judicent sapientiores; ab urina enim esse impossibile Virginitatem deperditam conjectari ait *Sinibaldus Geneanthr. lib. 4.* Similiter quæ de Gagate lapide narrat *Porta* ad explorandam Virginitatem pro nugis habentur. Ex quibus omnibus arbitror, spreto Obstetricum judicio, nihil certi ex observatis circa abdita nostræ Puellæ de corrupta Virginitate affirmari posse; & in hac sententia sum Ego, à qua non discedam; ideò Judicem, ut constet de cor-

pore delicti ad alia indicia minus dubia confugere oportet. Et hæc est mea opinio, quam tuæ censuræ libenter subjicio, Excellentissime Domine. Hinc me ama, & vale, atque iterum vale.

CONSULTATIO CXXV.

De Suppressione Mensium.

ADmodum Reverenda Monialis turbatam patitur corporis œconomiam, ut abundè testantur prava symptomata, quæ eleganter descripta colliguntur à Scheda ab Excellentis. Dom. Curante transmissa. Ut autem meum aperiā sensum & liberè, ut mei moris est, loquar, puto ex aliquo errore in una, vel pluribus rebus nonnaturalibus, ut iracundia nimia, & corporis transpiratione impedita, Sanguinis massam salibus acidis cō inquinatam fuisse, hinc paulatim impedita, ac vitata naturali cruoris fermentatione, pariter suppressa sit menstruorum fluxio, & sic ibi stagnando, acidior evasa, revertendo in massam Sanguinis morbum sæviorem producit. His ergo stantibus, dico, Patientem nostram, nondum trigesimum annum elapsam posse facile sanari, quia morbus non est confirmatus, & viscera ejusdem sunt sana. Ut autem salus recuperetur, producta morboſa superius enunciatamovenda sunt, prout arti nostræ permittitur à Summo bonorum omnium & præsertim salutis Datore. Instituta igitur curatione, & sumpta indicatione ab eo, quod prudentissime scriptum est à Dom. Curante, post blandam alvi solutionem factam ope *Florum Cassiæ*, utendum erit *succis depuratis Sonchi, Endiviæ, & Borraginis* ad dies octo, pondere unciarum trium quovis mane, superbibendo *serum depuratum Caprinum*. *Salia* insuper *Absinthii, Artemisiæ & Tartari* utilia erunt. Consularem quoque, ut per multos dies assumeret *decoctionem* factam ex aqua *Fabrorum*, in qua bullierint *folia Absinthii* addita *tinctura Martis*. A Fonte Chirurgico unicam præstabit sumere venæ sectionem in pede dextro ad lib. j. sanguinis educendum. Motu locali præsertim mane exerceatur. Cœna sit levis, & vinum *Absinthio Romano* sit alteratum, imò

imò justè fateri possum usum sequentis vini quovis mane ad uncias tres summæ efficacix semper fuisse in simili casu: & *Vini albi generosi, lib. XII. aquæ stillatitiæ Matricariæ, lib. iij. foliorum Dictamni Cretici, Pulegii, Origani, Sabinæ, ana, pug. i. Rubiæ, Cypæri, ana, 3. j. Cinnamoni, seminis Dauci, ana, 3. ij. Misce: bulliant ad quintæ partis consumptionem, inde adde limaturæ Chalybis lib. j.*; omnia reponantur in vase clauso, quotidie agitentur. *Dosis sit unc. iij.* Cum cibo gelatina Cornu Cervi utatur. Pauca hæc habebam pro salute Rev. Monialis.

CONSULTATIO CXXVI.

De Nimio Fluxu Mensium.

UXor Civis cujusdam nostri Ferrariensis, annorum ætatis 40. post longas febres, nimio Fluxu Mensium afficitur, ita ut macra, debilis, pallida appareat; nunc opem Medicam implorat.

Hæc affectio Mensium fluxus nimius est, qui definitur, Apertio vasorum, tam sanguineorum, quam lymphaticorum præternaturalis; cujus causa est Sanguis vel ferosior, vel Lympha acrior; per anastomosim enim, vel per diapedesim exit cruor subtilior factus; per diæresim verò à Sanguine, & Lympha acrioribus redditis provenire potest; multoties etiam à Sanguinis nimia copia, quod tamen non est in casu nostro credendum; sed tantum à vitio, id est à quali, non à quanto. Quod attinet ad Prognosim, fluxus iste, ubi fuerit frequens, vel continuus, malus est, defectu enim nutrimenti in Hæticam incidet Ægra, & exinde necabitur; semper ideo hæc affectio est periculosa: at quia non sumus in ætati senescente, aliquid boni sperandum est. Sanguis igitur iacraffandus erit, motus ejusdem cohibendus, & ejus acredinem temperare oportebit. Leviter igitur erit alvus sollicitanda, nisi enim ventriculum prius purgabimus, Ægra non curabitur, ait *Paulus Barbetta in Praxi*. Venæ sectio nihil facit ad causam. Proderunt ligaturæ brachiorum. Adstringentia præscribantur. *Ufnea* in pri-

mis *Cranii humani* internè, & externè poterit usurpari magno fructu, suadente *Frid. Deckers in notis ad Barbettam*. Convenit etiam *tinctura Martis, Coralliorum, stercus Asininum*; Multum levamen afferunt *Pilulæ Helvetii, species Diamartis Mynsichti, succus Urticæ urentis, Plantaginis &c.* Pulvis sequens juvare poterit: & *Lachrymarum Sanguinis Draconis, Oculorum cancri præparatorum, cretæ albæ vulgaris, ana, gr. x. Chalybis præparati, lapidis Prunellæ, ana, gr. v. Misce, fiat S. A.* pulvis pro una dosi, & ad plures dies sumatur. Inde propinetur sequens remedium: & *Radici Bistortæ 3. ij. herbæ Majoranæ, Pulegii, ana, manip. j. coque S. A. ex aquæ & Vin. Q. S. in colaturæ unc. XX. dissolve syrupi Artemisiæ, & Coralliorum, ana, 3. 8. semis, aquæ Cinnamomi 3. v. Misce, & bibat Ægra unc. iij. bis in die.* Unguentum sequens externè inungatur: & *Unguenti Comitissæ, olei Mastiches, Myrtillorum, ana, 3. j. sacchari Saturni, 3. j. Camphoræ, 3. j. misce, fiat linimentum.* Conservæ *Rosarum veteris, Cydoniorum, Corniolatæ optimæ* sunt. & *Aquæ Plantaginis in qua lotus sit lapis hæmatites usque ad rubedinem aquæ*; hæc aqua bona erit; sicuti *Jaspidem rubram femori alligatam* laudo. Suffitu *Ranarum combustarum* curari Menstruorum fluxum immodicum habetur ex *Thes. Med. Burnet. lib. XI.* Aquam ferratam potantam sunt qui extollunt in hujus morbi curatione: Tandem sequens remedium experirer. & *Aquæ lib. VII.* in quibus coquantur cortices trium *Aurantiorum acidorum & subviridium* ad duarum partium consumptionem, ex colatura, uncia viij. potandæ erunt quovis mane jejuno stomacho. His adjiciatur accommodata victus ratio, & causæ morbificæ adversa. Hæc dicta sint pro salute nobilis nostræ Mulieris, quæ à D. O. M. salutaria exopto.

Auxilia, & Eventus.

Corpore purgato leviter, & multis adhibitis ex præscriptis remediis, omninò pristinam sanitatem recuperavit, & nunc sana vivit.

CONSULTATIO CXXVII.

De Fluore Albo.

TRapezitæ filia; ætatis annorum XXIII. conqueritur de Fluxu Albo post ordinarium Mensium Fluxum. Facies ei pallet, oculi cinguntur circulo livido, capitis adest dolor, & interdum tument hypochondria cum cordis palpitatione: humor verò qui fluit, modò graveolens est, modò etiam nullo odore molestus. Consilium, atque opem medicam implorat.

Morbus iste Fluor Abus dicitur, & est humoris excrementitii tota natura à Sanguine alieni inordinata ex uteri excretio; & fit quando per muliebria genitalia illuvies varia plus minus acris emanere solet, idque nunc parcius, nunc copiosius, nunc foetida, nunc non, ut in casu nostræ Juvenculæ. Causa istius affectus est copia, & turgescencia lymphæ excrementitiæ, quæ excernitur, cui correspondet laxitas, & flacciditas prostatarum, undè facile labi permittunt illam materiam. Multoties verò non solum relaxantur prædictæ prostatae, verum etiam eroduntur; quod tamen non esse in nostra Patiente puto, quia naturæ tam acris non est materia. Credo autem massæ Sanguineæ vitium concurrere ad talem affectum. Quod si petatur, undè tanta ubertas liquoris hujus præternaturalis, qui excernitur in nostra Patiente, cum per prostratas non possit tanta copia emitti: consideremus quanta materies per nares exeat, quanta ex oculis, quanta ex ulceribus, & facile sic concipere possumus per prostratas vitiatas ex massa cruoris tale liquamen effluere. Addendum insuper, vaginam esse porosam, & semper naturaliter quandam lympham emittere in naturali statu, tantò magis in morbofo, ut in nostro hoc casu. Affectus iste Chronicus est, & curæ difficilis, prout omnes glandularum morbi; & quò magis erit inveteratus, eò difficilior curabitur; quia verò in Patientie sumus, quæ Adolescentula est, ac omnem morbi gallici timorem excludit, ideò difficilis minus erit curatio; quæ ut habeatur, indicationes eruendæ sunt, ut solitam methodum servemus: istæ
erunt

erunt absumere materiam illam effluentem, massam Sanguinis corrigere, prostates ad naturalem statum reducere, & partes affectas corroborare. Quæ ut assequantur ad praxim est deveniendum. Et primò quod spectat ad Chirurgiam, nihil, meo videri, ab ista sumendum, erit, cum Venæ sectio nullum hîc locum habeat, ita etiam suadentibus *Galeno* ipso, *Joh. Forti*, *Ettmullero* & quoquot vidi libros, qui de hoc tractant affectu, nullum inveni, qui sanguinis missionem applicet in Fluore albo. Ne vires ergo deficient à phlebotomia erit abstinendum, & solummodò Pharmacîæ, ac Diætæ fidendum, ex quibus tota curatio expectari debet. Venter igitur evacuandus, exhibita potione ex *Cassia*, vel *Manna clarificata*, post quam tanquam mirabilem *Joh. Fortis* proponit aquam *Tetuccianam* per quinque dies cum vehiculo *Mellis Rosati Solutivi*. Ad Sanguineam massam edulcorandam deveniri poterit ad usum decocti *Salsæparillæ*, *Lentisci*, & *Quercini*, ac radicis *Chinæ* per XX. dies. Sequens pulvis utiliter adhibeatur cum aqua *Plantaginis* sumendus, id est: ℞ *Cornu Cervi usti* 3. ij., *Limaturæ eboris*, 3. j. *Corallii rubri præparati*, *Succini præparati*, *Boli Armenæ*, *Mastiches*, ana, 3. j., *Seminis Anisorum*, 3. ij., *Sacchari quantum satis*, *Misce fiat Pulvis*, cujus dosis erit *Scrup. ij.* pro vice. Sequens Electuarium commendatur à *Zecchio*, & Ego bis feliciter eo usus sum in praxi facienda: ℞ *Gummi Arabici*, *Tragacanthi*, *Corallii utriusque*, ana, 3. ij. *Cineris putaminis ovorum*, *Cornu Cervi*, *Seminis Anethi*, *Succini*, ana, 3. iiij, *Mellis Rosati quantum satis*, *Misce fiat electuarium*. Dosîs sit 3. ℞., *Succum Urticæ*, & album *Ovorum* in aqua *Rosarum* concussum, jejuno stomacho ebibitum non solum Fluorem album, sed Gonorrhœam ipsam sanare ait *Amatus Lusitanus* referente *Th. Burnet*, lib. 6. *Thes. Med.* Extrinsecè lumbis sequens linimentum apponere bonum erit: ℥ *Boli Armenæ*, *terræ Samiæ*, *sanguinis Draconis*, *Mastiches*, ana, 3. ij., *pulvis nucis Cupressi*, 3. iiij., *Ceræ*, & *Olei quantum satis*: *Misce*, fiat linimentum. Certa verò fiducia in bona victûs ratione ponatur; quare victus sit exsiccans, carnes potius sint assæ, quam elixæ, vinum sit generosum, & leviter chalybeatum. Omnia porrò prudentiæ Medici assistentis committenda; & si videbitur, ad usum lactis *Asinini* deveniendum per mensem. Ista D. O. M. nostra secundet vota.

Eventus.

Ex præscriptis remediis multum utilitatis percepit; undè temporis spatio speratur perfecta in ea salus.

CONSULTATIO CXXVIII.

De Fluore Albo.

Nobilis Fœmina, ætatis annorum XXXIX. Albo Fluore per menses plures incontinenter, non citra tædium, vexata, sensim vires deperdens, appetentiam dejiciens, & spirandi difficultate inducta, subtumido corporis habitu, ac decolore affecta, otiosam, sedentariam degens vitam, præsertim hoc hyemali tempore, semper in pejus ruens, auxilium Medicum petit.

Iste morbus Fluor Albus muliebris dicitur, & à *Zuvingero* Gonorrhœa nuncupatur, & est inordinatus, ac penè continuus, modòque interruptus lymphæ plus minus viscidæ, & acris à glandulis Vaginæ, & cervicis Uteri destillantibus, & per partes pudendas hujus Mulieris, effluxus. Pars igitur affecta sunt glandulæ supradictarum partium, & in specie corpus prostaticarum glandulosum à *Graafio* circa ductum urinarium detectum. Causa ergo proxima hujus morbi est erosio tubulorum glandulosorum Vaginæ, Prostaticarum, & Cervicis Uteri, undè lympham mucosam Patiens nostra conatur assiduè effundere: eroduntur autem tubuli illi à lymphâ acri, & falsa, quam suppeditat massa Sanguinis Cacochymiâ ferosâ infecta, ex crudiore chylo excitata. Ad hoc etiam concurrunt laxior, & mollior fibrarum textura, & Cachexia. Ad Prognosim quod attinet, quia sumus in Fœmina ætatis consistentis, & menses sunt, & non anni, quibus tentatur hac affectione, idèò posse sanari puto; si enim inveterasceret, molestam exulcerationem, excoriationes, & inflammationem partium affectarum excitaret; imò Atrophiam, Hecticam, & Hydropem insanabilem paret. In curatione igitur causa antecedens, sive humorum dyscrasia

sia erit corrigenda, vascula Vaginæ erosa sananda, exulcerationes mundificandæ. Quæ ut assequantur nos confugere oportet ad Chirurgiam, Pharmaciam, ac Diætam; & quoad primam *Galenus*, nec verbum quidem fecit de Venæ sectione, ideòque eam tanquam inutilem rejiciendam puto: Si verò alvus non fluat clysteres imponere laudo. Frictiones toti corpori convenire docuit *Raym. Joh. Fortis de Morb. Mulier.* Ex Pharmacia igitur tota penè curatio dependet; sicque communiter primis expiatis viis, aquæ *Tetuccianæ* utiles erunt cum suo vehiculo ad octo saltem dies. Opiata sequens laudatur, cujus ter in die magnitudo nucis moschatæ sumatur: & *Conservæ Rosarum, florum Tunicæ, ana, ʒ. j., pulveris Corallii rubri præparati, Unicornu fossilis, ana, ʒ. j. boli Armenæ Orientalis, Sanguinis Draconis in lachrymis, ana, ʒ. ij., misce & cum Syrupo de Rosis siccis quantum satis fiat Opiata.* Utilis insuper erit usus pilularum *Helvetii*, ut & decoctum *Salsæparillæ, Sassafras, & Quercini*, ad mensem. Usus lactis non improbo. Approprietate autem juvant semen *Hederæ, & cortices Pini*, ut innuit *Hippocrates*; *Syrupus Myrtillorum; Mastiches, & terra Sigillata*: Extrinsecè porro lumbis hoc lenimentum juvabit. ʒ *Boli Armenæ, ʒ. ss., terræ Samiæ, Mastiches, Sanguinis Draconis, ana, ʒ. ij. pulveris nucum Cupressi, ʒ. iij, cepæ parum.* Misce cum Unguento *Malvino* fiat linimentum S. A. In Diæta caveat Patiens nostra à cibis aquosis, à metu, ira, ac tristitia. Pro potu uti poterit decocto ligni *Buxi, Sassafras, & Lentisci*; post pastum utatur potu Caffè: potius commendatur assum, quam elixum, in cibis, puta carnibus, quæ facilis debent esse concoctionis; vitet aërem pluviosum, & frigidum Ægra nostra; fugiat acida, & falsa, quia sunt glandulis inimica; observat enim *Dolæus* in Belgio talem affectionem vagari, quia ibi Mulieres abutuntur acetariis. Motus corporis, & exercitium sint mediocria; uti & somnus, & vigilia non excedant limites ordinarios, quia excessus omnis est malus. Talibus igitur remediis si Deus affulserit, si Ægra se præstiterit opportuna faciens, spero futurum, ut si non integra salus, saltem lenitas succedat, quam ex corde auguror.

CONSULTATIO CXXIX.

De Suffocatione Uterina.

JUvencula Nobilis, boni temperamenti, ætatis annorum XIX. menstruorum diminutione primò affecta, accedentibus Abdominis rugitibus, & ructibus frequentibus, difficili respiratione cum suffocationis metu; quibus supervenêre vellicationes in ventre infimo, unà cum vomitu amaræ materie, & hoc potissimum accedente tempore menstrualis fluxûs; multoties veluti suffocata remanet, voce destituta, extremis refrigeratis, pulsu penè deperdito, sine sensu, ac motu, mortuæ ad instar jacet per aliquod tempus, mox paulatim ad pristinum statum redit, pallido tamen colore suffusa. Ut sanetur nunc auxilium petit.

Affectio hæc Fœminis familiaris Hysterica passio, ac suffocatio Uterina dicitur, eo quod suffocari, & quasi strangulari videntur Fœminæ: per unum tantum symptoma definiri non potest, nunc enim respiratio impeditur, modò syncope afficiuntur, nunc animales, nunc vitales læduntur functiones, ut in præsentī casu. Potest autem tali modo definiri, ac describi. Suffocatio Uterina est congeries Symptomatum quam plurimorum: præprimis animalium, & vitalium actionum læsarum, proveniens à concursu morborum diversorum Cerebri, Cordis, & Uteri ob succi nervei, & cruoris impuritatem, & motum inordinatum per effluvia explosiva, aut etiam congelativa, ex retentis vitiosis particulis Sanguinis menstrualis collecto; cùm enim constans opinio sit, morbos mulierum ab Utero provenire, ut ait *Clar. Redi in suis consult. pag. 265.*; idcirco ab impuritate menstrualī uterinâ hunc affectum provenire dicendum, quatenus infarcto Sanguine fit ejus præternaturalis ebullitio in vasis præsertim Pulmonum, & Cordis, ut docet *Highmorus de Hysterica passione*. Causæ antecedentes internæ sunt vitium sanguificationis, mensium imminutio, ac defectus, & animi pathemata cum flatulentia, ex qua vasorum fibræ adeò relaxantur, ut sese stringere, & contrahere nequeant, undè tenuis, ac flatulentus

cruor in vasa flaccidiora irruens, illa non retinentibus fibris, præter modum attollit, inflat, ac distendit; retrahuntur autem, ac convelluntur nervosæ partes irritatæ à particulis salinis acribus ab humoribus emanantibus, & nervos ferientibus; Uterus quoque labem concepit ab inquinamentis menstrualibus retentis. Nunc de Prognosi aliquid dicendum; Et primò hunc morbum rarò periculosum esse observavi; potest tamen lethalis esse conjunctione aliorum morborum, & ut plurimùm contumax est, maximè cùm altas egit radices; verùm quia sumus in casu Adolescentulæ salus speranda; & quoniam frequentes, & copiosi ructus in insultu Affectionis apparent; ut habetur ex historia, ideò de sanitate non desperandum, siquidem, ait *Dolæus*, bonum est si copiosi ructus superveniunt, quod & observavit *Sylvius*, his enim, & morbus, & paroxysmus sæpè terminari solent. Indicationes igitur in casu nostro erunt, aperiendi Uteri vasa, auferendi irritationes, & nervosarum partium contractiones, tollendi congestionem humorum peccantium, purificandi cruoris massam, & viscera corroborandi, ut & eorum fermenta. Pro quibus assequendis, curatio, quàm celerrimè fieri potest, instituenda erit, ut meliùs, ac citiùs salus in nostra Patientè restituatur. Ad tria igitur Practicæ Medicinæ brachia deveniendum. Ex Pharmacia, itaque primò pro alvo leniendâ, ac primis communibusque viis expurgandis sufficere poterit *Potio ex Manna Clarificata ad §.vi.*: *Cysmata ex oleo Amygdalarum dulcium* laudat *Malpighius*. Pro alterantibus usurpetur *jus pulli alteratum foliis Mellissæ, Borruginis, Absinthii Romani*, & chalybeetur addendo aliquas guttas *spiritus salis Ammoniaci*. Utilis erit *pulvis Oculorum Cancris præparatorum, Rasura Eboris* & similia, quæ dulcificandi humores vim habent; *Crocus Martis aperitivus, Stibium diaphoreticum, Sperma Ceti* commendantur à Medicis. Et hîc notandum, quod omnia, quæ conveniunt in curatione Epilepsiæ, juvant etiam in hac tollendâ Affectione, ut advertit *Dolæus*. *Triphera Magna cum Opio* confert, sicuti bolus sequens frequenter usurpatus: & *Pulveris Castorei gr. viij. salis Artemisiæ ʒ.ß., Conservæ Borruginis, quantum satis. Misce fiat bolus, & deauretur*: Pariter uti poterit sequentibus bolis per vices sumendis: & *Pulveris Asæ fætida ʒ.ß. Castorei, Myrrhæ, Charabæ, ana ʒ. j. Camphoræ, ʒ.ß.,*

℞, *Triphera Magnæ cum Opio*, *Philonii Romani*, ana, ʒ. j. *Misce cum Syrupi de Artemisia quantitate sufficienti fiant Boli aurati num. X.* Externè ad excitandam in Paroxysmo hysterico nostram Patientem juvabit sequens remedium naribus admovendum: ℞ *Succini*, *Assæ Fœtidæ*, ana, ʒ. iij., *salis Ammoniæ*, libr. j. *Calcis vivæ*, libr. ij. *olei Tartari*, ʒ. xx. destillentur. *Simon Pauli folia herbæ Thee Uteri regioni*, & *Umbilico calidè imposita magni facit.* *Allium concisum*, & *Umbilico applicatum celebrant aliqui.* *Poterit*, suadente *Platero*, apponi sequens emplastrum Uteri regioni: ℞ *Galbani*, ʒ. j., *Styracis liquidæ*, ʒ. j. cum oleo *Nardino fiat emplastrum S.A.*, & extendatur super alutam, & Uteri regioni applicetur. *Potionem sequentem commendat Riverius*: ℞ *Aquæ Artemisæ*, *Rosarum*, *florum Aurantiorum*, ana, ʒ. j., *aquæ Cinnamomi*, ʒ. iij., *confectionis de Hyacintho*, ʒ. j. *Specierum Diamargariti*, ʒ. ʒ. *croc gr. iij.* *Misce fiat potio.* *Aqua hysterica Quercetani* apud nos *Ferrarienses* est in usu. Inter cætera, quod omnium maximè solet mulieres Utero præfocatas quasi momento revocare, est evaporatio facta ad nares ex pulvere verrucarum, quæ tibiis equorum adnascuntur, ita docente *Th. Burnet. in suo Thes. Med. Pract. lib. 8.* De Chirurgiâ verò, licèt *Malpighius* aliique Doctores nihil prorsùs dicant de Venæ sectione; attamen Ego venam secarem in pede dextro ad uncias x. Sanguinis hauriendas, & hoc non solum ad minuendam massam, verùm etiam ad evocandum catameniorum perennem fluxum, qui in casu nostro summoperè attendi debet; talis enim perennitas necessaria videtur. Victus tandem ratio sit mediocris, parcè tenui utatur Vino, imò juxtà *Redium* omninò à mero abstineat, & potet aquam *Nucerinam*, vel bonæ qualitatis, quas præscribit ipse *Redi in Consult. pag. 174.*: vitet aromata, acida, acria, & falsa: Hilari vivat animo. Et hæc sunt, quæ pro salute Illustris nostræ Patientis breviter exarare potui. Faxit Deus, ut omnia pro voto accendant.

Ferrariæ 5. Maii 1727.

Eventus.

Multa ex supradictis remediis adhibita fuerunt, & recta observata vivendi ratione, Nobilis Juvencula pristinae sanitati est revocata.

CONSULTATIO CXXX.

De Sterilitate.

B Ononiâ Ferrariam reverso tuæ humanissimæ Literæ mihi traditæ sunt, quibus affectionem honestissimæ Fœminæ ætatis annorum XXIX. diligentissimè descriptam habeo, quæ nihil aliud est quam Sterilitas, postquam enim Viro juncta sit octo abhinc annis, qui Vir antea ex prima conjuge duos filios habuit, & in omnibus suis corporis partibus bene, ac naturaliter se habeat, & sit in suæ ætatis anno XXXVI. tamen frustra mariti partes agit, nam uxor iafœcunda manet, ad venerem naturalia irritamenta non sentit, in congressu nullam habet delectationem, menstrua pauciora patitur, & ferè semper mucositates à vulva demittit. Nunc auxilium Medicum poscit.

Hic affectus à Practicis dicitur difficultas concipiendi, & abolita prolis generatio ob morbos varios partium generationi destinatarum. Inter varias causas Sterilitatis, quas egregiè *Cæsalpinus* enumerat, & *Clariss. Redi* in suis *Consultationibus* nuperrimè typis datis, una est præternaturalis humiditas in utero, & vagina luxurians, quo fit, ut locus generationis destinatus non sit idoneus, undè *Hippocrates* dixit, *quæ perhumidos habent uteros non concipiunt, extinguuntur enim in eis genitura*. Puto igitur in casu nostro Sterilitatem evenire à vitio Uteri, qui conspurcatus ab ichoribus præternaturalibus, semen ipsum Viri vitiat, & præsertim spirituosam partem ipsius coinquinat, & ineptam reddit ad ovum fœcundandum, quod si etiam fœcundaretur, descensum in Uterum, ab illis liquidis corrumpetur, & data ejusdem visceris lubricate, ovum ab Utero corruptum

tum exiret, quam veritatem etiam comprobat *Thom. Bartholinus* in *sua Anatom. lib. 1.*, dum ait Sterilitatem haberi à nimia humectatione, & relaxatione, ut in Scortis, vel ex nimio profluvio humorum. Ut ergo hæc causa tollatur, & fœcunda hæc Nobilis Mulier reddatur ad practicam Medicinæ partem confugere oportet; & primò conveniens existimo communiter corpus expurgare, ut facilius etiam Uterus, tanquam pars corporis, expurgetur. Poterit igitur primò assumi petio *Magistralis Solutiva* addito in infusione *Rhabarbari 3.j.*, & *Agarici trochiscati 3.ij.*; post tridie Vena pedis incidatur, & hauriantur uncix decem Sanguinis; convenientes postmodum erunt *aquæ Tetuecii* per octo dies cum vehiculo *Syrupi Aurei Solutivi*. Sic rectè purgato corpore, ad usum decocti *Salsæparillæ*, *Lentisci*, *Sassafras*, facti in aqua *Capillorum Veneris* per multos dies deveniendum. Potus Theè utilis erit, ut & balneum aquæ dulcis æstivo tempore, dum *Syrius* ardet. Congrua his omnibus addatur victus ratio, læto ac hilari vivat animo, sicque omnia a me dicta remittantur prudentiæ, & bonæ administrationi Excellentissim. Medici ordinarii.

Eventus.

Prædicta curatio instituta, ac omnia diligenter usurpata remedia, quæ in hac mea Consultatione præscripta fuêrunt, Mulier post quintum mensem gravida facta est, & statò tempore masculam peperit prolem.

CONSULTATIO CXXXI.

De Sanguinis Missione in Gravidis, & Somno post Venæ Sectionem

A Me petit, Vir Excellentiss., an in Mulieribus gravidis possit tutò venam secari, sine infantis, ac matris periculo; cui brevi respondeo cum *Celso lib. 2.*, & *Franc. Peccettio lib. 4*: In Gravidis mulieribus tale præsidii genus experiri Antiquis non placuisse,

cuisse, quandoquidem Veteres Medici timebant, ne foemina gravida, ob Sanguinem missum, abortum pateretur; apud Neotericos tamen res aliter se habet, cum Mulieribus gravidis quocunque gestationis mense tuto Vena secetur, ut quotidiana praxis ostendit: verum tamen est, hoc cum prudentia faciendum, & semper vires esse considerandas; si enim Mulier gravida, vel feбри, vel aliqua inflammatione afficiatur, tunc Sanguinem mittere oportet, ut curatio aegritudinis praesentis instituatur: cujus indicatio sit, massam cruoris peccantis, vel in quanto, vel in quali minuere, & sic ad debitam crasim restituere. Tutius autem Vena secatur à quarto mense, usque ad septimum. Hanc fuisse mentem *Hippocratis* apparet manifestè in *lib. Epidemior. 4.* de Uxore Acheloi, quæ sextâ die abortum fecit, cum esset sanguinea, & cum acuta febre laboraret, quia Sanguis non fuit missus, ex febris malignitate abortum fecit; unde colligitur utero gerentibus primò pro morbi curatione, & per accidens pro abortûs praeservatione, Sanguinem Vena secta auferri posse. Notandum tamen sola urgente necessitate in gravidis mulieribus Venæ sectionem admittendam esse, & licet videatur ex sententia *Hippocratis* Venæ sectionem abortum proritare posse, tamen ubi periculum mortis matris, & simul foetus evidens est, ut in acutis morbis, huic primùm remedio prospiciendum cum majus periculum sit evitandum, & ei quod plus urget occurrendum, altero tamen haud neglecto. Ulterius non negavit *Hippocrates* Sanguinis missionem in Gravidis, cum non dixerit, nunquam esse mittendum Sanguinem, sed dixit, cum major est foetus magis abstinendum; ergo infero minus à Venæ sectione abstinendum cum foetus sit minor; credo enim in gravidis mulieribus aliquando Venæ sectionem convenire, id est in magnis necessitatibus, ubi sint validæ vires, in modica tamen quantitate Sanguis emittendus, priusque renes sunt corroborandi unguento Comitissæ, vel alio simili linimento: & cum experientia satis abundè manifestaverit Venæsectionem in Gravidis sine abortûs periculo exerceri posse, ideò quando opus est, à Medico erit praescribenda; fuere enim, & adhuc sunt, multæ foeminæ, quæ ope Venæ sectionis abortum prohibent, ut testatur *Marc. Donatus Hist. Med. mirab.*; cum enim saepe plethora una

ex

ex causis sit, quæ abortum facit, ideò illi Venæ sectione occurrendum, nam nullo alio auxilio melius, ac citius, quam Venæ sectione, minui potest; quemadmodum igitur, ait *Frideric. Hoffmannus meth. med. lib. 1.* alimenti defectus potest interimere fœtum, sic & abundantia eum poterit suffocare, & ligamenta uteri frangere, & sic fœtus Sanguine diminuto poterit resurgere, ut spontè aliquando accidit in prægnantibus, quæ modò patiuntur naturalem fluxum hæmorrhoidum, aut naris hæmorrhagiam sine ullo fœtus periculo, immò cum mulieris gravidæ levamine; dempta enim ferventis cruoris abundantia, Mater, & Fœtus meliore sanitate gaudebunt. In instituenda porrò Venæ sectione in gravidis examinandæ sunt vires, quæ si fuerint debiles, & Venæ sectio indicetur, in minori quantitate tunc Sanguis est detrahendus, quod Medici curantis prudentiæ relinquendum; cæterum, ut docet *Horatius Augenius*, non sunt omnes mulieres ad hanc evacuationem ferendam accommodatæ, quæ enim exiguum Sanguinem habent, & quibus venæ sunt exiles, non ferunt phlebotomiam, aut si urgeat magna necessitas pro Venæ Sectione, necesse erit uti scarificationibus; sic enim Sanguis minuetur sine tanto virium detrimento, & eidem indicationi satisfiet, cum cucurbitulæ scarificatæ dicantur à Medicis vicariæ Venæ sectionis. Sic *Laz. Riverius* fatetur, in mulieribus pluries se abortum prohibuisse ope Venæ sectionis, etiam pluries tempore gravidationis celebratæ; immò etiam pedis Vena secanda tutò, & sine abortûs metu in gravidis, ut docet *Zacutus*; & Ego justè fateri possum, pluries vidisse Uxorem meam dilectissimam gravidam, cui Vena secta in pede nihil sinistri accidit, ut etiam in praxi facienda observavi in aliis mulieribus utero gerentibus.

Ad aliud verò quæsitum tuum mihi factum in humanissima tua epistola, nempe an dormiendum sit post Venæ sectionem; respondeo, verum esse nonnullos Medicos reperiri, qui somnum post phlebotomiam prohibent, quia putant cruorem redire ad cor cum ægri discrimine, quod non est verum; immò post Venæ sectionem Sanguis redit in præcordia magna cum naturæ recreatione. In Ægrotis autem, qui noctes ducunt infomnes, cum beneficio somnus accedet, si Venæ sectioni succedat; vires enim restaurabit, &

fessos dulciter irrigabit artus. - Si igitur veniet somnus post phlebotomiam, bonus erit, tanquam signum naturæ recreatæ, & ad bonum inclinantis, uti somnus est, qui in morbis acutis semper est bonus: Igitur & post Venam sectam juvabit. Si ergo post alias evacuationes bonus erit somnus, quidni etiam post Venæ sectionem, undè *Galenus ipse in Meth.* ait bonum esse, si Æger post sanguinis missionem in profundum somnum delapsus sit, quod etiam approbare videtur *Primerosius de Vulgi error. lib. 4.* & *Th. Bonetus in Mercur. Compital. lib. 19.* Si quis autem dicat, somnum prohiberi, ne fascia solvatur, id nihil est, nam diligenti adstantium cura, & aptè facta deligatione id potest prohiberi. Hæc autem sunt, quæ mihi circa ea, quæ quæsieras, Vir Illustriss., exponere licuit. Vale interim ad Nestoris annos, & ut me amare pergas, rogo.

CONSULTATIO CXXXII.

De Secundinarum Retentione.

ARtificis uxor partum debito tempore edit viventem, sed remanent Secundinæ: Obstetrix hoc periculosum symptomatum curare videtur, & à Medico graviter reprehenditur. Ægra, & domestici auxilium implorant.

Post partum aliquandò Secundinæ subsistunt, quæ, nisi quamprimum expellantur, puerperæ citam mortem minantur: retinentur autem vel propter nimiam densitatem tunicarum, & earum crassitiem, propter quam uteri parietibus firmiter adhærent, ob earum rursus intumescuntiam, virium exsolutionem ratione partus laboriosi, & oris ipsius Uteri occlusionem, vel ob incuriam, negligentiam, & imperitiam Obstetricis: ex qua verò causa casus hic noster judicandum relinquo Excellentissimo Curanti. Quoad Prognosim, ex Secundinis retentis eadem mala expectari debent, quæ ex foetu mortuo retento habentur, undè nisi natura, vel arte excludantur mors certa erit: quare statim elaborandum, ut foras exeant, foemina expurgetur, & vires conserventur; quæ erunt Indica-

dicationes in casu nostro. Illa autem, quæ Secundinas educere valent, sunt, vel Chirurgica, vel Pharmaceutica : Ex Chirurgicis ; manu periti ministri extrahi debet ; si verò non poterit, ad Pharmaciam transeundum. Antequam autem remedia Pharmaceutica apponam, notandum est cum *Waldschmidio in Prax. Med.*, Obstetrices, & Adstantes multoties nimis indulgentes parturientibus, has post enixum partum è Sella dimittere, licèt Secundinæ nondum exierint, quod est gravissimum crimen ; quandoquidem ad cubile non debet Puerpera reduci, nisi priùs Secundinas reddiderit : hæ autem commodè manu ab Utero divelluntur, ubi funiculus umbilicalis, qui indicis loco est, recens adhuc existit : quod si orificium Uteri jam sit clausum, debet apice unius digiti iterum aperiri, & digitus prudenter circumduci, donec & alter possit introduci, & inferi. Jam si digitos ad Uteri fundum usque exporrigere fas sit, tunc quærendus erit locus, ubi Secundinæ Utero adhærent, & digito inter Uterum, & placentam inserto cautè divellantur : de hac operatione jam satis. Nunc Pharmaceutica tangamus remedia. Sequens pulvis commendatur à *Timæo*. & *Trochiscorum de Myrrha*, pulveris radicis *Dictamni albi*, ana, ʒ. ʒ. *Boracis naturalis*, seminis *Violarum*, ana, ʒ. v. Misce, fiat pulvis pro duabus dosibus ; & assumatur cum aqua *Capillorum Veneris*, cui addantur aliquæ guttæ *Elixiris Proprietatis Paracelsi*. Oleum ligni *Juniperi* ad gutt. xxx. sumptum proderit. Porri succum cum vino potum mirificè valere ait *Zecchius* : Pulverem *Testiculi Equi*, *Trochiscos de Myrrha*, *Sabinam*, *Artemisiam*, *Crocum optimum* laudant Medici. *Martin. Rulandus* ait, Secundinam solvi, & expelli imponendo super umbilicum *Olei Heraclii* ʒ. iij. Succum *Levistici viridis* cum vino laudat *Forestus*. Conveniunt sternutatoria : *Secundina præparata*, *Dictamnus Creticus* commendantur à *Sennerto*. Peccant autem, ait *Bartholinus*, qui frictionibus manu rudi validis Secundinas conantur excludere : dolores enim augent ; undè postea vigiliæ, febres, aliaque mala sequuntur : poterunt autem lenta manu è lateribus ad ventrem reduci, monente *Borgesia cap. 14. obstetr. Gallic.* quasi tremula frictione ; immò inserto digito in fauces vomitum ciere, proponit citata *Borgesia* ut ex illo conatu Secundinæ excludantur. Modum autem commodum extrahendi

Secundinas retentas docent *Mauriceau, & Sebast. Melli in suis obstetric.* Clysteres etiam utiles erunt. Victus ratio medicamentorum virtuti respondeat; concedatur vinum, quatenus hoc facit ad Secundinas expellendas, ut docet *Nic. Lemery in Dictionar. Pharm.* Et hæc dicta sufficiant pro cura nostræ Patientis. Faxit Deus, ut saluti restituatur.

CONSULTATIO CXXXIII.

De Crusta Lactea.

Nuper tuis literis, petiisti à me habere aliquod remedium pro tollenda Crusta Lactea in Filiolo tuo, ab illa contagiosa peste malè vexato. Quid sentiam expono.

Morbus ergo, quo afficitur Puer tuus, à nonnullis dicitur *Crusta Lactea*, ab aliis dicitur *Lactumen*, vel *Achores*, qui sunt capitis ulcera tenuissimis foraminibus cutem perforantia, ex quibus glutinosa sanies effluere solet. Causa proxima est humor acris, ferofus, nitrosus, & mordax, crasso admixtus, dependens vel à nimia voracitate, vel meconio humores inficiente, uno verbo à lymphâ acido-acri, falsâ, & glutinosâ ex vitio chyli matris ingestione, vel lactis nutricis in lactatione: hinc puerilis ætas huic morbo maximè est obnoxia; Pro curatione autem, ut petis, varia proponam, ex quibus prudentia tua seligat quid libuerit. Lotionem hanc commendo. *R. Fumiterræ, Scabiosæ, Betæ, foliorum Hederæ, rasuræ ligni Guaiaci, ana, manip. semis, radicis Enulæ, Chelidonis, Althææ, ana, ʒ. i. Farinæ Lupini, Fabarum, ana, ʒ. i. ʒ. aquæ Communis, lib. iiij, coquantur S. A., & hac aqua pars affecta tepidè lavetur. Post lotionem sequenti linimento utatur: R. Radicis Enulæ Campanæ, Lithargyrii auri, & argenti; Cerussæ, Aluminis rupei usti, ana, ʒ. i. terantur subtilissimè, & incorporentur cum axungia porcina, addito modico olei Vitelli ovorum, & ceræ Q. S., ut unguenti formam recipiat. Jul. Cæsar Baricellus laudat linimentum ex oleo, in quo ad exactam coctionem Bufo, sive Rana terrestris ebullierit; Fides autem penes ipsum. Lixivium*
se-

sequens edocere nunc convenit, quod didici à Martino Rulando.
 & Absinthii, florum Chamæmeli, Serpilli, Matricariæ, ana, man. semis,
 baccarum Lauri, radices Ireos, ana, 3. j. radices Asari 3. j. ʒ. incidantur
 omnia, & singula sacculo condita, & coquantur in lixivio ex ligno Junipe-
 ri cinere facto, & hoc Luna decresciente caput quotidie lavetur.
 Internè verò exhiberi poterit Cornu Cervi philosophicè præparatum,
 Antimonium diaphoreticum, & Oculi cancrorum. Abstineat tam In-
 fans, quàm Nutrix à cibis falsis, acribus, & in specie à carne suil-
 la, à cepis, raphano, allio, & similibus; & poterit potui Nutri-
 cis, & Infantis infundi rasura Cornu Cervi cum floribus Fumariæ,
 Scabiosæ, Salsæparilla, & Sassafras. Ultimo loco expertus pro-
 pono lotionem aquæ Spermatidis Ranarum. Et hæc sufficiant.

CONSULTATIO CXXXIV.

De Favis, & Achoribus.

PUellus ætatis annorum quatuor, filius cujusdam civis nostri
 Ferrariensis, à multo tempore afficitur Achoribus, ac Favis;
 turpia enim ulcera multis foraminibus pervia in capite tolerat,
 materiam crassam, & foetidam manantia non sine tineæ con-
 tumacis periculo. Parentes ejus me in Consilium vocant, post-
 quam incassum varia remedia experta fuerant.

Morbus igitur iste à multis Favus dicitur, à multis Achor;
 quia duo hæc nomina à variis Scriptoribus confunduntur invi-
 cem; licet Ego Favum ab Achore ratione varietatis foraminum
 distinguam, quia Favus ulcus est habens foramina majora, Achor
 verò minora. Sunt autem ulcera capitis manantia, ex quibus
 glutinosa sanies solet effluere, cujus causa est portio salino-sul-
 phurea cum pituita mixta, & collecta cum excrementis alca-
 licis, & corruptis; à Græcis ἀχῶρες Achores hæc fordida ulcera vo-
 cantur, & κηρίον, Cerion: a Latinis ulcera manantia, & Favi di-
 cuntur; ab aliis Tinea absolutè vocatur; quia sub hoc nomine om-
 nia manantia capitis ulcera comprehendi possunt; & a Francisco
 Peccettio dicuntur ulcera capitis foraminulenta cum aliquo tumore,

à quibus sanies tenax emanat melli similis. Ista ulcera difficilior sanantur, & maximè si inveterata, quantò enim recentiora sunt, tantò faciliora curatu; quod si pauca fricatione rubeat cutis, signum erit facilis sanationis; sin minus, è contrà: Attamen in casu nostro omnes lapides movendi erunt, ut puer salutem recuperet ad suorum parentum consolationem; quocirca primò levissimè expurgatis communibus viis modico oleo *Amygdalarum dulcium recentissime expresso*. Galenus sola charta combusta, & aceto diluta locum affectum illinebat, & hoc remedio plurimos curavisse ait *Thom. Burnet. Thes. Med. lib. 1.* Poterit autem ablui caput sequenti lavacro: R. *Fumariæ, Betæ, Lapathi acuti, Malvæ, Chelidoniæ, Hederæ terrestris, radicis Althææ, ana, manip. ʒ. coque in aquæ communis Q. S. S. A.* Deinde ut crustæ morbosæ melius emollescant, post prædictam lotionem caput inungatur sequenti linimento. R. *Mucilaginis Fænugræci, Seminis lini cum aqua Malvæ extracti, adipis Gallinæ, Porcini, olei ex Vitellis Ovorum, ana, ʒ. 1., Croci ʒ. ʒ. misce pro linimento, & sæpius reiteretur balneum, ac linimentum.* Si autem hoc non prodesset, uti poterit alio unguento, quod tale est R. *Lithurgyræ auri, & argenti cum aceto acerrimo, & oleo rosaceo nutriti, ʒ. ij. Cerussæ aqua solani lotæ ʒ. j. Aluminis rupei usti, ʒ. ʒ. Fuliginis, pulveris radicis enulæ siccatae, chartæ combustæ, ana, ʒ. ii. Olei Vitellorum Ovorum, pinguedinis Gallinæ, ana, ʒ. ʒ. olei Laurini, & Aceti Q. S. Incorporentur in mortario plumbeo S. A., & fiat Unguentum molle; & tale unguentum est magni pretii apud Petrum Forestum, ita ut ipse credat hoc esse magnæ efficacisë. Julius Cæsar Baricellus utebatur suo tempore linimento ex oleo, in quo ad exactam coctionem, bufo, sive rana terrestris ebullierat: Prius tamen semper capilli sunt abradendi. Lixivium factum ex cineribus *Lignorum Ficus* in quo cocta sint *Malva, Lapathum acutum, & Lupini* laudatur. In unguentis semper *Tutia præparata* admiscenda. Internè poterit quotidie exhiberi decoctum radicis *Chinæ, Sassafras, & Salsæparillæ*, ut sic corrigatur massa fluidorum peccans in hoc puello. Supra dixi, *Galenum* commendare medicamentum factum ex *papyro*, sive *Charta*, verum papyrus, sive *Charta* nostra non est eadem antiquorum, attamen habet fermè easdem facultates, sed debiliores, ut advertit *Pecet-*
tius*

tius lib. 3. *Lixivium dulce*, in quo *Aristolochia* rotunda decocta sit, laudant aliqui Medici; alii *Mercurium* adhibent. Ego verò à Mineralibus, & præcipuè ab argento vivo abstinerem, quia sæpè secum affert nocumenta. *Lac Asinæ* ad mensem exhiberi poterit, servatâ optimâ victus ratione a Medico assistente juxta morbi, & Naturæ Patientis exigentiam dirigendâ.

CONSULTATIO CXXV.

De Epilepsia Puerorum.

Puer ætatis mensium 16. à sanis parentibus ortus, vix ab usu lactis semotus, horis pomeridianis in lectum, ad somnum capescendum, repositus, ut moris erat, placidè visus est quiescere; verum in somno circa præcordia anxietas apparuit, inde apertis oculis, labia, & mandibulæ motu reciproco per aliquod tempus convelluntur, postea paululùm cessavit violentia istius affectûs, mox rediit: hinc Parentes sollicitè Medicum vocant, & petunt auxilium.

Morbus hic, quo vexatur præsens, Puellus, Epilepsia puerorum vocatur, ut ex signis, seu symptomatibus prædictis constat, & magnam habet affinitatem cum Epilepsia adultorum, cum hoc discrimine tamen, quod in puellis originem habet vel à Ventriculo, vel ab Intestinis, eo quia vel lac corruptum, vel aliquod acidum vitiatum sua acredine Ventriculi, & Intestinorum fibras rodens, ac vellicans, fortes dolores, ac convulsiones, & anxietates parit: Quocircà subjectum istius affectionis erit organum sensuum, & pars musculosa, & præsertim fibræ labiorum, oculorum &c. Anxietas verò dependet ab irritatione fibrarum Diaphragmatis, velut primarii instrumenti respirationis. Ad Prognosim quod spectat, quia Epilepsia morbus gravis est in adultis, sic in puellis gravior; melius erit, suadente *Hippocrate*, si superveniat febris, licet *Doleus* in sua *Enciclop. lib. 6.* fateatur, se ab *Hippocratis* aphorismo deceptum in suo filiolo tali Epilepsia denato, licet febris tali convulsioni supervenerit. Morbus igitur præsens valdè timendus erit,

mul-

multos enim pueros tali mortuos affectu observavi. Duplex potest esse curatio in nostro casu, alia in paroxysmo, altera extra paroxysmum. Quando urget affectus, inungantur nares oleo *Succini*, & apponatur *aqua Reginae Hungariae*, & accendatur pro suffitu *lignum Aloës*: in primis autem os apertum servetur, & cavendum, ne lingua dentibus incidatur; stomachi regio oleo è *nuce Moschata* expresso inungatur, ac si urgeat paroxysmus, cauterium in nucha inuratur. Extra paroxysmum curatio institui poterit remediis sequentibus. Primò *oleum Amygdalarum dulcium* recenter expressum ad educendos pravae humores in primis viis existentes exhibendum erit jejuno stomacho; mox *pulverem Guttetæ Riverii* per plures vices assumendum consulo, ex tali enim remedio multos pueros sanitati restitutos notavi: exhibeatur autem hic pulvis cum *aqua Pæoniae, Melissæ, Betonicae*, & hujusmodi. A *Dolæo* laudantur sequentia, nempe *Pulvis Secundinae humanae, Corallium rubrum præparatum, Cranium humanum, Oculi Cancrorum præparati, oleum Succini*. Ego *Oleum nostrum Contrapestem* commendo tam intus, quàm foris; *Aquam Cerasorum nigrorum, Epilepticam Langii*, & pro amuleto *radicem Pæoniae*, ac *ungulam Alcis*. Clysteres ex decocto *Malvæ* utiles erunt. Accedat congrua victus ratio, quæ nec quantitate, neque qualitate vitiosa, præsertim acida peccet. Præcavendi autem sunt terrores, ac angue pejus, & cane fugiendi, quæ omnia ut *Puella nostro* proficua sint, D. O. M. ex corde precor.

CONSULTATIO CXXXVI.

De Dentitione Difficili.

A Liquantisper levatus variis animi, & corporis molestiis, salutem Filioli tui, Vir Sapientissime, consulturus respondeo; ille enim difficile dentitionem patitur non sine mortis metu ob febrem, alvi fluxum, dolorem, aliaque symptomata, quibus Puer afficitur, & sanè Puerorum ora valdè cruciat ex dentibus dolor, cum è vagina prorumpunt dentes, & ruptis gingivis prodeunt.

Iste

Iste affectus dicitur Dentitio, seu solutio continui gingivarum à denticulis cuspidatis jam genitis, & erumpentibus perforatione facta; & ut clarius me explicem, nihil aliud est hic affectus, quam gingivarum à dente accrescente perforandarum dolor urgens ex interspersis variis nervulis, qui tenent consensum cum partibus nobilioribus, undè de facili evenit, ut sub atroci dolore tandem corpus totum nervosum vellicetur, undè convulsiones etiam possunt accidere, maximè quia in se ipso nervosum systema in Infantibus tenerius, ac mobilius existit. Signa istius difficilis Dentitionis sunt, ut etiam innuis tu, Vir Præstantissime, in doctissima tua Epistola mihi tradita, mense septimo, vel octavo ætatis salivatio multa, & copiosa, ex dolore quippe gingivarum vicina vasa salivalia irritantur; Tussis, & Diarrhœa cum inquietudine, vigilia, fletu, genarum rubore, pavore in somno, feбри, & digitorum frequenti in os impositione. Quod Prognosim attinet: Dentitio difficilis laboriosum est malum, imò sæpè in mea praxi facienda lethalem esse affectionem observavi; Macilentis tamen minus periculi afferre, quam obesis ait *Joh. Franc. Louv. ab Ersfeld in tract. de Morb. infant. cap. 25.* Curatio autem Dentitionis consistit in hoc principaliter, ut dentium exitus ocus promoveatur, exinde obstacula retardantia debent removeri, & mitigari symptomata, servato semper à Nutrice bono vivendi modo. Ita lenientia, & emollientia adhibenda erunt, quæ scilicet gingivarum carnem laxare valeant, & dolorem mitigare. Nutrix ergo oleo *Amygdalarum dulcium*, melle & *Similibus* inuncto digito sæpe Pueri gingivas affricabit; *sanguinem cristæ Galli*, lac *caninum*, adipem *Anseris*, vitellum *Ovi*, *Medullam ossium Vituli*, & *sucum è cancris vivis* gingivis applicatum commendant alii. Fortiora verò aperientia, & extrahentia ab experientia videntur *cerebrum Leporis*, *Agni*, *Cuniculi*, *adeps Leporis* ad gingivas appositus. Extrinsecus utendum est *Butyro recenti*, quo Puelli genas manè, & serò inungantur; quod si hujusmodi remediis Dentitio non facilitetur, tunc, suadente *Ambr. Pareo*, scalpello gingivas aperire decet, & sic dentibus exitum facilem procurare, ut ipse *Pareus* fecit in propriis Liberis. *Dolæus* suadet in difficili Dentitione nuchæ fonticulum applicandum esse. Infanti autem frigida gingivis non admovenda esse scire

oportet, nam potius Dentitionem impediunt, ideòque non probo aurum, argentum, ebur, corallum, dentem apri, & alia dura corpora collo suspenfa Pueris, ut solet vulgus, quia hæc alveolos dentium potius occludunt; sed talium duriorum rerum loco adhibeatur *Liquiritiæ radix*, vel *Althææ*, vel *Iridis Florentinæ Syrupo Coralliorum* illitæ. Addo; ad Dentitionem facilitandam *Felix Platerus* gingivas Pueri leniter fricabat sequenti linimento. & *Cerebri Cuniculi in vino cocti*, vel *Butyro recenti cum Melle permixti*. Ad dolorem leniendum, & inflammationem prohibendam peculiariter commendatur *succus Sempervivi*, & *Plantaginis à Timæo*, & *Burneto*. Antequam ad umbilicum hujus Epistolæ perveniam, notandum Dentitionem aliquando notham esse, ut advertunt Medicinæ Magistri, cum tumores quidam in gingivarum posteriori parte acumen protuberant, undè Pueri malè afficiuntur; de hac autem spuria Dentitione certior fiet Medicus, si Infantem ad posticam aurium partem digito compresserit, statim enim ille ob dolorem ejulabit; tale malum aliquandò periculo non vacat, cui profligando imprimis conducit externam aurium regionem, præsertim posticam *axungia Leporis* inungere frequenter, & gingivas oleo *Amygdalarum dulcium* sæpius demulceri. Habes igitur meam de difficili Dentitione sententiam tumultuariò scriptam, à multis enim negotiis impeditus, diligentia uti nequivi. Vale, ac me ama.

CONSULTATIO CXXXVII.

De Furunculis.

JUvenis Nobilis annorum ætatis XXI. post Febrem Quartanam contumacem China Chinæ fugatam, incidit in furunculurn in facie penes labia, à quo vix liberatus iterum in eundem affectum in manu læva incidit, quo superato, & curato, denuò Furunculus recrudit in coxâ dextra. Ut à tali molestia liberetur auxilium petit.

Morbus iste *Δολιχ* græcè; *Furunculus* latinè dicitur, & significat tumorem ex crassis humoribus in carnosiss partibus consistentem,

mi-

mitem quidem, cū solam occupet cutem, sed pertinacem, & malignum ubi subter actis radicibus erumpit, & est de genere inflammationum in abscessum degenerantium *Amath. Cast. Brun.* Quod ad Prognosim spectat, Furunculus periculo vacat; attamen, suadente *Dolæo*, in Adultis non tam facile, quam in Pueris curantur isti tumores; cū autem oriatur à Sanguine polypofo, & crasso, ipsum attenuare debemus, & volatilizare. Quæ ut assequantur: primò Sanguinis missio celebranda in pede, inde levis purgatio instituat; & pro alterantibus utatur decocto *Malvæ, Betonicæ, Borriginis cum rasura Eboris.* Inde veniendum ad usum decoctionis *Sal-separillæ* factæ in aqua *Nucerina* ad mensem; quo tempore etiam Furunculi curatio Chirurgica instituenda. Idcirco *Galenus*, referente *Peccettio*, ait, coquendum esse Furunculum appositione frumenti jejuno ore mansi, & ad Cataplasmatidis formam redacti, & applicati; Si verò dolor urgeat, & materia suppurationi sit rebellis, sequentibus utatur: *℞ Liliorum alborum, ʒ.ij., foliorum Malvæ, Violarum, ana, m.j. coctis, & contusis, adde farinæ Tritici, Hordei, ana, ʒ.j. pinguedinis Suillæ, ʒ.ʒ., Butyri recentis, ʒ.ij., Vitelli Ovorum, n. ij. Misce, fiat S. A. Cataplasma*; vel si hoc non arrideret, cerato sequenti utatur, quod præscribit *Joh. Dolæus in Encycloped. Chirurg. lib. 5. cap. 4. ℞ Gummi Galbani, Ammoniacy, ana, ʒ.ʒ., Styrcis Calamitæ, pulveris radicy Bryoniæ, seminis Cumini, ana, ʒ.ʒ., resinæ Pini, ʒ.iiij. olei Guaiacy, ʒ.j. Misce, & S. A. fiat Ceratum.* Multi *Diachylon cum Gummatibus* adhibent. Aperto tumore educatur pus, & cicatrizetur more consueto. Ut autem præcaveatur, ne sæpius ista tubercula infestent Patientem nostram, vestibus insuatur *Nux Moschata*: qua verò virtute amuletum hoc à Furunculis immune corpus reddere queat, sagacioribus expendendum relinquit *Joh. Munnicks in Chirurgia.* In Diætâ alimenta sint exsiccantia, & calefacientia, & frequens sit *Oryzæ* usus. Vitentur acria, falsa, & acida; vinum sit tenue. Et hæc pro præsentis sint satis.

CONSULTATIO CXXXVIII.

De Pernione, & Grandine.

HEri vesperi redditæ mihi fuere literæ tuæ mihi semper gratissimæ, in quibus de duabus affectionibus meam sententiam requiris. Primus casus est de Pernione, alter de Grandine oculorum. Circa primum, Puellum habes quovis hyeme Pernionibus correptum in manibus, pedibus, auribus, ac naso, & mihi auxilium postulas.

Perniones igitur sunt tumores hyberno tempore in calcaneis, digitisque pedum, ac manuum, & aliis partibus quoque exorti, & dicuntur solutæ unitates, aut fissuræ à summis rigoribus hyemalibus provenientes, & oriuntur frequentius in talis: sunt autem inflammationis genus, seu tumores in manibus, & pedibus, præcipuè Puerorum, in quibus materia quædam acris inest, & rodens, undè ulcus siccum, ex quo nulla, vel pauca humiditas emanat, excitatur, qua neglecta non rarò gangrænam inducere solet. Ut autem iste morbus curetur, primò *fotus calidi cineris* adhibeatur, quo remedio testatur *Fallopianus* se liberatum fuisse à Pernionibus, quibus singulis annis afficiebatur, *Oleo Cerae* poterunt illiniri, ut monet *Rodericus a Fonseca in Consult.* Excavetur Rapa, & infundatur *Olei Rosati*, & *Therebinthinæ*, ana, .j. supra calidos cineres ponatur rapa, & bulliat, & hoc liquore calidè inungatur Perniones. Quòd si exulcerentur, imponatur *unguentum de Tutia*: Immò nonnulli *rapam coctam*, contusam, & ferventem imponunt felici successu. Ego antequam rumpantur Perniones, *spiritu vini* eos abluo, *aqua Reginae Hungariæ*, vel *Oleo Saxi*, quod *Petroleum nativum montis Zibini* vocant, quod oritur in Mutinensi Ducatu. Adeps Anseris commendatur à *Dom. Lovv ab Ersfeldt in lib. de infant. morb.*

Nunc de Grandine aliquid est dicendum, ut tuo satisfaciam desiderio, & meæ obtemperem obligationi, Grando igitur, quæ Græcè *χαλαζα* dicitur, in foro nostro Medico significat tuberculum grandini simile, & pellucidum, in palpebris concretum, & est vitium,

tium, quod oculos infestat, cujus causa est humor quidam lentus per congestionem concretus, qui provenit à lymphâ acidâ, & condensata, in gypseam, aut crySTALLINAM degenerans naturam, ad quam tollendam medicamenta lixivialia à nonnullis commendantur, quæ habeant vim talem duritiem resolvendi, & dissipandi. *Emplastrum Diachylum cum gummatibus* laudat *Joh. Dolæus in Encycloped. Chirurg.*, ut & salivam hominis jejuni, quæ multo sale volatili constat; *axungiam Viperarum &c.* Multi commendant ad Grandines tollendas *Ceratum de Ranis cum Mercurio*; aliique *ceratum ex Marcasita*. Ego autem feliciter utor sequenti linimento sæpe ad partem affectam apposito: & *Olei Chamomillæ*, & *pulveris Salis Saturni Q. S.* ad conficiendum linimentum. Si verò non cedant prædictis remediis, cùm jam humor Grandinis concreverit in gypseam duritiem, tunc aperienda erit, & materies contenta educenda. De Diætâ nihil occurrit advertendum. Habes autem, Vir Excellentiss., quæ tuis petitionibus respondent, in quibus si quid fortè displicuerit ignorantiam meam accusa, non voluntatem. Vale amicorum optime, & me ama, iterum Vale.

CONSULTATIO CXXXIX.

De Asperitate Cutis.

HAbes curandam Juvenem Nobilem pertinaci cutis Asperitate laborantem, & meam sententiam de tali affectu scire desideras.

Dico cutis Asperitatem symptomata esse qualitatis mutatæ in superficie cutis, quo ejus mollities naturalis tollitur, & inducitur asperitas, non incommoda tantum, sed ipsi munditiei adversa, quæ sane in Juvene virgine valdè considerabilis est. Subjectum hujus affectionis ipsa cutis est: cutis autem, ut tu, Excell. Domine bene scis, ipsa est involucrum membranaceum crassum potissima sui parte, ut notavit *Zuvingerus*, è nerveis filamentis, & vasculis humorum affabrè inter se complicatis contexta, qui-

bus glandulæ numerosæ, harumque excretorii tubuli, tanquam sudoris, aut vaporum viæ densissimè interponuntur; ita ut ipsa cutis, quasi è duplici substantia componatur, exteriorè scilicet nervoso-membranea, interiorè verò glandulosa, & quasi carnea: si autem cum *Malpighio* per microscopium cutem nudam diligenter consideremus, primò occurrer corpus reticulare crebris foraminibus suis, non solum tubulos sudorificos, sed & plurimas nerveas pyramidales papillas, in cuticulam usque protensas comprehensens: Infra porrò corpus istud reticulare numerosissimæ hærent glandulæ, in quibus materia halituaosa ex arterioliis secernitur, & inde per vascula excretoria ad ipsam protunditur cuticulam, & sub forma sudoris expellitur: rugosa est ipsa cutis, & inæqualis superficiei, sulcis ubique prædita, in statu naturali mollis, totum corpus contegens, in multis locis crassa, & densa, in aliis verò tenuis, & tenella. Sic in statu naturali cutis est mollis, terfa, lævis, polita, cum nempe ejus pori humore blando, & oleoso repleti sunt. Lævitas autem hæc nativa in casu nostro deperdita est culpa humoris vitiosi falsi in cutaneis porositatibus copiosè collecti, aut frigoris nimii elapsæ hyemis, fibras epidermidis constringentis, ex quo cutis superficies magis rugosa, & aspera redditur. Ad tollendam hanc cutis asperitatem, primò debet ejus fordes, si adest, detergi, quod fieri commodè poterit vino, & aqua calida, addito furfure, vel panis mica. Deterfa verò cute, eadem fricari poterit sequenti pasta: *Amygdalas dulces* recenter excorticatas contunde, dein misce cum mica panis recentis, & cum vini albi, & aquæ Rosarum quantitate sufficienti in pastam redige, qua postea cutis ipsa fricetur. Alii commendant *placentam* illam *Amygdalarum dulcium* post expressum oleum in prælo remanentem. Multi *axungiam Caponis*, & *Sperma ceti* recens, pulverem *Ireos Florentinæ*, quatuor semina frigida majora, *masrich*, & *albumen ovorum recentium*, nec non lac *Asinæ* utiliter proponunt. Tu ex his cape, quod magis libet. Bonum erit, si placuerit, prius communiter purgato corpore, uti decocto ex *Salsa*, & *China* ad corrigenda salia in humoribus scatentia, ex quibus rigiditas, & asperitas in cute exoritur. Quibus omnibus congrua,

&

CONSULTATIO. CXL.

De Herpete Serpiginoso.

Petis à me consilium pro Herpete exedente, seu serpiginoso in Viro Religioso amico tuo suavissimo, qui tali morbo nonnullis abhinc annis afficitur.

Est igitur hic morbus exulceratio pustulosa proveniens ab ichorosis, & lixiviosis Sanguinis particulis in corporis habitu subsidentibus, & corrodentibus; cujus duo sunt species, alia miliaris, alia exedens, quæ est præfens, de qua tu poscis, & unitur dolori plus minus ardenti, ac inflammatorio; affecta enim pars asperitate præternaturali est contaminata: in principio serum exulcerationes istæ emittunt, postea etiam purulenta materies emanat; salia enim acido-acuta illius causæ lixivialis, viscoso humori irretita, per glandulas miliares cutis probè secerni nequeunt, ibique subsistentes extimam cuticulam erodunt, & exedunt non solum, sed ipsas cutis fibras, & carnosum panniculum exulcerant; & certè in principio curatio istius morbi faciliior erit, quam in progressu temporis; non erit ergo negligenda curatio. Et ut exordiar à præparantibus, sive alterantibus, uti poterit jusculis, in quibus bullierint flores *Agrimoniæ*, *Cardui Benedicti*, *Cichorei cum radicibus contusæ*, *Radices Enulæ campanæ*, *Scorzoneræ*, & *Graminis*. Alvum moventia vel erit *Manna*, vel *Cassia*. Pulvis *Oculorum cancri præparatorum*, *Sibii diaphoretici*, *Cornu Cervi usti*, utiles erunt, *Aquas Thermales*, & balnea aquæ dulcis commendo. *Aquam Calcis* ad ablundam affectam partem laudat *Theod. Zuvingerus in Praxi*. *Unguentum Pomatum cum Tutia* expertus propono. Ex Chirurgia *Venæ sectio*, & *cucurbitulæ scarificatæ* utiles erunt; sicuti usum *Lactis Asinini*. Demum accedat bona victus ratio, quæ talis instituitur, ut causæ morbi sit adversa. Abstineat à vino, potet aquam, & Deus iis omnibus faveat.

CONSULTATIO CXLI.

De Scabie fœda, ac pertinaci.

Illuſtris Civis, gracilis habitûs, temperiei bilioſæ, ætatis annorum XXXVII., computationibus generoſi vini deditus, à multo tempore ſcabendi deſiderio tentatus, mox puſtuloſis, & minutis tumoribus affectus, tandem incidit in fœdam, ac pertinacem Scabiem, ad quam tollendam multa ex arte fuere à perito Medico adminiſtrata remedia, verùm omnia fruſtanea fuerunt, ità ut adhuc perſeeveret contumacia Scabiei, Illuſtrem noſtrum Patientem vexantis. Nunc conſilium poſtulat.

Morbus igitur iſte *ſcāpa* à multis, ab aliis Scabies dicitur, & nihil aliud eſt, quàm obſtructio ulcerosa, ac puſtuloſa cutaneorum tubulorum cum dolore pruriginoso; afficiuntur autem excretorii tubuli glandularum ſubcutanearum, quatenus lymphæ falſo-acris ibi adhærens, puſtulas cum elevatione cuticulæ producit. Incipit Scabies cum pruritu ſtimulante Ægrum ad fricandum; cùm igitur cutis ita fricatur, ejus tubuli comprimuntur, & ſic cuticula nonnihil elevatur, & puſtulas ſanioſas efficit; & dum æger cutim ſcalpit cum aliquali voluptate, fit rubefcentia, & incaleſcentia, undè puſtulæ creſcunt, ac tandem ſquammulæ in ſuperficie oriuntur; ruptis porrò puſtulis ſanies ichoroſa, acris erit, & vicina loca inficit; ex quo apparet, cauſam hujus affectionis eſſe ſerum falſo-acidum, & lympham acrem in extremitatibus tubulorum cutis ſtagnantem: hinc acrimonia hujus humoris extremitates tubulorum erodit, & puſtulas prædictas producit; & ſi vaſculâ ſanguinea inficit, tunc cruor ſimul exit, ut in caſu noſtro. Cauſæ autem ſunt omnia ea, quæ valent reddere acrem lympham, & ſerum ipſum, ut chylus falſus, & crudus ex falſis cibis congeſtus, & ex nimia ignis incaleſcentia vitiatus. Aliqui accuſant vermes, qui cutem perforando pruritum, & ſolutionem continui inducunt. Ad Prognofim quod attinet: affectio hæc moleſta magis quam periculosa exiſtit; cùm autem fœda eſt, pertinax, & ſquam-

squammosa, nisi Sanguis promptè corrigatur, in lepram mutari potest; Pro curatione suppono, jam rectè fuisse communiter purgatum corpus, & in tali casu propono *pulverem Viperinum* ad multos dies sumendum cum *decoctione Fumariæ*. *Decoctum Salsæparillæ* utile existimo, sicuti *aquam sibiata* vulgò *del Pompenacio*. Balneum utile erit ex aqua communi, in qua bullierint herbæ sequentes *Scabiosa*, *Hypericum*, *Chamomilla*, & similes approbatæ à Magistris Artis nostræ. Vinum medicatum purgans aliquandò profuit. Inter hæc cucurbitulæ scarificatæ dorso applicatæ non nocebunt. Unguentis insuper utendum erit, à quibus salus speranda; & notandum in unguentis sulphur locum principalem tenere, ità ut aliqui sint, qui sulphur etiam in casu nostro internè assumendum proponant. *Cingulum Mercuriale* laudat *Theod. Zvingerus* in *sua Praxi med.* quo tamen ego nunquam sum usus: Lotionem ex aqua, & vino factam in quibus bullierint folia *Rhodaphnis*, *Salviæ*, *Rorismarini*, & *Rosarum* commendant multi. Addo illud *Amati*, quod incantamenti instar esse ait *Joh. Stephanus*, & fit ex radice *Enulæ contussa* cum *axungia suilla*, *sulphure vivo*, & *modico salis*, & *unguento Rosato*, quod poterit aromatizzari pauco *styrace* liquido. His addi debet optima vivendi norma, quæ refrigeret, humectet, dulcificet, & bonum succum gignat, alia multa mitto; sat enim est apud virum Sapientem digitum ad fontem intendisse.

CONSULTATIO CXLII.

De Scabie.

SECUNDUS jam percurrit annus, quo non minùs molesto, quàm scædo cutaneo affectu pruriginoso, & scabioso vexatur Honestus quidam Civis ætatis annorum 43., habitûs carnosus; à quo sordido affectu, ut liberetur opem Medicam implorat.

Præfens Morbus Scabies à Medicis dicitur, quæ est aspredo quædam cutis, seu ejusdem levis exulceratio pruriens, ac rodens cum pustulis, qui affectus provenit ab ichoroso corrupto Sanguine

multis salibus lixiviosis, & corrosivis particulis fixis scatente, cutem dissolvente. Nullius autem certè morbi labes (peste tantum excepta) facilius, aut certius, quam Scabiei propagatur; ita ut, non tantum contagiosus sit affectus, sed etiam pertinax, quemadmodum in præsentì casu. Circa hujus Scabiei curationem, duæ veniunt indicationes; prima ut cruor ad debitam crasim reducatur; secunda, ut ipsius cutis porositates à Scabie liberatæ, suam pristinam corroborationem recuperent; quibus accedit tertia indicatio, quæ dicetur præservatoria; curata enim Scabie, cavendum est, ne redeat, & dum curatio peragitur navetur opera, ut labes arceatur à nobilibus partibus. Omnes autem istæ intentiones per remedia tum externa, tum interna adimpleri possunt: & primò à medicamento purgante inchoandum, exhibendo scilicet vel *Mannæ uncias tres*, vel *portionem ex Cassia clarificatam*: inde Sanguinis missio instituenda; nam cum materies Scabiei in sanguine delitescat, & cum Scabies sit passio universalis, ita remedium universale Venæ sectionis est usurpandum; inde quovis mane decoctione sequenti utatur. & *Salsæparillæ, ʒ. ij. radicis Chinæ, ʒ. j. incisa misce & divide in VIII. partes æquales*, & quotidie una ebulliatur in ʒ. vii. *aquæ Malvæ*, & calidè assumatur. Cucurbitulæ scarificatæ utiles erunt; & si morbi pertinacitas perduraret, ad usum pulveris *Viperini* deveniendum. Quod verò spectat ad externa remedia, in quibus nonnulli Medici totam spem curationis reponunt, utendum erit *unguento ex Sulphure*, & *butyro* conflato. Ad balneum tandem veniendum, modo sequenti parandum: & *Vini albi, lib. ij. aquæ Rosarum, lib. j. Vitrioli Cyprini ʒ. j. foliorum Rorismarini, Rhododaphnes Q. S. misce*, & bulliant parum temporis, & hoc balneo calido ter abluatur totum corpus, & maximè illæ partes, quæ à Scabie gravius fuerunt affectæ. His omnibus addenda erit victus ratio congrua, sicque, ut spero, salutem recuperabit.

CONSULTATIO CXLIII.

De Phlyctænis : de Motu peristaltico Intestinorum : de Urinæ quantitate in Corpore humano : Et de Chocolata.

NUdius tertius accepi literas tuas humanissimas, in quibus legi, te nonnulla à me optare, & primò meum consilium de Phlyctænis, sive pustulis sanandis, atque omninò tollendis in tuo filiolo unico annorum trium; quocircà respondeo: Phlyctænas à Doctoribus dici pustulas in summa corporis planitie enascentes à tenui sanie cuti subtenta, eamque suâ salinâ tenui acrimoniâ pungente atque erodente; & quia in tua epistolâ dicis has pustulas humore flavo repletas esse, & similes vesiculis illis ab ustione ferventis aquæ factis, ideò à tenui lymphâ salso-acri leniter erodente dependent, tanquam à causa immediata, & plerumque Infantes infestant, qui in lecto diù decumbere solent, quoniam inibi per cubilis calorem, lymphâ peccans in pustulis magis agitur, & actuat. Huic lymphæ peccanti dant ansam cibi falsi, & nutrix ipsa, quæ jam filiolum tuum lactavit, erat enim iracunda, potatrix, & falsis cibis delectans, quæ omnia massam humoralem ad falsedinem disponunt. Debet ergo, quantò citius possit curari hic affectus, ne in scabiem transeat. Per absorbentia igitur, & edulcorantia medicamina falsedo illa Sanguinis corrigi debet, cùmque primæ viæ plerumque crudis recrementis scateant, ante omnia purgandæ erunt, quod usu olei *Amygdalarum dulcium* recenter extracti fieri poterit: postea quovis mane uterer Syrupo de Cichoreo cum Rhabbaro, pulveres absorbentes esse poterunt *Bolus Armena*, *Corallium album præparatum*, *Terra Sigillata*, *Oculi Cancrorum præparati*, *Cornu Cervi ustum*, & similia tibi notissima. Pro alteranti summo mane uti poteris jusculo, in quo bullierint folia Cichorei, *Portulacæ*, *Endiviæ*, & *Malvæ*: laudo balneum aquæ dulcis tepidum, in qua aqua bulliant *Gramen*, *Lapathum*, *Plantago*, *Salvia*, & *Beta*; cibi sint facilis coctionis, & pro vino aquam bibat.

Nunc transeo ad tua quæsitâ; & primò quæris an verè detur

motus peristalticus Intestinorum, ut quidam Doctores negant. Per istum Intestinorum peristalticum motum Ego intelligo motum, quo Ventriculus, & Intestina ab initio usque ad finem successivè coarctantur, & instar vermium inter se se repunt. Dari probatur hic motus, primò quia illum videmus in vivorum animalium anatome; & licet aliqui dixerint, illum esse convulsivum, atque præternaturalem, attamen hoc non suspicandum esse assero, quia etiam apparuit in cane, facta vel minima apertura abdominis, quæ sine magno dolore potuit haberi; & tunc à quo convulsio expectari non poterat; præsertim quia canis erat sanus, junior, & cultri injuria levis. Ulterius hunc peristalticum motum suadent annulares, & carnosæ illæ fibræ in Intestinorum tunicis tot nervis instructæ, item chyli, & fæcum per intestina protrusio, quæ aliàs per Intestinorum plexus, gyrosque difficilior fuisset, & ita putredinis, & tardioris nutritionis causa. Fit igitur iste motus successivâ fibrarum annularium à spiritibus animalibus inflatione, & contractione, item etiam retractione fibrarum rectarum, quæ illæ aliqua sui parte, se à chylo subtrahunt, alia verò consistunt, eo modo, quo videmus Serpentes repere, & id indefinenter; sicut causa spiritus animales ex cerebro excutens versus nervos Intestinorum, & Ventriculi, puta novorum spirituum adventus in Cerebellum, vel Intestinorum à bile irritatio, est continua; undè nullatenus hic motus subjicitur nostræ voluntati, ut docuit *Franc. Zypæus in Fund. Medic.* Quod si spiritus animales impetuosius in fibras irruant Intestinales vel compressis fibris, quasi per illas regurgitent, & motum suum invertendo, vomitum excitant, & promovent: Hæc de motu Intestinorum peristaltico satis.

Nunc propero ad aliud Quæsitum, nempe, an debeat dari certa, & determinata urinæ quantitas in corpore humano? ad quod dico, copiam urinæ in statu naturali proportionari debere liquidæ materiæ assumptæ, sic tamen, ut non minor sit (supponamus) subtripla, eò quod aliqua continuò pars ejus cedat in nutrimentum, aliqua etiam insensibiliter, vel per sudores, vel per sputa excernatur, aliqua denique in cruore, ad hoc, ut ipse diluatur ad faci-
tandum circuitum. Major urinæ copia, nisi ob frigus aëris insensibilem transpirationem inhibens, assumpta diuretica, vel alia ex-
trin-

trinseca, vel post Hydropem, Rheumatismum, aut febres, qua non rarò morbi causa expellitur, accidit; minor verò Urinæ quantitas, nisi ex assumptionis liquidi defectu, summum indicat calorem dissipantem serum, & sudores, ac insensibilem transpirationem, ut sæpè observatur in febribus; vel viarum urinæ obstructionem, & tunc Rheumatismum, Catarrhos, Anxietatem, & alia mala sequutura promittit, prout istas, vel alias partes occupat; & hæc sufficient de urinæ quantitate determinata.

Nunc ad ultimum tuum Quæsitum me converto, in quo quæris, an ex nimio usu, vel ut melius dicam abusu Chocolatæ aliquid mali oriri possit? ad quod breviter respondeo, omnia debere sumi moderatè, in propria dosi, in pondere, numero, & mensura, ne noceant; sic vini spiritus debito tempore, ac discreta quantitate medicamen existit; intemperanter autem assumptus, & abusivè multos malos producit effectus, ut Medicorum testantur historię; sic quia in compositione Chocolatæ adest Cacao, ideò ab ejus abusu abstinendum; illud enim juxtà *Mangetum in tom. 1. Biblioth. Pharmacut.*, Alvi, Uteri, & Hypochondriorum obstructions parit; sed clariùs *Georgius Franck* ait sorbitionem frequentem Chocolatæ alvum duriores, & vigilias afferre, unde *Sim. Paulli* Chocolatæ usum, aut potius abusum in nostris Europæis summè detestatus est in *Class. 3. Quadri, Botan.*; præterquamquod certè ingredientia Chocolatam componentia, non sunt talia, quæ mereantur laudem, & panegyrim; quoniam tu benè noris quid valeat Saccharum & saccharata quæcumque; hinc *Bartholomæus Gornia* observavit multos propter sacchari abusum mortuos esse Gangræna, Sphacelo, aut interna laceratione affectos. De Chocolatæ abusu, & noxa legi meretur *Epistola Clariss. D. Co. Joh. Bapt. Felici* nuper Florentiæ typis data, in qua multa colliges scitu digna. Scias interim velim Excell. Vir, me summa benevolentia te semper prosequutum esse, & quoad vivam etiam prosequar, siquidem aiunt, amorem, vel eadem, vel cumulatione esse mensura reddendum. Vale, & me tui amantissimum ama.

Ferrariæ 6. Kalend. Octobris 1728.

CONSULTATIO CXLIV.

De Impetigine.

Civis annorum ætatis XL. æstivo tempore corripitur Impetigine in collo, ac facie, quæ nunc in hanc, nunc in aliam corporis partem serpit cum pruritu, & calore; & quia ista affectio ad multum tempus perdurat, nec vulgaribus cedit remediis; ideò consilium postulat.

Morbus iste Impetigo dicitur, à multis *Lichen*, *Vitiligo*, *Mentagra*, & *Lepra Græcorum*; & est cutis asperitas dura, ac sicca cum prurigine, hac illac transiens, ita ut *Volatica* vulgò dicatur, & *Serpigo*: cùm ergo cutis asperitatem Impetigo faciat, ideò est morbus in compositione, & præcipuè in superficie, cùm eam asperam reddat. Pars affecta est cutis & ut plurimùm oritur circa cervicem, ac faciem, licet etiam in aliis partibus oriatur, ut in casu Civis hujus nostri. *Galenus* docet hunc affectum provenire ex humore tenui seroso, succo acri, & crasso commixto: & *Avicenna* vehementer calidum talem humorem esse scribit. Provenit autem, ut ego credo, ab humoribus salino-corrosivis ad ambitum corporis protrusis, undè corporis interiora per hujusmodi cutis vitia expurgantur; tenuiore enim existente lymphæ, sed ab acido in motu impedita, & in glandulis primò paucioribus, deinde pluribus hærente, & easdem in cute obstruente, fibrasque vellicante cum suo sale erosivo, Impetiginem oriri puto. Impetigo nisi rectè curetur, facile in Pforam, & Lepram potest transire, ideòque recens facilius curatur, quàm quæ diuturna, ac fera, & ut ita dicam, confirmata, ut in casu nostro. Indicatio curativa est dulcificare humores acres, & purificare cruorem, cutem affectam liberare, eamque amplius corroborare; quæ ut fiant ad consuetos Medicinæ practicæ fontes deveniendum, & primò conveniens erit communiter corpus purgare, & primas vias à recrementis liberare, & abstergere, & fermenta earum, si quæ sint, vitiata corrigere, quod fieri potest, vel *Manna*, vel *Cassia*, vel *Syrupo Aurco Soluti-*

vo, pro alterantibus autem decocto Cichorei, Endiviæ, Borraginis, utendum cum pulvere Oculorum Cancris præparatorum. E Chirurgico fonte Venæ sectio desumi poterit à dextro brachio ad unc. x. Sanguinis educendas. Postmodum decoctione Salsæparillæ & radicis Chinæ utendum erit ad dies viginti. Ad edulcorandum cruorem, ejusque sales eluendos, congruum erit serum lactis simplex quale exit à lacte, non depuratum, non distillatum, ut etiam monuit in suis Consultationibus Clariss. Redi. Medicamenta chalybeata commendat Mangetus Bibl. med. lib. 3. sicuti pulvis Viperinus laudatur à Villisio. Externa verò remedia præter Salivam humanam, oleum Tartari, succum Limoniorum, Acetum cum Saccharo Saturni, aquam Spermatidis Ranarum, oleum Ovorum, poterit valere unguentum sequens à Dolæo descriptum, nempe, & Unguenti ex Saturno, oleo tartari, canphora, cerussa, & balsamo Sulphuris: Præstare etiam poterit sequens linimentum: & Succus Sempervivi, ʒ. ij. cretæ pulverisatæ, Q. S. Salis Saturni ʒ. j. Misce fiat linimentum. Sulphure cum aceto feliciter aliqui sunt usi. Hic autem præterire non possum novum quoddam remedii genus, ante hac quod sciam à nemine Medicorum memoratum, quod in secundâ centuriâ suarum observationum publicavit Fulvius Gherli Amicus meus semper colendus, & hoc ad majorem auctoritatem præcisus ejusdem verbis annecto

Fattemi adunque questo Signore sedere, e levare i panni d'attorno, e discoperte le spalle, e la schiena col mandar giù la camicia, essendomi prima posto a sedere sopra una seggia, fui dallo stesso in quelle parti visitato, e assicurato, aver ritrovato fra le spalle, e poco sotto di esse le radici di quelle Volatiche, onde senza cavarle, & estirparle affatto, era impossibile, che io mi liberassi mai da quella deformità, che nella faccia io aveva; ma che levate dette radici, siccome egli mi prometteva di fare, in soli tre, ò quattro giorni, le Volatiche sarebbero affatto sparite, senza mai più ritornare: che il segno preciso, dove erano queste radici, si era un punto di color di tabacco, assai somiglievole ad un picciolo neo, nel quale conficando pian piano la punta dell' Ago, e tirando con forza all'insuori, cavavansi le radici, come fila fortissime nervose, or lunghe, or corte e che non bisognava fermarsi così subito, ma ch'era d'uopo pescare, e ripescare con la punta dell' Ago in quel picciolo circolo, e qualche poco all' intorno del medesimo sotto la cute, fin a tanta

che

che non eransi cavate tutte le dette radici, essendovene in un solo punto moltissime, e che quante erano le *Volatiche*, altrettante erano queste macchie, ò tronchi di radici. Scoperto dunque, siccome ho detto, ch'io hebbi il dorso, e dopo avere questo Signore riguardato ben bene il fatto suo, poichè si sono alle volte de' piccolissimi nei, i quali molto rassomigliansi a quelle macchie, e non lo sono, le quali però si discernono le une dall' altre, facendone la prova colla punta dell' ago, conciossiachè cacciata la punta ne' nei, subito la pelle si strappa, e cede; ma conficcata nelle radici, non così va la faccenda, posciachè e d'uopo tirare con tutta la forza l'ago impuntato nella pelle, se si vuole carpire la detta radice; guardato, dico, ch'egli ebbe ben bene il fatto suo, scopri due macchie, che disse essere due grossi tronchi di radici, & in fatti fattane la prova, ritrovò, ch'ei non erasi ingannato; onde incominciò ad estirparne una con l'ago, e nell' atto d' operare, io non provava gran dolore nella parte, ma solo nel carpire, ch'ei facea, le radici, che furono assaissime, sembravami, che mi sterpasse il vicino braccio, e tanto erano queste indurate, che gli fu necessario d' adoperare tutta la forza per tirarle fuori, & una volta per il gran sforzo, che fece ruppe si l'ago, il che mi è poscia anche accaduto più d' una volta nell' fare questa operazione. Finalmente dopo d' avere pescato, e ripescato più d' una volta in queste due masse di radici, & averle cavate tutte, mi fece rivestire, assicurandomi, che ben presto avrei veduto l'effetto di questa sua operazione; come in fatti entro il termine di quattro giorni dileguaron si affatto le *Volatiche* dal mio volto, nè mai più vi sono ritornate &c. Ho poi anche provato, e riprovato questo sperimento in moltissime persone, e sempre sono riuscito con onore &c. Hoc, quia notabile, ante finem consultationis notare volui, ut, si hæc operatio arrideat, experiri eam placeat, & ut nihil relinquam, quod ad rem nostram faciat. Quibus omnibus addatur congrua victus ratio ab Excellentiss. Dom. Medico curante præscribenda, cujus prudenti judicio cuncta quoque præscripta libenter committo.

CONSULTATIO CXLV.

De Cicatrice in Facie.

C Elebris quidam Supputator post longam febrem Quartanam faciem habet adeò deturpatam, ut vix ab amicis cognoscatur, ita ut vultum cicatricibus plenum habere videatur. Nunc ad faciem à tali deformitate liberandam auxilium postulat.

Turpem hanc affectionem, ut citò fugare possit Supputator noster, uti poterit sudore, vel madore effluente ex ovo, dum affatur, cicatrices sæpè illiniendo, quo remedio Uxorem suam à maculis fuisse dealbatam, & rectificatam asserit *Forestus*. Commendatur etiam *Oleum de Myrrha*, & ex *Vitellis Ovorum expressum*. Mirandum in modum conferre aquam, aiunt multi, ex induratis Ovorum albuminibus, exemptis vitellis chymico more destillatam. *Oleum de Tartaro* adhibent nonnulli, & *Riolanus* approbat sequens remedium: & *Tartari calcinati*, lib. j., *Mafliches*, z. ij. contendantur cum Albuminibus Ovorum, & reponantur in vaporario; hinc destillatus liquor servetur ad usum. Me legisse recordor apud *Joh. Marinellum* in suo libro, cui titulus *Ornamenti delle Donne, fel. Bovis cum semine Erucae*, atque modico aceti pro linimento, optimum esse remedium ad delendas faciei cicatrices, & maculas. Aliqui Scriptores demum adhibent *Thus*, *Coriandrum*, *semen Raphani*, *Lithargyrium argenti* cum *adipe Anatis* mixti cum *Cerussa*; *Cucumeres Sylvestres virides*, ex quibus omnibus, quod sibi velit suscipiat Æger, ut hanc turpitudinem fugare possit. Intellego insuper, præsentem nostrum Patientem clavis pedum obnoxium esse; quocircà consulo, ut abscindantur decresciente Luna, pedibus aliquandiù primùm aqua calida lotis; deinde admoveantur *folia Hederæ Terrestris* contusa, & singula die iteretur remedium manè, ac serò; & ita clavum extrahi intra nonnullos dies ait *Samuel Formius*. *Succus* pariter *Chelidonii*, *Ammoniacy*, & *Galbani* aceto dissoluti appositi; ut & *succus Tithymali* laudantur à *Petro Foresto*. *Stercus Hominis* applicitum est ab

aliis non sine fructu, ut & *succus Fabariæ*. Quæ omnia à me dicta sufficiant pro levamine nostri Patientis.

CONSULTATIO CXLVI.

De Esseris.

ESSERÆ, quibus sæpè vexatur Soror tua Nobilissima, sunt exanthemata, sive parva tubercula magnitudinis diversæ, pruritûs insignis, magis die, quàm nocte infestantia; citò evanescencia, sed brevi iterùm redeuntia, & quandoque corpus universum occupantia; quorum causam consistere puto in phlegmate quodam falso, quod ob irregularem suorum corpusculorum figuram penuriamque aquosarum diluentium particularum, in extremitate tubulorum cutaneorum adhæret, ac epidermidem vitiat; citò verò evanescunt, & redeunt, quia illarum materies volatilitate quadam gaudet, ac ita laxatis vasculorum fibris promptè transmittitur, dum interea constrictis denuò poris noviter iterùm efflorescunt, & pruritus excitant, quia ejus particulæ acuminatæ sunt, ideòque fibras blandè irritant, pungunt, ac vellicant. Circa Prognosim notandum, periculum non portendere, & pro majori, ac minore humoris peccantis falsedine, & acrimonia, brevius, vel tardius durare possunt Esseræ. Quoad curationem spectat, cùm nulla sit febris, statim communis instituatur purgatio. Poterit igitur primò exhiberi *Cassia cum cremore Tartari*, mox potest Vena secari, vel saltem cucurbitulis scarificatis uti, quæ sunt Venæ sectionis vicariæ. Sudores utiliter promoveri poterunt ope *Stibii diaphoretici*, & *Cornu Cervi philosophicè preparati*. Balneo aquæ dulcis per sesquihoræ spatium uti, laudat *Zuvingerus*. A cibis falsis, ac acribus abstinendum erit: ideòque victus sit moderatus, ac tenuis, & cibaria sint facilis coctionis: pro vino uti poterit *Ægra nostra aqua Nucerina*; corporis, & animi motus vitandus erit. Quæ pauca pro Esseris curatione tibi scripta sufficiant.

CONSULTATIO CXLVII.

*De Gutta Rosacea: de Unctione pectoris in
Tussi Infantium: & de connubio in
Cholorosi: ac de aliis.*

ACcepi humanissimas tuas literas, quibus nonnulla à me scire desideras; & primò cupis meum medicum habere consilium pro curatione Illustris Viri Gutta Rosacea affecti, qui à multis mensibus tali affectioni obnoxius est; patitur enim in facie ruborem cum tuberculis, quibus vultus defœdatur, ac si Guttis Roseis conspersus esset; ut Tu in epistola tua narras. Hujus affectus proxima causa est portio lixiviosa Sanguinis coagulata, & stagnans sub cute, præsertim in facie, ubi magis exoritur hic affectus, quia supposito intempestivo potu, ut Tu in tua epistola innuis, frequenter etiam Sanguinis æstus, & rarefactio augetur, unde vasa distenduntur, & compressione sua impediunt, quominus Sanguis in venis faciei debita promptitudine ad cor descendere queat; & sic tardius profluens incrassatur, & crassiores suas particulas in poris cutaneis relinquit. Concurrit etiam ad hoc structura glandularum ipsius faciei, quandò scilicet earum tubuli strictiores existunt, unde coercent sæculentas cruoris particulas. Ad Prognosim quod concernit; si hic affectus altas egerit radices, & confirmatus evadet, incurabilis erit; si verò non adeò pertinax, tunc spes erit recuperandæ salutis. In curatione igitur tollendæ erunt obstructions, & illæ viscidæ salino-lixiviales particulæ per diaphoresim, vel per alia loca educendæ; & causæ antecedentes emendandæ, ac tota Sanguinis massa à particulis falsis, austeris, lixivialibus liberanda. Expiatis igitur primò communiter primis viis, ad usum decocti ex Salsaparilla, radice Chinæ, Sassafras, Lentisco facti in aqua Borruginis recurrendum erit, inde vinum medicatum è plantis sale nitroso abundantibus assumendum, cujus descriptionem exhibet Theodor. Zuvingerus in sua Praxi Medica. Proderit etiam sequens si Platero credamus: & Summitatum Lupuli

recentis, *Fumariæ recentis*, ana, manip. j., *foliorum Senæ*, 3.iiij. oo-
que in sero Caprino, colaturam bibat, & repetat. *Antihecticum Po-*
terii laudat *Dolæus*. Externè verò proderunt sequentia, *Flores*
Sulphuris in aqua Rosarum, *aqua spermatis Ranarum*, *florum Fabarum*,
sal Saturni, *oleum Tartari*. Multi *urina propriâ* partem affectam
lavant. Ungentum sequens describit *Thom. Burnetus*: & *Lithargy-*
rii auri, *Cerussæ*, ana, 3.ij. Unguenti citrini, 3.j.℞., *Thuris*, *Masti-*
ches, ana, 3.j.℞., *Radiciis Serpentariæ*, *Ossis Sepiæ*, ana, 3.j., *Olei Tar-*
tari, 3.iiij., *Succi Limoniorum*, 3.j. Misce inungatur facies. Sequens
remedium maximè laudatur à *Dolæo*: & *Aquæ Rosarum*, *florum*
Liliorum cælestium, ana, lib. j. *Sulphuris vivi* 3. j. *Camphoræ* 3.ij. *ossis*
sepiæ, 3.iiij. *medullæ Vituli*, 3.ij. terantur omnia, & cum aquâ
supradictâ misceantur; ponantur ad Solem, quotidie agitando, &
illo liquore facies illinatur. In diætâ demum omnia salita, & aro-
matica fugere debet *Ægrotans noster*; & vinum aqua diluatur,
ac motus corporis sit moderatus; uno verbo, victus ratio mor-
bo proportionata esse debet, à tua prudentia præscribenda, cu-
jus prudenti judicio reliqua omnia judicanda, ac disponenda re-
linquo. Faxit Deus, ut salutaria evadant.

Petebas insuper in tua epistola, an aliqui fuerint Medici, qui
de morbis Viduarum scripserint. Ad quod respondeo, duos fuisse
Medicinæ Doctores in quorum libris ego inveni factam men-
tionem de morbis Viduarum. Primus est *Ludovicus Mercatus* in
suo libro, cui titulus *Gynæciorum*, sive de Mulierum, Viduarum,
Sterilium, Prægnantium &c. morbis; libri quatuor: Basileæ 1588. 40.
Secundus autem est *Rodericus à Castro Lusitanus* in suo opere, cui
titulus est, *De universa Mulierum Medicina*, in cujus parte altera
tractatur de Virginum ac Viduarum morbis: Hamburgi 1604. in
fol. hæc de hac re.

Nunc pergo ad aliam tuam petitionem, quæ fuit, an in Tussi
Infantium liceat inungere pectus. Quocirca respondeo, aliquos
esse Medicos, qui negativam tenent, quia omnis inunctio ob-
truit porositates cutis, nec virtus linimenti penetrare potest ad in-
tima: præterquamquod ipsa inunctionis frictione calida, major
fit ad locum affectum affluxus. Ego verò affirmativam teneo cum
Gregor. Horstio, quia ejusmodi linimenta, vini molliendi, & di-
ge-

gerendi possident; sic igitur ad primum respondemus, inunctionem actu frigidam poros cutis obturare, minimè verò, quæ potentia, & actu calida sunt unguenta; imò licet aliqua attractio fiat, id accidit ad exteriora, & partem sanam, non autem ad affectam, seu interiorem, verbi gratia, Pulmonem, Diaphragma &c.

Ultimo loco visum est, te exoptare à me scire, an Connubium sit utile in Chlorosi; quocirca, dico vulgatam esse opinionem, Virgines valetudinarias, si viro copulentur meliorem consequi valetudinem; & revera interdum accidit, ut quæ Virgines decolores fuerunt, ac pallidæ, nubendo fierent vegetæ, & roseum corporis colorem acquirerent; contra verò compertum est, suadente *Sennerto*, quasdam Virgines post nuptias, non convaluisse, sed in pejorem statum fuisse conjectas; ideò distinctione opus est, nam si ex mensibus, vel semine, ut aiunt, retento illa valetudo adversa ortum habeat, tunc tutum erit, Virginem Marito jungere, ita enim uterus facilè expurgari poterit; si verò in aliquo viscere, verbi gratia, Liene, Hepate, Pancreate, vitiosa aliqua adsit dispositio; illa Matrimonii, ac Veneris usu non tollitur, sed potius augetur, & obstructions crescunt, undè diurnæ febres, aliaque nascuntur incommoda; immò cum in illis Sanguis non sit defæcatus, ac bonæ crasis, foetui probum alimentum non deveniet, & exinde foetus debilis erit, partus laboriosus, vel mola, abortus fiet. Tales ante conjugium primò curandæ sunt, aut si incurabiles fuerint, melius erit, illas innuptas remanere. Vale interim Vir Excellentissime, & communibus Amicis salutem meis quoque verbis plurimum indulge. Dabam Ferrariæ sexto Idus Novembris. anni 1728.

CONSULTATIO CXLVIII.

De Strumis.

AD me perducta est Adolescentula ætatis annorum XV. temperiei Sanguineæ, cui nondum apparuit Menstrualis fluxio, sed in variis corporis partibus tumores Strumosi orti sunt, & spe-

ciatim in Gula, & Brachiis. Ejus Parentes meum consilium petière.

Hæc affectio Struma, seu Scrophula dicitur, quoniam frequenter Scrophis in collo nascuntur, vel a multiplici partu, quoniam sicut Sues multos edunt partus, sit in Scrophulis ex una plures fiunt, sunt enim numerosæ sobolis, ut in casu præsentis. *Galen. lib. de Tumor.* ait, *ubi glandulosæ partes indurantur, & ad Scirrhum deveniunt, is affectus Struma vocatur.* Ego autem definitio sic: Tumor est Struma scirrhusus glandularum vel in collo, vel in aliis partibus, proveniens a materiâ collectâ, congelativâ, stagnante, ac induratâ; cujus duæ species, benigna scilicet, & maligna; hæc cum inflammatione, & dolore; prima sine dolore, & inflammatione, ut apparet in præsentis Adolescentula: iterum aliæ sunt mobiles, & pendulæ; & aliæ immobiles, & fixæ, quales sunt, quæ Patientem nostram torquent. Causa hujus affectus est lymphæ tenax, & viscida à particulis ramosis, & terrestribus ligata, à multis tartarea dicta. Ut ad Prognosim deveniam, dico Strumas difficiles esse curatu, undè ad pessimum morbi genus referuntur a *Dolæo*, & certè fatigant Chirurgo, & Ægros, quia non faciliè suppurantur, nec discutiuntur, & frequenter in Scirrhum exquisitum degenerant, & transeunt in gypseam duritiem, & exulceratæ desinunt in ulcera fistulosa. Cum verò in Pueris facilius resolvantur, & curentur, quàm in Senibus, ideò spes affulget salutis; licet sit *Mercurialis*, qui asserat, quod licet exactissimè curentur iterum, atque iterum revertuntur. In Strumarum curatione quatuor intentiones convenit habere, suadente *Franc. Peccettio Cælestino*. Prima in victu ac in rebus nonnaturalibus, secunda in Pharmacia, tertia circa localia, & quarta in manus operatione. Prima ergo intentio sit, moderatè uti cibis, & moderatè siccantibus; potus sit Vinum bonum, & fames erit toleranda; absint crassa cibaria, & humidiora, aquæ potus, & immoderata repletio: Motus ante cibum juvat, somnus sit brevis, caveat ab ira, & risu profuso, & immodica locutione; & alvus semper lubrica servetur. Pro altera intentione inservire poterit potio ex *Manna clarificata* pro alteranti decoctum *Betonicæ, Fumariæ, Scrophulariæ, Cichorei*, & vinum medicatum cum *Salsaparilla*, & *Quercino*, ac *Radice Chinæ*. *Aëtius* laudat carnem *Viperarum*, & *Galenus Theriacam*, *Felix Platerus* pul-

verem Spongiæ in furno exsiccatae per multos dies jejuno stomacho ad drachmam unam; & *Frider. De ckers spiritum salis Ammoniaci* internè, & externè. Bis instituatur Phlebotomia in pede, & educantur unc. IX. Sanguinis pro qualibet vice. Pro tertia intentione uti poterit emollientibus, & incidentibus, & primò poterit applicari sequens Cataplasma: & *Stercoris Caprini in aceto decocti, & cum axungia suilla commixti ad Cataplasmatidis formam.* Tres Bufones in oleo Olivarum in vase terreo coctos, oleum quoddam facere ait *Petrus Borellus in observ.* quo feliciter curantur Strumæ; sed cum vapores, dum fit, noxii sint, ideò ab iis cavendum, & probè vasa erunt lutanda. Scrophulæ primò, juxtà *Mangetum in Biblioth. Med. Pract. lib. 16.*, arsenico admoto vesicante excorientur, pars deinde admotione sublimati corrodatur, ac demum oleo dicto utendum, quod præstantius erit, si in eo saltem Bufonem infuderis; & hinc forsan orta sunt antiqua Galliæ insignia, erant enim tres bufones, cum Reges Galliæ hujus morbi curam susceperint; dicunt enim Christianissimo Francorum Regi divinitus peculiari dono esse indultum, ut plurimos Strumosos solo manuum attactu integræ sanitati restituat. Sequens emplastrum commendatur a multis: & *Ammoniaci, Galbani aceto soluti, ana, ʒ. j. Bdellii, ʒ. ʒ. Medullæ Cervi, adipis Anatis, ana, ʒ. j. ʒ. Mucilaginis Althææ, ʒij. pulveris Ireos Litthargyrii ʒ. ʒ. ʒ. j. Olei Anethi & Cerae Q. S. Misce fiat S. A. Emplastrum.* In curandis Scrophulis magnam vim *Dolæus* adscribit *Opoponaci*, a quo externè adhibito, easdem penitus evanituras esse nonnulli confidunt. *Emplastrum de Ranis* cum *Mercurio* apponunt alii. Hic autem Eruditionis gratia liceat mihi describere curationem, quam Rex Galliarum in Strumis facit, ut supra innui, desumptam à *Dloæo* in sua *Encyclop. Chirurg. lib. 2.* „ Die Pentecostes Rex „ Galliarum horâ vespertinâ, Deo reconciliatus, & sacra usus Synaxi in Æde D. Francisco Sacra, homines morbosos ab Archiatro „ Regio, ejusque Collegis, in duos ordines ab utroque latere ita „ collectos, ut spatium intermedio, personæ quatuor juxta se invicem una vice transire queant, simul probè exploratos, num ex „ avaritia, & studio captandi doni, aut dolo, & malitia ex aliorum „ hostium instinctu Regem instrumento quodam, aut armis hac ratione insidiosè, & clanculum lædendi, aut occidendi, se ægros fiment, Satellitibus, aliaque cohorte militari stipatus, capite nudatus,

„datus, & facie manibusque singularem præ seferent pietatem ac-
„cedit; Adventante verò Rege homines morboſi manibus in Cœlum
„ſublatis in genua devotè procumbunt, quos deinde Medici a ter-
„gis eorum ſtantes capillis placidèprehendunt, & verſus Regem
„declinant, qui brachio dextro aliquantum exerto, & manu in
„formam Crucis poſita ſingulorum frontes tangit, hiſce ſimul prola-
„tis verbis *Rex tangit te, Deus ſanat te in nomine Patris, Filii, &
„Spiritus Sancti.* Quibus peractis Regis Eleemoſynarii, unicuique
„exhibent munuſculum, & unum poſt alium per atrii fores dimit-
„tunt. Regi verò exhibetur aqua pro abluendis manibus; &
„actus hic ceremoniis hiſce finitur,,. Sed veniamus modò ad
quartam intentionem, quæ Chirurgiâ, & manus ope completur;
extrahitur ergo Struma, vel ferro, vel cauſticis, vel igne: hîc au-
tem monendus Chirurgus, non ante Scrophulas aperiendas eſſe,
quam univerſus humor concluſus in pus plenè, & perfectè abierit,
aliàs reliquum humoris crudum reſtabit, ac niſi vix, & longo tem-
poris tractu ad maturationem perducipotèrit, quod præceptum in
Strumis præſertim, ſed in aliis abſceſſibus quoque, qui ad ſuppu-
rationem veniunt, eſſe obſervandum monuit olim *Ambros. Pareus.*
Divelluntur porrò, cutis facta incifione, & amputantur; ſed in hac
re perficienda diligenter cavendum, ne Venas jugulares, carotides
arterias, aut nervos recurrentes ferro violemus, tunc enim eſſet er-
ror pejor ipſo morbo, ut accidit in Puella X. annorum Strumis la-
borante, aſperæ arteriæ, & nervo recurrenti tenaciter adhærentibus,
de qua narrat *Fabricius Hildanus*, quod temerarius quidam exſecuit
Strumas adhibita novacula, & illicò obiit Puella. Pariter curatio-
nem moliri per potentialia, vel actualia cauteria periculofum admo-
dum eſſe monuit *Platerus*, quapropter benè ait *Mercurialis*, Strumas
ferro, & igne tractare, eſſe negotium cum timore, & prudentia
tractandum. Miſerioribus ergo remediis utendum erit, ut ſupra dixi,
ut ſalus à noſtra hac Puella acquiratur.

CONSULTATIO CXLIX.

De Ganglio.

AB Epistolâ tuâ humanissimâ heri mihi redditâ per Tabellarium, Illustrissime Domine, intelligo, te optare à me aliquod remedium pro curando Ganglio, quo à non paucò tempore afficitur honesta quædam Fœmina, ætatis consistentis, Vidua; in dextro quippe poplite tumorem gerit ad pugni unius magnitudinem, molestiam potius, quàm dolorem afferentem.

Hic tumor igitur durus est, & indolens, quo pressò stupor sentitur, pellicula propria includitur; quod si longè ab articulationibus enascatur, à quibusdam dicitur Nodus. A lenta, & viscida lymphâ originem ducit; nunc minuitur, modò augetur. Ad remedia quæ petis nunc venio. Primò admoveri potest *aqua Vitæ cum Succo Rutæ* mixta, arctè ligatis linteis. Laminam etiam plumbeam hydrargyro illitam applicat Sam. Formius; quo remedii genere pluries feliciter usus sum in praxi facienda. Balneum sequens experiri poterit. *℞ Lixivii, Urinæ, Vini, ana, partes æquales, bulbi Liliorum, ʒ. ij. Aquæ vitæ, Spiritus Juniperi primi, ʒ. ij, Secundi, ʒ. j. misce: cum spongiâ intinctâ foveatur calidè tumor; deinde apponatur sequens Emplastrum; ℞ Radicis Bryoniæ, Iridis recentis, ana, lib. semis, bulborum Liliorum, ʒ. ij. coque in aceto forti, & contunde addendo olei Liliorum, ʒ. ij. Gummi ammoniaci in aqua Vitæ soluti, ʒ. iij. pulveris radicis Ircos, ʒ. ij. misce: redigantur in formam emplastri; & sæpè hoc remedium repetatur.*

Pro ceratis adhiberi poterunt, *ceratum Oxycroceum, de Marcassita, de Ranis cum Mercurio, vel ceratum ex Ammoniaco, & Bdellio.* Quæ pauca, quantulacumque sint, faxit Deus, ut nostræ mulieri profint. Interim tibi, Illustr. Domine, & Illustri Patienti inculpatam a D.O.M. precor salutem. Vale Academiae tuæ decus, & me ama.

CONSULTATIO CL.

De Ganglio.

NUdius tertius accepi Literas tuas humanissimas, *Vir Excellentissime*, in quibus te optare dicis meum consilium de Ganglio, quod in quadam Monacha curandum habes.

Dico Ganglion, est tumor parvus, non in profundo, sed sub cute saltem delitescens, inæqualis, in compressione ad latera recedens, ut etiam mutatis verbis in tua Epistola legi; accidit ut plurimum iste tumor in pedibus, vel manu, ut in casu nostro; rarissime autem in cubito, ac capite; plus minus renitens tumor est cuti concolor ab expansione tubulorum tendinosorum; aliquandò oritur à lymphæ in quadam cystide collecta, increassata, ac indurata, & ratione suæ originis, Aneurisma vasorum lymphaticorum dici potest. Recedo itaque à sententia *Dolæi*, qui à contorsione, & induratione tendinum provenire ait. Producitur Ganglion ferè semper à causa aliqua violenta, & externa, ut observasti in casu nostro. Curatio tota in ejus extirpatione dependet. Si igitur materia ejus nondum sit indurata, per attenuantia, incidentia, & resolventia remedia protinus discuti debet; ad quod valet *Lamina plumbea Mercurio illita*, aut *ceratum de Ranis cum Mercurio*, quod ceratum acui poterit cum *oleo de lateribus*. Fodus sequens à nonnullis usurpatur. *R. Lixivii Samentorum, part. iiij. Aceti optimi, part. j. Antimonii crudi, Aluminis, Tutie, Æruginis, ana, q. s. bulliant*, & linthea huic liquori calefacto immersa ter quotidie applica usque ad tumoris evanescentiam, & discussionem. Si Ganglion autem durum fuerit ac discuti nequeat, debet excindi, nimirum cutis ad panniculum carnosum usque cruciatim inciditur, hinc elevato panniculo integra cystis Ganglii evellitur, vel seta rubra circa radicem Ganglii trajicitur, & tota ejus radix confringitur, ac resecatur, radicem postea tangendo lapide infernali; ulcus autem relictum consueto Chirurgorum modo sanatur.

tur. Si verò Æger abhorreat à tali cruda operatione, ac refecationem Ganglii respuat, ad sequens emplastrum discutiens, & valdè resolvens deveniendum erit, nempe, ℞. *Colophonix*, ℥. iiij. *Cere novæ*, *Picis navalis ana*, ℥. ij. *Therebinthinæ*, ℥. j. *Gummi Tacamahacæ* 3. v. *Elemi*, ℥. 8. *Olibani*, *Masticis*, ana, 3. ij. *Boli Armenæ*, *Spongix astæ præparatæ*, *Cochlearum cum testis calcinatarum*, ana 3. iiij. *Florum Balaustiorum*, 3. 1. 6. *Lumbricorum terrestrium præparatorum* 3. ij. Mesce fiat S. A. Emplastrum, addito oleo Philosophorum, & etiam Mercurio. Ante verò hujus emplastri appositionem, pars affecta poterit foveri vino, in quo bullierint *Aristolochiæ rotundæ radices*, & *Scrophulariæ*, vel saltem inungi debet oleo *Succini*. Emplastrum autem alutæ superinductum, & impositum per septem dies linquatur, inde replicetur, donec evanescat. Congrua his addatur vivendi ratio, & à Deo speret salutem, ut ex corde precor.

CONSULTATIO CLI.

De Verrucis.

UT ex eloquentissima epistola Excellentiss. Dom. ad me transmissa rectè intelligo, Nobilissimum Juvenem Verrucis in utraque manu laborare, quod turpe visu videtur, & est contra venustatem, & suavem corporis formam, quocirca à me petit auxilium.

Ut autem more Medico procedam; primò quid sit Verruca videndum est. Verrucæ igitur sunt tubercula ex cute instar monticulorum pronata, absque dolore, subdura, & scabra, corporis venustatem fœdantia; & originem habent à vitioso succo nutritio ad exteriora cutis repente, & juniores maximè infestante, quod morbi genus invasit antiquis temporibus, teste *Plutarco in Q. Fabio Maximo Verrucoso*, undè *Serenus Sammonicus* cecinit.

Interdum existit turpi Verruca papilla.

Hinc quondam Fabio verum cognomen adhæsit.

Habebat enim *Fabius Verrucam* in labris si *Keuchenio* credamus, undè *Plinius* vocat eum *Fabium Verrucosum*. Hic morbus nullum vitæ periculum portendit ; quantò tamen citiùs fieri potest tollendæ sunt Verrucæ ne in majorem crescant molem, idcirco Pharmaciam, & Diætâ relicta, ad remedia topica externè apposita deveniendum erit, quibus mediantibus Verrucæ tolli, atque extirpari poterunt. Imprimis ergo, suadente *Foresto*, omni die *Sale*, & *Aceto* Verrucas confricare bonum erit ; tale enim remedio Patrem suum à Verrucis sanatum fuisse affirmat. Sunt alii, qui madefaciunt illas *Succo Calendulæ*, & hoc solo remedio sanatas dicunt. *Succum Tithymali* commendant nonnulli. Præterea *Raphanum* excavavit, illoque *Sale* impleto, & in catino, operculo occluso, per noctem servato, sal in liquorem versum invenietur ; eo liquore Verrucas confricare oportet, eisdem prius incisis, ut liquidum penetrare queat, & panno eodem liquore tincto superligato, & sic oppugnata Verrucæ decident, quod est secretum *Alexii Pedemontani*, ab aliquibus tamen nostris Ferrariensibus feliciter expertum. *Radice Chelidoniæ* cum *axungia* tritam, & admotam, & *agrimoniam* cum forti *aceto* emplastratam commendat *Th. Burnetus in Thes. med. lib. 18*. Hic verò apponere nonnulla alia remedia non incongruum puto, ut tu, Excellentis. Vir, possis, quod magis tuæ prudentiæ congruum videtur eligere. *Philipp. Salmuthus* ait, Verrucas cujusdam puellæ totas manus occupantes solo *Sanguinis Tauri* illitu sublatas fuisse. *Sal Ammoniacum* in aqua communi solutum *Petr. Borellus* laudat. *Lac Ficulneum*, & *spiritum Sulphuris* *Simon Jacoz.* *Portulacam* contusam *Samuel Formius*. *Scrophulariam* *Chalmeteus*. *Folia Salicis* *Fallopius*. *Pisa*, & *Ciceres* *Dioscorides*. *Heliotropium* *Platerus*. Alii *Cichoreum Verrucarium*, *lac Tithymali*, *radices Dracunculi*, *Iridis*, *Ari*, *Cyclaminis*, *folia Sabinae*, *Rutæ*, *aquam ex Samentis Vitium*. *Oleum Antimonii* commendatione dignum esse asserit *Donzellus*, & pariter laudat *oleum Tartari*, *oleum Vitrioli*, ejusque *spiritum* ; necnon *Scillam* assam, & appositam. *Hepar Siluripiscis* optimum esse contra Porros, sive Verrucas scribit *Nicol. Lemery* in suo *Dictionar. Pharmac.* Sequens linimentum præscribit *Baldas Timæus* : & *Mellis rosati*, ʒ. ij., *Spiritus Vitrioli* ʒ. iij., pro linimento, quo sæpe illinantur Verrucæ. *Elaterium* cum *Sale* mixtum pro-

proponitur à *Franc. Peccettio suæ Chirurg. lib. 1.* cui addit etiam sequens medicamentum: *℞ Sulphuris vivi, Sandaraci, Elaterii, ana, partes æquales, tere cum aceto, & S. A. pastillos efforma, quibus dissolutis illine; vel: ℞ Foliorum Aëris, 3. vi. Vitrioli Romani usli, 3. 8. Misce, & fiat pulvis subtilissimus & cum felle Hirci misceatur, & inde frequenter applicetur.* Si autem talibus remediis Verrucæ non cedant, immò pertinaces crescant, artem nostram deludendo, ad Caustica erit deveniendum, & quidem potentiora, ut verbi gratia sunt *Spiritus Nitri, & aqua Fortis*, qua Ego usus sum in filio meo unico annorum ætatis 20. super utrasque manus Verrucas pertinaces habente, quo caustico pori illi mortificati fuere. Si verò caustica dolores, ac inflammationem excitent, anodynis mitiganda erunt, deinde ad caustica redeundum, donec omnino Verrucæ evanuerint. Quæ omnia tamen, Domin. tuæ Excellentis. prudentiæ sunt remittenda. Interim vale, ac me ama.

CONSULTATIO CLII.

De Varis.

QUæcumque ad Viri Nobilis ægritudinem cognoscendam, atque curandam pertinebant, tam copiosè, & prudenter non minus acta, & scripta à Dominatione tua Excellentissima sunt, ut qui plura velit, is quoque majorem lucem in ipso Sole desiderare videatur. Ut autem quod sentio dicam, breviter me expediam.

Morbus iste à Latinis *Varus* dicitur, à Græcis *ἰσθῆς*: & est, ut in vultu istius Nobilis nostri Patientis videtur, exiguus tumor in facie, ac durus; qui in nostro casu multiplicatus est ad deformandam ipsam faciei cutem. Istius affectionis causa, meo videri, est pinguior humor spiritu turgidus ad musculos faciei delatus, & ab acido præcipitatus, ac coagulatus, ut nec in vasa absorberi, nec per poros cutaneos exhalare possit, undè diutius ibi morando fibras distendit, & vultum reddit cum rubedine tuberosum, quemadmodum in casu nostro. Indicationes curativæ erunt glandulas libera-

re ab acido-craffo-terrestri succo illas infarciendo; fluxilem reddere illum humorem, ne amplius coalescat; & fibras musculares cutaneas corroborare, ne iterum talis in facie deformitas appareat. Quæ ut assequantur, primò institui debet communis primarum viarum expurgatio, & hoc ut affluxus ad partem affectam cohibeatur, & causa, ut dicunt, antecedens tollatur. Venæ sectio instituenda in brachio dextro, immò proderunt etiam cucurbitulæ scarificatæ. Peractis verò convenientibus evacuationibus, ad topica, & specifica deveniendum erit, in hisce quippe præcisa curatio Vari consistit: Licet Ego hujus morbi curationem in sanguinis purificatione consistere credam; attamen nonnulla ex Authoribus Medicinæ decerpta in præsentiarum describam, ut integrè meo muneri satisfaciam. Facies ergo abluatur *aqua Florum Fabarum*, & *Sero lactis*. Bonum etiam erit sequens linimentum: & *Aquæ Spernatæ Ranarum*, *Liliorum alborum*, *Florum Fabarum*, *Pulpæ Citri*, ana, ʒ. ʒ., *olei Tartari*, ʒ. ij., *Sacchari Saturni*, ʒ. j. *Cerussæ*, *Boracis Venetæ*, ana, ʒ. ʒ., *Camphoræ*, ʒ. ʒ. *Misce*: Et hoc remedium esse expertissimum ait Clariss. Mangetus in *Biblioth. Medic. lib. 3*. Sequens aqua destillata à nonnullis commendatur: & *Camphoræ* ʒ. ij. *Cerussæ* ʒ. j. *Cicerum rubrorum*, libr. ʒ. *interiorum Melonis*, libr. j. *ovorum Hirundinum*, n. X. *Margaritarum*, ʒ. ij. *Seminum Bombacis*, ʒ. iiij. *Salis communis*, ʒ. ij. *succi Limoniorum*, ʒ. ʒ., *Tartari Vini albi*, ʒ. ʒ. pulverizentur pulverizanda, & contendantur contundenda, & infundantur omnia simul in libr. X. *aquæ destillatæ Lapathi acuti* per duos dies, tum destillentur in Alembico, & aqua exiens servetur ad usum. Saliva quoque hominis jejuni, spiritu acido, & alcali turget, cujus ratione esse cosmeticam ait Joh. Dolæus, undè valet illita ad Varos, & alias cutis faciei maculas ejiciendas. Nonnulli utuntur *Mercurio vivo* cum *succo Limoniorum subacto*, & cum *pinguedine Viperarum redacta in modum linimenti*. Verùm hîc notandum cosmetica, & præsertim Mercurialia, habere sequentia incommoda, nempe quod sint tantum pro fuco, rugas quoque cutis contrahant, & citò senescere faciant, inde inimicissima sunt Gingivis, Tonsillis, Dentibus, & partibus circa palatum existentibus; hinc ulcera oris, fœtorem, & vacillationem dentium inducunt; quare Puellis suadet citatus Dolæus, ut cautè istis mercentur. Congrua addatur victus

victus ratio ; atque hæc pauca adduxi, ut confirmarem ea, quæ à Dominatione tuâ Excellentissimâ proposita sunt.

CONSULTATIO CLIII.

De Morphæa.

A Dolefcens ætatis annorum XV. Vitilagine affectus, faciem habet valdè rubram, & pustulosam, ex qua furfures, & squammæ decidunt ; insuper tota corporis cutis valdè maculosa, & defœdata, ita ut quasi leprosus appareat : consilium petit, ut sanitati restituatur.

Inter Cutis vitia annumeratur Vitiligo, quæ nihil aliud est quam fœdus color cutis ex malo habitu proveniens, nutrimentum assimilare non valentis. Differt autem Morphæa à Lepra, quod hæc sit in carne, illa verò in cute. Rara hæc affectio est. Ego verò in Praxi faciendâ vix duas Morphæas vidi, & curavi ipsissimis remediis, quibus curatur Elephantiasis. Cùm igitur tota hujus adolescentis cutis valdè maculosa, & defœdata sit, & cùm optet, ut facies præsertim, quantò citius fieri queat, pristinum colorem, & nitorem recipiat ; purgato prius leniter corpore Medicinâ lenienti assumptâ ; oleo primùm *Raparam cum aqua mixto* oblinenda erit cutis ; inde mutando remedium, sequenti oleo inungat cutim omni vespere ante somnum. *℞ Olei Tartari, Vini albi potentis, ana, ʒ. j. :* inde sequenti unguento utendum erit : *℞ Olei Tartari, ʒ. ij. Olei Amygdalarum amararum, ʒ. j. succi Lapathi acuti, ʒ. i. Cerae Q. S. Misce fiat S. A. Unguentum.* Demum sequenti balneo utatur : *℞ Colochyntidis, ʒ. j. decoque in aceto, & aquæ fabariæ lib. semis, eâque calefactâ spongia illi immersa cutem labe fœdatam abluat, & ut spero, brevi tempore maculæ cutis delebuntur.* His porrò accedat congrua victus ratio &c.

CONSULTATIO CLIV.

De Alopecia.

Collegi ex tuis Literis, Filiam tuam annorum ætatis XXI. Alopecia laborare, post enim Quartanam Febrem Capilli cadere eidem cepere. Ut tibi satisfaciam, & tuæ filiæ medicamenta proponam ad tollendam hanc affectionem, breviter me expediam.

Morbus igitur iste Alopecia vocatur à Medicis, & est Capillorum defluvium, cujus causa dependet à pravo, & corrupto humore capillorum radices erodente; & sic postulat hic affectus correctionem ejusdem humoris; & ad naturalem statum reductionem: quod ut consequi possit, prius purgato communiter corpore, sequenti unguento utendum erit. *℞ Olei Abrotani, ʒ. j. Pinguedinis Ursi, ʒ. j. Cineris pellis Echini terrestris, ʒ. iiij. Nucum ustarum ʒ. j. Mellis parum: Misce, fiat Urnguentum S. A.* Mane jejuno stomacho quotidie assumat decoctum *Salsaparillæ & radicis Chinæ* ad humores edulcorandos. *Pinguedo Ursina* à multis commendatur, quoniam habet proprietatem Capillorum defluvio medendi juxta *Nicolaum Fontanum*. Nec volo, nec possum silentio involvere quædam remedia à nonnullis Medicinæ Magistris proposita, ut sic tuo genio satisfaciam, & omnia, quæ ad hanc rem attinent, attingam, ut ex tantis remediis, quod tibi magis arrideat, assumas; *Paulus Ægineta* pulverem pellis *Viperarum combustæ* laudat contra Alopeciam. *Succum radicis Nenuphari* applicari utiliter in nostro casu ait *Donzellus*. *Abrotanum* contusum, ac impositum juvare ait *Nicol. Lemery*. *Adipem Anguillæ* illitum, *Stercus Murium*, *Lacertas*, *Fellem Suillum*, *Vespas* pulverizatas, & *Muscas* contusas, & applicatas optimas esse ad hoc, ut Capilli nascantur, & crescant, & sistantur, si decidant; Insuper pinguedinem *Vulpis* illitam optimam esse, ait *Joh. Schroderus*. Coquantur ait *Jo. Stephanus* in sua *Cosmetica* grana *Juniperi*, *Ladanum*, *Absinthium*, *Adianthon* ex vino, & oleo *Myrrhino*, simul mixta madescant per integram hebdomadam, tum recoquantur ad vini consumptionem, & percolentur, validèque expri-

man-

mantur, colatura fervetur, ad Capillitium ungendum. *Succus* insuper *Nicotianæ* capiti illitus mirandum in modum Alopeciam submovet eodem suggerente *Stephano Medico* suæ ætatis præstantissimo. *Oleum Ovorum* laudat *Joh. Crato in Consil.*, & *Oleum Caryophyllorum* chymicum *Roder. à Fonseca in Consil.* His autem addatur congrua victus ratio; abstinendum à salitis, ab acribus, à vaporosis, à vino meraciori; sicque ut spero, Capillorum decorem recuperabit *Patiens nostra*. Quod reliquum est, vale *Vir Illustris*, & *Lanzonum* tui amantissimum omni tempore diligere perge: iterum vale.

Eventus.

Nonnulla ex præscriptis remediis adhibita fuere, & intra mensem perfectè convaluit *Juvenula* ista à Capillorum defluvio.

CONSULTATIO CLV.

De Area, seu Alopecia tollenda.

R Emedium cupis pro Area tollenda. Hæc Medicè sumpta nihil aliud est, quam Alopeciæ species, & est Capillorum defluviū, evenit autem hoc Capillorum vitium interdum penuriâ nutrientis, vel succi nutritii vitio, nempe acris, ac maligni: ad quam affectum tollendum post universalia remedia, commodè linimento ex cinere Apum, & oleo Myrthino parato uti poterit: prius tamen lavari debet caput lixivio aliquo convenienti. *Petrus Forestus* emplastrum ex *Muscis tritis*, *Therebinthina* & *Vitello Ovorum* concinnatum apponit; & nonnullis profuit liquor è limacis rubris fale aspersis stillans, cum oleo Ovorum mixtus, loco prius panno aspero fricato; necnon *Pulvis Murium domesticorum ustorum* cum *adipe Ursi*, & *medulla Cervi*: & notat *Fontanus*, pinguedinem *Ursinam* propria qualitate Capillos juvare. Notandum autem, gradatim procedendum esse in admotione remediorum, nam tria remediorum genera parari debent, debilia, quæ in usu sunt in morborum initio,

& in levibus affectibus, & corporibus delicatis, ut Puerorum, Nobilium, & Fœminarum; mediocria in mediocribus; robustiora in fortioribus, ac robustis. Hanc igitur distinctionem summo studio observandam à te esse volo. Sæpe ergo erit inspiciendus locus affectus, ut noscatur, an medicamen admotum debilius, vel acrius sit.

CONSULTATIO CLVI.

De Porrigine.

Vix ullus morbus rectè curari potest per Medicum absentem, & Ego nihil ago difficilius; attamen, ut obediam Excellentissimo Domino, qui diligentem historiam morbi Illustris Civis mihi humaniter transmisit, meam circa essentiam talis affectus sententiam, & curationem remittere coactus sum.

Cùm igitur Patiens noster in ætate annorum XXXIX. melancholici temperamenti, post febrem quartanam, illi tenues squammulæ furfuraceæ & capitis, & corporis universi superficie continuò resolvantur, pluribus ulceribus relictis, è quibus sanies ex intervallis per totum corporis habitum emanat, quod malum non solum est foedum ac molestum, sed periculosum, & faciliter in Lepram transire potest: idcirco ei auxiliares manus porrigere convenit.

A Græcis *Προρίασις*, à Latinis Furfur & Porrigo iste morbus vocatur; ejusque causa immediata consistit in particulis acribus, salinis, ferosisque ad ambitum corporis cum alimento delatis. Indicationes curativæ sunt corrigere totam Sanguinis massam, eamque liberando à particulis ichorosis salino-acribus cutem infestantibus, cutem ipsam ad pristinum salutis gradum restituere. Quæ ut habeantur, à Pharmacia primò inchoandum: & communiter prius purgato corpore, ad usum decocti *salsæparillæ*, & *radicis Chinæ* ad plures hebdomadas deveniendum erit, una cum pulvere *Viperino*. Præcedere verò hoc decoctum poterit Sanguinis missio in dextra manu instituenda, secta *Salvatella*. *Balneum Urinæ* laudat *Zacutus Lusitanus*, in qua Urina prius *furfur*, & *fumaria* sint coctæ: nec sine ratio-

ne, nam vehementer abstergit, & potenter repurgat, quo pacto scabiem, sorditiem, pruritumque, nitrosa qua pollet facultate tollit, & sanat. Victu mediocri utatur, vitetque varietatem ciborum. Pauca hæc cursim scripsi pro salute nostri Patientis in medio meorum occupationum, semper ad confirmandam Consultationem Excellent. Dom. Curantis ad me transmissam.

Eventus.

Proposita auxilia adhibita fuerunt, & XL. dierum spatio Æger sanitati restitutus fuit.

CONSULTATIO CLVII.

De Phthiriasi.

VIr, qui huc accessit, ut pro valetudine sua sententiam meam intelligat, quantum ex ejus verbis licet mihi intelligere, morbo pediculari à duobus mensibus detinetur, & liberari enixè desiderat.

Hic affectus *Phthiriasis* nuncupatur à Græcis, à Latinis *proventus pediculorum*, sive *morbus pedicularis*; & definiri potest, sordidus universi corporis pediculorum effluxus; quo à duobus mensibus tanto pediculorum agmine infestatur hic Patiens, ut in cute, & per faciem catervatim quasi reptantes Pediculi, insignem molestiam, & pruritium excitent, somnumque impediant. Causam Veteres in vi feminali ponebant, in materiâ idoneâ latente, quam calor, ut causa adjuvans, excitat, & in actum deducit; quam causam suppeditare dicebant usum ciborum pravi succi, vestium sordes, corporis neglectam munditiem, & omissam capitis pectinationem. Cum verò videatur Naturam in generatione insectorum semper sequi genesim ex ovo, id est ex semine, cum à nemine negari possit è seminibus, vel ovis muscarum varii generis vermes produci; non absurdum ergo erit, in corpore nostro, ejusque humoribus contineri semina, è quibus convenienti accedente calore,

ac datis præviis dispositionibus plures gigni viventes, verbi gratia, lumbricos, pediculos &c. Semina verò istorum insectorum, cum cibo, potu, vestibus, per vias manifestas, modò cum aëre per occultas inferuntur. Cogito igitur in nostro Ægroto Pediculos fuisse introductos intra cutem, qua terebrata à lenta lymphæ glandulis extillante alimentum sumpsere, & ita luxuriantes Pediculi, & enormiter multiplicando, corpus istius Viri, veluti sylvam Pediculorum reddidere; sicque pariter accidit in Scabie, Variolis &c. in istis enim morbis, & semina, & vermiculos esse compertum est, ut ex observationibus *Redi, Vallisnerii, Bonomi, Cestoni*, & aliorum Recentiorum constat. Quod spectat ad Prognosim, morbus iste à *Dolæo* morbum tædiofum dicitur, esse & contagiosum, nec parvi pendendum, ideòque celerrimè profligandum. Præcaveantur ergo hæc animalcula proba victus ratione, corporis blanda purgatione, & munditie. Primò igitur sollicitetur alvus *pilulis Aloëticis*, Aloës enim maxime facit adversus vermes, aliaque insecta. De Venæ sectione nihil. Conducent porrò decocta ex *Salsaparilla, Chinæ radice, Sassafras, & santalo Citrino*. Externè lotio ex Aqua Vitæ utilis erit. Balneum olei Olivarum, Lixivii &c. Lavare corpus quotidie decoctione facta cum *Lupinis, Staphisagria, & aceto*, juvare poterit. Unguentum sequens describitur à *Burneto lib. 14.* & *Axungia porci, Olei laurini, Saponis nigri, ana, ʒ. ʒ.*; *Argenti vivi cum saliva hominis extincti, ʒ. j.* Misce: imò ait, ad omnia genera Pediculorum occidenda, nullum esse præstantius remedium, quam Argentum vivum. Circa tamen hoc cautè est procedendum; Mercurio enim, qui utuntur, tremore, aliisque symptomatibus afficiuntur; & Ego semper à Mercurialibus abstineo. Pro amuleto sit *Camphora*. Accedat demum, ut supra dixi, idonea vivendi ratio apta secundum qualitatem, & quantitatem, & hæc erant dicenda in casu proposito.

CONSULTATIO. CLVIII.

De Obesitate.

Vir Nobilissimus adeò obesus est, ut vix incedere possit; cæterùm sanus est; verùm quia Obesi, ut plurimum vitæ sunt brevioris, teste *Dolæo*, ideò opem Medicam postulat.

Iste affectus est corpulentia nimia, sive crassities; & definitur, dispositio corporis in latitudine sanitatis, spectans ad auctam magnitudinem præternaturalem; & per diametrum opponitur gracilitati, & ponitur prima in classe tumorum, cùmque moderata corporis constitutio omnium sit optatissima, ita nimia Obesitas multa secum trahit incommoda, quæ vitam breviorē efficiunt, suadente *Bened. Sylvatico*: quamobrem Patiens noster Nobilissimus æquo corpulentior, timens, ne corporis sui moles ingravescat in dies: ideò medicam opem postulat. Ego itaque meam sententiam candidè aperiā, & quia in abundantia succi nutritii peccatur, & lymphatica illuvie; hæc erunt subtrahenda, & quanto citius fieri potest corpus ad naturalem statum reducendum, ne quid impofterum gravioris malī contingat. Alvus igitur lenissimis remediis proritetur, & semper laxa servetur; phlebotomia bis celebretur in utroque brachio; cibus sit parcus, & cœna levissima. Vinum sit modicè generosum, album, antiquum; imò familiaris sit usus *Aceti scillitici*, cujus solo usu ad *unc. j.* quotidie jejuno stomacho curatum quendam Venetum ab Obesitate novi. Somnum fugiat diurnum, & cum labore se exerceat. Post exercitium frictionibus utatur. Panem cum surfure edat; sub vesp̄ram utiles erunt *pilulæ ex Aloë lota cum succo Rosarum ad 3.℔. Decoctum Guaiaci*, & *Salsæparillæ* cum tenui, & exsiccanti Diætā commendavit sua ætate *Mercurialis*; cum cibo utatur sequenti pulvere: & *Tartari*, 3.ij. *Cinnamomi*, 3.iiij. *Zinziberis*, 3.j., *Sacchari*, 3. iv. *Misce* fiat pulvis subtilissimus pro familiari usu. Sint pariter familiares *Capræ* cum aceto conditi. *Tabaci* masticatio prodesse poterit, & testis hujus rei erit *Petr. Borellus in observ.* Sunt qui cauteria commendant; Ego autem nec laudo, nec vitupero. Hilariter demum

vivat, & gaudeat consortio amicorum. Quæ omnia salutaria illi ex corde precor.

CONSULTATIO CLIX.

De Vesicatoriis.

SI Virorum doctorum mandatis, ut par est, obtemperare unusquisque debet, *Excellentissime Vir*; nulla sanè mihi temeritatis culpa injungenda, dum tibi omnium disciplinarum splendore ornato, hanc epistolam rudi Minerva exaratam mittere non dubitavi, & hoc, ut scires meam de Vesicatoriis sententiam. Amicus enim noster communis mihi nuper significavit desiderium tuum sciendi, quid Ego de talibus remediis sentiam.

Videamus igitur primò quid sint Vesicantia; secundò an convenient. Vesicatoria igitur vocantur cauteria quædam potentialia, quæ virtute Euphorbii, & Cantharidum, aut alterius Caustici Vesiculas in cuticula excitant, undè ab effectu nomen sortiuntur; eorum materia usitatissima sunt Cantharides, insectorum genus, Fraxinum, Triticum, & Ligustrum amantes, in nostris Ferrariensibus agris abundantes, quorum Vesicantium formulæ apud Pharmacopolas passim invenies. Medici utuntur hoc remedio ad revelandum, ut ipsi aiunt, derivandum, & evacuandum; & applicantur in variis locis corporis humani, ut cruribus, brachiis, coxis, aliisque partibus juxta varias intentiones à morbo, ejusque causa indicatas. Excitatae à Vesicatorio vesicæ forfice discinduntur, & exulceratio non exsiccatur, neque cicatrizatur, nisi exhausti sint humores pravi, & morbus evanescat: folio interim Brassicæ cum Butyro appposito ad demulcendam acredinem illatam à remedio, ut sic ichorosa materia educatur, unde commendant tale genus præsidii in Affectibus soporosis, Catarrho, Febre maligna, Apoplexia, Ischiade, & Venereis exostosis: sic humores per Vesicatorium excerpti, partim è cutis poris, & glandulis, partim ex arteriolarum osculis, partim è fibrarum nervearum finibus extillant. *Henric. ad Heers* solis cucurbitulis suo modo applicatis, sine appositione

sitione causticorum Vesicatoria excitat, ut videre est penes *Bonnetum in Mercur. Compital. lib. 19.* & glorianantur aliqui Medici, quod qui Vesicatoria rectè administraverit, is difficilium plerorumque morborum victoriam obtinebit. Utuntur etiam, teste *Ambrosio Paræo*, cum emortuæ parti vitam, & vigorem restituere volunt; sic enim, aiunt, unà cum calore spiritus revocantur, & tunc deligenda sunt mitiora Vesicatoria, nempe rubificantia tantum. Licet autem multi Medici talia medicamina, Vesicatoria scilicet, laudent; Ego tamen, ut liberè, ac candidè verum fatear, in toto meæ practicæ Medicæ cursu, hoc est quadraginta annis, nisi bis, & hoc coactè, Vesicantia apposui, & tamen feliciter Deo adjuvante Medicinam exerceo, & præsertim in Xenodochio S. Mariæ Novellæ meæ curæ commisso, in quo plurimos Ægros quovis mense curatos habeo absque Vesicantium tormento: hinc narrat *Panarolus* de quodam Ægrotante, cui mane Vena secta fuit, & vespere vesicantia apposita, media nocte, dum jam Vesicatorium opus suum ageret, ob dolorem, impetuosissimè reſerata Vena, quæ mane secta fuerat, brevi talis sequuta est Hæmorrhagia, ut Æger mortuus sit. Optimè igitur monet *Jo. Bohnius de offic. Medici* ob teneram vasorum urinariorum texturam abstinendum esse à tali remedio; Vesicantia enim semper nocua putavit *Helmontius*, nam aqua ab eis stillans nihil nisi cruor transmutatus est; quapropter *Græbnerus* à Medicina proscribit Vesicantia tanquam Ægrorum tormenta; & in *Miscellan. Acad. Natur. Curios. Dec. III. ann. 5.* *Dom. Ernest. Grassius* docet, Vesicatoria difficilius effectum sortiri, quo magis humores ad coagulationem tendunt, unde actio eorum semper frustratur in febre malignâ, imo nocua est; cùm testetur *Emanuel König in Miscell. Cur. Dec. II. ann. 9.* in febre maligna grassante, eos, qui Vesicantia passi sunt, in sepulchrum præcipitados fuisse; cùm enim tenues, & acres particulæ vesiculas in cutè excitantes, in humores delatæ, per ipsos circulantes, ut patet ex citatiori pulsu, urinæ ardore aliisque, Sanguinem amplius inquinant; hinc est quod visceribus noceant, vigilias, sitim, & virium languorem excitent; talia enim remedia conflantur ex Euphorbio, Sinapi, Cantharidibus, Aceto &c., aliisque acribus humano corpori infensis; atque majus damnum procul dubio, ait *Lucas Tozzi in Comm. in Aphorism.* inferrent, cùm vi-

tiosos

tiosos humores in alvum decumbere, aut per vias urinarias expurgari, aut alios potentiores aditus petere contingat, veluti per loca conferentia, quemadmodum ex *Hippocrate* edocet *Galenus* 1. aphor. comm. 21. inquit, *conferentia loca solere esse intestina, ventrem, vesicam, uterum &c.*, mox subdit: *Medicum imitatore ejusdem inclinationem observare debere.* Si igitur natura nihil in cutem deponere videtur, & , ut loquitur *Sanctorius*, nullam ad illam habet inclinationem, ad quid Vesicantibus licebit uti. Sic apud *Hippocratem* in *Epidem.* *Meton sanguine à naribus fluente quinta die judicatus est*; mulier per menstruas purgationes à maligna febre convaluit; & alii plurimi sanati referuntur per urinas, sputum, parotides, & non per ulcera, vel sponte, vel arte excitata. Ichor autem ille, qui solet emanare à Vesicatoriis est portio lymphæ per glandulas subcutaneas excurrentis, vel etiam ejus humoris, qui in cutis alimentum cedere debuisset, quique cum liquato linimento commixtus sæpè degenerat in materiam foetidam, quæ pro maligno humore solet ostentari, cùm cæteroquin profuisset, si retenta. Præterea magnos Vesicantia producant dolores, vigilias, urinæ ardorem, ulcus cum partis languore, imò gangrænas insanabiles, ut annis elapsis accidit hîc Ferrariæ in Domino Almerico Boari Cive nostro, cui posita fuere duo Vesicantia, ex quibus ortæ fuerunt duæ pessimæ gangrænæ, ex quibus vitam cum morte commutavit; ita ut fatendum, Ægrotos exinde tam graviter affici, ut motui inhabiles, & lecto decumbere coacti longe pejus se habeant, quam à morbo. Miserrimum enim est observare Ægrum maligna febre detentum, en ut æstuat, brachia sine viribus languida cadunt, flaccidæ frigescent aures, pectus crebro tumescit anhelitu, livent fœda rubigine dentes, *flagrat in stomacho flamma, ut fornacibus intus*, labra non sine tremitu pallent, singultus frequens corripit nervos, & membra coarctat, totumque corpus gelido sudore madescit, non amplius dulcis animæ comes, sed potius ejusdem jamjam evoluturæ sepulchrum. Quid si miser iste Vesicantium igne damnetur, hæc magna pœna suis addetur cruciatibus. Proscribenda igitur meo voto erunt à praxi Medica Vesicantia, cùm *Galenus* ipse, cùm egit de febrium malignarum remediis, ea prætermiserit. Bene igitur *Homob. Piso* ait, Vesicantia esse

esse faces lugubres vicinæ mortis, non verò felices [redivivi Ægro-
tantis rogi; mitem animum induere fas est, nec licet pro incerto
bono tot cruciatus pacisci; & testatus fuit Clarif. Georg. Baglivus
plures ab usu Vesicantium vidisse mortuos, quàm sanatos, & in-
fructuosa], imò noxia Vesicantia extitisse. Præterquamquod lo-
cus vesicatus vehementer inflammatur, & cum atrocissimo dolore
excoriatur, cum exigua feri, & quandoque nulla prorsus eructa-
tione, vesica atroci corripitur stranguria, ut Ego non semel obser-
vavi in praxi facienda. Abstinentum igitur a Vesicatoriis, cum a-
lia habeantur efficaciora remedia, ut Hirudines, Venæ sectio, Cu-
curbitulæ scarificatæ, Frictiones, & similia, quæ citius, ac mitius
agunt; Medicus enim debet citò, tutò, & jucundè curare; ast
ope Vesicatorii nec citò, nec tutò, nec jucundè curat, ergo Me-
dicus debet abstinere a tali doloroso remedio; non citò, quia ad
longum tempus ulcera à Vesicatoriis inflictà perdurant, & sæpè ter-
minato morbo, non terminatur Vesicantis cruciatus; non tutò,
quia sæpè in Gangrænas periculosas transeunt, ut supra notavi; non
jucundè demum, quia spasmo ita afficitur Æger, ut velut a carnifi-
ce abhorreat à Chirurgi manu, bis in die crudeliter Vesicatoria fri-
cante. Hæc ideò tibi, Vir Illustrissime, significavi, ut meam ha-
beres opinionem circa Vesicantia, quam optabas: hanc si minus
probaveris, culpam in te rejiciam, qui me de tali remedio scriben-
tem voluisti. Vale.

CONSULTATIO CLX.

De Coalitu Palpebrarum, & de Sale Alembroth.

Primariam Cathedram in nostro almo Ferrariensi Gymnasio,
mihi obtigisse gratulanti tibi maximas ago gratias, scio enim
quantum me amare soleas, & hoc non est primum tuæ benevo-
lentiae argumentum.

Petitiones tuas libentissimè legi, sed ipsis ad rem respondere, & dubitationes solvere non opis est meæ, Ægrotantium multitudine distringor, & nullum otium lucubrationibus admittere possum.

Joseph Lanzoni opera. Tom. II. **T** **t** **N**

Ne mireris igitur, si serius, ac ineptius rescribam; tuæ enim eruditæ curiositati non satisfacere crimen esset. Petis igitur primò, quid sit morbus, qui Græcè dicitur *Αγκυλοβλέφαρον*, & quomodo curetur? Ad quod respondeo, esse coalitum Palpebrarum oculorum, undè hæc morbosa affectio fit, quando palpebrarum extremitates, vel interna superficies, & adnata oculorum tunica per lympham interfluentem, viscidam, ac glutinosam nocturno in primis tempore ita coalescunt, ut vix aperiri queant; atque subinde adeo cilia coalescunt, ut prius glutinosam lympham necesse sit emollire, antequam oculus aperiatur; undè rectè in *Lexico Castellò-Brunoniano* legitur, hanc affectionem esse vitium oculorum, in quo palpebræ, vel inter se, vel cum alba, aut nigra oculi parte cohærent, cùm serum viscidum Sanguinis copiosè per glandulas lachrymales exsudat, ibique inspissatur; & iste affectus maxime familiaris est in Catarrhis, in Ophthalmia, in Variolis, & Epiphora. Hic porrò palpebrarum coalitus curatur, primò præcavendo humorum affluxum exhibitione alicujus purgantis, quod cruditates è primis viis expellat; inde oculis apponatur lac calidum cum *Croco*, & *aqua Rosarum albarum permixtarum*. Si tale non arrideat remedium, foveatur oculus *aqua Fœniculi*, *Euphrasie*, cum modico vini spiritus camphorati, addita *Tutia*: internè profunt *Oculi Cancrorum præparati*, *Antimonium diaphoreticum*, *Cornu Cervi philosophicè præparatum*; Insuper Venæ sectio proderit, ut & Cucurbitulæ scarificatæ, addita semper bona victus ratione.

Petiisti præterea, quid sit *Sal Alembroth*, quomodo conficiatur, & ad quid valeat in Praxi Medica, ad quod respondeo, primò plura habere nomina hoc remedium: à nonnullis enim dicitur *Sal Alembroth*, vel *Elebrot*, ab aliis *Sal fusionis* vel etiam *fixionis*. Duplicis est speciei, nempe mineralis, & artificialis. *Sal Alembroth* minerale tenet formam, & colorem sanguinis exsiccati, & educitur è quadam terra, quæ invenitur in Monte Olympo, si *Lemery* fides habenda; hoc autem non est in usu. Species autem Salis Alembroth artificialis ita conficitur. R. *Salis Gemmæ uncias octo*, *Salis Alkali uncias quatuor*, *succi Menthæ*, & *Caryophyllatæ depurati, ana, unc. j.* Misce omnia simul, & dissolve ad ignem in quantitate sufficienti aquæ communis; inde filtra, & serva in vase vitreo ad ignem usque ad siccitatem, & serva *Sal* ad usum.

Ejus facultates sunt, lotium movere, provocare menstrua in Fœminis, obstructions aperire, humores tenaces, & viscòsos attenuare, & incidere. Dosis verò ejus est à scrupulo uno, usque ad drachmam. Tu interim bene vale cum tuis omnibus, quibus felix ineuntis anni novi auspiciam, ex corde comprecor; iterum vale.

Ferrariæ die 30. Decembris 1728.

CONSULTATIO CLXI.

De Hippolitho, & an simul, & semel aqua utendum intus, & foris.

Nuper tuis literis, Excellentissime Domine, petiisti duo scire a me, scilicet, quid sit lapis Hippolithus; & an balneo utendum, cum bibuntur aquæ.

Ad quæ breviter sic respondeo. Hippolithus est lapis ad instar ovi, lutei coloris, qui reperitur in vesica fellis, in intestinis, ac in vesica equorum, & hic in laminas separatur, quemadmodum Bezaar, & in se continet multum salis volatilis, & modicum olei, suadente *Nicol. Lemery in suo Dictionario*. Lapidem hunc esse hydroticum, & adversus venena, vermes, & alvi fluxum valere asserunt multi: Ego tamen nondum expertus sum. Dosis est ab uno ad duos Scrupulos.

Ad alteram petitionem respondeo cum *Doctiss. D. Franc. Justino Med. Doct. Ferrariensi*, ac Amico meo magno, posse tuto easdem aquas adhiberi extra, & intus; hoc est, dum Medicorum suasu potantur aquæ Thermales, poterit tutò Ægrotans, & balneo ipsarum aquarum uti, vel potius balneo aquæ dulcis, verbi gratia, Padi nostri; nam levamen, quod a balneo suscipitur, dependet ab activitate, quam habet ipsa aqua ad corrigendam humorum dyscrasiam, & viscera emundanda ab extraneis corporibus, ut scripsit *Andreas Baccius: ex balneo, alteratio, rectificatio, & confortatio membrorum*: accedente ergo potu aquarum ipsarum, credibile est facilius has posse per vasa ipsa transire, & secum è corporibus hu-

manis educere particulas exoticas impediētes motum humorum, & viscerum cribrationem necessariam, idcirco Bononiensis Tura loquendo de Porreta sic ait: *incipiat bibere aquam prædictam, usque ad duos, vel tres urceos, & statim post ipsum potum, parvum, & moderatum faciat exercitium; successive alios duos urceos aquæ bibat, & post potum etiam ambulet; & toties aquam per potum assumat paulatim, & non impetuosè, sed quodammodo ad delectationem, quoad usque ipsa aqua corpus egrediatur superius per os, aut per virgam, aut per partem posteriorem, & tantum de præfata aqua bibat, quantum ipsam emitat per alvum, & alium ex locis supra nominatis, claram, & apertam, prout & sicut aquam ipsam ab aquæ ductu sumptam per os recepit, & assumpsit; cujus aquæ emissæ claritatem cum vase vitreo inspicere oportet: aqua igitur clarè emissa post spatium aliquantulum, & pausa facta intret balneum, & ibidem moram faciat, ut superius est expressum, ipsum enim balneum non debilitat, sed humores in toto corpore dispersos maturat, & disponit ad exitum: quod Hugolinus confirmat solummodò discrepans in hoc, quod balneum Porretæ debilitat. His assentit etiam Hugo Senensis; ait enim: si aqua operetur, & homo non sit valde debilis, ingrediatur in balneum. Antonius Pantheus Veronensis in suis dialogis de Therm. Calderianis jubet potari aquam, & balneum facere, ut etiam docuit Nicol. Massa his verbis, quod si opus fuerit, & lavare, & bibere; altera bibat, altera lavet; Fabric. Hildanus loquens de aquarum potu, ait: æquali ordine hoc est singulis diebus ad horas quinque balneandum est. Antonius Fumanellus de baln. cap. 3. ait: bibat aquam, & post prandium hora assignata potest se humectare. Guglielmus Gratarolus scribit hæc verba: intret balneum, in quo moretur, donec delectet, mox incipiat aquam bibere. Idem confirmat Hugo Senensis in Consult, & Bartholom. Montagnana dicens: cum balneum exeunt, bibant de aqua è minera fluente. Venhartus in Med. offic. ait: ante prandium acidulas potari, post prandium pro balneo usurpari solent; ut consulit etiam Duccinus in Baln. Lucen. Imo Clariss. Franciscus Redi in Consult. habet hæc verba: *verso il fine d'Agosto se ne vada al Bagno di Lucca per bere quell' acque, è bagnarsi; & osservetur illud e esse copulativum, non disjunctivum.* Itaque fretus autoritatibus supra expositis, dico, posse tutò adhiberi balnea, etiam quando intro Thermales aquæ assumun-*

tur ad humectanda viscera, corrigendos humores vitiosos &c. Deus interim Tibi, & tuis hunc annum benignè fortunet, ut ex corde precor. Vale, & me ut soles amare perge.

Dabam Ferrariæ die 5. Martii 1727.

CONSULTATIO CLXII.

De Termintho; & Ton.

DE Termintho, & Ton me interrogas. Respondeo, Terminthum morbum esse ad Chirurgos spectantem: sub hoc enim nomine veniunt tumores exigui, vel cutis eminentiæ plerumque in tibiis, vel cruribus obortæ, colore ex nigro, & viridi, rotundæ, quæ postea vi ardoris in squammas abeunt; quarum causa est stagnatio portionum serosarum putrescentium cum acerbitate aliqua atrabiliari indurata, & cum ista affectio sit similis Epinyctidi, ideo eadem ei convenit curatio, idemque Prognosticum. Hæ pustulæ maximè veniunt in puerili ætate, rarò in medio corpore, & sæpè verno tempore, & in eminentibus partibus; ac *Celsus* indicat nullum in Termintho esse periculum. Primò autem in eo curando secanda est Vena: Brassicam erudam cum aqua, vel apium applicitum commendat *Francis. Peccettius Chirurg. lib. 1.* Uva passa cum Ruta egregiè ei medetur si *Foresto* credas. Sed hæc ad Chirurgos. Ad alium morbum transitum facio.

Morbus est Ton exoticus, ac peregrinus; & de hac affectione paucissimi loquuntur Authores, & in nullo Lexico Medicinæ de illa fit mentio. Nihil autem aliud est, quàm Brasiliensis affectus, quo digiti pedum atroci gangræna corrumpuntur, & assimilatur alii morbo *Dracunculus* nuncupato, quæ sub Venæ Medinensis titulo explicat *Vvedelius*; uterque enim vermes parit, iique oblongi, teretes, & tenues; sed in hoc differunt invicem (sunt verba *Clariss. Dn. Mangeti in Bibliot. Med. lib. 17.*) quod Dracunculi sunt aliis multò longiores, & exinde crassiores, quodque non sub unguibus, sed in ipso musculorum medio lateant; imò quandoque tendini-

bus alligentur, ac circumvolvuntur, quæ causa est, quod ni integri evellantur sui retractione quasi convulsiva, partes quibus circumducuntur dolorificè, & sæpe magno cum periculo constringant. Plura si de tali morbo desideres legas velim *D. Thevenot in Itiner. ad Orient. Mundi plagas part. 3.*

CONSULTATIO. CLXIII.

*De Hypercatharsi: de Sanguine Hircino: ac de Usu Vini
in curatione Pleuritidis.*

DUO petiisti. Primò aliquod remedium pro Hypercatharsi. Hæc cum nihil aliud sit, quam superpurgatio ex operatione violenti solutivi, colliquantis, stimulantis, ac urentis; ad eam sistendam sequentem exhiberem clysterem: *℞ Jusculi carniū Hædi, lib. j. Sacchari rosati unc. j. Laudani gr. v. Vitelli Ovorum n°. j. vel loco Laudani poterit adhiberi Theriacæ drachm. j. Misce: Utilis etiam erit sequens bolus. ℞ Mithridatii optimi drachm. semis fiat bolus & deauretur: atque inungi poterit tota regio Abdominis incipiendo à regione Ventriculi, oleo de Absinthio, & Mastich.: Ad stomachum roborandum apponatur Emplastrum de Crusta Panis, & de Palmul. Galeni.*

Petiisti secundò quid sentiam de viribus, ac præparatione, usibusque sanguinis Hircini. Scias velim *Helmontium* Medicum suæ ætate celebrem commendare summoperè in Peripneumonia, Pleuritide, & aliis morbis sanguinem Hirci sequenti modo collectum, ac præparatum: Hircum suspendit cornibus, & alligatis pedibus postremis ad cornua, resectis testiculis castrat, cruorem inde emanantem, usque ad ejus mortem excipit, & siccat; & in Pleuritide cruorem hunc ita præparatum summæ efficaciam existere fatetur citatus Auctor; nam *Archæo*, dicit ipse, sedando inservit, causam morbi immediatam tollit, ad diaphoresim disponit cruorem, & dolorem pacat: Quin etiam veneno resistit suasu *Lemery*; intumescientiam gutturis, calculum, urinæ suppressionem, & menstruorum tollit. Dosis sit à scrup. j. ad drachm. j.; & quoniam

niam sermo incidit de Pleuritude addere mihi liceat nonnulla de usu Vini in curatione Pleuritidis. Advertendum ergo, Vinum concedere *Hippocratem in lib. j. acut*; repugnat autem *Galenus* dicens, multa esse, quæ prohibent Vini usum, inter quæ inflammationes viscerum, capitis dolores, deliria, & febris incendens. Solvenda tamen est præsens quæstio hoc modo. In febre, ac interna inflammatione tria sunt considerata, nempe febris, ejus causa, & dolor pungitivus cum difficili respiratione: Febris, quæ febris, vinum respuit, utpotè quid calidum; verum si lentescens, lymphaticus, &, ut ita dicam, pituitosus sit humor, qui in Pleura excitat inflammationem, tunc concedit vinum *Zacutus*, præsertim aquosum, dulce, & in parva quantitate; nam concoquit, roborat, excretionem humoris peccantis promovet, ut ait *Bonet. Merc. Comp.*; & hac ratione nocere non poterit. Id verò intelligas velim, dummodo coctio sit facta, & impetus morbi mitescat: & salutarem fuisse in nostro casu Vini potionem narrat *Rhodius in Observ.* idemque innuere videtur *Clariss. Sebastian. Rotarius* Medicus sapientissimus Amicus meus magnus, & semper colendus.

CONSULTATIO CLXIV.

De Pedum Intumescencia post morbum relictâ: De Sanguinis missione in Hydrophobia: De aquis Thermalibus in Hypochondria: De purgatione in Lienteria.

PLura quæris in postrema Epistola tua: Quæsis, ut sciam, satisfaciam, ordinem ipsum sequutus, quem Tu in propositione observas.

Petis consilium ad tollendam Pedum Intumescenciam post longum morbum relictam. Abluantur primò pedes lixivio dulci, inde spiritu vini camphorato; inde apponatur sequens Emplastrum: *℞ Stercoris vaccini Q. S. cum aceto, coque simul ad pultis consistentiam.* Alii oleo sequenti manibus perunctis pedes tumefactos benè confricant. *℞ Olei Nucum vel Amygdalarum Amarrarum, unc. iiij.*

Se-

Seminis Aneti, Cumini, ana, drachm. iij. baccarum Juniperi, unc. semis, Salis, & Aluminis, ana, drachm. ij., vini albi optimi, unc. iij. coque trita, & mixta ad consumptionem vini; deinde exprimendo coletur. Interim internè exhiberem decoctum Salsaparillæ, & Sassafras per plures dies. Oleum Cerae commendatur à Riverio externè adhibitum.

Interrogas an Sanguinis missio conveniat in Hydrophobia, seu Rabie? In morfu canis rabidi, Venæ sectionem minimè convenire respondeo, juxta *Avicennam*, quippe quæ venenum per totum corpus trahat in Venas, attamen post quartam diem mitti posse Sanguinem volunt alii. Hinc Recentiores in demorsis à cane rabido, ita à Phlebotomia abhorrent, ut omninò vitandam esse putent, & maximè, cùm metus aquæ supervenit; & ego sanè abstinere à Sanguinis missione, licèt *Jac. Pons.* edoceat, quando plenitudo adsit, & venenum sit diffusum per universum Corpus, convenire Venæ sectionem; autumarem & quoque convenire, quando adest febris acuta.

Postulas num aquæ Thermales convenient in curatione affectionis Hypochondriacæ, de qua re etiam inter Authores est discrepantia. *Sennertus* cum suis affeclis eas approbat, quasi ob mineralia, à quibus aquæ thermales vires trahunt, quatenus primas eluunt vias, & vitiosos humores à corpore per urinas, & alvum educunt: uno verbo viscera refrigerando in sua crasi naturali ea restitunt. Alii verò cùm *Claudino*, aquas istas thermales omninò rejiciunt in curatione Hypochondriaci affectus, quia dicunt ipsi, habent vim calefactivam, & ea propter exsiccant; & cùm talis morbus à nimia viscerum caliditate pendeat, ideo abstinendum ab aquarum thermalium usu. Verùm duce *Doctiss. Sennerto*, cæteris remediis præstant aquæ minerales quæ, uti suprà dixi, viscerum obstructions potenter reserant, attenuando, ac detergendo; & hujus opinionis fuit *Sylvaticus, Riverius, & Bonetus*, unà cum *Doctiss. Malpighio*, qui in 54. consult. de Affect. hypoch. scorbut. convenire asserit aquas thermales acidulas ad eluendam acidorum copiam in tali morbo luxuriantium; immo balnea ipsa commendat in antecedente consilio de morbo eodem.

Quæris, an in Lienteria per superiora, an per inferiora purgandum

dum? Circa quod dico cum *Rolfincio*, in Lienteriâ, quæ in intestinis continetur materia, illa per alvum expurgari debet: quæ verò in ipso Ventriculo, per Vomitum educatur; ideòque *Rhases* commendat vomitum & non immeritò; nam revellit ab inferioribus. Attamen *Hippocrates* contrarium videtur docuisse in *Aphor.* 12. *sect.* IV. scribendo, quibus ob levitatem ventris cibi sunt incontinentes, hyeme suprâ purgare malum: & *Galenus* ipse in comment. ejus loci confirmat, & minus securum usum vomitorii decernit in Lienteriæ cura, ab imbecillitate, copiosè restagnante acida lymphâ in intestinis. Sola porrò per vomitum vacuanda, quæ in Ventriculo stagnant. Ea verò, quæ in Intestinis resident, per vomitum evacuare non expedit.

CONSULTATIO CLXV.

De Amuletis Abortum impredientibus.

Poscis ut scribam num aliqua adsint Amuleta Abortum inhibentia & prolem conservantia, quemadmodum dicis, credere Obstetricem quæ in Pago, ubi degis, suum munus exercet non infeliciter: ad quod dico, Æritem gestatum pro impediendo Abortu inservire ex communi Authorum sententia, cum hac tamen observatione, quod si in superioribus partibus corporis feratur, abortum arcet, si verò in inferioribus, scilicet infra uterum, foetum ex utero elicit; undè liquet contraria hujus Amuleti virtus; ita ut suspensum animum meum sentiam circa talis lapidis potentiam; imò ut candidè loquar, parum fidei teneo huic Amuleto. Ungula Ursi contra Abortum laudatur à nostro Ferrariensi *Lud. Bonacciolo de fœtu form. cap.* 6. Lapidem Corneolum ventri alligatum Abortum præcavet, & partum conservat, suasu *Frid. Hoffmanni in clavi Schroder.* Ossa de corde Cervi sub axillis gestata custodire conceptum volunt nonnulli. De lapide Lazuli scribunt multi, eum tam fortiter, ac potenter foetum custodire, ut debeat à corpore arceri partus tempore, ne fortè foetus ultra legitimum tempus retineatur. Si lapidem ex capite Luma-

cæ defumptum, colloque mulieri appensum habeas, foemina abortire nequit, ita *Baricellus in Hort.* nec possum de dicto lapide reticere, duplicem in eo effectum esse, si *Ant. le Grand* fides habenda, nempe admirabilem in gravidis habere consensum, quippe suspensum si secum pragnans portaverit, in abortum minimè incidet, si verò tempore partus tritum in vino assumat, de facili pariet. Ad Foetum retinendum, mulieres quasdam esse scio, quæ sibi ex panno *Chremesino*, vulgò *Scarlato*, faciunt cingulum, quod toto gestationis tempore juxta carnem ferunt, quod idem me olim legisse recordor in *Miscell. Acad. Natur. Curios. Dec. I. ann. 3.*, & *Jac. VVollfio in Scrutin. Amulet. cap. 2.* Vermes sub radicibus graminis inventos, sindone alligatos sub axilla gestatos, adversus abortum facere scribunt alii. Si vis quod sentio, dicam paucis: nihil fidei præstare possum hisce Periaptis. Tu interim consilio meo ab his cave, vel tacitè solum permittas mulierculis superstitiosis illis uti, ne videaris atrox nimis ac fastidiosus. Vale.

CONSULTATIO CLXVI.

*De Animadversionibus in curatione
Mensium suppressionis.*

QUæris habere cautiones meas in curandis Mensium suppressionibus. Dico nunquam adhibenda remedia. Menses ciens, ac fortiter provocantia; nisi prius præmissis universalibus, ne humores ad venas Uteri copiosius promoti augeant potius, quàm tollant obstructions; immò in ipsas gravitando, majora mala producant, uti adnotavêre *Joh. Fortis*, & *Riverius*, cum *Boneto*, & *Schenckio*. Medicus Venetus mulieri suppressione mensium laboranti, non vacuatâ prius pituitâ vasa obstruente, apozema dedit menses ciens; cujus assumptioni successit Paralysis. Optimè ergo *Heurnius* docebat, debere Medicum prius obstructions tollere; istis enim neglectis, atque relictis, cruoris impuritas in venis Uteri stagnans, si adhibeantur præcipitantia remedia, in altiores Venas

Venas deducitur, undè difficilior erit morbi curatio. Lentè ergo festinandum ait *Sylvius* ac plus profici blandis, quàm vehementibus medicamentis; & cavendum ab omnibus, quæ conjunctum habent periculum: Et Ego justè fateri possum, plures scæminas me liberasse à Mensium suppressione, solo potu vini, in quo infusum fuerat Absinthium Romanum, vel Ponticum. Quando verò universalia adhibita fuerint, & communiter erit evacuatum corpus, viscera emundata, & obstructions sublata; si spontè catamènia non redierint, tunc poterit uti stimulantibus, ac menstrua cientibus: hoc tamen observato, quod semper exhibeantur talia remedia solito fluxus tempore; nam si Medicus naturam, in novilunio excernere consuetam, in plenilunio stimulare velit, tunc incassum laboraret, nisi vehementissimis utatur medicamentis, in quibus plus noxæ erit, quàm commodi, juxtà *Volæum Meth. Med.*: ideòque oleum, & operam perdent, qui extra tempus menses provocare tentent, quia suadente *Mercato*, natura nusquam utiliter movet, nisi statutis suis temporibus. Cùm igitur adest necessitas remedii deobstruentis, & incidentis viscosos humores, qui infarciunt vasa Uteri, sive ad ipsum Uterum tendentia, opus erit uti non acidis, sed salibus volatilibus; nam prima fixare possunt, secunda solvere valent, & præsertim salia volatilia: semper autem sumenda sunt jejuno stomacho, sic autem facilius penetrabit vis medicaminis. Inter hæc plurimum extollit *Clariss. Franc. Sylvius de le Boë spiritum salis Ammoniaci*. Suffitibus autem non sine cautione uti debes, Excellentissime Domine, tenerrima enim acetabula siccitate facilè arescunt, teste *Heurnio*, undè infœcundæ fieri possunt, ac steriles scæminæ. Sanguine turgescente, secato Venam ad libram cruoris è Vena pedis extrahendam: ante verò hanc operationem balneo calenti partes inferiores laventur, quod fuit monitum *Riverii & Boneti*. Vomitoria, ut evites, consulo, Ego enim in mea facienda praxi, nunquam tali sum usus remedio; sed potius ad usum Martialium me contuli: Blanda enim remedia semper amavi, & simpliciora; & à fortioribus, & violentioribus semper abstinui, ut me docuit *Suaviss. Amicus meus Redi*.

CONSULTATIO CLXVII.

De Abusu Venæ Sectionis.

MEam, quam petis de hodierno abusu Venæ sectionis, sententiam, breviter expono. In omnibus penè rebus præsens sæculum abusum facit; & quod ad remedium, & usum salutarem fuit inventum, ac introductum, nunc pessimè in abusum cum salutis detrimento transivit. Sic apparet evidentissimè in Spiritu Vini, in Tabaco, in Chocolata, in Thè, Caffè, & centum aliis, quæ forsitan velut remedia fuerunt inventa, nunc in abusum redacta, cedunt in corporis humani perniciem, ut crebra in dies passim testantur exempla. Ita pariter evenit in magno illo Medicinæ practicæ auxilio à Venæ sectione petito: cum enim Illustres Medicinæ Magistri Phlebotomiam introduxissent, veluti remedium extremum, in magnis morbis solummodò concedendum, paulatim talis accessit nonnullorum temeritas, & audacia, ut in qualibet, vel minima Vertigine, dolore, timore, ac tristitia, Sanguinis missio celebratur magno cum naturæ detrimento: id enim, quod olim summa præmeditatione faciendum erat à Veteribus Medicinæ Magistris, nunc inconsultò, & veluti per jocum à quibusdam Neotericis exercetur, & Sanguis, qui est naturæ thesaurus, velut aqua fluminis disperditur, ac inutiliter, imò damnosè consumitur. Utamur ergo remediis, sed cum ratione, & sine abusu, & cum *Baglivo* credamus, quàm parvis remediis curari morbos, & pluribus vitam arripere remediorum faraginem. Sanè in febribus intermittentibus non convenit Venæ sectio, quia causa istarum febrium non exstat in Sanguine, sed in primis dumtaxat viis luxuriat, & in chyli visciditate, ac vitio consistit. Quis ergo non videt, dempto sanguine, vehementiorem paroxysmum excitari, cum Sanguis sulphure suo balsamico depauperatus tam debiliior remaneat, & spiritus vitales de facili dissipentur? Pluries Ego observavi Tertianas simplices, duplices factas post Venam sectam, & benigniores febres à multiplici Phlebotomia in malignas, & mortales commutatas, quod etiam innuere videtur

Clariss.

Clariff. Jo. Masseneau in sua Med. Qua propter egregiè monuit Medicos *Ferd. Car. Veinhart in suo Medico Officioso*, in intermittentibus febribus non esse necessariam Venæ sectionem, nisi in casu metus futuræ alicujus visceris inflammationis: pariterque docuit in malignis febribus, omninò à Phlebotomia supersedendum, cùm experientia pluribus nocuisse, quàm profuisse constiterit; & concludit *Joh. Walæus in sua Meth. med.*, Venæ Sectionem nunquam convenire, nisi plethora adsit. Hinc non tam indignatione, quàm commiseratione digna est hodierna vulgi credulitas, Chirurgis nimis ficiens, quæ ex solo capitis dolore, Vertigine, faciei rubore, Venæ sectionem indicari putat; undè ipse *Galenus* monet cavendum, nedum febrem jugulare conamur, Ægrum simul jugulemus, quòd tribus Medicis evenisse scribit in *lib. de curat. per V. S. c. 12.*; quibus non opinantibus pro animi deliquio, Mors obrepfit: imò *Sennertus*, & *Kergerus* volunt Venæ sectionem intempestivè adhibitam semper nocere, ut in febre maligna, ac intermittente succedit, ut supra dixi. Negari certè non potest, Sanguinem esse vitæ liquorem constitutivum, nec lædere non posse, adeoque in corpore humano potius retinendum, quàm emittendum esse, ut in quo juxta aliquorum opinionem ipsa etiam anima gliscat, & principaliter hæreat, atque ejusdem profusionem, segnities, languor, & palliditas, nec non imbecillitas omnium partium sequatur. Cùm ergo sola plethora indicet Venæ sectionem, ut docuit *Horatius Augenius*, hinc est, quod in febre, nisi adsit inflammatio alicujus internæ partis, non admittatur; undè *Galenus* ipse in *lib. de Venæ Sect.* habet hæc verba, *crudis humoribus abundantibus cautè evacuandum, antequam ægroter, si febricitet nequaquam*: Et Ego puto, Venæ sectionem præter necessitatem factam, majus damnum posse facere, quam febrem ipsam, quæ juxta *Sydenhamium* nihil aliud est, quam motus naturæ excitatus ad expellendam nocuam materiam in corpus introductam. Quocirca egregiè ait *Clariff. D. Jo. Masseneau*, Venæ sectionem inservire in febre maligna tanquam Venenum ad augendum morbum, non verò ad minuendum. Hæc sunt ejus verba: *il salasso serve come di Veleno per aumentare il male, non per sminuirlo*: Undè *Galenus* ipse *lib. 4. de San. tuen. cap. 4.* ait, *si Sanguis insigniter mutatus sit, nequaquam detrahe*: & *Glabachius* exitiosam vocavit in febribus Venæ

sectionem, quia si est omninosa in malignis febribus, ut volunt Practici peritiores, quid erit in simplici febre intermittente? nam juxta hunc Auctorem febres inter se non differunt, nisi secundum magis, & minus, quod igitur uni erit plus exitiosum, alteri erit minus, nec proinde hoc minus omni carebit exitio: proinde docet experientia, non rarò febres in principio mites, & non periculosas apparere, cum tamen postea febres illæ fuerint malignæ, adeoque melius est semper à Venæ sectione abstinuisse. Tandem cum basis curationis in Febribus in eo consistit, ut turbata mixtio cruoris restituatur, nihil potest utilitatis à Venæ sectione expectari, turbatum enim magis turbabit cruorem, dum particulæ volatiles, & spirituosæ evolant, quibus ille orbatus, minus commovebitur, unde transpiratio impiedetur, & rarò erit expectanda crisis, ita ut Æger vel debilitatus succumbat, vel in longum protrahatur morbus, aut in Cachexiam incidat: Et sanè, si in febribus malignis particulæ acres, acidæ, & erosivæ indolis luxuriant in cruore, has convenit corrigere, mitigare, & evacuare, quod rectè non expectandum erit à Phlebotomia, cum æqualiter illæ per totam massam humorum diffusæ sunt, ita ut totus deberet educi cruor, quod inevitabilem ferret moriendi necessitatem: Sicuti pariter in febre maligna præsentente Diarrhœa nunquam Venæ sectio tentanda erit suadente *Waldschmidio in Monit. Med.*, tunc enim in perniciem Ægri cedit Venæ sectio, ut observare datum est anno 1727. in *Illustr. N. N.* febris maligna detento, cui pluries secta fuit Vena præsentente Diarrhœa, & decima septima morbi die miserabiliter obiit. Qui autem peccantem materiam è Sanguinea massa educere, & malignam fermentationem in sede sua omninò radicatam Venæ sectione tollere tentant, non minus risu digni sunt, ait *Laur. Donckers in sua febr.*, quam qui dolium aliquo in loco perforantes, cum exiguæ vini portionis emissionem, ejus quoque fæces vino permixtas extrahere, vel ipsius fermentationem tollere stultè sibi imaginantur: difficile enim, & propè impossibile est educere illum humorem, qui facit morbum, quia hic, scribente *Tozzio*, non rarò alicubi hæret, aut stagnat, ut in apicibus arteriarum, vel in glandulis, vel in intimioribus partium penetralibus, immo Sanguinis missio vires dejicit, & furatur, quibus maximè egemus ad profligandam morbi causam,

& per ipsam salutare naturæ motus impediuntur ; & experientia docuit , omnes penè periisse febri maligna detentos , quibus secta fuit Vena ; undè *Petrus Forestus* in febre Delpheni , quæ anno 1557. grassata fuit , eos omnes , ait , quibus secta fuerat Vena , mortuos esse ; idemque notavit *Vit. Riedlinus Obs. Med. num. 18. pag. m. li 112.* De Venæ Sectionis in febribus malignis noxa plura scripsere *Mart. Kergerus , Henric. Screta* , aliique plures , quibus notandis præsens non sufficeret pagina. Ne abusus igitur fiat de tali auxilio Medico , quòd sub nomine magni , & extremi remedii à Medicis salutatur , debemus diligenter cavere in præscribenda Phlebotomia , quemadmodum fusè habui in præsentis consilio. Quamobrem scribendi finem facio , nam dicta sufficiunt pro responsione quæsit.

CONSULTATIO CLXVIII.

De Venæ Sectione in Febris Tertianæ Curatione.

Postulabas an in curatione Febris Tertianæ Venæ sectio conveniat ? Dico , non convenire primò auctoritate plurium Medicinæ Scriptorum , & præsertim *Clariss. Ettmulleri* , qui de Tertiana Febris sic ait ; & de omnibus Intermittentibus. *Venæ sectio in febris intermittibus inutilis est , nam certè paroxysmus Venæ sectionem insequens , ut plurimum gravior esse solet , & diuturnior reliquis antecedentibus : Raymundus Joh. Fortis in Consult.* Sic habet : de convenientiâ Venæ sectionis dicant quid velint *Mercatus , Mercurialis cum Actuarius* ex usu esse posse , auctoritates enim , & rationes eam non admittendam persuadent , quia Sanguinis missione Tertiana in Continuum , immò in Ardentem migrare potest ; *Ardens enim , & Tertiana intermittens conveniunt in materiâ , differunt tantum loco.* *Galenus* ipse in curatione exquisitæ Tertianæ omisit omninò Sanguinis missionem. *Glabachius* sic ait : *Venæ sectio febricitantibus est exitiosa.* *Clariss. Vulpinus* Amicus noster plurimum honorandus sic habet in sua *Spasmologia pag. 17.* *Cæterum in febre intermittente Venæ sectio , ut frustranea , imò & amethoda ablegari peroptimè valet , & præsertim intermittibus in febribus.* *Dolæus* sequentia verba exaravit : *Nega-*
tur

tur *Venæ sectio* in intermittenti febre, cum constet aliquot mille absque *Venæ sectione* esse curatos, & cum experientiâ constet, illos, qui frequentius duci sibi Sanguinem patiuntur, satis proclives fieri ad febres, & porro nos doceat, quod febres per *Venæ sectionem* prolongentur, nec tertiana remittant. Theodorus Zuvingerus in sua *Praxi Med.* ait, *Venæ sectio* absente Plethora in febre Tertiana nullum locum habet. Andreas Cæsalpinus *Art. Med. lib. 2.* scribit. *Evacuatio in Tertiana non sit per Venæ sectionem.* Rosinus Lentilius *Miscell. Curios. Decur. 11. ann. 7. Append. pag. mihi 80.* ait, Veteranum quendam fuisse, qui quoties venam fecaret, corriperetur Tertiana; & addit in continuis febribus posse admitti, in Intermittentibus autem minimè exerceri posse statuit. Avicenna inquit non esse phlebotomisandum in Tertiana; immò addit Sebastianus Scarabiti^{us} de *Febrib.*, non esse administrandam Missionem Sanguinis in Tertiana, ne fortè contingat nocumentum ex ea, quia apostema alicujus partis nobilis sequeretur cum vitæ periculo; sunt ejus præcisa verba. Idem porro confirmare videtur Horat. Augenius de *Sang. Missiō. lib. 4.* dicens, in Tertianis exquisitis Galenum nec verbum fecisse de *Venæ sectione*. Jo. Bapt. Verlosching Amicus meus suavis in *abus. purg. Verno-autumn.* ait, *Venæ sectionem* in febribus intermittantibus minimè esse proficuum, ideòque nocuam. Claudinus in *Consult.* statuit, non posse probari *Venæ sectionem*, quoniam deficit Sanguis, sed tantum ratione doloris capitis convenire cucurbitulas scarificatas partibus inferis applicitas, sicuti frictiones, ligaturas, & lavationes &c. Zacutus Lusitanus *lib. 4. de Med. Princ. hist.* sic habet; Medicos maximè Ægros offendere, qui in febribus *Venæ sectione* utuntur; ideòque *Venæ sectionem* utilem non esse. Hæc quoad auctoritates. Nunc ad rationem; non convenit enim *Venæ sectio*, nisi in morbis magnis, magnum cum sit ipsa remedium; febris autem Tertiana intermittens non est certè morbus magnus, periculo enim vacat teste Hippocrate; ergo non convenit. Quod si in intermittente febre Sanguis detrahatur, exinanitæ *Venæ biliosum*, seu sulphureum humorem peccantem ad se attrahere poterunt, & ardentem continuam febrem excitare; etenim nullo alio modo fit febris ardens, nisi quando æstatis tempore *Venæ* turgent humore bilioso in eas derivato, derivat autem de facili latrante Syrio, quia tunc facilè accenditur,

movetur, ac penetrat, quatenus subtilior factus totam massam cruoris ad præternaturalem fermentationem inducit; & licet observetur, ait *Bonetus*, in plerisque acutis, & ardentibus febribus locum habere Venæ sectionem, non est tamen semper universaliter verum, nos debere uti Phlebotomia in quacumque licet exigua febre; & licet aliqui Ægroti post Venam sectam melius se habuerint, non per hoc sequitur, omnibus idem remedium esse utile, cum præsertim multa habeam exempla illorum, quibus non tantum inutilis, sed noxia extitit sanguinis missio, quemadmodum sæpè observavi mensibus Julii, & Augusti ann. 1728.; quibus enim tertianariis die vacua emissus fuerat Sanguis, supervenit ipsa die febris, & sic de simplici facta fuit Tertiana duplex; & licet, suadente *Hippocrate*, Tertiana simplex septem circuitibus, quod longissimum est, terminare soleat, attamen Venæ sectionis causa, duplex cum vitæ periculo facta, vigesimum paroxysmum inivit. Exulet igitur in cura Tertianæ simplicis Phlebotomia, siquidem hæc juxta *Sylvium de le Boë* sola diæta curari possit. Benè igitur *Clariss. Joh. Bohnius de off. Med. cap. 9.* opponit exempla plus quam quotidiana illorum, qui à febre, non tantum per Venæ sectionem, non reconvalescerint, sed gravioribus periculis, ac morti mancipati fuerint, ut narrat *Franc. de Francisco*, & *Jac. Ponz.* Concludo igitur, Sanguinis missionem feбри intermittenti, qua tamen tali, minimè competere, & aliquando in harum medela nocere.

CONSULTATIO CLXIX.

De Purgatione Corporum Verno - autumnali ad præservationem.

Sciscitaris an Ego approbem Purgationes Corporum humanorum verno-autumnales sine morbi præsentia, & ut vulgò dicitur ad præservationem à morbo; circa quod nescio an legeris opus *Joh. Baptist. Verloschnig*, cui titulus est *Abusus curationis verno-autumnalis*, in quo etiam affert Author meam opinionem, quam nunc repeto; nam cum Jesus ipse Dominus noster asserat, *non esse opus bene valentibus Medico*, non video necessitatem purgandi cor-

pora salute gaudentia: quomodò enim absque necessitate purgari possit sine noxa non video, cùm à purganti viscera chylicationi dicata, non parùm lædantur, & debilitentur, ita ut, non sine difficultate, naturalem crasim recuperare valeant, & tonum pristinum redimere. Sanguinis porro missio, educendo balsamicas ejus particulas, effœtum magis magisque reddit cruorem; & fanè phlebotomiam taliter non commendo, ut quasi me subscriberem *Clariss. Helmontio*, & *Leonard. à Capua*, ac *Doctiss. Amico meo Rotario*, si paulò moderatiores iidem se gererent, nec rectum usum unà cum gravi abusu omninò tollerent. Pessimo igitur agunt consilio Medici illi, qui purgationem instituunt, quando non adsit illa rationabilis indicatio. Cunctis enim in corpore ritè se habentibus quid proderit humores turbare, & Sanguinem nec quantitate, nec qualitate peccantem educere; immò credo, si hoc fecerit Medicus, corpus ad morbos faciliùs disponi. Optimè ergo dixit *Sapientiss. Georg. Baglivus* in homine sano nullam medicam evacuationem convenire, nam si sanus est, ad quid Medicinis turbare illum, ac debilitare, cum illæ in sano hominis statu incredibiles turbationes faciant, corpus labefactent, & solvant, ad morbos disponant, & educant, quæ educere non debent. Et hæc de tuo quæsito mea fit sententia, quam fanè saniores Medici approbant.

CONSULTATIO CLXX.

De Purgatione diebus Criticis in Morbis acutis: Et de usu Aceti in nimia obesitate.

INstantiæ, quam in Epistola mihi facis, an in Morbis acutis, criticis diebus liceat purgare; respondeo cum *Nicol. Fontano*, si nihil indicatum ante fuit, licere die septima, & decima quarta purgare, vel sanguinem etiam educere, quando tamen non fuerit indicata crisis per sua signa, tunc enim propriè illi dies critici non possunt vocari. Quod si Medicus videat naturam illis diebus velle moliri aliquam operationem, vel evacuationem, puta per sudores, urinas &c., tunc Medicus nihil agat; si verò natura imperfectam tentet

crisim,

crisim, Tu nota, num id agat vomitu, sudore, hæmorrhagia, tunc sanè leni vomitorio juvare licebit vomitum ipsum, frictione sudores, & hirudinibus hæmorrhagiam. Sed si per secessum natura moveat crisim imperfectam, præstabit, Medicum hunc juvare motum, levem purgationem sollicitando, quare leniens medicamentum poterit exhiberi. Quod si natura impedita nullum die critico motum peraget, tunc Medicus poterit Venæ sectionem, vel alvi solutionem instituere, prout indicationes vocabunt, maximè cùm sciat naturam probabiliter nihil esse facturam. Ad illud verò *Hippocratis* critico die nihil movendum, respondeo, Magistrum loqui de tali die, in qua natura movet, nam tunc vires defatigantur, & non convenit naturam interrompere à sua actione cum ejus detrimento. Quando die critico natura non movet, tunc licitum est purgare, ut supra dixi.

Postulas postea num Aceti usus in nimia Obesitate conveniat? Te enim legisse dicis apud *Stradam de Bell. Belg.*, Chiapinium Vitellium Generalem Castrorum nimium Obesum, Aceti usu quotidie assumpti convaluisse. Quocirca respondeo, aliquos esse Aucthores, qui in nimia Obesitate commendant Aceti usum, maximè in æstate, per plures dies ad mensuram unius cyathi, nam potenter corpora exsiccat, & emaciat, cùm præsertim sit ejus usus assiduus, maximè in Acetariis, & condimentis. Attamen hoc genus remedii eos fugere oportet, qui articulos habent imbecilles, necnon uterum; atque hyeme, ut ejus nimia acredo refrangatur, ipsi aceto immiscendæ sunt uvæ passæ. Possunt etiam esse in assiduo usu Cappares in aceto ipso conditi, & Olivæ, suadente *Epiphanio Ferdinando*. Pariter, Excellentissime Domine, notare debes, à quibusdam Aceti usum commendari; sed advertas velim, Venter, & Intestina lædi posse, cùm acidum sit infensum omnibus partibus membranosis.

CONSULTATIO CLXXI.

De Remediis Diaphoreticis.

CIrca medicamenta Sudorifica hæc est sententia mea, quam petis. Diaphoretica, hoc est, Sudorifica medicamina, longè sunt præferenda cathartics, & sanguinem dementibus, nam hæc placidè, sine noxa, & feliciter operantur; immò certum effem; ait *Clariss. Zypæus*, noxam ab expurgatione, & Venæ sectione in Peste, Variolis, Petechiis, aliisque morbis malignis, expectari posse, felicem è contra eventum à Sudorificis in illis morbis haberi. Neque velim dicant, sudorifica calida esse, adeoque in febre non convenire, ne fortè augeatur calor; respondeo enim; non omnia esse æquè calida, & licèt calida sint, attamen esse purgantibus longè tutiora: sudorifica enim tenuibus suis particulis humores massæ sanguineæ valdè attenuare, incidere, & rarefacere, & ad cutis glandulas propellere dico, ita ut sine ullâ molestiâ causam morbificam expellant. Duplici autem modo, meo videri, operantur; vel ob rarefactionem, vel figendo, & nimiam ebullitionem compescendo, & tunc cum præcipitantibus confunduntur. Sunt ergo Sudorifica, quæ humores tenues, vitiosos, ac corruptos, non solum è corporis habitu, verùm etiam è reliqua parte corporis, mediantibus venis, arteriis, & vasis lymphaticis, vel sensibiliter per sudorem, vel insensibiliter per effluvia expellunt; maxime propterea utilia in morborum causis eliminandis: & licèt immediatè habitum totius corporis evacuent, mediatè tamen, & quadam consequutione omnia vasa, venas, arterias, vasa lymphatica, & reliquas corporis partes inaniunt. Dividit autem talia remedia cum *Vvedelio Mangetus Biblioth. Pharm. l. 4.* in illa quæ sensibiliter sudorem movent, & Hydrotica vocat, & in ea, quæ insensibiliter id agunt, & dicuntur simpliciter Diaphoretica, quæ per poros subtiles humorum partes excludunt; magna quippe semper fuit vis transpirationis ad vitæ conservationem, quam statico scrutinio *Sanctorius* deprehendit esse omnibus aliis evacuationibus

maiores : per poros enim partium evacuat Diaphoresis magnam copiam sordium volatiliū, & crassarum, quæ in visceribus, & valis reperiuntur. Hæc pauca de Diaphoreticis remediis sufficiant.

CONSULTATIO CLXXII.

*Formula Remediorum Auctoris ad Hæmorrhoidas,
ad Gonorrhœam, & Aquæ Vitæ Solutivæ.*

Mitto libenter formulas, quas petis, Remediorum meorum ad Hæmorrhoidas, Gonorrhœam, & Alvi solutionem Ad Hæmorrhoidas est unguentum, quod tale est. R. Cephæ sub cineribus coctæ, unc. ij. Unguenti Populeonis, unc. j. olei Lini, & Vitelli ovorum, ana, drachm. ij., Salis Saturni pulverisati, drachm. j. Extracti opio drachm. j. misce; fiat S. A. linimentum, & benè misceatur in mortario plumbeo.

Contra Gonorrhœam virulentam Rotulæ sunt sequentes. R. Ligni Sancti limati, corticis ejusdem, Salsæ parillæ electæ, ana, scrup. iiij. Suberis pulverisati, Coriandi præparati, Cinnamomi electi, Rosarum rubrarum, Cornu Cervi usti, ana, scrup. j. misce; Pulverizentur subtilissimè & cum Saccharo, & aqua Lactucæ Q. S. fiant Rotulæ S. A. Hanc Rotularum formulam anno 1702. misi ad Germanos, qui eam publici juris fecere in Dec. III. Miscell. Curios Acad. Leopold. anno. X. pag. 266.

Formula Aquæ Vitæ solutivæ, qua aliquando utor ad alvum sollicitandam, talis est: R. Radicis Jalappæ pinguis, & resinosa minutim contusæ, unc. j., Cinnamomi elect. drach. ij., Corticis Citri recentis, drachm. ij. infundantur in lib. j. spiritus Vini rectificati, stent infusa super cineres calidos, deinde coletur, & filtretur ac spiritus reponatur: interim R. Sacchari fini, unc. iiij. reponantur in vase, deinde super affundantur aquæ ferventis unc. iiij. stent in vase clauso, donec refrigerentur, & Saccharum optimè fuerit dissolutum, tunc misceantur cum spiritu vini jam reposito, & Soli per 8. dies exponantur, postea rursus colentur, & filtrentur. Quarta formula, quam addere mihi placet, est alius modus faciendi Aquam vitæ solutivam: R. Pulveris

Jalappæ electæ, unc. j. Cinnamomi electi, drachm. ij. corticis citri parum, infunde omnia in lib. j. Spiritus Vini rectificati, & stent in infusione super cineres calidos per tres dies: coletur postea, filtretur per chartam & servetur ad usum dosisque sit unc. j. Ambas has Aquæ solutivæ Formulas retulit clarissimus Franciscus Maria Nigrifolius in Pharmacopœa Ferrariensi, Class. 6. de Extractis. &c.

CONSULTATIO CLXXIII.

De Variis Quæsitis in Medicicina.

PLura sunt, quæ à me scire cupis, quibus singillatim breviter respondere in præsentì pagina decerno. Quæris à me igitur.

- I. An Medicum interdum non curare deceat?
- II. An crurum scarificatio in hydropè tentanda?
- III. An Vernalis purgatio in sanis instituenda?
- IV. Quid sit Elaps?
- V. Quid sibi velit Ectropion?
- VI. An tutò in Gravidis Vena in pede secetur?
- VII. Quid sit Danta?
- VIII. An Cochleæ Phthificis concedendæ?
- IX. An Panis repletio sit pessima?
- X. Quid sit terra Catechù?

Ad primum respondeo, re bene pensitata, officium rectum Medici erit, Ægri curationem prorsus non aggredi in deploratis, sed manum de tabula tollere; & revera Medicus aggredi non debet morbos, qui omninò lethales sunt, ita enim Medicus morituros præ-

prænuñciandæ culpa vacabit, quod etiam annuit *Celsus*; est enim prudentis hominis primò eum, qui servari non potest, non attingere, nec subire speciem ejus, ut occisi, quem fors ipsius peremit, alias in prognosi peccaret, quæ est pars in Medico essentialis, & Medicus nominis sui existimationem, ac auctoritatem vulgi rumori exponet, & medicamenta aliàs optima hisce morbis desperatis applicata ob denegatum eorum affectum infamabit, ut ait *Frid. Hoffmannus in Mat. Med.*

Ad secundum dico, scarificationem crurum celebre fuisse apud Veteres remedium, licèt *Hercul. Saxonia* commendet quidem scarificationem cutis in abdomine; in talis autem, & cruribus ob metum gangrænæ ab iis abstinendum esse præcipiat: eandem verò *Langius* commendat; & non conferentibus alijs remedijs, crurum Scarificationem proficuum esse aliquandò ego deprehendi, quando scilicet viscera non sunt admodum vitata, ac vasa lymphatica non sunt disrupta.

Ad tertium respondeo, vernalem corporis purgationem inutilem esse, & nocuam, ut diffusè ostendit in suo *lib. de purg.* Clariss. D. *Joh. Bapt. Werloschnig.* Collega, & Amicus meus semper colendus; nam Purgantia, Venæ sectiones in corpore sano, vernali, sive autumnali tempore, adhibita, plus damni, quàm juvaminis afferre dico. Et quoad purgantia, nescio qua fronte hæc deleteria pharmaca in usum sine necessitate vocanda sint, nam detestari debent juxtà illud *Hippocratis*, sana corpora Medicationes ægrè, ac molestè ferunt; & revera sanitatis negotium in integra humani corporis structura, atque harmonica, & amicabili omnium vitalis, & animalis liquoris particularum mixtura, & motu consistit; cùm vero Cathartica in sano corpore adhibentur, illicò naturalis humorum mixtura, ac motus solent turbari, siquidem intestinales fibrillæ à sale purgantium medicaminum irritantur, undè spiritus, & humores turbantur, tormina, sitis, febris ipsa, & sæpe convulsio succedit; quare ex repetita, & violenta alvi purgatione homines è sano in valetudinarium statum præcipitantur; etenim tumultuaria cathartorum salia, enervatis fermentis viscerum, & dissipatis spiritibus, Cachexiam, & sæpe Hydropem excitare valent; & pejus erit, si in

Se-

Senibus, Infantibus, ac Fœminis delicatioribus purgatio instituitur.

Quod verò spectat ad usum Sanguinis missionis verno-autumnalis ad præservationem; scias velim me esse ejus hostem acerrimum, & rarò etiam in morbis tali uti præsidio, & nisi inflammationibus, Anginis, Apoplexiis, aliisque morbis magnis venam secari concedo; cum præsertim sciam ex usu frequenti Phlebotomiæ Cachexias, Hydropes, & Febres frequentes oriri posse. Præterquàm quod, si etiam Sanguis qualitate peccaret, per medicamina appropriata facile corrigendus esset seposita omni empyrica Venam aperiendi consuetudine.

Ad quartam tuam petitionem respondeo: Elaps. est Serpentis species longa circa tres pedes, crassitie unius viperæ, coloris subflavi, & signata per longum tribus nigris lineis à capite ad caudam; & reperiri aiunt Naturales in insula Lemnos: non est hic serpens tamen valde periculosus, licet ejus morsus sit molestus, ac dolorosus, & sanatur suadente *Lemery* sale viperino, & Cornu Cervi. Caro autem, Hepar, Cor, & adeps hujus animalis hydrotica sunt, & venenis resistunt.

Ad quintum quæsitum dico, *Ectropion* esse affectum inferioris palpebræ, qua invertitur, & deorsum trahitur, ut internæ palpebræ pars cum deformitate videatur, & instar rubræ carnis appareat; Hujus morbi, ac deformitatis causa multiplex esse solet, ut incrementum carnis, tumor internus ipsius palpebræ, paralysis, vel convulsio ejusdem. *Plinius* de Coribantiasmo meminit, sed iste est idem affectus in superiore palpebra.

Ad sextum respondeo, Venæ sectionem rectè institui posse in Gravidis è talo, & hoc experientia constare affirmo, Ego enim sæpius à Vena pedis Sanguinem mitti jussi in Gravidis; si enim in uteri cavitate Sanguinis copia nimia stabuletur, suffocationem uteri effectura, poterit tutò è Vena pedis Sanguis educi, & ita uteri plenitudinem exhauriri: & tantum abest, ut ex Saphenæ sectione sequatur periculum abortus, ut potius deoneratâ naturâ, & vacuatâ uteri plenitudine, foetus alacrior evadat, dummodo tamen gravida sit carnosâ, & succulenta, venis turgentibus prædita.

Danta

Danta est animal quatuor pedum, ut Cervus; & oritur in America, Mulo simile: labia verò ejus sunt ad instar labiorum vituli, dentes habet fortes, & acutos, in capite unum tantum cornu, crura sunt breviora, ungula scissa, pili sunt rubro-flavi, cauda brevis, ejus porro cutis dura, ac penè impenetrabilis: animal amphibium est, nam quando Venatores illud persequuntur in aquas fugit. Ejus caro commodè comeditur, & pellis ejus caro emittitur pretio ab Europæis, & Indis ipsis, nam factæ ex ea vestes sagittis resistunt. Dicitur rasuram unguium istius animalis valere ad Epilepsiam fugandam, & contra venenum: fides sit penes Indos.

Cochleas non convenire in Phthisi, quia difficilis sunt coctionis, nec bonum succum præbent, brevissimè respondeo: cum enim Phthisici febre laborent, & propterea vis naturalis in corpore sit debilis, cibum difficilis coctionis non superabit, unde multa redundabunt excrementa, tum in toto corpore, cum in ipso ulcerato pulmone: & sic eveniet, ut in vulneribus, quæ saniem copiosiore emittunt, si vulneratus pravo cibo utatur: hæc est mea sententia, licet sint aliqui Medici, qui Phthisicis, & Hæticis cochleas commendent adducti procul dubio auctoritate *Galen*i, qui lib. 3. de alim. facult. limacum carnem potentissimè nutrire affirmat.

Ad XI. quæsitum, dico: falsissimam esse prorsus sententiam, omnem repletionem malam esse, panis verò pessimam: panis tamen intelligendus est bonus, benè fermentatus, & triticeus; nam qui ex aliorum farinis fit, ut fabaceus, miliaceus, hordeaceus &c., panis improprie dicitur: nimia autem panis repletio est omnium rarissima, & si esset frequentior, non esset pessima, quia *Eliæ* famefcenti solum panem Deus mittebat per Corvum; ita ut nomine panis omnem escam intelligi ait *Jac. Primerosius*, quia præcipua est, & solus sufficere potest, unde annonæ penuria, quæ tam gravis esse solet populis, est frumenti, ex quo panes fiunt, defectus, & inopia, etiamsi carnum, & piscium adsit copia. Et sanè Triticum valde nutrit, & præstat alimentum constans, ac solidum, & si aliqua mala præstaret quantitas panis comesta, illa tolli poterunt

idonea præparatione, verbi gratia, visciditas tollitur fermento, humiditas verò sale, & coctura. Si solo pane multi vescerentur, *Primerosio* suadente, pauci morbi forent, & curationes, faciliores, nam convivium frequentia, splendida, crapulæ, & ebrietates sunt, quæ malignos morbos pariunt, & curatu difficiles, unde meritò postea Doctiss. noster *Savonarola* dixit, se nullibi hanc turpem sententiam de panis repletionem invenisse, & à multis Doctoribus petiisse, qui etiam se non vidisse dixerunt.

Terra Catechu, sive ut alii dicunt, terra Japonica, est quædam species pastæ siccae, ac duræ, paulum gummosa, subrubra, figuræ veluti lapidis, saporis amari, & subaustris in principio, sed postea subdulcis, & grati: punctulis albis lapis iste est intertextus; & est duplex: primus est ponderosior, alter porosior, ac pallidior primo. Aliqui volunt à Japonicis parari cum extracto *Areccæ*, *Calami aromatici*, & *seminis Bangue* mixtis, & ad ignem induratis. Alii credunt hanc terram esse compactam ex succo *Areccæ*, & ex corticibus arboris Japonensium dicti Catechu, simul, ope caloris, condensatis. Alii tandem asserunt esse revera quandam terram, quæ reperitur in montibus Orientis sub radicibus Cedri. Melior autem est illa ponderosior, saporis styptici, ac amari. Adhibetur ad Tussim, ac Raucedinem, permixta cum saccharo, & dosis est à scrup. j. ad drachm. j. Habet usum in urinæ profluvio juxta *Frid. Hoffmannum*. Apud nos parantur rotulæ quarum descriptio habetur in tomo 2. *Biblioth. Pharm. med. lib. 19. Clariss. D. Joh. Jacobi Mangeti* & hæc sunt, quæ mihi breviter dicenda videbantur pro responsione ad tuas petitiones faciendâ.

CONSULTATIO CLXXIV.

De Aliquibus observatis in Re Medica.

EA est humanitas tua, talisque animi tui candor, ut nefas esset tibi non respondere, *Excellentissime Domine*, ac Discipule dilectissime. Manum igitur ad chartam defero, & quod desideras transmittō; optabas siquidem scire observationes à me factas, & à Tyronibus meis in Praxi faciendā, & præsertim duobus hisce annis, quibus tu extra urbem nostram, & longè à nobis permanes; & speciatim observata in meo Nosocomio S. Mariæ Novellæ, vulgò *Battù Bianchi*. Scias igitur velim, multas, ac varias *Ægri- tudines* à me fuisse curatas, inter quas innumeras febres malignas contagiosas, quarum multæ feliciter Deo adjuvante cesserunt, aliæ verò ad interitum terminavêre. In omnibus autem observatæ sunt puncticulares maculæ copiosæ, præsertim in pectore, sudatiunculæ, tremores, convulsiones, subdeliria, parotides, pulsus inæ- quales, lingua arida, urinæ tenues, & alvi excretiones biliosæ. In his curandis omissa Venæ sectione, cucurbitulis tantum scarifica- tis sum usus, clysteribus, emulsionibus diureticis, alexipharma- cis, sudorificis, bezoarticis, aliisque remediis, quibus tu bene scis me uti libenter solere.

Vomitum immanem sedavi sola exhibitione vini Hispanici, & ex- tra, inunctione olei *Mastiches*.

Tusses multas solo decocto *Raparum* fugatas vidi. Tremulum Aurigam, solo balneo urinæ propriæ à tremore sanum evasisse ob- servavi, quod remedii genus *Forestus* ante me commendavit. Plu- res suffocationes uterinas mitigasse sequens medicamentum exper- tus fui: *Pulveris Assæ fætida*, ʒ. ʒ. Castorei, Myrrhæ, Charabes, ana, ʒ. j. Camphoræ, ʒ. ʒ. Tripheræ Magnæ sine Opio, Philonii Romani, ana, ʒ. j. Misce cum Syrupō de Artemisia, fiant S. A. boli aurati n. X. quo- rum unus sumatur alterna die, donec finierint. Iliaca passione de-

tentum, assumptis plumbeis pilis ad usum Sclopeti, à Mortis faucibus evasisse notavi. Sanguinis sputum sistere vidi solo usu *succi Urticæ*, & *Pilularum Helvetii*. Pertinacem Cephalæam arteriotomia curatam observavi.

Hyemali tempore multas Pleuritides curavi iterata Venæ sectione, pulvere Sanguinis Hirci præparati, syrupo de Hyssopo, Gelatina Cornu Cervi, & oleo Cucurbitonis externè inuncto.

Duas Puellas lumbricis affectas, usu pulveris *China China* cum Vino generoso liberavi.

Obstructiones viscerum sola masticatione frequenti *Rhabarbari* curatas conspexi.

Opthalmias sequenti remedio curavi: R. *Salis Saturni* gr. xij. *Salis Ammoniaci*, gr. iij. *aquæ Rosarum albarum*, ℥. iij. *Misce*: instillabantur in oculum affectum mane, & vespere. Mensium suppressionem in aliquibus fœminis solo usu vini in quo infusum fuerat *Absinthium Ponticum*, sustuli.

Adolescens ætatis annorum XIII. Lichenem in palmis manuum admodum fœdam habentem vidi, & purgato prius communiter corpore, tandem sequenti unguento sanitati fuit restitutus. R. *Lithargyri auri*, & *argenti* per noctem in aceto infusi, & macerati, ana, ℥. . *Sulphuris vivi*, ℥. j. *pulveris Hellebori nigri*, ℥. j. *succi Limoniorum*, ℥. j. *adipis porcini*, & *butyri loti in aqua Rosarum*, ana, ℥. . *Ceræ modicum*, *Misce*. *Fiat unguentum molle S.A.*

Die tertia Julii 1726. delatus ad Xenodochium Sacerdos quidam Mutinensis annorum ætatis 55. qui quinque dierum spatio stagnantem urinam passus est, & jam morti vicinus, meo jussu, assumpsit pro haustu, vini albi generosi, ℥. iij. *succi Limoniorum*, ℥. j. *spiritus Therebentinae*, ℥. j. *spiritus Salis dulcis*, gutt. x. , & post tres horas copiosè minxit, & saluti fuit restitutus, & post injectum clysterem è Xenodochio sanus demissus fuit.

Mense Augusti Faber lignarius Ferrariensis annorum XLIX. molesto hæmorrhoidum dolore affectus ad nostrum hospitale confugit, isque brevi duorum dierum spatio sanatus est sola applicatione mei unguenti de Ceba; id est, R. *Cepæ sub cineribus coctæ*, ℥. ij. *Unguenti Populeonis*, ℥. j. *olei Lini*, ℥. . *Vitelli Ovorum*, ℥. ij. *Salis*

Satur-

Saturni pulverisati, 3. j. *Extracti opii*, 3. 8. *adipis Ranarum*, 3. ij. *Misce*, fiat linimentum S. A., & benè misceatur in mortario plumbeo.

Febres omnes duplices tertianæ, quarum non est numerus, pari modo curatæ sunt, nempe per simplicem alvi purgationem, Venæ sectionem, alterantia, ac usum *Chinae Chinae* ter in die sumptæ in aqua *Cardui Sancti*, vel uino nostrate generoso, & vix unus ex talibus Ægris fato cessit: Et hîc admonere debeo, me observasse, usum corticis Peruviani magis proficuum esse in febris declinatione, quam in principio accessionis, & ante paroxysmum.

Uxorem unius Militis Præsidiî nostri Ferrariensis curandam habui, quæ affecta erat Abdominis musculorum Scirrhus, & purgato prius communiter corpore, sequenti appolito cataplasmate ritè convaluit: & *Ammoniâ*, *Galbani*, *Bdellii*, ana, partes æquales, terantur in mortario cum oleo *Liliorum alborum*, deinde adde *muilaginis* *Seminum Fœnugræci*, *Lini* & *Ficum* ad pondus omnium prædictorum, contundantur omnia simul, donec in unum coeant, & fiat S. A. Cataplasma; & hoc medicamentum præscriptum fuit quondam à *Joh. Zecchio* in Consult., scripsit enim, illud esse ad scirrhos emolliendos, & discutiendos omnium sanè efficacissimum.

Dolores articulares sola assumptione iterata *specierum Hermodatyl. Officinal.* ad 3. iiij. in juscule vituli calido sanatos observavi, absque Venæ sectione, & alio remedio.

Narium hæmorrhagiam bis in Nosocomio sistere vidi stupâ sequenti madefactâ naribus inditâ: & *Aceti fortissimi*, 3. j. *Croci Martis adstringentis*, 3. j., *Colcotharitis*, 3. ij. *Misce.*

Ad nostrum Valetudinarium anno 1727. mense Junio accessit Juvencula febre albâ laborans cum omnimodâ menstruorum suppressione, quæ prius expiatis communi purgatione primis viis, mox sequentibus assumptis bolis, ab consuetum Catameniorum fluxum rediit, & sana à febre albâ evasit. & *Aloës*, 3. j. *Myrrhæ*, *Gentianæ*, *Aristolochiæ*, *Dictamni*, *Croci*, ana, 3. 8., *Rubiæ majoris*, *Mithridatii*, ana, 3. j. cum Syrupo de *Artemisia* fiat massa; capiat pro dosi pil. iiij. quotidie mane jejuno stomacho, superbibendo decoctum *Artemisiæ*, & *Cicerum rubrorum*.

Observavi insuper in malignis febribus, vini usum aliquando fuisse proficuum, utpotè insigne cardiacum, & malignæ qualitati maximè adversum.

Odontalgiam pessimam curatum vidi solo aceto, cui summitas *Hyssopi* cum tantillo *Salis Absinthii* incoxerint, mox candentis vitri frustulo injecto, fortè quia vermes extinguit; suadente *Joh. Bapt. Vulpino Amico meo magno in sua Spasmolog.* qui fatetur se Odontalgia divexatum tali remedio salutem obtinuisse, ita ut per menses, imò annos dolorem non passus fuerit.

Singultum in febris malignæ sedavi non semel, solâ exhibitione *Laudani liquidi Sydenhamii*, superbibitâ *Emulsione quatuor seminum frigidorum majorum facta in aqua Melissæ ad lib. 1.*, in qua drachma una pulveris *Salis Prunellæ* dissoluta fuerat; Externè inuncto Stomacho oleo de *Absinthio*, & *Emplastro de Crusta panis*, aut de *palmulis Galeni*.

Oculorum inflammationes, & pertinaces ophthalmias sola stimulatione ventris assumpta solutiva potione curatas vidi, absque Venæ sectione, cucurbitulis, & aliis hujusmodi remediis; hoc autem juxta *Hippocratis* monitum feci, ipse enim ait, *Lippientes alvi profusio corripit, bonum.*

Mulierem curandam habui mense Julio anni 1727., quæ Cholera affecta fuit circa meridiem diei 30. ejusdem mensis; hæc primò *Tertiana* simplici videbatur afflicta, quæ primis duabus accessionibus, tanta fuit fermenti febrilis malignitas, ac ferocia, ut excitato vomitu, atque frequenti alvi fluxu cum magna virium jactura summum *Ægræ* periculum impenderet; gravis aderat dolor in Ventriculo, ac Intestinis, ita ut corpus in assidua agitatione maneret; exhibita fuit *Emulsio quatuor seminum frigidorum majorum facta in aqua Portulacæ cum Scrup. ij. Crystalli Montanæ præparatæ*, & modico *Laudani liquidi Sydenhamii*, & convaluit.

Molestissimum aurium dolorem in quodam Adolescente fugavi sola appositione olei è ligno *Coryli*: in alio verò hujusmodi dolore affecto fel bovis mirificè profuit, absque ulla Venæ sectione, quæ quia est remedium magnum, non tam de facili in usum

sum ducenda, sed in magnis morbis tantummodo adhibenda, ne temerè in abusum ducatur, ut hodie à nonnullis Medicis fit; non sine magno hominum damno; jure & merito igitur exclamat *Clariss. D. Joh. Bapt. Vulpinus* amicus meus recolendus in *præfat. suæ Spasmolog. Proh stupor, cruenta hæc secta, fixasque egit radices, ut alteram in naturam jamjam conversa, sine ea qui tractari sustineat vix reperiatur.*

Stranguriam post febrem Tertianam vidi; quæ fuit sanata ope *Emulsionis ex quatuor seminibus frigidis majoribus factæ in aqua Malvæ, & cum pulvere Oculorum Cancris præparatorum*, nullo alio addito remedio, neque intrinseco, neque extrinseco.

Puerorum Serpiginem semper feliciter curavi sola appositione *cretæ pulverisatæ, & mixtæ cum succo sempervivi* ad formam lini-menti, quo locus affectus inungitur, est de faciliè parabilibus remediis, & tamen summoperè juvat, sine Pharmacopolæ lucro, & incommodo.

Succum Liquiritiæ adversus raucedines semper feliciter adhiberi observavi, imò justè fateri possum, aliquando in vocis deperditione *oleum Sacchari, & Syrupum de Rapis, atque aquam Hordei* tepidam cum solo Saccharo profuisse.

Virum nosco in pessimam Cachexiam delapsus ob frequentem usum purgationis Verno-autumnalis, quam obrem cum amicissimo nostro *Jo. B. Verloschnig* in suo *de abusu purgat. pag. 99.* dicendum puto, Purgationem, & Venæ sectionem Verno-autumnales miseros homines in jacturam virium præcipitare, undè vitæ filum decurtant, & vitæ finem anticipant. Cautè igitur semper in talibus purgationibus præscribendis procedendum, nec unquam sine causa purgandum, non enim ad præservanda corpora à morbis faciunt, verùm ad evocandos morbos in ipsa sana corpora tendunt; & hîc optimè quadrat *Nostri Servatoris oraculum, non est opus benè valentibus Medico, sed malè habentibus.* Caveat ergo *Dominatio Vestra Excellentissima*, ne purgationem, & Venæ sectionem sine causa, & ratione instituat, nam tunc contra artem, contra conscientiam, & in Mortalium perniciem Medicinam ageret, quod nefas est cogitare.

Arthri-

Arthriticum Sacerdotem solo usu assiduo, & quōtidiano *aqua Lentisci* per ebullitionem factæ ad ordinarium potum, & omnimodâ abſtinentiâ à vino, ſanatum obſervavi: Sicuti ſceminam hyſtericam ſola abſtinentia à vino ſanitati reſtitutam vidi. Hæc igitur, Vir Excellentiffime, ſunt, quæ tibi poſſum ſignificare, circa obſervata in Medicina ultimis menſibus elapſis, ut petiſti.



JOSEPHI LANZONI

Philosophiæ & Medicinæ Doctoris Ferrariensis, in Patria Universitate Lectoris Primarii, ac S. R. I. Academiae Cæsareo-Leopoldino-Carolinæ Naturæ Curiosorum Socii, &c.

OBSERVATIONES MEDICINALES

Olim MISCELLANEIS NATURÆ CURIOSORUM
instructæ, nunc conjunctim editæ.



L A U S A N N Æ,

Sumptibus MARCI-MICHAELIS BOUSQUET ET SOCIOR.

M D C C X X X V I I I.

JOSEPH

JAYSON

Philosophia & Medicina Doctoris
in Praesentia Universitatis
et in Regia Academia
Medicinae Carolinae
et Carolinae

OBSEVATIONES


MEDICINAE

in Praesentia Universitatis
et in Regia Academia
Medicinae Carolinae
et Carolinae



IN VINDIA

Printed at the University of
Carolina



OBSERVATIONES

MEDICÆ

D. JOSEPHI LANZONI

OBSERVATIO I.

Ex Miscellan. Natur. Curios. Decur. II. Ann. VIII. Obs. 21.

De Verme ab Utero

PUERPERA quædam annorum. 23. temperiei biliosæ, post enixum foetum vivum ac sanum, sensit nonnullos diros cruciatus circa matricem; ideòque Me in consilium vocavit. At paulò post ab Utero ejecit Vermem ad instar lacertæ, magna cum adstantium admiratione; Vermis autem intra horæ spatium expiravit, qui longitudine palmum unum cum decenti latitudine æquabat. Nunc Puerpera melius se habet, & in publicum prima vice prodit, dum hæc scribo.

OBSERVATIO II.

Ex Miscellan. Natur. Curios. Decur. II. Ann. VIII. Obs. 199.

De magnis Calculis renalibus.

Post longam ac diris concomitatam symptomatibus ægritudinem, Innocentius XI. Pontifex Romanus æternæ memoriæ, frequentibus arthriticis insultibus afflictus, tandem die 12. Augusti Ann. 1689. mortuus est. Aperto Cadavere, in Renibus reperi sunt lapides isti in figuris sequentibus delineati; licet antea Sanctissimus Pontifex nullum passus fuisset unquam nephriticum dolorem. Calculus autem Renis sinistri in parte superiori albicabat, reliquo corpore nigricabat, pondereque uncias novem æquabat: qui verò in dextro Rene fuerat, totus erat albicans, & uncias septem ponderabat.

OBSERVATIO III.

Ex Miscellan. Natur. Curios. Decur. II. Ann. VIII. Obs. 200.

Ulcus in Pulmone Sanatum.

Sisto hinc observationem, quam Excell. D. Ludovico Maria Barberio, Medico Imolensi celeberrimo debeo: Scil. Dominus Lottus, civis Imolensis, annorum circiter quinquaginta, in Massa Lombardorum degens, immani fato circumdatus, incidit in Peripneumoniam die 27. Junii elapsi anni, quæ dierum progressu vesicularem ipsius pulmonis substantiam ulcere labefactavit, ut à Practicantium corona infelicissimus empyematicus haberetur: puris sanguinei sputum, difficilis respiratio, sudores nocturni, febris marasmodica & consumptiva eum comitabantur. Imolanum delatus 8. Augusti
ferè

ferè excarnificatus, usu *balsami Sulphuris* per dies quadraginta, diætâ rationali, ex his, quæ solent in his affectibus à Practicis usurpari, uti *pulmentis hordeacis* &c feliciter fuit sanatus: mane capiebat guttas duas *balsami Sulphuris* in cochleari insulsi juris, qui balsamus paratus extabat è floribus *Sulphuris philosophicis*, cum Spiritu vini rectificatissimo, per circulationem ad lumen lucernæ, vitro subtilissimo, per dies quadraginta usque ad rubedinem. Deintres horas à pastu sumebat aliud cochleare cum balsamo *Sulphuris*, prout communiter præparatur in pharmacopœis cum *Spiritu Therebentinæ*, *Syrupo de succo violarum* admixti, quibus remediis ultra spem sanatio est subsequuta.

Probabile est, si licet internas minimorum explorare actiones, impetum Sanguinis ex Sulphurearum & Salinarum particularum superfluitate (ordinata & certa enim quædam est textura, qua proportionaliter miscentur particulæ omnes sanguineam massam constituentes, quæ, si aliqua earundem erodatur, morbosam constitutionem fas est oriri) febrili, & efferato motu sanguineam massam extra arteriosa & venosa claustra urgente, laxiores membranaceas fibrillas, Pulmonis vesiculas componentes, deprehendendo, eas lacerasse ac dirupisse, quibus ulcus formatum in ipso Pulmone lethale morbum composuit. Pus itaque non tantum lymphaticis retrogradis, sed & sanguineis vasis redditum, perenne fermentum sanguini indidit effervescentiæ febrilis, ex quo deficiente nutritione, marasmus ortum duxerat. Usus itaque nutritionis ut habeatur, necesse videtur, ut in partibus nutriendis ab evolantibus particulis (unde nutritionis necessitas) non tantum impetu transeuntis Sanguinis, sed elastica pressione nitro-aërearum particularum super extimam corporum superficiem collidentium; pori figurati relictî succis denuo impleantur, qui si succo evolanti non fuerint proportionales & figuratæ mixtionis, partem nutriendam reficere non valebunt, angulosumque pus fibrillas tracheales, & vesiculares Pulmonis stimulo contrahendo contractiones in ipsis inducit, (villum enim stimulo contrahi dubium non est) unde contactus spiritus aërei & ingressus ipsius in Sanguinem intercipitur, præ nimiaque contractione etiam laxati villi vesicularum, necesse est Sanguinem ad illas appellentem

coagulari, unde infarctus Pulmo difficilem induxit respirationem. Chimico-balsamica igitur medicaminis constitutio succum sic proportionaliter particulis coagmentatum Sanguiini impartita est, ut purissimum sulphur sine angulatarum particularum obstaculo (sulphurea enim corpora simul ramositate conjuncta nequeunt à salinis angulatis menstruis penetrari) ita aptum nutritioni redderetur, ut dierum progressu paulatim imbibita sanguinea massa, non tantum partes omnes nutriendas restituere valuit, sed ulcus Pulmonis confirmatum istius purissimi sulphuris appulsu vesicularum refectione paulatim sanavit.

OBSERVATIO IV.

Ex Miscellan. Natur. Curios. Decur. II. Ann. VIII. Obs. 201.

De Diarrhœa annua.

CIvis quidam Ferrariensis, annorum triginta duorum, temperamenti biliosi, diarrhœa laborans, Me hebdomada elapsa in consilium vocat, ac interrogatus de morbi causis, narrat, se septem ab hinc annis, semper in finemensis Junii affici molesta hac diarrhœa, biliosa, cum facili ad vomitum propensione, quæ post septem dies evanescit. Rara mihi visa est hæc affectio, cui similem aliam Me legisse non recordor: sequenti autem præscripto remedio ad formam Electuarii, sumendi ad cochleare dimidium ante pastum, septimam observaturus diem, discessi. Remedium autem hoc est: *℞ Conservæ Rosarum veteris, Citri, ana, ʒ. j. ℥. Cornu Cervi præparati, Corallii rubri præparati, Lapidis Alabastrites pulverizati, Hæmatites præparati, Margaritarum præparatarum, Terræ Sigillatæ, Spiritus Vitrioli, ana, ʒ. j. Cum Syrupo acetosæ simplicis, Fiat Electuarium S. A.* Et septima die, doloribus mitigatis, & cessante nausea, terminavit Diarrhœa more consueto; ipse autem Patiens nunc læto animo vivit; sic enim quovis anno dicit naturam suam pravos elicere a corpore humores, sine medicaminum usu, sperans ita, nec autumnò, nec æstate amplius se ægrotaturum.

OBSERVATIO V.

Ex Miscellan. Natur. Curios. Dec. II. Ann. VIII. Obs. 202.

De Lacte concreto in Stomacho.

Adolescens quidam elapsis diebus maximam copiam vaccini lactis ingurgitavit jejuno stomacho, hincque duabus transactis horis, tumefacta Stomachi regione, dolores fortes surrexere, ac diri ventris cruciatus: Me in consilium Parentes vocarunt, qui statim lac esse in ventriculo concretum conjeci, ideòque jussi, ut Æger comederet *Allium*; hoc autem manducato, statim lac dissolutum fuit & per alvum expurgatum. Quod remedium didici in parte 2. *Promptuarii Chirurgici Anton. Phil. Ciucci* pag. 170.

OBSERVATIO VI.

Ex Miscellan. Natur. Curios. Dec. II. Ann. IX. Obs. 38.

Partus mirabilis Scandiani editus 26. Maii Ann. 1690.

QUam hinc sisto Observationem curiosam Exc. D. Antonius Vallisnerius Medicus, ut Nobilissimis nostris Dom. Collegis innotesceret, communicavit, quam etiam propriis ejus verbis exhibeo. Mulier annorum XLVII. temperamenti melancholici, ferè semper erumpentibus menstruis dolori dexterum hypochondrium lancinanti obnoxia, non sine flatu, & interdum vomitu, quam ipsa sibi duriolem molestiam declinata sponte movebat, Viro septuagenario nupta quatuor fœmellas, atque unicum marem, spatio novem annorum, enixa est. Dum autem hunc postremum fœtum, tenera nimis, & imbecillis constitutionis, cum magno propriæ valetudinis detrimento lactabat, oborta in fauces falso-acri destillatione, & multis per imum ventrem doloribus,

loribus, præterito proximè Febuario, menses illi omnino defuerunt, alias etiam tempore lactationis, quanquam minori rivo, prodire assueti; quamobrem se gravidam esse juramento credidit. Verùm mense Martio iterùm aliquid ex utero fluxit, & veteri dolori hypochondriaco, plus quam assueverat, vellicanti cordis oppressio, flatus, inappetentia, sitis, stypticitas, vigiliæ, ac acidissimæ materiæ vomitus sese comites adjunxere, excitata insuper febricula, quæ cum urinis suboscure rubentibus horis vespertinis invalescebat. Vigesima sexta ejusdem mensis accessit Medicus, qui propter frustula Sanguinis ex utero quotidie decidentia nequaquam illam utero gerere rationabiliter arbitratus, leves primò purgationes, postea pharmaca humectantia, & vehementer aperientia ipsi præbuit, ac venam pedis secari jussit. Cùm tamen memorata symptomata nihilominus insævirent, & extillare Sanguis ab Utero non desineret, vigesima secunda Aprilis habita fuit cum altero Medico consultatio, qui omnibus ritè perpensis succorum acrimoniam, atque acorem accusavit, & cachexiam instare portendit. Ejus consilio secta iterum vena pedis, medicamenta acidum infringentia, atque absorbentia largè assumpta, & die nona mensis Maii, Sanguis ad quatuor uncias ex manu detractus Die X. fluxus ex Utero major, & fractarum virium imbecillitas, recensitis symptomatibus perpetuò sequentibus, die XXI. gravem vomitum multi Sanguinis excretio secuta, & per quatuor circiter horas multa de patientis salute trepidatio; resurgentibus tamen viribus visa sunt ipsa mala deficere, & parcius fluente Sanguine per quinque dies minus turbida rerum facies. Jam nox diei vigesimæ sextæ adoleverat, cùm ferocientibus iterum symptomatibus magno nisu ovatum corpus suis tunicis involutum, & ovo anserino magnitudine proximum, ex Utero expulit, quam expulsionem ingens, ac mira vesicularum multitudo immediatè secuta est. Membranæ corpus illud continentes teneræ, ac fragiles; iis reclusis non distincta humani corpusculi figura, sed rudis, & obscura moles apparuit, illis destituta machinamentis, quibus divinum hoc opus confici, ac exornari consuevit. Non caput, non brachia, non crura dignosceres, sed truncum tantummodo negligenter intextum, quem ex viscerum inchoata quadam, & informi structu-

ra ruditer vixisse deprehendebatur. Cæteris visceribus minus imperfectum Cor erat, ejus tamen magnitudo grandior, quam parvi, & gracillimi Corporis mensura requireret. Sacculi duo membranei valdè laxi, ac in sese concidentes pro Pulmonibus habiti sunt, nec aorta defuit, ac vena cava, quæ furculos hac illac per thoracem emitteret. Hepar in abdomine obscurè sanguineum, sine lobis & figura Hepatis, & Pancreas, ac Lien binas glandularum massulas referebant, quas non naturæ solertia, sed fortuita quædam, atque inconsulta congeries excitasse videbatur. Ventriculus, & Intestina paululùm rubescebant, & tum ipsa, tum moles universa tenuiter admodum, ac molliter contexta fuerant, ut quamvis odorem nullum putredinis exspirarent, ferro tamen, vel levissimè contacta dissolverentur, ac fluerent, quæ inter manus tabescendi facilitas obstitit, quin reliquas Fœtus indigesti, ac mirabilis latebras minutius inspicerem.

Intentis deinde ad ova, seu vesiculas oculis, tam ingens earum multitudo, tam densa implicatio visa est, ut nequaquam exactè numerari potuerint.

Cùm tamen sextam ex illis partem numeraverim, quæ ad mille circiter globulos ascendebat, fas mihi sit arbitrari universum acervum sex millia vesicularum continuisse. Non communi aliquo trunco gaudebant, ex quo propagines tenui, ac vario filo vesiculas eleganter sustentaturæ progredierentur, sed rude, ac nullo consilio digestum rete conspiciebatur, quod varios hinc inde non unius tenuitatis, aut longitudinis furculos emittebat. An elegantiores in Utero formam habuerit, per exeundi labores, & obstetricis contrectationem postea corruptam, ignoro; multas ex illis unicus ramus suspendebat, aliæ racematim dispositæ, aliæ longo limite unum latus insequiebantur, omnes tamen pedunculo fultæ, quo suo veluti stipiti insertæ manebant. Dispar illarum magnitudo, graciliores milium, grandiores pilam sclopetariam referebant, illæ cæteris rotundiores, nisi mollis, ac tenera, quâ velabantur, cuticula, quacumque de causa comprimerentur, orbem suum amitteret. Aqua quam continebant, gustu judice omnis expers saporis, Solique exposita nitoris non admodum limpidi judicabatur: nec omninò fluxibilem illam dixisses, sed aliquanto commu-

ni aquâ lentiolem, ovi tamen albumine magis fugacem. Cum alkali commixta non effervescebat, nec coagulabatur cum acidis. Vesiculæ in aquam collectim, aut sigillatim coniectæ fundum petebant. Si decoqueres igni, multum suæ molis amittebant in se se concidentes, ac macriores redditæ, cumque tunica illarum arctior fieret, crassior evadebat, & conclusus latex non viscidior, sed albidior apparuit, ideoque ex tunicâ vulneratâ, tanquam arctiori, & per calorem contracta, liquor expressus ad aliquam distantiam exsilliebat, nec post coctionem amplius diaphanæ, sed remissè albescentes conspiciebantur. Propter subjecti albedinem vix plura detexi microscopio, quàm simplici oculo videram: illud tantummodò patuit, ramosas nempe propagines, quibus vesiculæ annectebantur, nihil aliud esse, quàm tubulos, qui humorem ad vesiculas deferrebant. Vasa sanguiflua nulla sese visui obtulerunt, quanquàm penè me vas specie deceperit tenuissimè protensum Sanguinis vestigium, quod acrius intuenti postea compertum; minima enim Sanguinis portio tunicæ vesiculosæ rugis detenta venulas mentiebatur, tunica ipsa fibris longitudinalibus, & alterius generis decenter contexta, non secus ac in vesicæ structurâ fieri consuevit. Relictas per aliquot dies in nudâ mensâ vesiculas nulla putredo scedavit, colorem tamen glaucum, ac obscurum induerunt, & liquore, quem continebant, per poros exudante, paulatim inaruerè; non sine aliquâ odoris gravitate, quæ adstantium nares acido habitu vellicabat.

An hydatides, an *Regneri de Graaf* ova illa sint, an genus aliquod Hydropis ab *Aëtio* memoratum, an aliquid aliud adhuc Medicis irrepertum, alias peculiari disceptatione disquiram, & rudem sententiam meam amico cupidè ac perhumaniter expectanti detegere non verebor.

Post eorum exitum, quæ inconditè superius retuli, duravit Sanguinis expurgatio non sine patientis levamine, & quinque transactis diebus placenta nullo foetore polluta paulatim, ac per fragmenta defluxit. Lochia quoque feliciter prodière, à quibus *Ægra* se in pristina valetudinis lætitiâ sensim recepit.

OBSERVATIO VII.

Ex Miscellan. Natur. Curios. Decur. II. Ann. IX. Obs. 39.

Noxa ex frigidissimo potu.

Mercator quidam Ferrariensis. annorum XL. temperiei calidæ ac siccæ, mense Julio Anni 1690., incidit in febrem tertianam simplicem, quæ cum magno vomitu ac frigore invadebat, dolore capitis, ac calore, sitique intolerabili subsequenter. Transiens autem per viam Medicus quidam, asinus togâ indutus, sine methodo medicinam faciens, vocatur ad Ægrum, statimque jubet, ut magnam quantitatem aquæ gelidæ bibat, inscius illius, quod circa hanc rem scripsere *Forestus*, *Fabricius Hildanus*, *Poterius* & alii multi. Ast bibita hac aqua, Æger dolore in ventre maximo affectus, totus frigefactus est. Me itaque vocant in Consilium Parentes, quem morientem jam jam conspicio, id quod etiam post sex horas factum est. Pro remediis ergo ad sacramenta confugiendum esse decrevi.

OBSERVATIO VIII.

Ex Miscellan. Natur. Curios. Decur. II. Ann. IX. Obs. 40.

Mira antipathia cum Pœonia.

Militem juvenem novi annorum XXVI., qui Pœoniæ odorem aspectumque nullo pacto ferre potest, ac nisi diffugiat, syncope sudoribusque frigidis corripitur.

OBSERVATIO IX.

Ex Miscellan. Natur. Curios. Decur. II. Ann. IX. Obs. 41.

Febrifugum pluries expertum.

DN. N. Quartana laborabat vehementi, at post septimam accensionem exhibui sequentem pulverem, & febris abiit, quem postea pulverem sæpè, & in Tertianis, Quartanis, Erraticis, ac aliis febribus intermittentibus feliciter sum expertus, ejus autem descriptio hæc est: *Rx Salis Absinthii, Pulveris Cremoris Tartari, ana, ʒ. ij. Chinæ Chinæ, ʒ. ʒ. Santali rubri, ʒ. j. Spiritus Vitrioli rectificati, ʒ. ʒ.* Hunc Spiritum affunde guttatim, pulverem miscendo spatula lignea; inde lente igne exsicca & pulveriza, dosisque sit ʒ. ʒ. ad ʒ. j. in Aqua Cardui benedicti vel Absinthii.

OBSERVATIO X.

Ex Miscellan. Natur. Curios. Dec. II. Ann. IX. Obs. 42.

De Alvo adstricta.

JUvenis quidam XXVII. annorum bilioso præditus temperamento, alvo semper est adstricta, quam duarum hebdomadarum spatio semel tantum exonerat: Offa prunorum deglutita plurima etiam per sedes non dejicit, nihil tamen per hoc incommodi sentit, valetudineque semper utitur integra; nec, postquam ipsum Ego cognosco, nisi Tertiana simplici, ac brevi Ægrotantem eum scio. Porrò vir honestus annorum XLVIII., de prostrato appetitu laterisque doloribus sollicitus opem petebat, interrogatus utrum alvi fæces quotidie exoneraret, respondit à decem jam diebus nihil quidem se excrevisse, sed istam cunctationem sibi perpetuam ab infantia fuisse, sine salutis dispendio, neque enim hactenus,

tenus, nisi octavo, aut nono, quandoque etiam duodecimo die ventris onus se deposuisse. Interrogatus: an capitis dolorem passus fuerit, respondit, nihil tale unquam se persensisse.

OBSERVATIO XI.

Ex Miscellan. Natur. Curios. Dec. II. Ann. IX. Obs. 43.

Raucedinis remedium.

RAUCEDO malum est non tam periculosum, quàm admodum molestum, & frequenter accidit, quando membrana, quæ Laryngem ac Asperam Arteriam investit, præter naturam afficitur, exasperatur, & inæqualis redditur, ita scribente *D. Sim. Schultzio in Ephem. Cur. Dec. I. Ann. 3.* quod ut plurimum à nimia humidate, hoc vocis organum irrigante, accidit; quo in Casu commendantur varia à Scriptoribus Medicis, & præcipuè *Syrupus de Erysmo Lobelii*. Quod ad me attinet, affirmare verè possum, Reverendum *D. Franciscum Suzium*, Sacerdotem Ferrariensem, pluribus in vanum tentatis auxiliis, à Raucedine liberatum esse, sumendo quavis vespere *pulverem oculorum Cancris* ad 3. j. & hoc per tres vices adhibito remedio rectè convaluisset.

OBSERVATIO XII.

Ex Miscellan. Natur. Curios. Dec. II. Ann. IX. Obs. 44.

De rara Cordis Palpitatione.

CIVIS Ferrariæ annorum XXXI. gracilis corporis habitus, temperiei calidæ & siccæ; per multum tempus laboravit Cordis continua Palpitatione, cujus remedium unica fuit Saguinis missio. Verùm symptomate recrudescente tandem Syncope correptus interiit. Aperto Cadavere, cor maximum in mole apparuit, solum unam continens cavitatem, seu ventriculum, plenum Sanguine

ne nigerrimo; Cordis corpus autem erat emaciatum, arteriæ præ pondere elongatæ & conniventes, ita ut cruor spirituosus motu cordis amplius non potuerit expelli ad arterias; & loco alterius Ventriculi vena cava ascendens in ingentem elevata tumorem

OBSERVATIO XIII.

Ex Miscellan. Natur. Curios. Dec. II. Ann. IX. Obs. 45.

Gulæ & Narium coalitus à Variolis.

CUM anno 1688. Variolæ multum hîc Ferrariæ grassarentur, id mihi observatu dignum accidit, quod filiolo D. N. N. OEsophagus à Variolis ita coaluerit, ut denegato cibi potusque per illum transitu, misero puero fame & siti miserrimè non sine magno parentum luctû pereundum fuerit. Sic pariter in Puella coalitum à Variolis relictum Narium, sectione à Chirurgo feliciter instituta, video eodem Anno, sublatum.

OBSERVATIO XIV.

Ex Miscellan. Natur. Curios. Dec. II. Ann. IX. Obs. 46.

De Sternutatione cum Singultû.

NOBILIS Virgo annorum XXIII. feliciter debellatâ Tertianâ Febri, Singultum vehementer molestum experta non ita pridem est, in quo tollendo operam perdimus quot quot Medici à Patre rogati consilia dedimus; inusitatam enim faciem induit Singultus miserè tenellum corpus excrucians, & vix deglutationi tempus indulgit. Quandoque cessare videbatur, sed singulari metastasi succedebat Sternutatio perenni motu Ægram exagitans, tamque vehemens, ut lecto excuteretur, nisi ab adstantibus impedita fuisset. Vitium in OEsophago hæere tuberculo quodam impedito

dito suspicio fuit; quia, quæ exhibebantur, difficulter deglutiebantur. Sternutatio verò unde? Divinare non facile fuit: An Vermes in abdomine? aliquid hos contribuiffe inficiari non ausim; magni illi satis per enemata expurgati; omnibus tentatis nihil profecimus, quanquam Pharmaco pœorum officinas evacuaverimus; hinc aliquot menses sunt protracti inter has pœnas; leniri subinde malum videbatur, sed recurrebat, donec tandem corpore prorsus expurgato, variisque tum Galenicis, tum Chemicis medicamentis præparato, solo *Spiritu vini* exhibito a Muliercula convaluit, & nunc sana vivit; unde benè Proverbium ait: Beata vetula quæ venit in fine morbi.

OBSERVATIO XV.

Ex Miscellan. Natur. Curios. Dec. II. Ann. IX. Obs. 47.

De Nummo deglutito & post duos menses vomitu excluso.

A Dolefcens quidam pauperculus victum labore quæritans nummum argenteum in ore servavit, donec necessariam confecisset operam; ast inter labores fortè in fauces decidit nummus, & in medio gutturis hæsit magno cum dolore, sputo cruento, & difficultate deglutitionis rerum solidarum; ita per multum tempus affectus, sensim in Ventriculo delapso nummo, nihil inde incommodi sensit; tandem LX. transactis diebus, inter labores artis suæ, nato sponte vomitu & tussi valida excrevit nummum ærugine, ut mihi ostensus fuit, obductum.

OBSERVATIO XVI.

Ex Miscellan. Natur. Curios. Dec. II. Ann. IX. Obs. 48.

De Fluxu Hepatico curato.

Nobilis Mulier per totum ferè vitæ suæ curriculum Fluxu Hepatico vexata, tandem remediis multis frustra tentatis, usu aquæ Cichorei curata fuit; post multos menses eodem fluxu denuò laborans, ab eodem etiam remedio levamen accepit; adeò ut adhuc plenaria salute fruatur; sumebat autem aquam dictam Cichorei stillatitiam quovis die ad uncias viginti.

OBSERVATIO XVII.

Ex Miscellan. Natur. Curios. Dec. II. Ann. IX. Obs. 49.

De Pure in Coxa tumore collecto, per Alvium expurgato.

Miles quidam annorum XXXV., temperie calida ac sicca præditus, in Tertianam Febrem incidit; post cujus septimam accessionem tumor apparuit in Coxa dextera, magno cum dolore, duritie, ac magnitudine, adeò ut in dies magis, magisque cresceret. Emollientibus adhibitis remediis, tandem ad suppurationem venit; quare Chirurgus eum aperire mane sequenti decreverat; verum Æger medio noctis maximos stimulos alvum exonerandi sensit, & cum ter id successisset, dolor & tumor ferè disparuerunt. Adveniens etiam Chirurgus vidit omninò detumefactam Coxam, & inspecto excrementorum vase, puris concocti magnam quantitatem admiratus est; sicque Miles sanus evasit. Per quas autem vias Puris hujus transitus ad alvum fuerit factus, nullus adhuc scit; hæc enim sunt illa naturæ arcana, quæ me cogunt dicere: hoc unum scio, quod nihil scio.

OBSER-

OBSERVATIO XVIII.

Ex Miscellan. Natur. Curios. Dec. II. Ann. IX. Obs. 50.

Partus quinque Puerorum.

DE tali partu mentionem facit *Aulus Gellius lib. 10. cap. 2. Noct. Attic.* Et Sacerdos elapsis diebus jurato edixit, se Imolæ vidisse foeminam quandam annorum XXXV., uxorem cujusdam Barbitonforis, quæ Anno 1688., quinque filios peperit, qui pauco temporis intervallo obierunt, quos eodem fato paulò post mater insecuta fuerat. Et ego quondam Comaclensem Mulierem, atque aliam Ferrariensem vidi, quæ tres gnatos uno partu peperere.

OBSERVATIO XIX.

Ex Miscellan. Natur. Curios. Dec. II. Ann. IX. Obs. 51.

De Inedia novem dierum in Muliere.

ANno 1690. Mense Julio accessi, vocatus à Parentibus, ad Mulierem quandam annorum circiter XXXII., temperie calidâ ac humidâ præditam, quæ paroxysmis sævis tentata hystericis, spatio dierum novem sine sensu ac motu ferè mortua videbatur; id autem mirum fuit visum, ipsam sine alimento superstitem, solo olei succini odore ad se tandem rediisse; modò verò sana conservatur, nullumque, post assumptum sequentum bolum, sensit amplius hystericæ passionis impetum. Bolus autem talis fuit: & *Pulveris Castorei, gr. vij., Salis Artemisiæ, ʒ. ʒ., Conservæ Borruginis, Q. S. M.* Fiat Bolus auratus, & cum jusculeo calido sumatur jejuno Stomacho. Hinc & Monialem quandam XXII. annorum isto Bolo ab Epilepsia Uterina liberatam vidi, ut & Puellam XVII. annorum in Conventu S. Margaritæ ab hystERICA passione per eundem restitutam.

OBSERVATIO XX.

Ex Miscellan. Natur. Curios. Dec. II. Ann. IX. Obs. 52.

Sera dentitio.

VIdi cujusdam Pharmacopolæ filium, quī non nisi post septimum ætatis annum dentes emisit, & primò loqui incepit, adeò ut omnes prius crederent, eum esse mutum. E contrà Mercatoris alicujus Ferrariensis gnatum vidi, qui natus fuit habens quatuor dentes valdè visibiles.

OBSERVATIO XXI.

Ex Miscellan. Natur. Curios. Dec. II. Ann. IX. Obs. 53.

Dysenteria aquæ frigida pota curata.

O Ptimis remediis nihil proficientibus, interdum simplex ali-
quod & vulgare præsidium desperatos curare morbos, Medicorum historiæ demonstrant. Hinc Vir quadragenarius Ferrariensis, optimi habitûs, Mense Septembri anno 1690. postquam æstate præcedente fuisset multum exercitatus in Venatione, incidit in febrem continuam cum forti Dysenteria, ita ut nihil conducentibus medicinis lege artis à me exhibitis, jamjam mortem expectaret. Inter autem cruciatus, qui ægrum nostrum tormentaverant, sitis inexplebilis eminebat, ita ut loqui ferè haud posset. Petiit igitur, ut in tot languorum copia permitterem, ut sitim longo haustu *Aquæ Nucerianæ frigida* extinguere posset, sicque enim postea contentum se mori jurabat; quare permisi, ut Aquam ad plures cyathos biberet, ceu optaverat, postquam assumptionem remissa non tantum est febris, sed & cruciatus, alvi dejectiones cruentæ, & sitis, sicquè cessantibus pravis symptomatibus, paulatim & morbus cessavit; ipseque contra omnium spem evasit.

O B-

OBSERVATIO XXII.

Ex Miscellan. Natur. Curios. Dec. II. Ann. IX. Obs. 54.

De Infidis Experimentis Medicis.

PLuries expertus fui, nullius efficaciae esse remedium hoc à multis præscriptum ad inhibendum somnum videlicet *Cor Corvi* gestatum; nam multos Lethargicos vidi qui hoc adhibito remedio nihil opis senserunt. Pariter vanum esse remedium contra Febres intermittentes, præscriptum à Longino in suo *Trino Magico*, nempe *Cor Turturis* vivum, calensque comestum; expertus fui ter in diversis hominibus feбри tertiana & quartana affectis; hi enim tali assumpto, nihilominus febricitarunt. Nugas esse novi notatas in *Kiranid. cap. de Hirund.* dicit enim hic liber, comestas *hirundines* sanare Epilepsiam. Duos enim Epilepticos jussi ut assidue ederent hirundines, at sine ullo levamine. Fabula est, quam multi narrant, scilicet *Sanguinem Leporis* calidum inunctum podagricos pedes perfecte curare; contrarium enim usus evicit. *Fel & sanguis agniculi* tanquam verum præsidium ab Agyrta contra Epilepsiam venditabatur; hoc autem bis à me in duobus experto, falsum esse inveni. *Cor Vulturis* in pelle ligatum, omnes fluxus sanguinis sistere, apud multos legi; at dictis facta non respondent, pluries enim in hæmorrhoidali ac menstruo nimio fluxu præsidium hoc nullum dedit levamen. Fœmina quædam docuit juvenem, ut amaretur à dilecta Muliere, debere ipsi porrigere amasiæ nescienti assata *interiora Cornicis* comedenda; sed inde non tantum Mulier eum non dilexit, sed odio percita, eum semper fugiens, à tali dilectione omnino abhorruit.

OBSERVATIO XXIII.

Ex Miscellan. Natur. Curios. Dec. II. Ann. IX. Obs. 55.

De Fœmina tres Mammæ habente.

CLariff. *Cabrolius* observavit in quadam Muliere quatuor Mammæ; totidem quoque vidit *Joh. Faber*, quæ lac omnes habebant. Tres mammæ se vidisse in quadam fœmina juravit *Joh. VValæus*, & tres pariter *Olaus Borrichius*, ac *Gerh. Blasius*. Egoque Ann. 1690. vidi hîc Ferrariæ uxorem fabri lignarii tres mammæ habentem, ex quarum una nunquam lac effluxisse dicebat.

OBSERVATIO XXIV.

Ex Miscellan. Natur. Curios. Dec. II. Ann. IX. Obs. 56.

De Liene eximiæ magnitudinis.

Multos fuisse maximo donatos liene narrant *Hippocrates*, *Bartholinus*, *Forestus*, *Sennertus*, *Blasius*, *Smetius*, *Columbus*, *Donatus*, *Vesalius*, *Horstius*, *Kerckringius*, *Cabrolius*, *Helvoigius*, alique plures Authores. Quibus nunc addo, vidisse me anno 1685., in publico Ferrariensi Anatomico Theatro in cujusdam Militis cadavere Lienem eximiæ magnitudinis, quem à me ponderatum inveni octo libras æquare; cum autem esset dissectus, optimæ conditionis ac substantiæ est repertus, quod non parvæ admirationis fuit causa.

OBSERVATIO XXV.

Ex Miscellan. Natur. Curios. Dec. II. Ann. IX. Obs. 171.

De Vipera duplici capite prædita.

Illuſtr. *Franciſcus Redi*, Italicæ Medicinæ decus, Patronus ac amicus meus ſemper colendus, in principio ſui libri, cui tit. *Obſervat. Animal. viv. in animal. viv.* narrat ſe vidiffe ſerpentem duobus capitibus ornatum; quod idem ego obſervavi anno 1690. Vidi enim apud quendam Circulatorum Viperam duplici capite præditam, quæ ab ipſo cuſtodiebatur magna diligentia, hac enim curioſitate multos alliciebat Auditores, ex quibus major lucri ſpes accedebat.

OBSERVATIO XXVI.

Ex Miscellan. Natur. Curios. Dec. II. Ann. IX. Obs. 172.

De Epilepsia Arthritide ſuperveniente fugata.

Mulier quædam Ferrarienſis plurimum liberorum parens, annorum XL., à frequenti Epilepsia XXV. annorum ſpatio tormentata fuit; at nunc poſt pedis ſiniſtri Arthritidem non amplius jam per tres meſes ſenſit fonticum affectum.

OBSERVATIO XXVII.

Ex Miscellan. Natur. Curios. Dec. II. Ann. IX. Obs. 173.

De Phrenitide Vena jugulari ſectâ curata.

Iuvenis XXXI. annum agens, temperamenti calidi & ficci, negotiis impenſè deditus, adeoque vigiliis obnoxius, meri potui

maximè indulgens, sævo capitis dolore ac febris acuta corripitur, cum siti, vigiliis, somnisque turbatis & clamoribus, à quibus temerariè loqui cœpit, floccos ac festucas carpere, & nugari, atque continuè delirare; familiares non distinguendo. Vocatus ego, clystere primò acri injecto, jubeo jugularem venam secari, & Sanguinem ad uncias decem extrahi; quo factò cessavit delirium, ac febris remisit; hinc *Laudani Opiati* grana tria cum *Conserva Rosarum* Q. S. assumpsit, ad somnum conciliandum, post quem meliùs se habuit, atque post copiosum sudorem perfectè convaluit, & nunc sanus vivit, nec minimum doloris capitis sentit.

OBSERVATIO XXVIII.

Ex Miscellan. Natur. Curios. Dec. II. Ann. IX. Obs. 205.

Ex fumo candelæ sebaceæ mors.

Fœtorem candelarum sebacearum extinctarum obtinere veneni naturam multi docent; de quo videatur *D. Pauli Ammanni Medicina Critica* pag. m. 367. Id quod casus præsens confirmat: Erat Adolescens in caupona, dormiens post vini largam assumptionem. Fumigantem ab extinctione candelam sebaceam naribus sæpè obtulerunt adstantes sic dormienti, unde nonnihil expergefactus, iterum tamen obdormivit; illi verò continuarunt per semihoræ spatium istam insolentiam, à qua convulsio, difficilis respiratio, tandemque mors successit misero Adolescenti, nocte subsequente.

OBSERVATIO XXIX.

Ex Miscellan. Natur. Curios. Dec. II. Ann. IX. Obs. 206.

De squamula Ossis per Nares excreta.

QUam hîc scribo observationem, communicavit nuper *Exc. D. Francisc. Justinus* Medicus noster Ferrariensis, Xenodochii
D. An-

D. Annæ Chirurgus; talis autem est: Miles præsidii nostri Ferrariensis, temperamenti calidi & sicci, XXXV. annum agens, vulneratus fuit cum angulo bacilli ferrei intra supercilia, cum fractura ossium cavitatis frontis, & aliqua depressione. A Chirurgo quodam Urbis nostræ vocato instituta fuit cura communis pro capitis vulneribus; at post quindecim dies exivit squamula ossis vulnerati, unde Chirurgus putans, totam ossis substantiam læsam fuisse exsquamatam, balsamo vulnus clausit. Sanato sic exterius vulnere, capitis dolor successit, atque inflammatio partis offensæ, ejusdemque intumescencia. Unde in consilium vocavit Patiens prædictum D. Justinum, ut auxiliatrices porrigeret manus, qui tangendo partem læsam, videbat exire è naribus non exiguam puris copiam, postquam excreta fuit squamula ossis, phaseoli magnitudine; postea totum opus naturæ per triduum commissum est, & Æger sanus evasit; qui nunc fatetur, se ante vulneris inflictionem continuò ferè afflictum fuisse à sævo dolore capitis, jam verò post peractam vulneris curam, ne quidem minimum cephalæ passum fuisse; natura tamen per nares frequenter aliquam puris portiunculam adhuc deponit.

OBSERVATIO XXX.

Ex Miscellan. Natur. Curios. Dec. II. Ann. IX. Obs. 207.

De fluxu Mensum immodico, Scabie superveniente curato.

VIdua quædam Nobilis Ferrariensis, XXXI. annum agens, temperie calida ac humida donata, habitûs plethorici, quæ juncta marito, sex annorum spatio ter concepit & peperit, tandem orbata Viro, in sævam ac inconsolabilem incidit mœstitiam, quam sequebatur fluxio immodica ac continua menstruorum, cum virium languore, lumborum laxitate, pallore ac tumescencia præsertim in facie ac cruribus. Pluribus incassum tentatis remediis, tandem Scabie superveniente curata est.

OBSERV-

OBSERVATIO XXXI.

Ex Miscellan. Natur. Curios. Dec. II. Ann. IX. Obs. 208.

Mulieris Gravidæ antipathia cum Anguillis.

FEles, Cantharidesque nonnulli oderunt, ait *Plutarchus in Opuscul.* & Rubetas, & Serpentes: Germanicus verò neque Gallum aspicere poterat; at Persarum Magi Mures interficiebant, tum quia illos oderant, tum quod Diis immortalibus ejus generis animal molestum esse arbitrabantur. Sic de mira Monialis cujusdam antipathia mentionem feci in *meis Animadvers. med. pag. 221.* Liceat mihi jam sequentem historiam proferre: Est hîc Ferrariæ Uxor cujusdam nostri Civis, annorum XXXIII. quæ dum utero gerit, statim antipathia cum Anguillis laborare incipit, ita ut hoc solo signo se Gravidam esse judicet. Tunc enim nec edere, nec videre anguillas potest, ad earum solummodò præsentiam in vomitum incidens. Post partum autem hæc cessat antipathia, imò eisdem coctis tanquam delicato ferculo ipsa utitur.

OBSERVATIO XXXII.

Ex Miscellan. Natur. Curios. Dec. II. Ann. IX. Obs. 209.

De Mortuo ex Tertiana Simplici.

Mercator Ferrariensis XL. annum agens, temperamenti calidi & ficci, liberè vivens, diarrhœa biliosa quovis ferè mense trium dierum spatio laborans, post longum iter, æstivo tempore, sitiens valdè, æstuansque domum reversus, in magna copia vinum generosum glacie refrigeratum potavit; sequente nocte tertiana corripitur simplici, quæ eum die intermissionis in plateam prodire permittebat ad expedienda sua negotia. In tertio autem paroxysmo, delirio affectus, ac sudore frigido undiquaque perfusus,

ex

OBSERV. MEDIC. *Observ.* XXXII.

381

ex improvifo fuit mortuus, magna cum Parentum admiratione, qui mortem ex tali febre haud expectabant.

OBSERVATIO XXXIII.

Ex Miscellan. Natur. Curios. Dec. II. Ann. IX. Obs. 210.

De Stercoris excretionem in Mortuo.

TOmum Ephemeridum Curios. Acad. nostræ Leopoldinæ Anni 1689. nuper perlegens, incidi in Observationem *Clar. D. Joh. Ludov. Hannemanni*, qui narrat duas fœminas maligno morbo extinctas, altero die post obitum urinam excrevisse. Circa quod Me quoque vidisse recordor Ann. 1686. mense Martio, Civem quendam Ferrariensem, XLV. annorum, sæva Peripneumonia extinctum, altero post mortem die non tantum urinam, verum etiam stercus excrevisse; idem quoque, observavi in puero Variolis defuncto.

OBSERVATIO XXXIV.

Ex Miscellan. Natur. Curios. Dec. II. Ann. X. Obs. 85.

De Remedio facili ad Quartanam.

AD fugandam Quartanam Febrem, multi multa parant remedia; per literas autem Illustr. *D. Paulus Mar. Terzagus*, Medicus Mediolanensis præstantissimus, Amicus meus maximus, communicavit mihi remedium à se expertum felici successu, ex facile parabilibus, quod est, Coriandri præparati, ʒ.ß. contusa quæ infundatur per horas 24. in ʒ. v. Vini albi, inde coletur, & Vinum bibatur ante accessionem. Sed lubet idem ipsissimis verbis prælaudati Viri etiam proponere: „il doctissimo tuo trattato della „Quartana, non piu tanto opprobrio de Medici, come un disgratiato penello la dipense, essendosi ritrovata forma di domerla.

Josephi Lanzoni opera. Tom. II.

C c c

„Non

„ Non può andar più in carro trionfale tirato da *Hippocrate*, e *Galeno*, gran Lumi dell' Antichità; mentre facilmente il suo furore
 „ rintuzassi: Un remedio *de facile parabilibus*, che più volte m' è
 „ riuscito; *una mez' oncia di Coriandoli preparati*, e amaccati posti
 „ in infusione in cinque oncie di vino bianco per hore 24. poi co-
 „ lato, beverlo avanti l'accessione fa mirabile effetto; e la Signora
 „ Marchesa N. N. fu da me con questo rimedio sanata aborrendo
 „ della China China da me variamente usata.

OBSERVATIO XXXV.

Ex Miscellan. Natur. Curios. Dec. II. Ann. X. Obs. 86.

De Cephalalgia Capitis Vulnere curata

Faber Lignarius quidam Cephalalgia per tres menses affectus, varia expertus est remedia, quæ tamen omnia frustranea fuere. Casu autem cecidit super caput ejus, lapis è fenestra cujusdam domus, caputque læsit, sine tamen cranii læsione. Vulnus ordinata methodo curatum est; sicque Patiens & à Vulnere, & à Cephalalgia sanus evasit. Sic me legisse recordor apud *Adolph. Brachelium in histor. sui tempor. ad ann. 1635. pag. m. 27. partis secundæ*, Adolescentem Stomachi languore ac Vomitu affectum fuisse, qui, immisso per Oesophagum in Ventriculum cultello, & è Ventriculo à perito Chirurgo ope vulneris arte facti, extracto, post Vulneris sanationem, etiam à Stomachi languore ac Vomitu convaluit; sectio autem ista infra costas sinistri lateris facta fuit.

OBSER-

OBSERVATIO XXXVI.

Ex Miscellan. Natur. Curios. Dec. II. Ann. X. Obs. 87.

De Cæcitate ex adstricta Dysenteria.

Nobilis quidam Vir XXXVIII. annum agens, gracilis habitus, ad iram pronus, Dysenteria corripitur sæva, morbo scilicet magno, & periculi pleno, longo, laborioso, & lethali ab Hippocrate dicto, si tertium gradum attigerit. Vocat ipse turpem Pseudomedicum, qui, ut citò sanaret hunc Illustriss. Virum, summè adstringentia propinat remedia; At cessante alvi cruento fluxu, dolores circa articulos insurgunt; anodynis ungit Medicus affectas partes; & patiens paucos post dies oculorum afficitur dolore ac inflammatione, quam cæcitas sequuta est, quæ multis adhibitis remediis à doctissimis etiam Medicis rectè administratis adhuc non cessat.

OBSERVATIO XXXVII.

Ex Miscellan. Natur. Curios. Dec. II. Ann. X. Obs. 88.

De Vomitu & Singultu ex Venere.

Mihi retulit Civis quidam Mantuanus, se fratrem annorum XXX. habere, qui quotiescunque in clinopali se exercet, post dulces Veneris gustatus vomitu tentatur, & materias flavas amaricantes ejicit ad pondus unciarum duarum. Et Ego olim me vidisse Hebræum recordor, post coitum Singultu affectum per semi horæ spatium durante.

OBSERVATIO XXXVIII.

Ex Miscellan. Natur. Curios. Dec. II. Ann. X. Obs. 89.

De Muliere Gravida Epileptica.

UXor Civis cujusdam nostri Ferrariensis, annorum XXVI., temperiei biliosæ, trium filiorum parens, quotiescunque gravida est, fontica passione afficitur bis in mense, transacto autem nono mense & partu finito, ab Epilepsia liberatur, & pro signo infallibili (ut ipsa ait) novæ conceptionis ipsi est Epilepticus insultus: Modò est gravida, & ego observavi verè ipsam Epilepsiam affici, nam levi causa in iram erumpit, ex improvviso in terram cadit, spuma ex ore exit, violenta concussione totum corpus quatitur, membra modò inordinatè retrahuntur, modò distenduntur, in se autem reversa non recordatur eorum quæ ab assistentibus fuerunt peracta. Multa adhibita fuere remedia, sed omnia frustra; nunc etiam Epileptica & quinquemestris gravida vivit, semper rubore genarum ac capitis calore molestata.

OBSERVATIO XXXIX.

Ex Miscellan. Natur. Curios. Dec. II. Ann. X. Obs. 90.

Mira calculorum excretio.

Supra laudatus D. Paul. Mar. Terzagus mihi nuper per literas communicavit sequentes de Calculis observationes: Mense Julio Ann. 1691. Monialis annorum XIX. intra octo dierum spatium LXXIX calculos deposuit, quorum aliqui pondus trium denariorum æquabant; duo autem erant longitudinis & latitudinis ungulæ mediani digiti, in quibus lucidæ apparebant atomi; cæteri autem Calculi colore variabant, ast illi, qui milii granum æquabant, non fuere numerati, sed cum arenulis abjecti. Porro Con-

ciona-

cionator quidam totius Quadragesimæ tempore L exclusit calculos, inter quos unus erat curiosæ figuræ; Sceptrum enim Turcicum repræsentabat, in cujus summitate semiluna conspiciebatur. Tandem in vesica fellea cujusdam Cadaveris humani reperti fuerunt LXXX. lapilli lucidissimi, nigri coloris.

OBSERVATIO XL.

Ex Miscellan. Natur. Curios. Dec. II. Ann. X. Obs. 91.

De Puero Diabete laborante.

Puer erat septennis, temperiei calidæ & humidæ, qui post scabiem, quæ sponte evanuit, urinæ magnam quantitatem mingere cœpit, ita ut ejus quantitas per multas libras excederet potus quantitatem; urina verò à curiosis bis & ter ponderata libr. XX. pondus quotidie æquabat. Attamen lege artis nostræ curatus in fine mensis convaluit. Sic Me legisse recordor apud *Schenckium*, *Cardanum*, aliosque puellam quandam passam olim fuisse tale urinæ profluvium, ita ut singulis diebus libras XXXVI. ejus emingeret, idque spatio duorum mensium, & tamen quotidie non assumebat pro cibo & potu nisi ad summum libras septem. Qua autem ratione urina, seu aqua in tanta copia egredi queat, inquire mihi nunc placet. Cogitavi enim in puero ac puella supra dictis, potuisse à nimio calore colliquari Sanguinem, ac secundum majorem sui partem in aquosum laticem verti; Credidi insuper potuisse dilatari vasa tum emulgentia, tum lymphatica, tum ea quæ sunt à Ventriculo ad Renes; Pariter putavi totum ferè potum ac cibum in aqueum humorem potuisse reduci. Verùm istis omnibus unitis, nec decimam aquæ egredientis partem æquare potui. Insuper admisi & intemperiem Renum & Viscerum cum Antiquis, & vitriolico-austera ac fundentia fermenta cum Recentioribus. At hæc omnia convincunt equidem materias, quæ in corpore sunt, posse fundi, colliquari ac egredi, sed non convincunt id quod non est posse diffluere. Cùm igitur interior causa non sit de-

monstrabilis, ad causam exteriorem confugiendum est, concludendumque, ab aëre denso & humido, plurimaque aqua vaporibusque referto, pendere; Aër enim aquosis illis vaporibus imprægnatus, in Pulmones delatus, immediatè Sanguini immergebatur, ac nimiam aquæ quantitatem in eo deponebat, sicque ad Renes delatus Sanguis aquam jam susceptam dimittebat. Cur autem in his potius quàm aliis ibidem degentibus contigerint isti affectus, recurrendum ad peculiarem istorum patientum constitutionem. Suspicari autem quis potest, quod cùm in hisce morbis ingens sitis adsit, patientes isti ingentem aquæ quantitatem furtim potarint; sicque hæc promptior causa videtur; nam quò plus sunt potæ, plus sitiuntur aquæ.

OBSERVATIO XLI.

Ex Miscellan. Natur. Curios. Dec. II. Ann. X. Obs. 91.

De Fluxu Menstruo imminuto Hirudinum appositione curato.

Formosa Virgo Bononiensis, annorum XXII. parum felici prædita sanitate, continuo capitis dolore afficiebatur, qui tempore menstruæ purgationis imminutæ magis exercebatur; tandem sequuta est febris lenta cum nausea & alvi stypticitate. Me in consilium vocaverunt Parentes, & varia medicamina secundum artis leges exhibui, sed omnia frustra. Ultimò proposui Hirudines Utero apponendas; quod remedii genus ægrè admisit patiens, & tamen appositis internæ Uteri parti duabus Hirudinibus, eodem modo, ac eadem arte, quam olim docuit in suis Progymnasmatibus Hieron. Nigrifolus Medicus noster Ferrariensis melius Juvencula se habere incepit, paucisque elapsis diebus omninò sanata fuit. Domesticos tamen monui ac hortatus fui, ut Virginem Sponso jungerent, quò constantiori frueretur sanitate. Et hisce diebus intellexi, ipsam desponsatam jam esse, imò gravidam, nec unquam ampliùs passam fuisse nec minimum quidem capitis dolorem.

OBSER-

OBSERVATIO XLII.

Ex Miscellan. Natur. Curios. Dec. II. Ann. X. Obs. 92.

De Variolis in Vetula.

ME légisse recordor apud *Franc. Ignat. Thiermaierum Lib. I. Consil. Monialem LXX. annorum*, Variolis laborasse, cui similes observationes etiam leguntur apud *Corn. Stalpartum van der Wiel, tom. II. Observat.* Egoque anno 1691. mense Septembri vidi foeminam LXXII. annorum, Variolis in magna etiam copia correptam, quæ in septimæ diei principio mortua est.

OBSERVATIO XLIII.

Ex Miscellan. Natur. Curios. Dec. II. Ann. X. Obs. 94.

De Remedio Arthritidis prodigioso.

PEdum Præfectum jam per tres septimanas pessimè à podagra habitum, solâ nive, tam eandem affricando, quàm super eam nudo pede ambulando convaluisset refert *D. Jo. Nic. Pechlinus lib. 2. Observ. med. 28.* Egoque notavi Religiosum quendam maximè podagra affectum, doloribusque sævis cruciatum, qui desperatione ductus aquam gelidam postulavit; quam famulus cùm concessisset, ipse pedes affectos unda gelida perfudit, & paucos post horas liber à dolore evasit, fluxioque podagrica evanuit.

OBSERVATIO XLIV.

Ex Miscellan. Natur. Curiosor. Dec. II. Ann. X. Obs. 95.

De Fistula curata.

Sisto hîc historiam curiosam mihi per literas communicatam ab Eruditissimo *D. Joh. Cosmo Bonomo* Sereniss. Electricis Palatinæ Archiatro, de fistula curata. Literæ autem ipsæ hæc habent: „Nel nostro pubblico Ospedal di Livorno questa settimana è occorso il tirar fuori d'una ferita sotto l'omoplata nella spalla destra di un soldato una candelletta di lunghezza otto deti, che da venti mesi in qua v'era stata messa, e non più trovata, ne tanto pocho penchata che vi fosse, solo attribuendo la continuatione della fistola alla cattiva qualità della ferita, che haveva reso il paziente quasi gobbo, mà a pena estrarra la candeletta ò moccòlo immediatamente tornò ad alzarsi & à drizzarsi come in tempo di salute, & ora à momenti si rende guarito.

OBSERVATIO XLV.

Ex Miscellan. Natur. Curiosor. Dec. II. Ann. X. Obs. 124.

De Ulcere in inguine, Alvi facibus transitum concedente sanato.

Mulier annorum XLVII. post Herniam Intestinalem abscessu in Inguine laborabat, cui tam alta successit putredo, ut portio Intestini, longitudine duorum digitorum transversorum, ad omnimodam suppurationem fuerit deducta, & in toto curæ curriculo faeces per ulcus prodierunt. At præter spem salutis, multi enim impossibilem tamen curationem aiebant, balsamicis adhibitis remediis, intra XX. dies successit consolidatio, indeque cicatrificatio, hodiè excrementa per alvum excernuntur, nec ullum patiens sentit in parte affecta dolorem.

OBSER-

OBSERVATIO XLVI.

Ex Miscellan. Natur. Curiosor. Dec. II. Ann. X. Obs. 125.

Mors à Narium Hæmorrhagia suppressa.

JUvenis quidam annorum XIX., temperiei calidæ & siccæ, habitûs corporis macilenti, gulæ deliciis valdè deditus, conqueritur derepentè de magna corporis lassitudine, cui succedit horror & rigor maximus, postea calor cum siti, capitis dolore & vigilia; pulsus est languidus, cæterùm naturalis ferè; urinæ boni coloris; Deliquia & Syncope superveniunt, diarrhœa biliosa. Accessi & maligna illum feбри affici judicavi; die sextâ non pauca Sanguinis quantitas per nares exit, ita ut hoc videntes Adstantes, de vitæ periculo timerent, statimque ideò ad Barbitonsorem currebant, ut hæmorrhagiam sisteret. Ille sine meo jussu, turundis ovi albumine imbibitis, ac adstringentibus pulveribus inspersis cruorem suppressit. Post hæc somnus supervenit lethargicus, & Æger in fine diei septimæ moritur.

OBSERVATIO XLVII.

Ex Miscellan. Natur. Curiosor. Dec. II. Ann. X. Obs. 126.

Mania ex amore nimio.

ADolescentula, Mercatoris cujusdam nostratis filia, vitam ducens otiosam, annorum XVII, honesto pulchri Adolescentis amore capta, nihil nisi matrimonium cum ipso optabat: Amantes ambo ad colloquia venerunt, & noctibus integris, nihili pendentes & æstivum calorem, ac hyemis frigus, assiduè vigilando, inter dulces amoris sermones delectabantur. Crescit tali via amor, & Adolescentula suppressione mensium afficitur, color faciei mutatur, & pallet, sic ut ait Poëta

Josephi Lanzoni opera. Tom. II.

D d d

Palleat

Palleat omnis amans, color hic est aptus amanti:

Febres succedunt nocturnæ, & obstructions viscerum fiunt. Vocatus à Patre, solus in cubiculo interrogo Juvenculam de morbi origine; amorem accusat; ad curam me compono, febres sequentes fiunt exiguæ, tamen delirare incipit, & fit maniaca; à quo tamen affectu secundum Artis nostræ regulas curata, libera evasit, ac fluxus mensium ordinarius rediit; nunc sana vivit, ac se ad matrimonium optatum citò ineundum accommodat.

OBSERVATIO XLVIII.

Ex Miscellan. Natur. Curios. Dec. II. Ann. X. Obs. 127.

Epilepsia per subsequens Matrimonium curata.

VIdua quædam annorum XXXI., temperie calida ac sicca donata, vitæ sedentariæ dedita, rarum fluxum mensium experita, vinumque in quantitate potans, ex improvise in terram cecidit, spumâ ex ore prodeunte, totum corpus violenter concussum, & membra retracta fuerunt. In se reversa horum non recordatur, & bis saltem in mense hoc affectu corripitur. Plura medicamina exhibeo; at omnia sunt frustranea. Unde consului, ut secundas accedat ad nuptias. Quo consilio usa, sequenti mense secundum amplectitur maritum, civem scilicet Ferrariensem, Amicum meum, annorum XXVIII. optima temperie præditum; primo statim mense imprægnatur, & nullos amplius patitur Epilepticos insultus, imò gratias Altissimo Deo agens nunc sana vivit, & jamjam se accingit ad partum.

OBSER-

OBSERVATIO XLIX.

Ex Miscellan. Natur. Curios. Dec. II. Ann. X. Obs. 128.

Quartana Venere curata.

MULTOS à Quartana febris fuisse liberatos timore, lætitiâ, ebrietate &c. adnotaverunt Doctores, & scripsi Ego de hac re in mea *Dissertatione de hac febre*. Verùm historiolum curiosum de Quartana fugata in Amico meo narrare nunc volo, ut pateat, aliquandò erroribus edomari morbos pertinaces. Juvenis annorum XXVII, Quartana trium mensium spatio laboravit, bis *pulveris Chinæ Chinæ 3. ij. in Vino Malvatico* ante accessionem assumpsit, sed frustra. Multa Amuleta ac remedia, quæ ipsi porrigebant quoque Agyrtæ & Mulierculæ, pari successu adhibuit. At Studiosus quidam Rhetoricæ eum docet Venerem optimum esse remedium. Juvenis Quartanarius ut remedium probet, meretricem invenit, cum ea rem habet, nec amplius Quartana afficitur. Nuper etiam alium Juvenem, ignei temperamenti, ad iram maximè pronum, & in victu intemperantem, frustra adhibitis per annum ferè aliis, assumptis die paroxysmi, ante accessionem, jejuno Stomacho, *unciis quinquo Spiritus Vini optimi*, à febre liberum evasisse observavi.

OBSERVATIO L.

Ex Miscellan. Natur. Curios. Dec. II. Ann. X. Obs. 129.

Usus Aquæ Tettucianæ in Dysenteria.

DUOS ego Dysentericos liberavi usu *Aquæ Tettucianæ*, imò celebrem esse hanc aquam in hoc morbo non miror, siquidem cùm uniformes sint auctores in assignanda humorum acredine (adderem Ego nimiam fluiditatem) pro causa interna Dysentericæ, rationi congruum videtur posse notabile derivari beneficium ab aliquo

liquo medicamento promovente expulsionem per urinæ vias materiæ pravæ aut sudorem, refermentando, simulque Intestina detergendo & exsiccando, cujufmodi esse autumo *aquam hanc*; unde & in potu & in Clysteribus usurpari potest cum utilitate, quod verò talem usum præstet hæc aqua, legisse Me olim memini apud *Nicol. Cæsium in lib. 5., Andr. Baccium de Therm.* aquam esse exquisitè falsam & siccantem gustu.

OBSERVATIO LI.

Ex Miscellan. Natur. Curios. Dec. II. Ann. X. Obs. 130.

Dysenteria Scabie soluta.

ANni præteriti æstivis mensibus hic Ferrariæ Diarrhœæ ac Dysenteriae plurimæ occurrerunt, pertinaces adeò, ut frustra fuerint remedia, licet Artis lege exhibita. Duas tamen observavi Ego Dysenterias, quæ post decimum quartum diem succedente Scabie sanatæ sunt; imò cum miles Dysentericus ita liber à morbo evasisset, & unguentis ac lotionibus ad scabiem abigendam usus fuisset, Dysenteriâ ipsum denuò correptum fuisse vidi.

OBSERVATIO LII.

Ex Miscellan. Natur. Curios. Dec. II. Ann. X. Obs. 131.

Coma Somnolentum ex nimio pulveris Tabaci usu.

CIvis quidam Ferrariensis ex nimia quantitate pulveris Nicotianæ assumpta, Comate somnolento detinebatur, ut neque ab acclamantibus Domesticis expergisceretur, ac in cubili sedens stupidus & immotus maneret; quem proximum esse Apoplexiæ prædixi; nec mea Me fefellit suspicio, nam post septimam morbi diem eâ extinctus est. Simile quid à nimio vini usu legisse me recordor apud *P. Forestum*; & satellitem novi, qui ob continuam

Ta-

Tabaci pulveris ac vini assumptionem immani Phrenitide mortuus fuit; unde Poëta Italicus cecinit: *Molto Bacco e Tabacco uccide un uomo.*

OBSERVATIO LIII.

Ex Miscellan. Natur. Curios. Dec. II. Ann. X. Obs. 132.

Pleuritis Spiritus vini potu fugata.

Miles quidam noster Ferrariensis, temperamenti calidi & siccici, ætatis annor. XXXIV, in hyemis principio valdè frigidò post exercitium violentum, ac nimium, & multos in re venerea errores, conqueri cepit de dolore sub mamma sinistra, & die sequenti febre cum dolore, tussì sicca, respiratione difficili, omniaque aderant signa quæ veram Pleuritidem denotant. Urinæ autem erant veluti aqueæ. Vocatus statim jussi educi è sinistro cubito sanguinis uncias decem, oleo cucurbitonis calido latus affectum inungi; pulverem etiam dentis Apri, Mandibulæ Lucii Piscis &c. cum Aqua Papaveris Rhæados exhibui. Die quarta morbi iterum sanguinis missionem celebravi in salvatella manus sinistræ. Dolor tamen non cessabat, sputa pauca erant, tussis molesta, somnus paucissimus. Sexta die Æger è cubili surgit, & cùm nullum domesticum in cubiculo observasset, arculam aperit, in qua erat vasculum vitreum, non exigua quantitate Spiritus vini plenum, cujus ad quantitatem libræ unius bibit, ad cubile denuò redit atque ad soporem se componit; in somno nonnihil delirat, ac varia incomptè loquitur, expergefactus sudore eximio perfusus invenitur, dolorem non amplius sentit, cessant omnia symptomata, & ita septima die liber à febre evadit. Sic multa in Praxi accidunt omninò contraria rectæ curationi morborum, & sæpè Ægri erroribus suis, *al dispetto de' Medici e della Medicina*, ut ipsi dicunt, sanantur.

OBSERVATIO LIV.

Ex Miscellan. Natur. Curios. Dec. II. Ann. X. Obs. 133.

Usus Euphrasie in Oculi caligine.

VIr quadragenarius Oculorum caligine laborabat. At cum multis, & diversis remediis frustra usus fuisset, me tandem vocari jussit; Imperavi ut è cephalica dextri brachii sanguinis missio fieret ad 3. x. cruoris exhaustiendas, inde vinum assidue bibendum *Euphrasia* medicatum exhibui; sicque convaluit.

Universa ferè Botanicorum cohors in oculorum caligine *Euphrasie* usum extollit, & vinum in quo macerata sit hæc herba propinant; verum cum *Euphrasia* manifestè sit calida ut ejus sapor subacris indicat, ideò non omni oculorum caligini convenit, sed tantum illam fugat, quæ à frigiditate provenit, non verò à calore; in hac enim produceret spirituum inopiam, & sic officeret dissipando; cavere ergo in tali adhibendo remedio debet Practicus, ne plus noceat Ægro, quam profit, memor ejus, quod observavit *Lobelius* qui testatur ex trimestri *Vini Euphrasii* potu, socium suum penè ambobus oculis orbatum fuisse, quod idem etiam confirmat *Sim. Pauli Quadrip. Botanic. Class. 3. cum Theophilo Boneto in Mercur. Compitalit. lib. 13.*

Hinc ergo eruditè post *Camerarium Hoffmannus* defendit, *Euphrasiam* non quamvis Oculorum caliginem fugare, sed illam, quæ est à frigiditate; in hac enim *Euphrasie* usus tam internus quàm externus optimus est. Idcirco ut paulo antè dicebam meritò in Oculi caligine fuganda adhibetur à Medicis *Vinum Euphrasiatum*, quod fit monente Clariss. *Ettmullero*, infundendo scilicet *Euphrasiam* in Mustum effervescentes, ut unà quasi ebulliat.

OBSERVATIO LV.

Ex Miscellan. Natur. Curios. Dec. II. Ann. X. Obs. 134.

De Vulnere Aqua Vitæ curato.

Milles quidam præsidii nostri Ferrariensis Annorum XXXII, patria Foroliviensis, vulneratus est ab alio milite in brachio dextro; à quo vulnere ipse sine ulla Chirurgi ope, aut unguentorum appositione, sola *aquæ vitæ* applicatione intra octo dies sanus evasit; Hinc Me quoque legisse recordor in libro cui titulus, *Acquisti del Morosini pag. 231. part. 1.* Turcas etiam vulnera sua *Aqua Vitæ* curare, absque longo medicamentorum apparatu; quod ego verò tantum feliciter accidere puto in simplicibus vulneribus.

OBSERVATIO LVI.

Ex Miscellan. Natur. Curios. Dec. II. Ann. X. Obs. 135.

De Vagitu Uterino.

Uterinum vagitum multi annotarunt, uti Mart. Weinrichius lib. de Monstr., Sennertus in Praxi, Andr. Libavius, Sitonius Jatrofoph. Miscell., Thom. Bartholinus Hist. rar., & Christian. Vaterus in Miscell. Curios. Ann. 1689. Idem elapsis ego diebus observavi in Muliere Annorum XXXIII. quæ secunda vice gravida, mense octavo, sentiebat maximas foetus commotiones, post quas vagitus triplicatus secutus est, quem, & maritus, & soror ejus audivêre.

OBSER-

OBSERVATIO LVII.

Ex Miscellan. Natur. Curios. Dec. II. Ann. X. Obs. 136.

De Narium Hæmorrhagia sola aqua simplici curata.

A Dolefcens quidam robustus, cùm in cœna largiùs bibiffet, correptus est immodica narium hæmorrhagia, ut vires deji- ceret; ad ipsam cohibendam multa adhibita fuère præfidia; verùm hoc unum profuiffe expertus est, nempe *aquam simplicem fontis frigidam* per nares frequenter attractam, qua statim cohibitus est cruoris fluxus.

Non tantùm verò narium hæmorrhagiam, verùm alias quoque sanguinis effusiones cohibere poffe *aquam simplicem* monet *Doctiff. Joseph. Cignocius Florentinus Chirurgus in fuis notis ad libr. de Ulcerib. Hippocr. pag. 21. cujus verba hæc funt.*

„ Jo sò di certa fcienza, che il *Sigr. Francesco Redi*, che qui
 „ nomino per apportar lustro & onorevolezza non ordinaria à
 „ quefta mia Scrittura, sò dico di certa fcienza, ch'egli in alcune
 „ fue esperienze, che fece per rinvenire la virtù d'una cert' aqua
 „ medicata chiara, e limpida, che gli anni adietro veniva atalmen-
 „ tè predicata per un certo ficuro rimedio à guarirè tuttè quante le
 „ piaghe, e tutte le ferite, e per iftagnare fubitamente ogni più
 „ ruvinofo fluffo d' fangue che dalle vene, e dalle arterie fgorgaf-
 „ fe, ritrovo il citato Signore, e afficurò con indubitabile evidenza
 „ che l'aqua femplice d' Pozzo, e di Fontana, di Fiume, o Piova-
 „ na produceva i medemi buoni effetti di guariggione, che produr
 „ foleva quella fopradetta tanto celebre aqua medicinale, è pure
 „ effo *Signore Redi* adoprava l'aqua naturale non in què fimplici ta-
 „ gli di lanzeta, che fi fanno nelle flebotomie, mà comandava, che
 „ nel collo delle pecore, e de Cani fuffe aperto un largo, e profon-
 „ diffimo fdrufcio &c.

De hac re vid. etiam *Ephemerid. Eruditorum Romæ impressæ Ann. 1670. & Joseph. Zambeccar. in fuis Experimentis impressis Florentiæ Anno 1680.*

OBSER-

OBSERVATIO LVIII.

Ex Miscellan. Natur. Curios. Dec. II. Ann. X. Obs. 137.

Diarrhœa solo Plantaginis succo curata.

Nobilis quædam Mulier gracilis complexionis, quæ proxima præterita æstate febrem tertianam duplicem experta est, Autumno autem adveniente, eo morbi genere perturbata est, in quo liquidiora excrementa, & frequentiora per alvum dejiciuntur quàm instituto naturæ conveniat, quæ quidem excrementa flava bile perfusa apparebant; multa adhibita fuere remedia; verum omnia frustranea; hinc Muliercula Nobilis patientis famula non exiguam *Plantaginis foliorum* copiam recepit, succumque exprimit, quem expressum, & depuratum manè jejuno Stomacho assumendum porrigit ad uncias quatuor; & hoc per trium dierum spatium; A quo remedio non tantum *Diarrhœa* cessavit, verum omninò evanuit, ac perfectè *Ægra* sanata evasit; Sic de Rustico etiam recorder, qui à *Diarrhœa* biliosa liberatus fuit, sola jusculi potatione, in quò bullita fuerunt *Plantaginis folia*.

OBSERVATIO LIX.

Ex Miscellan. Natur. Curios. Decur. II. Ann. X. Obs. 138.

De Papillis duabus in unica Mamma.

Mulierem vidi ex Romandiola Annorum xxxiii. Lauram nuncupatam, quæ binas papillas in una tantum mamma habebat, nec multum inter se distantes; cui similem observationem refert *Clariss. D. Petr. Borellus Centur. 1. observat. Medic. rar. 69. pag. mihi 55. Confer Ephemeridum. Decur. I. Ann. II. Obs. 72.*

OBSERVATIO LX.

Ex Miscellan. Natur. Curios. Dec. II. Ann. X. Obs. 139.

Colica biliosa usu aquæ frigidae curata.

FRigidæ aquæ usum in biliosa Colica commendat *Thom. Burnet* in suo *Thesaur. Med. Pract. tom. 1. lib. 3.*, maximè in iis quorum vires robustæ, & partes principes illæsæ sunt; Sic *Amatus Cent. 1. Curat. 2.* historiam notat de Muliere Colicâ ex causâ calida laborante, quæ ex potu aquæ frigidæ subito incantamenti inferar dolore est levata non amplius redeunte; Ad cujus historiæ confirmationem sequens à me elapsa æstate visa observatio facit, de Rustico Annorum XL. Colica biliosa laborante, solo aquæ frigidæ usu sanato; non tantùm enim frigidam intrò suscepit undam, verùm etiam lineum pannum aqua gelida madidum umbilici regionem feliciter admovit.

OBSERVATIO LXI.

Ex Miscellan. Natur. Curiosor. Dec. II. Ann. X. Obs. 140.

De usu Chinæ Chinæ ad fugandos Vermes.

USum Chinæ Chinæ valdè proficuum ad necandos vermes esse, docuit jam in sua *Dissertat. de Epidem. Anni 1690. pag. mihi 45. n. 49. Clariss. Ramazzinus* Medicus Mutinensis Præstantissimus, ac Amicus meus in æternum colendus; Quod idem ego bis feliciter evenisse observavi. Primò in Puero annorum sex magna vermium copia laborante, qui usu Chinæ Chinæ salutem fuit restitutus; Secundò in Adolescentula annorum sexdecim quæ per multos dies vexata est alvi fluxu, & nausea, cum febre, quæ omnia à Lumbricis in intestinis, ac ventriculo contentis nasci videban-

debantur; Post varia frustra adhibita medicamina, cum jam jam Ægra in summo vitæ periculo versaretur, ipsi exhibui vinum Chinatum, in quo scilicet infusa fuerat *China Chinæ*; Hinc vomitus, & alvi fluxus excitati sunt, quibus mediantibus ab ingenti vermium sarcina, se feliciter liberavit, ac sana evasit.

OBSERVATIO LXII.

Ex Miscellan. Natur. Curios. Dec. II. Ann. X. Obs. 141.

De Veneris Stimulo ex assumpto Pharmaco purgante.

Assumpta medicamina ansam Veneri dare, scribit *Doctiss. Christian. Frideric. Garmannus Academ. Curios. in suo de Miraculis Mortuorum libro tit. XI. §. 12. pag. 105.* & de hoc cum eo mentionem faciunt, *Forestus, Simibaldus, & Platerus*; idem quoque confirmat sequens historia à me nuper observata.

Civis est Ferrariensis, qui ut à Vertiginoso affectu se liberaret, pilulas *Aggregativas & de Agarico* à Medico præscriptas assumpsit, verum nullam ab illis sensit per alvum evacuationem, sed tantummodo stimulos Venereos, à quibus tota die divexatus est, adeò ut pruritum ægrè ferens, talem expertus est ad Venerem impulsus, ut bis Uxorem compresserit, ne ullam quidem sentiendo alvi solutionem.

OBSERVATIO LXIII.

Ex Miscellan. Natur. Curios. Dec. II. Ann. X. Obs. 142.

Præservatio a Calculis.

Sacerdotem nosco sæpè Calculosam affectionem expertum, qui nunc sanus vivit, & immunis à Calculi doloribus, ob solum, ut ait ipse, *baccarum Juniperi decorticatarum* & singulis diebus jeju-

no Ventriculo deglutitarum, usum; sic edoctus à quodam Empirico Hispano.

Hoc autem remedium etiam commendatur à Clariss. Nicolao Francimont à Franckenfeld in *Lithotomia Medica*, aliisque.

OBSERVATIO LXIV.

Ex Miscellan. Natur. Curios. Dec. II. Ann. X. Obs. 143.

Abortus ex Tenesmo.

Mulier quædam Ferrariensis annorum XXVII. uxor cujusdam Fabri Lignarii, duorum filiorum mater, gravida, jam quintum tangebat mensem tertię suę prægnationis, cùm assidua, crudeli, & præacerba desidendi cupiditate, eaque frustranea affecta est, quæ septem dierum spatio perduravit, eique successit Abortus cum doloribus maximis; quod etiam monuit Hippocrates in *Aphorism. 27. Sect. VII.* dum scripsit, *Mulieri Utero gerenti, si crebra, & inanis desidendi voluntas accesserit, abortum facit*; idemque confirmat Paulus Zacchias *Lib. 1. Quæst. Med. Legal.* Hinc docemur abstinere nos debere in curandis Gravidis à purgantibus remediis; faciliter enim ex his abortus causari potest, quemadmodum ex Tenesmo accidit.

OBSERVATIO LXV.

Ex Miscellan. Natur. Curios. Dec. II. Ann. X. Obs. 144.

Lac in Infante.

IN Infantulis recenter natis ex uberibus Lac effluxisse ait Clariss. Joh. de Muralto Medicus Famigeratissimus, Academicus Curiosus atque Patronus, & Amicus meus magnus, in suo *Vademec. Anatom. pag. 15.* Quod quodque nuper mihi confirmavit Obstetrix quædam nostra, quæ fassa est, se bis vidisse, infantes recenter editos
exiguam

exiguam Lactis quantitatem ex uberibus emittentes; Non ergo Mulieres tantum sunt lactantes, sed, & Pueri, & Viri; qua de re videantur *Borellus, Cardanus, Alex. Benedictus, & meæ Animadversiones &c.*

OBSERVATIO LXVI.

Ex Miscellan. Natur. Curios. Dec. II. Ann. X. Obs. 145.

Dolor Capitis à solo odore Sulphuris.

DE Generoso quodam Sexagenario refert *Clariss. Nathan. Highmorus in exercit. de Affectione Hysterica*, qui ex *Moschi, & Ambræ*, aut hujusmodi, vel levi odore, statim de dolore capitis insigni conquerebatur; Egoque observavi elapsis diebus in muliere Capitis dolorem ex solo *Sulphuris odore* oriri, quæ postea mihi falsa est, se semper ex tali odore Capitis dolorem perferre, at æstatis tempore vehementiorem.

OBSERVATIO LXVII.

Ex Miscellan. Natur. Curios. Dec. II. Ann. X. Obs. 146.

De remedio ad Tremorem.

AD Tremorem egregiè conferre *urinam propriam* ait *Petrus Forestus in schol. obs. 5. lib. 8.* referente & confirmante *Thom. Burneto in Thesouro Med. Pract. Libr. 17. Sect. 14.* quod remedium optimum esse notavi Ego elapsis diebus in famulo cujusdam Civis Ferrariensis magno correpto tremore, ex nimia Venere nato; Rusticumque olim vidisse me recordor, qui tremores partium corporis humani curabat applicatione *urinæ pueri calidæ*; imò tantam esse putabat hic Rusticus *urinæ pueri* virtutem, ut eam posse hydropem sanare crederet; quocirca Rustico ascitico ter calentem *urinam in-*

fantis propinavit, verum frustra, paucos enim post dies hydropicus mortuus est, licet nauseabundam hanc ingurgitaverit potionem; ostendendo, quid non mortalia pectora cogat spes quoque vana salutis.

OBSERVATIO LXVIII.

Ex Miscellan. Natur. Curios. Decur. III. Ann. I. Obs. 20.

De Ictu Scorpionum.

Quam hinc sisto observationem, *Excell. Dom. Dom. Francisc. Evangelistius*, ut Nobilissimis nostris Dom. Collegis innotesceret, communicavit; quam etiam propriis ejus verbis exhibeo: Elisabetha de Tursanis sub fine mensis Junii 1692. cum sese ad latrinam 5. hora in loco præhumido sitam contulisset, à Scorpione ibidem latente icta fuit circa ultimas Recti Intestini pliacas. A re inopinata perterrita Me accersitum voluit, ut prædicta narraret. Petii ab eadem, num esset certa quod verè Ictus Scorpionis fuisset, quem statim mortuum mihi ostendit, quia ab inflictio vulnere illum calceamentis contriverat. Interea, ut mortem, quem imminetentem arbitrabatur, evaderet, medica poscebat præsidia. Unde præcepi, ut locum sauciatum cum eodem Scorpione optimè trito fricaret, quod non permisit. Quapropter suffumigium cum eodem animali perficiendum commendavi, quod factum fuit; quamvis pudibunda dilatationem puncturæ opera Chirurgi peragendam renuisset. Interea nulla sæviora accidentia apparebant. Post duas horas à maxima viscerum commotione, vomendi stimulo, sudore frigido, & quadam veluti lipothymia infestata, denudò ad visitationem Adstantes me vocant. Ego indicatione sumpta à veneno repente ad superiora, hirudines ad locum sauciatum, unam post aliam, apponendas consului, & interim specifica alexipharmaca assumenda præscripsi, quæ omnia integrè peracta fuerunt. Post sex horas incidit in adeò perversum Intestinatorum motum, ut omnia quæ per os assumebat, statim evomeret. Unde cum

cum per superiora non posset dari medellæ locus, clysteribus, fomentis & unctionibus alexipharmacis, & spiritus refocillantibus usi fuimus. Primus Clyster vix injectus fuit, cum jam per superiora redderetur, de certitudine Volvuli nos certiores faciens. Interea pluries animi deliquia ipsam apprehenderunt, & post horas aliquot convulsa obiit.

Venenum Scorpionis esse minimum mole, sed facultate & immanitate maximum & potentissimum, *Galenus* ab experientia edoctus pronunciavit. Et quamvis in Italia lethale virus non emitte, *Plinius* testatus sit, attamen summa rerum magistra, experientia contrarium confirmat. Cur verò tam citò, & tot tantorumque morborum syndromes evenerit, non assequor, ni forte credam, quod per venas & arterias non solum virus ipsi cordi communicatum fuerit, spiritusque vitales infecerit, sed etiam pro certo habeam, quod in humoribus centuplicata fuerit quantitas veneni, non secus ac Chimici auri argentique multiplicationem invenerunt: Nam, *Apponense* dictante, Venenum perniciosam ac destruentem vim cordis habet, & quidquid attingit in humano corpore, hoc convertit in suam speciem venenosam, & seipsum ita multiplicat, inficiendo humiditates corporis nostri in venenosam naturam, qua multiplicata, augetur virtus Veneni. Geometricum enim est axioma: *Geminata quantitas exauget virtutem*. Mihi insuper persuadeo, nostram patientem tam citò obiisse, quod Chlorosi laboraret, & per consequens valetudinaria esset: hinc facile credo, quod veneno in suo corpore genito scatuerit, idque adventitio, & forsan sibi analogo adjunctum, deleteriam vim exeruerit, ac citam mortem attulerit. Nam ubi abundat venenosus spiritus, venenum denuò ingruens est magis perniciosum, ut probat *Castrensis Lusitanus* in suis *Meteoris Microcosmi*.

Iliaca passio, quæ successit, magis miranda videtur; cum aliàs ex occlusionè Intestinorum, & præcipuè gracilium ortum ducat; quæ tamen in casu nostro supponenda non erat, quia novissimè fæces ejecerat, quando à Scorpione icta fuit; neque ab inflammatione circa Rectum Intestinum premebatur, ex qua clausum orificium supponendum fuisset, tum quia ex febris absentia, imo ex autopsia abfuit inflammatio, tum etiam quia Clyster summa cum
facili-

facilitate injectus fuerat : Ergo omnis causa ad pravam Veneni qualitatem referenda videtur, quæ annulosis Intestinorum fibris communicata, & spiritibus in ipsa animi commotione versus principem suæ originis locum remeantibus, associata, secum fluida vaporum ad superiora per motum antiperistalticum stimulavit, & Convulvulum prædictum excitavit. Hinc duo fatenda videntur: Primum quod detur motus convulsivus, præter causam inanitionis & repletionis, ut plurimum ex causa venefica, & hac calida vellicante, quia ex frigida aut humida, potius resolutio, non convulsio succedit. Alterum, quod Scorpionis virus calidum, urens, & nervos mordens credendum sit, ut cum *Cæsalpino* plurimis placuit; non verò frigidum, ut multis aliis Medicinæ Principibus arrisit.

OBSERVATIO LXIX.

Ex Miscellan. Natur. Curios. Dec. III. Ann. I. Obs. 21.

De Corporis totius Pruritu periodicè recurrente.

MOrbos dari periodicos quotidiana ostendit experientia; sic Vomitus periodicos observavit. *Clar Dom. Dom. Georg. Francus* in *Miscell. Curios. Ann. 1690.* Cephalæam periodicam notavi Ego in Rev. Sacerdote annorum xxxiii: Cephalalgiam periodicè recurrentem vidit *Exc. Dom. Dom. Vit. Riedlinus.* Præstantissimus *Dom. Dom. Francisc. Evangelistius, Medicus Burgi S. Sepulchri* mihi nuper per literas communicavit observationem de Juvencula totius corporis Pruritu periodico affecta, quam ipsissimis ejusdem doctissimi Viri verbis subjungo: Lucia filia Johannis, filii Matthiæ ex rure Ruoti Diœcesis Burgi S. Sepulchri annorum xxvi. optimo prædita temperamento, nisi quod ad superfluam caliditatem inclinaret, vitam traducit incolumen, circa menstruas purgationes benè se habet, & robustissima est. Hæc mulier Ann. 1688. die 24. Junii, duabus horis ante meridiem, magnam fœni quantitatem per tractum unius milliaris ægrè, ob pondus improporcionatum, & excedens, in capitis vertice portavit. Pondere demis-

demisso, sub umbra patulæ fagi, fessa ut lassitudinem auferret, quiescebat. Post spatium unius quadrantis horæ vehementissimo totius corporis pruritu adeo correpta fuit, ut sese scalpendo, totum ferè corporis ambitum excoriaverit; hinc in magnum omnium artuum tremorem incidit per spatium duarum horarum; demùm dormivit, & expergefacta, præteritæ affectionis alia non persensit vestigia, præter excoriationem prædictam; imò robustissima è solo surrexit, & iterum ad rusticales suas operationes rediit. Integro anno elapso, eadem hora, eodem die 24., eodem mense Junio, anno 1689. absque alia causa externa, in easdemmet ipsas affectiones eodem modo incidit. Convaluit post horas tres per alium integrum annum. Annis 1690. & 1691. eodem die, & eadem hora, easdem ad unguem affectiones iterum atque iterum passa fuit. Demùm die 9. mensis præsentis Aprilis hujus anni 1692. ad Me venit, & petiit, num hoc præsentis anno Medicinæ ope tam durum pruritus molestumque tremorem evitare posset; Cui etiam medica præsidia pollicitus fui. In hoc casu sicuti nihil observatione dignum censemus, præter determinatum diem, quo morbus invadere solet, sic in investigatione causæ, per quam statò tempore prædicta affectio corripit, solummodò intenti esse debemus. Quam quia fateor me assequi non valere, à Doctioribus enodationem difficultatis exopto. Interim ut meam aperiam sententiam, paucis Me expediam, & ne ad occultas qualitates, à quibus nostri sæculi Doctiores abhorrent, confugere videamur, dicemus quod statò tempore dentur commotiones humorum alimentitiorum à Sole, sicuti excrementitiorum à Luna. Et quamvis nostri sæculi peritissimi Philosophi & Medici Astrorum influxus negent, tunc in eorum placitis acquiescendum fore putabimus, quando præscripti casus dabitur causa potissima absque eo, quod recurramus ad motum Solis. Morborum solstitialium meminerunt Veteres, & quamvis dies solstitiales latius fumantur à Medicis, attamen nobis multæ offeruntur observationes, per quas aptissimè patet, quod dari possint morbi, qui eadem hora, eodem die, & eodem mense invadunt. Elucescit hæc veritas ex *Plinio Secundo, lib. 7. cap. 51.* qui refert Antipatrum Sidonium Poëtam, omnibus annis uno die tantum notabili febris corripit solitum fuisse, & ea consumptum satis longa

senecta. Sic Joh. Architectus, referente *Antonio Benivenio lib. de abdit. cap. 84.* singulis annis statò die, id est in quo natus fuerat, feбри corripì solitus erat. Ex quibus manifestissimè patet, quod constitutio naturalis, quæ ad integram perfectionem tendit, à Sole tantummodò gubernatur & regitur, & individuum valdè sanum, cùm ad finem anni non possit proficere in melius, movetur in deterius, (si deterius illud dici potest quod tendit ad conservationem naturæ, in hoc enim casu hæ febres sunt potius coquinariæ naturæ, ut cum *Helmontio* loquar, non destructivæ) ut in casu nostro succedit. Non est ergo quod cum aliquibus ex Neotericis pro fabulosis habeamus hos morbos, cùm evidentissimi sint, & prædicta Lucia ad hanc diem idem experiatur. Quod verò tales morbi, qui ad motus Solis, & statò die recurrunt, perfectionem naturali constitutioni adaugeant, patet in nostra prædicta patiente, quæ post somnum horæ unius, robustior surgit; & in præfato Antipatro *Sidonio Poëta* elucescit, qui, referente *Plinio loc. cit.* satis longa senecta consumptus est: Morbi enim, qui ad motus Solis statos dies observant, non succedunt, nisi in corporibus valdè sanis, & benignissimi sunt, quia horas 24. non transcendunt.

OBSERVATIO LXX.

Ex Miscellan. Natur. Curios. Dec. III. Ann. I. Obs. 22.

De Risu Lethali in Puerpera.

HAnc quoque observationem mihi nuper per literas communicavit prælaudatus *Dn. D. Franc. de Evangelistis.* Salacissima quædam Muliercula tempore diuturnæ absentiæ Fratris sui adulterè compressa, masculum concepit, & hunc die 21. Novembris 1691. feliciter peperit, sed partum ab oculis Fratris occultare non potuit, uno enim eodemque tempore, quo Obstetrix filiolum vix natum in ulnis tenebat, ex improvise ejus Frater ad eam ingreditur, & ex crimine sororis ira percitus, ipsam strangulare contendit. Mulier perterrita in syncopen incidit, & vix ope aceti refocillata,

lata; laboriosè respirare incepit, hinc singultire, & in Singultu valdè concussivo per plures horas perseveravit. Secundinam ope Singultus ejecit quidem post duas horas à Syncope, sed Lochia retrocesserunt adeò, ut muliebria pudenda omnimodè exsiccata apparuerint: Tandem post septem vel octo horas cessit majori ex parte Singultus, sed incidit in alium perversum diaphragmatis motum, quem à similitudine veri risus, Risum præternaturalem appellare liceat, sed hunc valdè atque iterum valdè tumultuosum, cum lachrymis continuè largèque profluentibus, qui Risus perseveravit supra horas xxx. & intermittebat solum per spatium, quo salutatio angelica recitari potest, & tempore hoc intermedio bis, ter, & quater singultiebat, postea ad eundem risum revocabatur. Non bibere, non manducare, nec loqui poterat. Oculi adeò prominentes erant, ut ex orbita prolapsuri viderentur. Ego vocatus post horas xxii. à partu, obstupui ob similem affectum apud me omnimodè novum, ejusque causa pensitata, & indicatione sumpta, ab animi pathemate, & lochiorum retrocessione ad partes spiritales, medicamenta cordialia, & quæ sale volatili abundant præscripsi; Sed hæc ob Risum & Singultum sumere non potuit, undè solummodò externis uti coactus fui, inter quæ nonnulla, quæ lochia prolicere poterant, Uteri regioni admovi. Interim quamvis pulsus valdè obscurus (ex nimia sarcina) appareret, unam tamen ex saphænis tundi præcipio, sed incassum, quia nullus Sanguis ex aperta vena prodiit, idque non alia ex causa, quam quod in formam gelatinæ abierat, ut ex duabus vel tribus guttulis observare potui. Tandem cum ex carnosa, valdè extenuata evasisset, & per tot horas cachinnasset, lachrymasque profudisset, à valido terrore correptâ, vitam cum morte permutavit post horas quadraginta à partu. Puerperæ postquam parentatum fuit, cadaver aperuimus, & quod observatione dignum, vidimus ejus venas ferè sanguine destitutas, ac qui aderat, sine humiditate apparebat. Observavimus insuper diaphragma undiquaque vesiculis polyporum colore protuberans, quarum nonnullis phlebotomo adaptis, emanebat ferofus liquor colore aqueo, sed acidissimo odore ita imbutus, ut ob acutiem nares offenderet. Cum isto humore gossypium imbui-
mus, & aliquot guttulas expressimus in tincturam floris cærulei

coloris, cum qua plura experimenta ad explorandas differentias fa-
 porum acidorum olim feceramus; invenimus autem istam tinctu-
 ram in colorem rubro-flavescentem conversam fuisse, non aliter
 ac si in eandem spiritum nitri instillassemus. Atque ita ab insigni
 aciditate hanc mutationem evenisse credidimus. Quod naturaliter
 possit dari tam insignis aciditas in humoribus, aut saltem in suc-
 co pancreatico, pro impossibili habemus. Quare putamus, pro-
 bam hujus Mulieris Sanguinis massam, à vehementissimo animi pa-
 themate, illam insignem aciditatem contraxisse, unde Sanguinis
 fusio in instanti, ut ita dicam, sequuta sit, & in ferositates abie-
 rit, ut demonstrarunt copiosiores lachrymæ, non secus ac paula-
 tim in quam plurimis accidit; quia prægnantes & puerperæ habent
 corpus prædispositum ad quascunque impressiones & mutationes
 subeundas; Citissimè enim fit metastasis ab anima ad corpus, nam
 in iis valdè pollet imaginationis vis, ex qua spiritus commoventur,
 humoresque alterantur. In eam insuper devenimus sententiam,
 quod Singultus in casu nostro vel ortum duxerit ex affecto septo
 transverso, non ventriculo (ni dicamus sympathicè) ut Medici
 communiter statuerunt, aut pulmonibus, ut *Aristoteli* placuit *Sect.*
33. problem. 1. Risum præter naturam non alia ex causa inductum
 fuisse arbitremur, quàm ex vellicatione, quam inducebat ipse hu-
 mor acidus, vibrationes spasmodicas suis puncturis excitando in
 ipso diaphragmate, non aliter quam accidit *Tychoni* telo leviter
 in septo transverso percusso, ut refert *Veterum Medicorum* maxi-
 mus *Epidem lib. 5.* Cur verò tam citò mortua fuerit, difficile non
 erit rationem reddere, & maximè si sectemur opinionem *Platonis*
 qui 3. *de Republic.* dixit, quod effusum risum vehemens mutatio
 sequatur, id est, mors, ut explicat *Platoniorum Princeps Ficinus*.
 Nec moraliter interpretandus videtur. Et maximè quia ex-
 tat exemplum apud *Homerum*, videlicet: *Tum Proci illustres manus*
extollentes risu emoriebantur. Quod si tanquam à Poëta prolatum
 pro fabuloso judicetur, alia exempla patent apud *Valerium Maxi-*
imum, & præcipuè de *Philemone*, qui nimio ex risu obiit. Et me-
 ritò ait insignis *Philosophus Lælius Peregrinus*: *Risus intempestivus*
inter mortales est grave malum, quia ad mortem usque perducit. Et
 mul-

multo magis hæc efficere valebat Ritus non naturalis in Puerpera, ad quam plurima malorum syndrome accesserat.

OBSERVATIO LXXI.

Ex Miscellan. Natur. Curios. Decur. III. Ann. I. Obs. 23.

De Imprægnatione nullis unquam præviis Menstruis.

Observationem habet Clar. Dom. Dom. Cornel. Stalpaert van der Viel Cent. 2. obs. 31. de imprægnatione nullis unquam præviis menstruis; similia plura exempla habentur apud Aristotelem lib. I. de Gener. Animal. Rondeletium, Joubertum, Sennertum, Schenckium, Donatum, Th. Bartholinum, Rhodium, Riverium, Brassavolam, & alios, quibus etiam me adjungo. Vidi enim mulierem, cui nunquam Menses fluxerunt, & tamen sana degit, ac quinque filiorum est mater. Rusticæ etiam recordor, quæ bis peperit absque præviis menstruis.

OBSERVATIO LXXII.

Ex Miscellan. Natur. Curios. Dec. III. Ann. I. Obs. 24.

De Præfagio ex Somnio.

Mulier plebeia in lectulo dormiens jacebat, ut fessos spiritus ope quietis recrearet; hæccùm per quietem Fratrem militantem in Sabaudia castris, morientem vidisset, somnians gemitus edebat; at à socia quæ cum ipsa dormiebat, interrogata de querelæ causa, respondit Fratrem mortuum in bello se vidisse. Nonnullis autem elapsis diebus Ferrariam venit Miles quidam, qui retulit mortem Fratris somniantis Fœminæ; hic interrogatus de mortis tempore, asseruit, factò à nobis computò, fuisse eandem noctem, qua Mulier supradicta in somnio vidit Fratrem morientem.

Similes historias me legisse recordeor apud *Alexandrum ab Alexandro Genial. Dier. lib. I. Cap. II.*

OBSERVATIO LXXIII.

Ex Miscellan. Natur. Curios. Dec. III. Ann. I. Obs. 25.

De Longævis.

Nonnulla de Longævis leguntur in *Tomo Ephemer. Anni 1690. pag. 382.* quibus addere sequentia mihi liceat: Fœminam rusticam novi duobus abhinc annis defunctam, quæ ætatem annorum centum & octo attigit. Atque Religiosum quendam nosco, qui constitutus in ætate centum & sex annorum, adhuc vivit, ac benè edit, bibit, & dormit, arthritide verò sæpè tentatur.

OBSERVATIO LXXIV.

Ex Miscellan. Natur. Curios. Dec. III. Ann. I. Obs. 26.

De Vanitate nonnullorum remediorum.

VAna esse quæ de lapide Ætite ad partum promovendum nonnulli scripsere Doctores, ait *Jacob. Primerosius, lib. 4. de vulgi error.* Idemque ego confirmo experientiâ ductus, non semel enim nullius esse efficacæ observavi. Varias pariter magicas ac superstitiosas scripturas, & incognitos characteres, ridiculasque figuras, ad febres, epilepsiam, dolores, erysipelata, aliosque morbos, nullius esse virtutis notavi, & præcipuè carmina à multis commendata pro epilepsia: *Caspar fert myrrham &c. Draconteam herbam,* quam pro fanando Capitis dolore laudat *Kiramides*, ut & ejus semen ad visum acuendum, nullius esse momenti, sæpè expertus sum. Urinæ suppressionem minimè referare *vesicam Suis* suspensam, quæ non tetigit terram, quod nonnulli volunt, observavi in quodam

Reli-

Religioso, & Hebræo. Fluxum Hæmorrhoidum non compescere *Smaragdum* umbilico impositum, quater in variis deprehendi. Contra matricis suffocationem singulare periapton non existere *Ungulam Alces* pluries, præcipuè in nonnullis Conventus S. Margari-
tæ adolescentulis, notavi. Neque *filum sericum Chermesinum* parti affectæ circumligatum erysipelata fugat. Neque *Adamantis* præsen-
tia, uti quidem scribit *Sitonius* in *Miscell. Iatrosoph. tract. 25.* vim Magnetis tractivam tollit. Radix Pœoniæ collo appensa in Incu-
bo non juvat, nec radix *Cyclaminis* foris adplicata in Liene indura-
to. *Amethystus* gestatus ebrietatem non prohibet; nec *Smaragdus*
& *Jaspis* puerorum Epilepsiam. Plura alii observabunt.

OBSERVATIO LXXV.

Ex Miscellan. Natur. Curios. Dec. III. Ann. I. Obs. 27.

Obesitas curata.

CIVIS quidam Ferrariensis annorum XLVII. cùm extremè obe-
sus esset, ita ut proximus suffocationi videretur, multa ad-
dihuit incassum remedia. Jussu tandem meo Acetum bibere in-
cepit, & nunc etiam maximè jejuno Stomacho bibit, ac à pane
abstinet sicque ab obesitate est liberatus. Quod remedii genus di-
dici apud *Fam. Stradam de bell. Belg. lib. 8.* ubi refert, quendam
Castrorum Præfectum ope Aceti ab Obesitate fuisse liberatum.

OBSERVATIO LXXVI.

Ex Miscellan. Natur. Curios. Dec. III. Ann. I. Obs. 28.

De Dente molari orto in Quinquagenario.

DEntem molarem è mandibulæ superioris parte in Matrona
quinquagenaria, cum febre ardente, acerbo capitis dolore,

ac delirio natum recenset *Dom. Dom. Luc. Schroëckius* in *Schol. ad Observ. 29. D. Hellwigii*. Sic pariter Ego Ann. 1691. mense Decembri, in Viro Nobili, LIII. annorum, arthriticis doloribus sæpè laborante, post magnam cephalæam, ac febrem ardentem molarem dentem in dextra parte mandibulæ inferioris enatum observavi. Multoties Natura dentes ante nativitatem profert, & multoties pariter ante mortis tempus ultimos emittit dentes, quasi ultimos agens conatus.

OBSERVATIO LXXVII.

Ex Miscellan. Natur. Curios. Dec. III. Ann. I. Obs. 29.

De Convulsione Febri excitata, curata.

Febrem accendi, si cornuti Scarabæi in oleo decoquantur, atque ex eo pulsus inungantur, ait *Cardanus de Variet.* confirmatque *Jacob. Veckerus lib. 5. de Secret.* Ego idem adverti in mea *Zoologia, part. 4. cap. 11. pag. 156.* Sic nuper erat Vir nobilis, XLIV. annorum, temperiei calidæ ac humidæ, qui nebuloso atque pluvioso cœlo, itinere facto, tandem demum reversus somno se tradidit. Is media nocte de occipitis dolore conqueri cepit ad scapulas protenso, ita ut caput ad posteriora convelleretur cum dolore. Vocatus Medicus varias præscripsit unctiones, Venam secat, sed frustra; à quodam Empirico febris ope olei Scarabæorum, quo pulsus illiti sunt, excitatur, sicque perfectè sanatus est.

OBSERVATIO LXXVIII.

Ex Miscellan. Natur. Curios. Dec. III. Ann. I. Obs. 30.

De Arthritide usu Betonicæ & Vini abstinentiâ curata.

Vir Nobilis annorum quadraginta quinque per mensem articulorum dolorem passus est, qui modò dextrum femur, modò

dò sinistrum, nunc humerum infestabant, quorum sævitia per aliquot dies cùm intermisset, post longam sub Solis radiis moram rediit, & præcipuè in articulis manuum, crurum & femorum cum tensione nervorum in cervice, ac in manu sinistra, tumoreque levi rubore notato. Quare à Medicis varia præscripta fuere remedia; omnia tamen frustranea. Tandem meo consilio usum *Betonica* sibi fecit familiarem, & omnino a vini potatione abstinuit, sicque sanus evasit. Ita etiam legisse. Me recordor apud *Thom. Burnetum in Thes. Med. Pract. lib. I.* generosum quendam Bernensem exsiccatam *Betonicam* in pulverem redegissee, & saccharo permixtam ad 3.j. usum fuisse cum bono fructu in Arthritide. Multi verò sunt qui tabellas ex pulvere *Betonica* cum saccharo aqua *Betonica* soluto parant, & ad fugandam arthriticam passionem adhibent.

OBSERVATIO LXXIX.

Ex Miscellan. Natur. Curios. Decur. III. Ann. I. Obs. 31.

De Lactis examine ope Microscopii facto.

Sanguinem multis globulis rubicundi coloris constare observant Clar. Dom. Dom. Schraderus, & Dom. Dom. P. Philippus Bonanni S. J. Sacerdos omni eruditionis genere instructus in sua *curiosa micrographia Cap. 6. §. 8.* Lac autem multorum animalium meo subjeci microscopio, & observavi non dissimiles Sanguini globulos albos in sero notantes; plures autem notavi in lacte Nutricis annorum XXI, pauciores verò Fœminis duabus, quarum una XL. viderat annum, altera verò XXXVII vix complebat. Lac Capræ plurima constabat serositate; Asinæ non absimile Muliebri apparebat; Vaccæ denique moleculas plurimas continebat & paucam serositatem.

OBSERVATIO LXXX.

Ex Miscellan. Natur. Curios. Dec. III. Ann. I. Obs. 32.

De dolore Capitis diurno.

Multi hoc anno 1692. dolore Capitis diurno affecti sunt, tali scilicet modo: adveniente Sole Cephalæa appropinquabat, crescente crescebat, occidente evanescebat, noctis tempore liberi erant patientes, mane autem facto morbus redibat. Ego quoque post ephemeram, qua laboravi mensis Augusti die 20. & 21. tali Cephalæa correptus fui, quæ usque ad septimum diem perduravit, postea exigua superveniente diarrhœa biliosa evanuit.

OBSERVATIO LXXXI.

Ex Miscellan. Natur. Curios. Dec. III. Ann. I. Obs. 33.

Singultus ex Diarrhœa suppressa.

DE Febre singultuosa maligna ex intempestivè suppressa Diarrhœa, vide *Ephemer. Cur. Dec. II. Ann. VIII. obs. 212.* Pari- ter ego in Nobili quodam Viro temperiei calidæ & siccæ annorum xxx. Ann. 1692. Mense Augusti, Singultum ortum observavi val- dè pertinacem, ab intempestivè suppressa Diarrhœa biliosa per tur- pem Pseudomedicum. Vocatus à Parentibus, potione solvente ex- hibita, statim eum curavi. Sic mulieris recordor, quæ Anno 1688. à sæva Dyfenteria liberata fuit superveniente singultu, qui postea curatus fuit ope *Laudani opiat.*

OBSER-

OBSERVATIO LXXXII.

Ex Miscellan. Natur. Curios. Dec. III. Ann. I. Obs. 34.

De Ischiade facili remedio curata.

Addolefcens quidam diu Ischiade laborabat, & cum multis ac diverfis, à variis quoque Medicis, præscriptis frustra ufus fuiffet remediis, Rusticum medicaftrum vocavit ad fui curam, qui afferuit falutem ejus fumi debere ab urtica, fi ea locus affectus ad rubedinem ufque caderetur, & vino albo generoso pofttea ablueretur; quo peracto fanatus eft, non fine Adftantium admiratione. Tale verò remedium mihi novum non fuit, nam fimile quid me legiffe recordor apud *Wolffg. Hæferum lib. 4. Hercul. Med.*

OBSERVATIO LXXXIII.

Ex Miscellan. Natur. Curios. Dec. III. Ann. I. Obs. 35.

De Juvene in tenebris vidente.

Auguftum Octavianum adeò lucidos habuiffe oculos, legitur, ut, cum acrius quenquam intueretur, cogeret eum quafi ad Solis fulgorem oculos fubmittere; Tiberium etiam in tenebris vidiffe refert *Caius Suetonius Tranquillus*. Ego etiam vidi Juvenem in tenebris rectè videntem, adeò ut epiftolas etiam noctis tempore absque luminis ullius auxilio perfectè legeret, ac ambulantes per vicos agnosceret; quem Juvenem sæva Peripneumonia anno elapfo mortuum observavi.

OBSERVATIO LXXXIV.

Ex Miscellan. Natur. Curios. Dec. III. Ann. I. Obs. 36.

De Raucedine Syrupi Raphani curata.

V Ir quidam Ferrariensis annorum XXXIX, Raucedine diutissimè laboravit, ut vix, cùm loqueretur, intelligeretur; varia cùm frustra tentasset, tandem ope Syrupi à succo Raphani confecti sanatus fuit. Exc. etiam D. Franc. Justinum, Amicum & Compatriem meum in æternum amandum, Raucedine pertinaci affectum, prædicti Syrupi usu sanatum vidi.

OBSERVATIO LXXXV.

Ex Miscellan. Natur. Curios. Dec. III. Ann. I. Obs. 37.

De Febre Chronica metu ac terrore curata.

V Ir annorum LII. Chronica Febri laborans, pluribus frustra adhibitis remediis, jam desperabat salutem, cùm aliquando media nocte, fractâ domus januâ, cum fustibus & laternis satellites Ægri cubiculum ingrederentur armati, totam scrutarentur domum, at non invento eo, quem quærebant, è domo exeuntes, Ægrum magno affectum timore linquerent; cui hinc tremores magni, postea sudores copiosi advenêre; sequenti tamen die liber à Febre evasit, & intra mensem perfectè convaluit. Historias similes de ægritudinibus metu fugatis dabunt Joh. Petr. Langius Cent. 2. narrat. p. m. 370. Ludov. Richeomus de valet. anim. Franc. Kalleriola lib. 2. Observ. 4. & Ephemerides Curios. Academia nostræ Leopoldinæ.

OBSERVATIO LXXXVI.

Ex Miscellan. Natur. Curios. Dec. III. Ann. I. Obs. 38.

De Faucium ulcere ab Unguento Mercuriali.

Mercurialibus non semper esse fidendum docuit Illustr. Dom. Dom. Joh. Dolæus in Epist. 3. ad Dom. Waldschmidium, narrando historiam de quodam Artifice ulcusculis Faucium lethiferis ab Unguento Mercuriali inductis affecto; quam etiam mihi sequente Observatione liceat confirmare: Miles Lue Gallicâ infectus erat, qui inunctione Mercurii usus est ad morbum debellandum; verum ab usu talis linimenti non tantum sæva exorta est salivatio, sed ulcus ingens in faucibus sævire incepit, quod non sine magna difficultate, ac longo patientis & Chirurgi incommodo sanatum fuit.

OBSERVATIO LXXXVII.

Ex Miscellan. Natur. Curios. Dec. III. Ann. I. Obs. 39.

De Fluore albo, usu Syrupi Coralliorum Quercetani sanato.

FOEmina quædam Nobilis, annorum xxxiii, vidua, conquerbatur de Fluxu albo, facies pallebat, caput dolebat, hypochondria tremebant, cordis palpitationes erant frequentes. Hæc multis frustra tentatis remediis, tandem frequenti usu Syrupi Coralliorum Quercetani sanata est, ac modò iterum desponsata, gravida, prolem expectat. Aliamque mulierem à Fluore albo curatam vidi Ann. 1689. usu tincturæ coralliorum & pulvere Terræ sigillatæ.

OBSERVATIO LXXXVIII.

Ex Miscellan. Natur. Curios. Dec. III. Ann. I. Obs. 40.

De Sudore Vini simili.

N Arrat Cl. Franc. Zypæus in suis fundam. Med. phys. anatom. part. 2. cap. 3. artic. 17. aliquem à largo potu Vini Hispanici, sudorem illi similem reddidisse. Similiter Ego quoque observavi Militem à vini generosi liberali potu sudorem vino nigro similem effudisse; & de quodam Hebræo recordor, quòd æstatis tempore sudorem sub axillis præcipuè emisit, quo indusæ tingebat, & vestes rubro colore fœdabat.

OBSERVATIO LXXXIX.

Ex Miscellan. Natur. Curios. Decur. III. Ann. I. Obs. 41.

De Doloribus post partum Spermate Ceti sedatis.

DE honesta muliere scribit doctiss. Collega noster Dom. Chr. Franc. Paulinus in sua *Salvia* sect. 2. membr. 8. cap. 4. quæ summis doloribus à concreto Sanguine laborabat, & sumpto *Spermate Ceti* recenti in decocto *Zedoariæ*, *Salviæ* & *Corticum Aurantiorum*, brevi liberata fuit. Ego curavi Fœminam quandam magnis doloribus post partum affectam, sola exhibitione *Spermatis Ceti* recentis in decocto *Artemisiæ*.

OBSER-

OBSERVATIO XC.

Ex Miscellan. Natur. Curios. Decur. III. Ann. I. Obs. 42.

De Gallina pullum pariente.

G Allinam non ovum, sed pullum peperisse, ait *L. Apuleius Asin. aur. lib. 9.* quod sanè monstrosum fuisse ac admirabile scripsit *Philippus Beroaldus in Comment. pag. mihi 411. tom. 2.* Mihi quoque narravit Vir omni fide dignus, se anno elapso 1691. dum ruri esset, pullum absolutum fuisse ortum à Gallina, magna cum rusticorum admiratione, qui nunquam tale prodigium se observasse dicebant; pennis enim, unguibus, oculis & voce perfectus erat, qui matrem suam mox sequi cepit.

OBSERVATIO XCI.

Ex Miscellan. Natur. Curios. Dec. III. Ann. I. Obs. 43.

De Magnetis virtute non interrupta ab Allii succo.

C Rediderunt nonnulli, sic ab infano edocti vulgo, qui multa dicit, sed nulla probat, imò nescit, cur multa, quæ ignorat, dicat; crediderunt, inquam, Magnetem virtutem suam amittere, & ferrum non attrahere, si Allium interponatur, vel ejus succus adspargatur. Quod falsissimum esse non semel expertus fui, multis Amicis præsentibus; Magnetem enim succo Allii madefeci, & tamen observavi, statim fieri ab eo fieri attractionem, eodem modo, quo antea fiebat; insuper cultrum Magnetis virtute solo attactu armatum, licet succo Allii madefactum, vidi attrahere ferrum sine ulla vel minima retardatione.

OBSERVATIO XCII.

Ex Miscellan. Natur. Curios. Dec. III. Ann. I. Obs. 44.

De Singultu alapâ cohibito.

Lysimachus apud Platonem sternutamento, aspersione aquæ frigidaë, & respirationis cohibitione Singultum excuti tradidit; multique jusserunt auriculari digito intus aures diu confricari ad Singultus sedandos. Ego verò nuper Juvenem pertinaci Singultu laborantem sanatum vidi ab alio Juvene, qui eum ex improvviso alapâ percuterat.

OBSERVATIO XCIII.

Ex Miscellan. Natur. Curios. Dec. III. Ann. I. Obs. 45.

De Risu in Puerò, primo nativitatis die.

Zoroastrem primo vitæ suæ die risisse, legitur, de qua re videatur Lud. Bonacciolus Ferrariensis noster Medicorum sui avi Dux in lib. de fœt. format. Rarò hoc autem contingere, quotidiana ostendit experientia; nam in Pueris risum ante XL. dies alienum esse dicitur ab Authoribus. Mihi verò fidissima narravit Obstetrix, se observasse filium cujusdam Pistoris nostri, qui duas post horas à nativitate in risum erupit, non sine matris admiratione & timore. E contra scio multos nunquam risisse, ut fuerunt Socrates, Diogenes Cynicus, Heraclitus, Crassi in Parthis interempti avus, & alii, quod profectò, judicio dicti Bonaccioli, rigorem quendam, naturæque duram atque inflexibilem torvitatem significavit.

OBSERVATIO XCIV.

Ex Miscellan. Natur. Curios. Dec. III. Ann. I. Obs. 46.

De Excrementis per umbilicum emissis.

Multos fuisse qui non tantum sanguinem & pus, sed excrementa quoque per umbilicum emiserunt, referunt Medicorum historiae Greg. Horstii, Job. Meckerani, Alex. Benedicti, Schenckii, Fabricii Hildani, Bauhini, Höchstetteri, Cabrolii, Foresti, Donati, Corn. Stalpaerti vander Wiel, aliorumque: Quod idem quoque observavi in quodam Puero annorum quatuor, qui ventris excrementa per umbilicum exonerabat, Iliaca passione affectus, à qua occisus est. Aperto cadavere, ulcus apparuit in Intestino Colo, & nonnulli tumores in aliis Intestinis, ac in Mesenterio.

OBSERVATIO XCV.

Ex Miscellan. Natur. Curios. Dec. III. Ann. I. Obs. 47.

De Spiritus vini vi solutiva.

Militem vidi, qui cum lubricam vellet efficere alvum, ac corpus ab humoribus pravis, in primis viis stabulantibus liberare, uncias duas spiritus vini optimi assumebat; hoc enim assumpto, tanquam si solutivam sumpsisset potionem, alvum ter quaterve exonerabat, sine ullo incommodo, vomitu, aut dolore.

OBSERVATIO XCVI.

Ex Miscellan. Natur. Curios. Dec. III. Ann. I. Obs. 48.

De Morte ex Singultu.

Legisse Me recordor apud Lucianum, acino uvæ suffocatum periisse Sophoclem; & Zeuxin, inter Pictores sua ætate faciente
Josephi Lanzoni Opera. Tom. II. H h h lè

lè principem, ex risu nimio mortuum fuisse; imò de Pistoie suburbano post vigesimum quartum sternutamentum extincto narrat. *Fam. Strada prolus. Academ. lib. 3.* Ego autem anno 1689. observavi Rusticum quendam territorii nostri Ferrariensis, post largam aquæ potionem in Singultum incidisse pertinacem, à quo frustra tentatis multis remediis, extinctus fuit.

OBSERVATIO XCVII.

Ex Miscellan. Natur. Curios. Dec. III. Ann. I. Obs. 49.

De Tumore vento pleno.

QUOD de Viro quodam, morbo chronico diu detento, tandem inflammatione gutturis & spinæ dorsi tumore affecto & mortuo refert *Petr. Borellus Cent. 1. observ. 8.* ejus dissecto cadavere, omnia viscera sana reperta fuisse, tumorem verò illum apertum nil nisi ventum emisisse: id ego similiter anno 1691. in alio Viro conspexi, tumore sine rubedine ac dolore in brachio sinistro affecto, qui dissectus nil nisi ventum emiserat, non sine adstantium admiratione. Confer Historiam oppido raram, hucque apprimè facientem à Dn. D. Hünnio Dec. II. Ann. I. obs. 176. descriptam.

OBSERVATIO XCVIII.

Ex Miscellan. Natur. Curios. Decur. III. Ann. I. Obs. 50.

De Monstro Mentulato & bicorpori.

DE Mamma mentulata observationem habet Nobil. Dn. D. *Lochner in Dec. II. ann. VII. Obs. 123. Ephemer. Cur.* Curiosa pariter est facies mentulata, in filio ab Hebræa Romæ die 31. Februarii Ann. 1692. nato, qui tenebat instrumenta generationis palato

palato annexa in oris cavitate, cæterum autem in corporis dispositione reliqua non peccabat. Die 10. Julii, anni ejusdem, in suburbio S. Sebastiani Aesii, paupercula Mulier peperit binos masculos in latere in ventre conjunctos, & se decenter ulnis amplectentes, qui in exitu perierunt, postquam crura prius apparentia sacrum Baptisma ab obstetrice receperunt. Erant grandiusculi, æquabant enim altitudinem pedis unius cum quatuor digitis transversis, pulchra ornabantur facie, pulchrisque capillis, sed dissimilibus oculis, quos unus nigras, alter cæruleos habebat. Medici in exenteratione invenerunt duos ventriculos, ab ingenti hepate æqualiter amplexos, cor unicum, sed quadam profunda linea ferè divisum, intra tamen duas habens solitas cavitates, splenes duos perparvos, renes duos magnos, qui quidem quatuor æquare poterant: pulmones ritè divisos, & intestina denique utrimque distincta, usque ad proprium cujusque terminum.

OBSERVATIO XCIX.

Ex Miscellan. Natur. Curios. Decur. III. Ann. II. Obs. 29.

De Epilepsiâ Ulcere in crure sanata.

Multos & ingenio, & rerum gestarum gloria Excellentes Viros Comitiali morbo sæpè laborasse testantur historiæ: uti hoc morbo correptum bis fuisse in rebus agendis Julium Cæsarem scribunt. Hic autem Ferrariæ Epilepsia sæpius afficiebatur Excellentiss. Dom. N. N. Juris utriusque Doctor & Advocatus celebris, Annorum L. qui Ulcere sponte aperto à Natura in crure dextro, adhuc perseverante, non amplius eam passus est, in reliquis etiam sanus vivit.

OBSERVATIO C.

Ex Miscellan. Natur. Curios. Dec. III. Ann. II. Obs. 30.

De Lapillis multis vomitu rejectis in Arthritico.

CURIOSUM narrat Isaac Casaubonus Comm. ad Auli Persii Satyr. V. de Arthritico quodam è cujus corpus plus lapidum extractum fuerat, quàm ipse penderet. Egoque in Arthritico quinquagenario nuper excretos vidi multos lapillos albos, mediante vomitu, post diros stomachi cruciatus exeuntes, Mihiq; ipse Patiens narravit, se etiam cùm annum trigesimum ageret, quantitatem ferè similem similium lapillorum per vomitum ejecisse.

OBSERVATIO CI.

Ex Miscellan. Natur. Curios. Dec. III. Ann. II. Obs. 31.

De Ebrietate à nimia Mellis assumptione.

APUD Orpheum legitur, referente Josepho Laurentio in Polymathia lib. 1. dissertat. 34. Saturnum ab Jove filio per mellis poculum insidiis captum, quo saturatus, inebriatus fuit, & actò in vertiginem quandam capite, qualem vini copia excitat, obdormit. Ego anno 1691. mense Septembris, observavi Adolèscentulam rusticam, annorum tredecim, quæ à nimia mellis ingurgitatione inebriata fuit, ac tota die dormivit, imo etiam subsequenti die non benè mente constitit, adeò ut domestici eam quoque ebriam omnes dicerent.

OBSER-

OBSERVATIO CII.

Ex Miscellan. Natur. Curios. Dec. III. Ann. II. Obs. 32.

De Dolore Capitis, sonitu campanarum sanato.

Adolescens quidam Ferrariensis, dolore capitis ferè continuò affligebatur: cùm Ann. 1691. ob mortem Sanctissimi Domini nostri Alexandri VIII. omnes Urbis campanæ ad longum temporis spatium pulsarent ac strepitum ingentem ederent, hîc causa fuit fugæ doloris Capitis; dolor enim ea die intolerabilis factus est, alia autem die abiit, nec amplius rediit. Hinc Asclepiadem Medicum me legisse recordor, phreneticorum mentes morbo turbatas, sæpè per symphoniam suæ naturæ reddidisse; & me non latet, Herophilum quoque docuisse, venarum pulsus rythmis Musicis moveri.

OBSERVATIO CIII.

Ex Miscellan. Natur. Curios. Dec. III. Ann. II. Obs. 33.

De Ictero vini potu sanato.

Optimè cecinit de Vino *M. Terentius Vairo*: Hoc ægritudinem ad medendam invenerunt, & *Illustr. Francisc. Redi* in libro suo, cui titulus *Bacco in Toscana*, vocat Vinum adversus morbos bonum venenum, & reverà copiosa potatio vini sæpè multas ægritudines sanavit; hinc *Petr. Borellus Observ. 77. Cent. 2.* narrat, tres Viros Nobiles antiquis oculorum doloribus cruciatis, vini potu quasi miraculosè sanatos fuisse; unde *Hippocrates in Aphorism. 31. Sect. VI.* ait, oculorum dolores meri potionem solvere. Quod elapsis diebus verum esse observavi in Mercatore Ferrariense annorum xxxii. non febricitante, benèque valente, subi-

tò ictero correpto, at *larga vini potatione* facta, sanato, copioso subsecuto sudore.

OBSERVATIO CIV.

Ex Miscellan. Natur. Decur. III. Ann. II. Obs. 34.

De Malo Hypochondriaco Lactucæ usu curato.

Lactucas in prima, & postrema mensa apponebant Antiqui, unde *Martialis lib. 23. Epigram. II.* cecinit:

*Claudere quæ cœnas Lactuca solebat Avorum,
Dic mihi cur nostras inchoat illic dapes?*

In cœnæ principio apponebant ad concitandam appetentiam, in fine autem cœnæ ad ebrietatem reprimendam & somnum conciliandum, de qua re videatur *Lipsius lib. III. Antiq. Lctionum*. Novi ego Virum quadragenarium, longo Hypochondriaco malo affectum, in quo ventriculi imbecillitas, anxietas à cibo, respirandi difficultas, aurium tinnitus & flatus copiosi in ructus erumpentes aderant, is frequenti *Lactucæ* usu, quam & in prandio & in cœna comedebat, sanatus est. Sic Augustus olim pristinam valetudinem *Lactuca recuperavit*, Musæ Medici prudentia, cui idcirco Romanus Populus statuam juxta ædem Æsculapii erexit, monente *Suetonio*.

OBSERVATIO CV.

Ex Miscellan. Natur. Curios. Dec. III. Ann. II. Obs. 35.

De variis Remediis expertis.

Tutiora & conducibilia esse remedia simplicia, quam ex variis multisque rebus composita, atque in unum congesta, sem-

semper credidi, & Auditoribus meis perpetuò commendavi, illa enim præterquam quod paratu facilia, stomacho minus molesta esse solent, minusque dissolventes ejusdem succos fatigant, nec inter sese colluctationem passa, vim aut agendi energiam aut amittunt aut immutant; sed & non solum, quæ simpliciora sunt, verum quæ ex vilioribus nulliusque pretii rebus conficiuntur, plerumque sunt magis conferentia & efficacius morbum, morbique causam adoriuntur. Quis unquam crederet, ex foetidis excrementis arcana posse comparari ad gravissimas Ægritudines debellandas præstantissima? In horum censum referam, quod ipse expertus sum de *Nitro nostro vulgari*, quod colligitur ex fimo equino cæterisque recrementis in putrefactionem tendentibus, si hoc in crystallos redactum, & in pulverem tritum ad grana X. vel XX. singulis vicibus cum liquore conveniente Febricitantibus exhibeatur jejuno stomacho, & ante futuram accessionem, Febres sensim moderatur, & tandem delet. In pluribus tertiana febre diuturniori laborantibus experiri licuit maximo cum fructu etiam cum *pulvere Caffè & aqua Cardui benedicti* datum; ast efficacius est illud, quod colligitur ex iteratis ablutionibus Stibii diaphoretici, quod si cum alterutro pari dosi commisceas *antimonium ipsum diaphoreticum*, longè efficacius remedium nancisceris, quod ad Gonorrhœam Gallicam, affectus Renum & Vesicæ, Icterus, sitim, stomachi ardorem, similesque Ægritudines, miram opem præstare consuevit: Insuper Me per literas commonefecit *Excell. Dn. D. Lucas Tozzius*, Medicus insignis Neapolitanus, se nonnunquam cum catharticiis illud miscuisse, indeque successivè evacuationem blandam ac felicem, sine stomachi fastidio aut ventris molestia secutam. Porro *pulvieroem corricum Aurantiorum* pluries expertus fui, magnæ esse efficacix ad tollendas Febres intermittentes. Insigne est arcanum ad Icterus etiam cum Febre junctum, *albumen ovi*, quousque in spumam abeat conquassatum, & cum *aqua graminis* commixtum, vesperi & manè ad uncias quatuor assumendum, cui si placuerit, tantillum sacchari adjici poterit. Mirum quam suaviter Stomacho gratificetur, sensim sitim sedet, appetitum suscitet, jecoris æstum temperet, croceum cutis colorem deleat, ut millies expertus sum. Quis crederet tantam vim inesse ei, quod plerique à cibis salutaribus

ribus rejiciunt? *Smilax aspera*, magnum solamen facta est miseris Podagricis, ut illos ab iteratis cruciatibus tueatur, frondes ejus salutariter admoventur utrimque tarsis pedum, malleolis, tibiis ad suram usque, & singulo quoque die renovantur, sensim absque manifesto sensu extrahunt ichores foetidos, inducto leni in superiori cuticula attritu; arbitror eos à lymphâ per glandulas subcutaneas excurrente prodire. Invaluit nunc etiam apud Nostrates usus *caninae pellis* in tibiâ integumentum aptata, ad leniendam podagram.

OBSERVATIO CVI.

Ex Miscellan. Natur. Curios. Dec. III. Ann. II. Obs. 36.

De Somnio mortem prædicente.

Somnia non omnia esse contemnenda, ait *D. Cyprianus Epist. 69.* Exemplum hîc Ferrariæ habuimus, ubi Civis annorum XLVI. plethoricæ complexionis, postquam cum Domesticis quadam vespere cœnâisset lætanter, ac inter risus frequentia pocula miscuisset, nocte dormiens, se esse mortuum somniavit. Manè narrat somnium Domesticis atque Amicis, qui omnes vanitatem somniatam mortem dixerunt, aiebant enim cum Poëta Italico somnia esse.

Imagini del diguaste, è corrote
dal somno è dalla notte.

Ast, post prandium derepente apoplecticus cecidit, & mortuus est ita intra trium horarum spatium.

OBSERVATIO CVII.

Ex Miscellan. Natur. Curios. Dec. III. Ann. II. Obs. 37.

De Ficu & Aloë, simul cum Possessoribus suis emortuis.

DE Ficu Logothetæ cuidam unicè dilecta, curiosam historiam narrat *Eruditiss. Casobonus in Animadv. ad Suetonium lib. 7.*
pag.

pag. mihi 591. ait enim, hanc arborem die mortis amatoris sui exaruisse, ac postridie à summo ad imum se aperuisse, magnâ omnium admiratione; Pariter Ego annis elapsis observavi pulcherriam Aloës plantam, quæ à Rev. Sacerdote, amico meo olim, fuerat plantata, & ipsi semper cara; hæc die obitus prædicti Sacerdotis pariter emortua est. Et ut à Plantis ad Animalia sermonem convertam, notavi cujusdam Militis canem, qui die mortis heri sui, à febris maligna occisi, pariter vitam terminavit. Confer *Observ. 189. Dec. 11. Anno VI. p. 379.*

OBSERVATIO CVIII.

Ex Miscellan. Natur. Curios. Dec. III. Ann. II. Obs. 38.

De Verme ex Nare in Rustica; Cephalalgia causa.

Multorum Animalculorum sedes homo est, & præcipuè Vermium; nullus namque vivens est, qui ab hac peste sit immunis; hinc sæva Lumbricorum turba Infantes jugulat sæpè, Adolescentes invadit, Juvenes lædit, Viris non parcit, Senesque interficit, ac tandem Cadavera brevi ad nihilum redigit, imò in omnibus animalibus, inque eorum omnibus partibus generari quotidie experientia rerum magistra ostendit; sic vivos Vermes in cruore balæniiformes vidit *Borellus Centur. 3. observ. 4.* & *Moufetus* animalia Lumbriciformia oriri in Sanguine ex *Plinio* retulit. In scabie Vermes eruditissimus, ac nunquam satis laudatus Amicus meus *Joh. Cosmus Bonomus* observavit, & in Variolis citatus *Borellus Cent. 2. Obs. 72.* In semine humano *Thom. Bartholinus* & *Antonius Leuvvenhoeckius*; in fellis vesicula *Guil. Fabricius Hildanus*, in auribus *Plinius*, in renibus *Insignis Bellinus*, Medicus Florentinus, unà cum Doctiss. Franc. Mar. Nigrisolo, Medico nostro Ferrariensi; Hinc etiam in Corde vitalis flammæ sacrario, & Sanguinis spirituumque officina vermes se observasse scribit *R. P. Christinus*; in cerebro *Schenckius*, *Zacutus* & *Tulpius*; in urina *Kircherus*, in dorso *Borellus*, & in saliva *Joh. Leuvvenhoeck*, de quibus etiam meminit *Clariss. P. Bonanus*, Dominus meus semper amandus, in *observ. circa Josephi Lanzoni Opera. Tom. II.*

vivent. quæ in reb. non vivent. reperiuntur part. i. cap. 64.

Vidit tamen *P. Borellus* in naso multorum Juvenum Vermes nigro capite, ut ipse refert in *Centur. 3.* cui Borellianæ observationi sequens à me visa meritò annumeratur.

Elapsis diebus perpaucis, Rustica quædam calidioris temperiei, & in flore ætatis constituta, tam acerbo atque immani laborabat capitis dolore, ut domesticorum etiam per cubiculum gressus quamvis exutis calceis, sufferre non potuerit; videbantur enim sibi cultelli cerebro infigi; Post multa frustra adhibita remedia, tandem Vermis è naribus erupit, post cujus eruptionem non exigua secuta est Sanguinis copia cum tanto naturæ levamine, ut omninò dolor cessaverit, sana sic evaserit, & hodienum optimè vivat.

OBSERVATIO CIX.

Ex Miscellan. Natur. Curios. Dec. III. Ann. II. Obs. 39.

De Ligno per tumorem excreto.

Rusticus quidam vegetus annorum xxxvi. repente incidit in epigastrii dolorem, mox in diarrhœam, quâ diu vexatus cum torminibus & doloribus lancinantibus, tandem sponte & sine medicamentis, ut mos est Rusticorum, convalescens, cœpit crure sinistro dolere, ut etiam incessu privaretur, sensim deinde interna ejusdem cruris parte paulò infra inguinis regionem, acrius acriusque dolente, rubor & tumor juxtà coccygem non levis conspectus est, qui in suppurationem videbatur perducendus, in quam rem admotis congruentibus linimentis, atque adaperto in ejus summitate foramine, acumen ligni durissimi profiliit, quod forcipe à Chirurgo extractum ad indicis digiti longitudinem inventum est, ac adstantibus ostensum, unicuique admirationi fuit, unde nam? quo ductu? quomodo eò perlatum? ac tam benè lævigatum esset? suspicatus Ego illud casu fuisse deglutitum, aut verisimiliùs ex potationibus haustum, nunquam tamen rescire potui: Cæterùm ulcus relictum citò postmodum ad cicatricem devenit; Sic certè naturæ

por-

OBSERVATIO CX.

Ex Miscellan. Natur. Curios. Dec. III. Ann. III. Obs. 25.

De Arthritide Aquæ potu fugata.

DE Valesii filiis epota aquâ omni morbo liberatis, legitur apud Cæsar. Cala Tract. de feriis, *Quæstion. 1. N. 224. p. m. 49.* De Dysenteria frigidæ aquæ potu curata testatur in *Miscellan. Cur. Decur. II. Ann. IX. Observ. 53. pag. 84.* Miram etiam febris ardentis per frigidam curatæ, curiosam recenset historiam Excell. Dom. Dom. Joh. Ludov. Hannemannus in modo dictis *Ephemeridum Miscellaneis Curios. Decur. II. Ann. VII. Observ. 69. pag. 130.* quibus quid & Ego circa aquæ frigidæ usum annotaverim, in hac & binis sequentibus Observationibus, nunc jungam: Sacerdos quidam continuis doloribus arthriticis divexatus & miserè afflictus, meo consilio ab omni vini usu abstinet, & sola aqua simplici pro potu utitur, insigni cum effectu; ab hoc enim tempore ab omni articulorum dolore liber, arthriticus esse desiit; eodem successu & Societatis Jesu Sacerdotem quendam ex totali vini abstinencia, continuoque aquæ potu, ab arthriticis doloribus evasisse immunem, ex Amico quodam pro certo cognovi. Confer. *Observationem meam in Decur. II. Ann. X. pag. 165.* datam, cum eruditissimo Magnifici Dn. Præsidis annexo Scholio.

OBSERVATIO CXI.

Ex Miscellan. Natur. Curios. Decur. III. Ann. III. Obs. 26.

De Diarrhœa Aquæ frigidæ potu sanata.

GLoriari Averroen se frigidæ potu multos à morte liberâsse , ait *Dionysius Fontanonus de Morbor. internor. Curat. lib. IV. Cap. III.* quod equidem & in Arthritide me observasse, ex observatione præcedenti liquet: salutarem jam ejus usum etiam in Dysenteria, notabili probabo exemplo. Cùm enim Vir quidam robustus XXXV. ætatis anno tam acerba corripere Diarrhœa biliosa, ut humorum acrimonia anum non modo eroderet, sed & insignem urinæ ardorem inque mingendo dolorem excitaret, cum intensissima & ferè inexplibili siti, frustra præscriptis decantatissimis aliàs in hoc affectu remediis, frigidæ haustum anxie appetiit, quo concesso, mox mitigatis hisce symptomatibus fugata penitus podagra, integræ sanitati ex voto restitutus est.

OBSERVATIO CXII.

Ex Miscellan. Natur. Curios. Dec. III. Ann. III. Obs. 27.

De Dysenteria, balneo aquæ frigidæ curata.

SÆpiùs fiunt in medicina monstra, ut quod in hoc vel illo morbo ex multiplici & confirmata experientia noxium esse veneranda jam annotavit antiquitas, & ceu verissimum modernorum Medicorum comprobavit curiositas, nihilominus tamen quandoque in desperatissimis casibus salutare sit & proficuum, quod Militis cujusdam singulare exemplum haud ita pridem nos edocuit, hic enim cùm sæva Dysenteria atrociter conflictaretur, accepit à focio suo consilium, ut si vitam conservare & amissam sani-

sanitatem recuperare vellet, in *balneum aquæ frigidaë* mox nudus descenderet, erat autem in vicinia puteus non adeò profundus, in quem Æger, cui hoc arrisit consilium, alacriter conscendit, ibique per mediæ horæ spatium in aqua frigida moratur, cessavêre statim, mirum! tormina, & diri ventris cruciatus, cum cruentis per alvum dejectionibus, momentaneo quasi auxilio, sicque ex orci faucibus tunc ereptus est, qui ex voto hodiernum sanus & alacriter vivit.

OBSERVATIO CXIII.

Ex Miscellan. Natur. Curiosor. Dec. III. Ann. III. Obs. 28.

De Pica singulari in Gravida.

DE Mulierum gravidarum Pica eruditissimam Epistolam scripsit *Dom. Langius*; De Muliere quadam refert *Theophil. Bierlingius Miscell. Curios. Decur. I. Ann. II. Observ. 209.* quæ carne Mariti vesci tanto laboravit desiderio, ut eum etiam noctu occiderit. Rarissimam Picæ speciem narrat in *Actis Philos. Ann. 1667. Henr. Oldenburg* de Fœmina excipiente ventum ore aperto è follibus inversis propria manu impulsam: De Malacia Fœminarum exempla varia leguntur apud *Joh. Helvvigium observ. 137. Marcellum Donatum, Salmuthum, Riverium. Bonetum in Medic. Septentr. Miscellan. Curios. pluribus in locis*; & in Libro Italico nuper Neapoli impresso, variis curiosis enarrationibus referto, cui titulus est *Lettere memorabili*, historiam curiosam legi, quam ceu notabilem, nunc hic propriis Authoris verbis Italicis, ne fides minuatur, subijciam; verba verò sunt hæc: „Poi che mi trovo encomiando le „pietre di Napoli prego V. E. dispensarmi uscir un poco dalla „mia narratione per farle un curioso racconto; Anna Margarita „Jannoccaro Moglie D'Anello del Porto Serivano del Sacro „Consiglio, che abita alla Sellaria nelle case del Sig: D. Gaetano de Vencentiis, essendo l'anno 1686. gravida, le vene voglia

„ di queste pietre, cosa stravagante ad udire, de quali prese à mangiar-
 „ re, e continuo senza prender altro per suo cibo per lo spatio di tre
 „ mesi, e cio faceva con tanto suo gusto, che più volte have acer-
 „ tato non haver mai più in sua vita assaggiata cosa per delicata
 „ si fosse; che più saporosa o dilettevole siasi resa al suo palato;
 „ Venuto poi il tempo del suo partorire; fù assalita dà dolori,
 „ ch'erano acerbissimi, & oltre ogni tolleranza; nè qualli stette
 „ per quattro giorni senza poter partorire; Alla fine essenda ridot-
 „ ta all'estremo di sua vita, si fecero venire molti Chirurgici,
 „ li quali allargando conferri la strada per la quale al mondo venia-
 „ mo riuisci un Bambino morto, così duro, come una pietra, è
 „ nell'uscire fece una botta, come se una pistola sbarrata si suf-
 „ se, che i intese dà tutto il Vicinato; Campata dal pericolo,
 „ torno ad esser gravida, partori felicemente, ed ora si trova altre si
 „ col ventre pieno, ma non fa più simili pasti &c.

Ego Uxorem nosco cujusdam Sarcinatoris hujus urbis Ferrariæ,
 quæ Gravida dum esset unius Mensis spatio, esu carbonum famem
 explebat; & de alia recordor Fœmina, quæ dum Gravida esset,
 aliquot libras arenæ maxima voluptate, ac sine ullo incommodo
 una vice devoravit, & paulò post urinam propriam potavit.

Amicus meus fide dignus mihi narravit de alicujus Militis
 Uxore annorum xxxiii. temperiei sanguinæ, quæ dum esset Gra-
 vida, magna tentabatur voluntate comedendi pullum gallinaceum
 vivum cum plumis, ut ipsam se emori præ desiderio fateretur;
 Maritus ad ejus satiandum appetitum vulpinum, vivum pullum
 gallinaceum emit, & domum redit, eumque præbet uxori, quæ
 statim eum comedit incipiendo à capite, omnesque plumas, pe-
 des, intestina & excrementa devoravit; & postea facta fuit ipsam
 nunquam majorem sensisse voluptatem in edendo, ac tunc, cùm
 vivum pullum manducavit; ex quo patet, quanta sit vis appeti-
 tus depravati in Gravidis.

OBSERVATIO CXIV.

Ex Miscellan. Natur. Curios. Decur. III. Ann. III. Obs. 29.

De Puella ex horrore mortua.

DE Puero narrat *Anton. Benivenius de abditis morbor. & sanation. causis cap. 63.* qui dum rure paterno degeret, singulisque diebus ad vicinum Sacerdotem studendi causa, summo manè mitteretur à Patre, accidit semel, ut prope jam intranti illi Sacerdotis ædes, præstò fuerint duo viri nigris vestibus obvoluti, quibus adeò perterritus est puer, ut in admirabilem statim ægritudinem inciderit, ac demum in mortem ultimam rerum lineam. Et fanè maximas in timentis pectore tragœdias excitat horror ac terror, ut observavit *Nicol. Biffius comment. in Claudian. de Rapt. Proserpinæ*; unde *Ovidius* cecinit:

Extimui, sensique metu riguisse capillos

Et gelidum subito frigore pectus eras.

Et Lucanus:

Multos in summa pericula misit

Venturi timor ipse mali.

Quare timoris numen tanquam noxium procul à Civitate arcuerunt Antiquorum nonnulli, uti docet *Simon Majolas in diar. Canicular. tom. 2. colloq. 1.* idemque testatur *Lil. Gregor. Giraldu Ferrariensis noster in hist. Deor. Syntagm. 1. Annus III. Dec. III.*

Narrat *Joh. Rhodius Obs. Med. Centur. 2.* Viro Clarissimo Casparo Bauhino Anno 1619. oblatum fuisse Rusticum quendam, cui à spectro, ut ferebatur, perterrito, sensibus illæsis, & inoffenso linguæ motu, deperditus erat sermonis usus; Ego verò anno 1693. mense Februario, dum Bacchanalia celebrabantur, observavi Puellam quandam annorum quatuor, quæ perterrita à visu personati cujusdam Viri, subito terrore ac horrore correpta in terram cecidit semimortua; Accurrunt Domestici, ut opem miseræ Puellæ fer-

ferrent; sed omnia frustranea fuere, nam septem post horas mortua est; ex quo patet, metum sæpè inferre lethum.

O B S E R V A T I O C X V.

Ex Miscellan. Natur. Curios. Dec. III. Ann. III. Obs. 30.

De Epilepsia quartana superveniente sanata.

Vir Illustris Amorum natus XLIX. habitûs corporis laudabilis, calidi ac humidi, studiis maximè addictus, valdè prudens & eruditus, variis item conflictatus mentis angoribus, & octo abhinc mensibus Virgini honestæ connubio junctus, cùm optimè valeret ipsis Maii mensis Kalendis Anni 1695. dum à prandio fortè confabularetur, stomachum sibi leviter torqueri sensit, mox cùm Conjugem alloqui pergeret, illicò in sensuum omnium internorum eclipsim præceps est, subsequenter oculorum & oris distortionibus leviusculis & crurum aliquali motu convulsivo, quæ omnia inscio Ægro, nihilque mali tum persentiscente evenêre, ita ut superato insultu, sensus amissos receperit ac veluti expergefactus ad consueta munia surrexerit; tertia transacta die iterum redit insultus pari modo, ad quam curandam passionem vocatur Medicus, qui multa exhibuit remedia non tantùm purgantia, sed Chirurgica & specifica; verùm omnia frustranea fuêre, nam quavis hebdomada redibat Herculea passio; Tandem mense Augusto ejusdem anni Quartana Febri correptus non amplius Epilepsiam persensit, & omninò a fontica affectione liber evasit; à Quartana verò, ope pulveris *Chinæ Chinæ* ad 3. ij. in vino Malvatico assumpti ante accessionem, liberatus fuit, nuncque D. O. M. gratia sanus vivit.

OBSERVATIO CXV.

Ex Miscellan. Natur. Curios. Dec. III. Ann. III. Obs. 31.

De Scabie Continua.

Scabies, quæ à scabendo nomen habet monente *Adriano Turnebo in 1. Cicer. de legib. com.* morbus est fastidiosissimus, ac contagiosus, quo nonnulli ad menses, imò ad annos afficiuntur; testatur hoc hîc Ferrariæ Plebeius quidam annorum xxxiv. qui à natiuitate semper scabiosus fuit, licet multa adhibuisset remedia, sed omnia frustra. Evanuit tamen anno elapso mense Octobris, Scabies hæc ex improvîso, febre maligna mox insurgente, à qua ope remedium difficulter quidem liberatus est, recurrente tamen Scabie, quæ me Iudice miselli hujus comes erit utut ingratus, attamen perpetuus.

OBSERVATIO CXVI.

Ex Miscellan. Natur. Curios. Dec. III. Ann. III. Obs. 32.

De Singultu & Sternutatione ante menstrua.

Multa curiosa de Mensium fluxu narrantur à Medicis Physicarum observationum collectoribus; sic raram & curiosam diarrhœam ante menstrua, se vidisse testatur *D. Vitus Riedlinus Obser. med. 53.* Ego verò novi Fœminam quendam, quæ quotiescunque ad menstruorum fluxum accedebat, frequenti Singultu, per duas saltem horas afficiebatur; Et de alia mihi narravit obstetrix quædam omni fide digna, quæ quotiescunque Mensium fluxu detinebatur, à Sternutatione sat frequenti atque molesta per integrum diem affligebatur; imò aliquando & maximè æstivo tempore

pore vomitu affecta, omne quod comedebat spatio trium dierum, durante simul mensium fluxu, per os invita ejiciebat.

OBSERVATIO CXVII.

Ex Miscellan. Natur. Curios. Dec. III. Ann. III. Obs. 33.

De Insania diurna seu Solari.

DE Viro narrat *Clariss. Rembert. Dodonæus Medic. observ. cap. 11.* qui interdum benè habebat mente, sensibus integris, si quando verò quieti se dabat & dormiebat, mox insanire incipiebat, clamitabat, & brachia huc illuc disjiciebat &c.: vigil autem factus iterum sanæ mentis erat, ita ut nocturnus insanus diceretur; E contra autem meum nuper expetit consilium Adolescens, qui nocturnus mente erat, cùm autem aurora surgebat, Insania vexabatur, per totam diem durante, occidente verò Sole rursus Adolescens Insanus, mentis compos fiebat, durante enim Phœbi circuitu perdurabat Insania, terminatoque Solis itinere è stulto evadebat sanæ mentis: Simili ferè modo paucis abhinc annis curæ meæ subjectam recorder Mulierem dolore Capitis diurno laborantem; Capitis enim dolor in ipsa toto durabat die, nocte autem penitus evanescebat, Ægra nec minimum doloris sentiente. Sic tempora mutantur, & nos mutamur in illis.

OBSERVATIO CXVIII.

Ex Miscellan. Natur. Curios. Dec. III. Ann. III. Obs. 34.

De Febris continuæ solutione ex sanguinolento secessu.

VIr, XL. Annorum, corporis habitu mediocriter carnosus, post frequentes & insuetos animi corporisque motus, Febris tertiana duplici continua laboravit; at undecima morbi die magnam

gnam cruoris copiam per alvum sine ullo dolore, ac ne minimam exinde sentiens molestiam, emisit, sicque à Febre liber evasit, quæ cruoris quantitas quinque librarum pondo adæquavit. Similem observationem de Juvene triginta Annorum, vide apud *Cl. Co. Carolum de Caballis in Phænom. Medic. LXXXVII.*

OBSERVATIO CXIX.

Ex Miscellan. Natur. Curios. Dec. III. Ann. III. Obs. 35.

De Syncope ex Imaginatione.

CIvis quidam annorum XXXVI. abhorrens à nativitate à caseo omnibusque epulis caseo conditis, cum die quodam in domum Parentum suorum ad prandium invitatus, Murænam comedisset, Domesticorum quidam facetus, magnam casei partem admixtam esse, joci causa retulit; quid fit? illicò abstemius ille à caseo, totus frigefactus, imaginationis vi Syncopem patitur, levi tamen aquæ frigidæ aspersione sibi iterum datus, penitusque restitutus est.

OBSERVATIO CXX.

Ex Miscellan. Natur. Curios. Dec. III. Ann. III. Obs. 36.

De Continua Icteria, à felle in Vesiculâ suâ in lapidem coagulato.

DUm in *Zodiaco Medico-Gallico D. Nicol. de Blegny Ann. I. Mens. Maji. Observ. VIII.* in Muliere IctERICA lapidem pellucidum in vesicula ejus fellea repertum fuisse, lego, Militis cujusdam recordor, continua Icteria viscerumque obstructionibus laborantis, angina tandem vitam miserè finientis, in cujus post mortem dissecto cadavere hepar multis hydatidibus obsitum conspiciebatur, inque vesicula fellea calculus reperiebatur coloris subviridis, ma-

gnitudine nucem Moschatam, pondere verò quinque adæquans drachmas.

OBSERVATIO CXXI.

Ex Miscellan. Natur. Curios. Dec. III. Ann. III. Obs. 37.

De Sudore post mortem.

Mirandum sanè, quod in Adolescentulo Febri maligna haud ita pridem hîc defuncto contigit, dum tertia ab obitu hora, ex omnibus cutis spiraculis sudorem frigidum liberaliter fatis profuderit, id quod etiam ab aliis Academiæ Cæsareo-Leopoldinæ Collegis Dec. I. Ann. III. pag. 140. Dec. I. Ann. VI. & VII. p. 243. & Decur. II. Ann. IX., 71. annotatum est. Confer Excell. Dn. D. Garmanni Tractatum Curiosum de Miraculis Mortuorum.

OBSERVATIO CXXII.

Ex Miscellan. Natur. Curios. Dec. III. Ann. III. Obs. 38.

De Frustulis Raphani per urinam excretis.

Juvenis annorum xxviii. ex impuro concubitu Gonorrhœam contraxit, à qua ut liberaretur, consilium ab Amico suo, qui olim eodem laboraverat malo, petiit, qui eum edocuit, ut continuè comederet Raphanos, & Emulsiones ex seminibus Peponum cum aqua Malvæ paratas liberalius potaret: Raphanos ergo & manè & vespere manducavit, hinc subsequente nocte expergefactus, magnum mingendi pruritum persensit, quare magno conatu urinam provocare tentat, sed frustra insequuntur frontis sudores, genarum rubor, advocat domesticos, qui mox Chirurgum advocant, hic verò cum sine mora advolasset, præparat ac propinat Emulsionem sequentem.

R. Emulsionis ex semine Peponis in aqua Ononidis paratæ, ʒ. vii. adde

adde *Spiritus Chalcanti*, *Salis*, ana, gutt. X. Pulveris Oculorum Cancrifluviatilis præparatorum, 3.j. Misce: quâ hausta, elapso bihorio utut non sine acerbo fatis dolore mingere incipit, excreto simul, ceu ex urina inspecta ad oculum comparuit, Raphani frustulo elapso vespere comesto.

OBSERVATIO CXXIII.

Ex Miscellan. Natur. Curios. Dec. III. Ann. IV. Obs. 65.

De Cornu in fronte Puelli.

DE Cippo Italiæ Rege, legitur apud *Thom. Garzonium in lib. cui titul. Il Seraglio de stupori. pag. mihi 487.* qui Cornua in fronte gerebat, ibi fortassis nata ob vim imaginationis, ut docet cum *Petro Messia citat Garzon.* quod an certum sit? fides penes Autorem; Certum tamen est, Me Anno 1693. Mensis Julii die 29. observasse puellum recenter natum à Plebecula annorum xxvi. bonæ temperiei, qui præter labia leporina, etiam in medio frontis tuberculum nigrum, durum, ac corniculo penè simile ferebat; hic tamen tertia ab ortu die obiit; post mortem secto tuberculo, corneæ apparuit esse substantiæ.

De Cornutis infantibus historias curiosas refert *Clariss. D. Fortun. Licetus de Monstris pag. mihi 225.*

OBSERVATIO CXXIV.

Ex Miscellan. Natur. Curios. Dec. III. Ann. IV. Obs. 66.

De Febri Quartana larga Uvarum assumptione curata.

DE pertinaci Dysenteria larga casei dosi percurata, curiosam historiam narrat Clarissimus Dom. Dom. *Petrus Rommelius Medicus Ulmensis præstantissimus, in Miscellan. Acad. Nostræ Curiosor.*

Decur. 3. Ann. 2. observ. 213. imò Dysenterias contumacissimas ex uvis recentibus, immaturis, item musto recenti superatas, in prioribus horum Miscellaneorum Tomis recensuit quoque, placet autem mihi in præsentiâ Quartanæ Febris curationem curiosam afferre, nuper à me observatam.

Menſe Septembris Anni 1695. multæ erant Febres Quartanæ in noſtra hac urbe Ferrariæ, quarum illæ meæ curæ commiſſæ, ferè omnes uſu *Chinæ Chinæ* curatæ ſunt; Plebeius autem aliquis annorum xxxiv. temperiei bilioſæ, ad Febrem Quartanam pel- lendam, ab aliis perſuaſus, quotidie multa in Viſtum errata com- mittebat; modò enim vini magnam copiam ad ebrietatem uſque ſumebat, nunc multas cepas crudas edebat, modò magnam Salis communis quantitatem ingurgitabat; at omnia fruſtranea; donec à Juvene edoſtus libras xii. Uvæ comedit, à cujus eſu alvi fluxus ſequutus eſt; ſicque febris abiit Quartana, nec amplius rediit, nuncque ſanus vivit.

OBSERVATIO CXXV.

Ex Miscellan. Natur. Curioſ. Dec. III. Ann. IV. Obſ. 67.

De quinque Filiis Cæcis ex Patre Cæco.

Podagra afflicto Podagricum, Leproſum Lepra correptum aliquando generare, & maculas majorum quandoque etiam in pronepotibus inveniri ſcribit *Sapientiff. Bonif. Simoneta lib. 4. Epist. 18.* quod quidem Ego ſequenti obſervatione confirmo; Cæcus eſt hic Ferrariæ Pauperculus eleemoſynis vivens, qui a Conju- ge quatuor maſculos ac unam fœminam ſuſcepit, qui omnes quin- que gnati orbat lumina orti ſunt; imò circa hanc rem mihi nar- ravit Sacerdos Romandiolus fide dignus, ſe obſervafſe Faventia furdoſ Filioſ, è Matre furda natoſ.

OBSERVATIO CXXVI.

Ex Miscellan. Natur. Curios. Dec. III. Ann. IV. Obs. 68.

De Epileptico saltante.

DE Epileptica cantatrice observationem curiosam narrat *Clariff. Dn. Joh. Jacob Wagnerus* Collega noster semper colendus, in *Ann. 2. Decur. 3. Miscell. Curios. Obs. 161.* Ego verò Epilepticam nosco, qui in paroxysmo, & clamat, & saltat magna adstantium cum admiratione; Plura de similibus & aliis admirandis Epileptiis leguntur apud *Marc. Donatum de Med. Hist. mirab.* & in specie *Winclerus in Ann. 3. Decur. 1. Miscell. Curios. Obs. 304.* meminit de Epileptica, quæ solebat in Paroxysmo ridere.

OBSERVATIO CXXVII.

Ex Miscellan. Natur. Curiosor. Dec. III. Ann. IV. Obs. 69.

De Vomitu ex manu sinistra distortionem.

CLariff. *Joh. Bapt. Helmontius in suo Pylor. rector.* narrat, sibi ex fortuita distortionem pedis rigorem accidisse, cum nausea, vomituque; ast reposito in suum locum pede, cessasse vomitum, & rediisse appetitum pristinum; Sic Ego pariter mense februario Anni 1696. die 9. observavi Adolescentem, qui currens cecidit, illique manus sinistra distorta fuit, & illicò vertigo, ac vomitus non exiguus successit, cum totali corporis tremore; deferitur hic domum; statimque vocato Chirurgo, semidislocata manus reposita est, cui repositioni subito secuta est vomitus cessatio & vertiginis ablatio; Ex quo apparet maximum esse consensum inter Ventrículum ac nervos manuum & pedum: de consensu cum Capite nil addo, a Cerebro enim omnes nervi derivantur.

OBSERVATIO CXXVIII.

Ex Miscellan. Natur. Curios. Dec. III. Ann. IV. Obs. 70.

De Globulo plumbeo per triennium in corpore humano detento, tandem per tumorem in Inguine extracto.

DE Particula Gladii Anni unius spatium in thoracis cavitate Dom. Simonis Capece detenta, tandemque inter octavam & nonam costam feliciter à Chirurgo extracta historiam mirabilem narrat Julius Jafolinus in *Ischiæ Balneis lib. 2. pag. mihi 164.* ubi etiam iste Autor delineat particulæ Gladii figuram, longitudinis spithamæ unius, & latitudinis duorum transversalium digitorum, cujus ensis portiunculæ extractio facta fuit Anno 1581. die 6. Aprilis hora 20. Sic pariter Rusticus quidam Annorum xxix. ab alio Rustico vulneratus mediante sclopeto accepit in parte sinistra Abdominis, à quo intra XL. dierum spatium sanatus est; globulo autem plumbeo, quo vulneratus fuit, intra corpus manente, uti in aliis hujusmodi casibus fieri solet; clausa cicatrice jam Rusticus omnia munera rusticalia feliciter, ut ante vulnus, subibat; elapsis tribus annis ei subortus est tumor in inguine sinistro; ita ut omnes crederent bubonem esse venereum, quantumvis ipse juraret de castitate servata; Tumor ad suppurationem paucis diebus pervenit, & sponte ruptus est, quo aperto, non exigua puris quantitas effluxit, unâ cum globulo plumbeo à tribus annis in corpore ipsius patientis detento, absque ulla pridem noxa; Cæterum brevi sanatus est tumor, & pristinam Rusticus recuperavit valetudinem, quam etiam dum hæc scribo, Deo adjuvante possidet, ac bene viribus pollet. Hinc de alio recorder Adolescente, qui similiter sclopeto vulneratus fuit Anno 1683. in coxa dextra, globuloque intromanente sanatum vulnus fuit; & Anno 1685. ortus est tumor exiguus super genu ejusdem partis, quo aperto, globulus plumbeus exivit, non sine adstantium admiratione. Imò multos nosco viventes, ac sanos hîc Ferrariæ, qui intra suum corpus globulos plumbeos absque ulla noxa servant; ex quo apparet amicitia Plumbi cum humano corpore.

OBSER-

OBSERVATIO CXXIX.

Ex Miscellan. Natur. Curios. Dec. III. Ann. IV. Obs. 71.

De Remedio singulari ad Luem Veneream curandam.

Glossopetram virtutem habere alexipharmacam tradit Clariss. Dom. Jacob. Prancrat. Bruno in *Amalth. Castell. Brunon.* unà cum Frider. Hofmanno *Clav. in Schroëd : & Chiocco in Museo Calceolar. &c.* ipsamque non parùm valere adversus malignas febres calcinatam & in pulverem subtiliter redactam, ac sumptam cum aqua Scorzonerae expertus pluries in Praxi facienda didici; Communicare verò Curiosis Dom. nostris Collegis de *Glossopetra* hoc in præsenti utile puto, quod non semel probavi, videlicet pulverem *Glossopetræ calcinatæ* ad pondus ʒ. j. manè jejuno stomacho in jusculo, in quo bullita sit parva quantitas *Salsaparillæ* & Anisum sumptum à Lue Venerea affectis, non levem ferre opem; quòd nuper etiam in juvene à decoctis & diætâ sudorifica abhorrenti feliciter evenisse notavi. Medicus etiam Mantuanus, amicus meus singularis, mihi de *Glossopetra* narravit, ipsius pulverem cum aqua Theriacali frigida sumptum, rusticum quendam à Fun-
gonum veneno liberasse; Ac de Sacerdote recordor, qui semper secum ferebat *glossopetras*; cogitabat enim, has contra Vertiginem, Apoplexiam, Epilepsiam, morsus venenatos Canum & Serpentum externè quoque valere; At curiosum illud ad calcem hujus observationis circa *Glossopetras*, quod legitur apud *Plinium histor. natur. lib. 37. cap. 10.* apponere fas mihi sit, scilicet *Glossopetram* linguæ humanæ similem, ut loquar *Pliniano sensu*, in terra non nasci, sed deficiente Luna Cœlo decidere; quod quidem, nec à *Plinio* ipso alioquin certè nimis credulo, tanquam certum acceptatur.

OBSERVATIO CXXX.

Ex Miscellan. Natur. Curios. Dec. III. Ann. IV. Obs. 74.

De Hydrope Ascite urinæ profluvio sanato.

Hydropicum urinæ profluvio sensim detumescentem, se notasse scribit *Clariss. Dom. Johann. Bapt. Scaramuccius in Theorem. Familiar. 4. pag. mihi 59.* Ego sequentem de Ascitico, urinæ profluvio excitato, curato, observationem modò observatam nunc addo.

Vir quidam non ignobilis, Annorum XLII., temperiei biliosæ, post longam febrem tertianam duplicem, inflatus est ventre, cæteris verò partibus emaciatis; à Medicis destitutus, & quasi desperatus, meo consilio tandem quotidie mane jejuno stomacho assumebat sequens remedium: *℞. Therebint hinæ lotæ in aqua Malvæ 3. s. & cum pulvere liquiritiæ, Fiat S. A. Bolus*, assumendus cum aqua sequenti:

℞. Aquæ Ononidis, Malvæ, ana, 3. ij. spiritus Salis, 3. j. Misce.

Post prandium verò syrupum sequentem assumebat, *℞ Syrupi, de quinque Radicibus; & de Althæa Fernellii, ana, 3. j. s. M.*

Post cujus assumptionem bibebat jusculum in quo bullierant *folia Malvæ & radices Asparagorum*; Quibus adhibitis remediis, per urinæ vias Hydropis lymphæ excreta est; & postea Æger convaleuit; nunc verò sanus vivit.

OBSERVATIO CXXXI.

Ex Miscellan. Natur. Curiosor. Dec. III. Ann. IV. Obs. 75.

De Vino è Mamma excreto.

Crevissiam è Mamma excretam in quadam Matrona puerpera se observasse ait *D. Salomon Braunius in Miscellan. Curios. Decur.*

cur. I. Ann. 4. & 5. observ. 15. Ego vero in Nutrice quadam honesta Ferrariensi Annorum XXVI. vidi Vinum nigrum sincerum suum proprium colorem & saporem habens, excretum è Mamma dextra tantummodo, à sinistra autem Mamma lac solummodo, nec Vini quidem exiguam quantitatem excretam; quod non parùm admirationis attulit Discipulis meis, & Nutricis prædictæ Domesticis.

OBSERVATIO CXXXII.

Ex Miscellan. Natur. Curios. Dec. III. Ann. IV. Obs. 76.

De Partu quinque Filiorum.

DE tali partu memini etiam Ego in *Miscelli Acad. Curios. Decur. II. Ann. 9. observ. 50.* & ante Me meminerunt quoque *Aulus Gellius lib. 10. Noct. Attic. cap. 2. & Joh. Bertrandus de Jurisperit. lib. 1. pag. mihi 109.* narrando de quadam Muliere, quæ tempore Caii J. C. quinque liberos enixa est, de qua re sic legitur in *L. utrum, D. de reb. dub. Et nostra quidem ætate Serapia Alexandrina mulier ad D. Hadrianum perducta est cum quinque liberis quos uno fœtu enixa est.* Sic Ego Mense Martii Anni hujus 1696. Uxori alicujus Plebeii adstiti, quæ quinque filios peperit unica tantum die quæ septima mensis Martii erat, peperit scilicet tres fœminas, duosque masculos; quorum duo tantummodò vivunt. Confer *Observ. 15. D. Gabriel. Clauderi in Ann. 4. Miscell. Curios. Dec. II.*

OBSERVATIO CXXXIII.

Ex Miscellan. Natur. Curios. Dec. III. Ann. V. & VI. Obs. 118.

De Nævis Menstruo sanguine deletis.

Sanguinem menstruum ob suam virtutem nitrosam curare Erysipelata, Gangrænam, Nævosque maternos Me legisse recordor in *Physiologia Reformat. Clariss. D. Georgii Wolffgang. Wedelii cap. 16. pag. 576.* Et circa Nævos maternos expertum vidi elapsis diebus in Puella trium annorum, cui appositione menstrui sanguinis Nævi aliqui evanescere; sic enim fuit edocta Mater à quadam vetula rustica; Imò recordor Puerum quendam Anno 1690. à Nævis maternis liberatum me vidisse sola, sed frequenti lotione urinæ.

OBSERVATIO CXXXIV.

Ex Miscellan. Natur. Curios. Dec. III. Ann. V. & VI. Obs. 119.

De Noctambulatione periodica.

DE Noctambulonibus curiosa scripsere Petr. Salius Diversus, Schenckius, Sennertus, Regius, Craanen, Græbnerus in *Medic. Vet. restit. & Beat. Gabriel Clauderus Acad. Curiosus eruditissimus in Miscell. Curios. Decur. II. Ann. 5. Obs. 189.* raram historiam narrat; cui Ego etiam hanc de noctambulatione periodica observationem addo. Est hinc Ferrariæ Studiosus quidam Annorum ætatis XVIII. qui quovis mense, tempore plenilunii, etiam patitur; media enim sub nocte elevatis palpebris domus supremas conscendit partes; imò tales pertingit situs, ad quos sanè non pervenisset si planè vigilasset, præterquam enim quod maximum portendunt periculum, etiam difficulter, & magno conatu, & virium jactura ascenduntur.

OBSERV.

OBSERVATIO CXXXV.

Ex Miscellan. Natur. Curios. Dec. III. Ann. V. & VI. Obs. 120.

De noxa Venæ sectionis & purgationis in Pleuritide grassante
Ann. 1696.

HYems Anni 1696. modò borealis fuit, modò australis, ut mense Januario & Februario vernum tempus adventasse videretur; subsecutū tamen est frigus prægrande in Martii principio, quibus diebus plurimæ Capitis intemperies, quæ vulgò dicuntur *Freddore* divagabantur, his accessere Febres, quibus commixtus erat lateris dolor cum aliis symptomatibus, quæ Pleuritides comitari consueverunt; observatum est, omnes quibus Vena secabatur interiisse, propterea mutata methodo medendi cucurbitulis procedebatur, quibus cutis spiracula aperiuntur, ut sic causa antecedens amoveretur, ac revelletur materia ab ambitu corporis ad thoracem fluens; hac occasione in memoriam revocatum est, annis etiam antea actis ex ingenti frigore enatis affectibus perperam administratam fuisse sectionem Venarum, & totum curationis cardinem aliquorum Practicorum nostrorum in hac omittenda stetisse, sed & in tali constitutione, hujus Anni nempe 1696. lethum acceleratum animadvertiebant Clinici ab alvi fluxu, sive hic spontè accederet, sive arte promoveretur. Tantū enim aberat, ut hac evacuatione morbus allevaretur, quin potius eadem adhibita ocyus Ægri deficerent; cū itaque, & quæ per Venas sectas & quæ per alvum laxatum fiunt, evacuationes jure suspectissimæ forent, esset tamen hostis internus deturbandus, via alia excogitata est, quam exitus ipse comprobavit. Per urinas & per sudores ducere cœptum; Et tali methodo curatus est Civis quidam Ferrariensis noster, ætatis annorum xxxiv. qui uti mortuus deplorabatur; huic ope lapidis Bezoard, decoctionis Carlinæ cum Hordeo paratæ, ac magna quantitate assumptæ; nec non datis gelatina Cornu Cervi & Electuario

ex *Carlina* & similibus, alvi fluxus mortis prodromus fletit, sudor successit, qui diu, largèque prorumpens Virum dictum ex Orci faucibus eripuit. Haud dispari ratione per clarissimos Artis Apollineæ Mystas, Amicos meos, plures alii sani facti sunt Ægri, etsi à sudore copioso in lipothymias, syncopesque incurrerint, majori potius terrore assidentium, quam languentium detrimento; quicunque verò secus tractati ab aliis fuere medentibus, libitinæ mactati, curantium errores sepulchris intulêre. Notabilis itaque Pleuritidis dicto tempore vagantis idea, quæ à Practicis judicabatur Pleuræ phlogosis; quibus symptomatum series favere videbatur, dolor nempe lateris punctorius, febris acuta, tussis, pulsus ad duritiem vertens, ac respiratio difficilis, non tanta tamen, quanta in Peripneumonicis esse consuevit, & dum inter Medicos de sede hujus morbi disputaretur, è vivis sublata est mulier tali affecta morbo, ego cadaver aperui, ex quo lis tanta dirimeretur, & ecce Pulmonis medietas, absque ulla Pleuræ læsione, erysipelate apparuit infecta, tumefacta, ac inter flavum membranorum colorem diversis etiam maculis conspersa, quod sanè Ego prius in consultatione pro dicta muliere facta prædocui, constituendo morbum, quo vexabatur patiens, *Febrem continentem cum decubitu causæ morbificæ in Pulmones*, Hippocrate fretus, atque Felicis Plateri, aliorumque placitis adhærens, quibus hujus morbi natura erat magis perspecta; symptoma notandum hos morbos consequens, erat excretio per tussim multæ materiæ biliosæ tenuis inconcoctæ; Urinæ aderant turbatæ, quæ sudore erumpente clarescebant; itaque ut primum curandi sparta nobis imponebatur, cum cucurbitulis scarificatis & non scarificatis totum deplebatur, cutisque pori reserabantur; mox apozemata ex *Pectoralibus* dabantur, cum guttulis aliquot *Spiritus Sulphuris* quod Pulmonum Balsamum habetur à Medicis sanioribus; Anacatharsi juvandæ eclegmata non præscribebamus saccharata, quæ in bilem faciliter verti solent, sed largi haustus imperabantur *decoctionis Carlinæ* cum Hordeo factæ, quibus nedum thorax humectabatur, sed & totum corpus, ad cujus circumferentiam pellebatur materia, quæ in venis majoribus fermentescens, tandem in Pulmonis anfractibus præcipitata morbum fovere, lethumque accersere solebat; Pectus ungebatur *oleo*

nostro

nostro cucurbitino pro Pleuritide nuncupato. Frictionibus, & dorsu inunctionibus cum *Aëtii* linimento celebri in Praxi Medica multum Me præstitisse exitus nos docuit; pulveribus *oculorum Cancris præparatorum*, *Cornu Cervi philosophicè præparati*, *Mandibulae Lucii Piscis*, *Dentis Apri*, *sanguinis Hirci præparati* quibus *Bezoar* quoque accessit, usi sumus; hinc *Ægris* copiosi sudores, & magni lotii proventus, & hinc salus; sicubi res postularet, alvum segnem clysmatibus, ac glandibus irritabamus; Quod si morbo ansam dedisse constaret nobis menses suppressos, saphænam tundere non reformidavimus; cùmque phrenitides multoties *Ægris* supervenirent, *Phœnigmos* in scenam produximus; eosque suas partes optimè egisse notavimus; si curatio juxtà hanc nostram methodum procederet, morbi dies septima, nona, aut undecima ægros judicabant ad salutem; Paucos autem memini servatos, quibus in ipsa indicatione animus deficiebat; *Offa vino dulci, odoro, dilutoque imbuta*, pretiosioris cujus vis remedii cardiaci vices opportunè supplevit; Quæ omnia hùc retuli, ut posteritas noscat, quam periculosa alea plena sit nonnullorum temeritas, qui omni in febre & morbo quovis, tanquam ad sacram anchoram ad Phlebotomiam, atque Catharsim confugiunt, cùm utraque hæc evacuatio exceptiones suas patiatur; adeò verum nullam in Arte nostra Apollinea regulam generalem posse dari præter hanc unam, nempe, *nullam tamen in ipsa Praxi Medica Regulam assignari.*

OBSERVATIO CXXXVI.

Ex Miscellan. Natur. Curios. Decur. III. Ann. V. & VI. Obs. 121.

De Phrenitide Balneo Aquæ frigida curata.

Rusticus quidam in nostro Ferrariensi suburbio annorum ætatis XL. per aliquot dies strenuè vino generosissimo usus, paulò post gravi delirio, cum vigiliis perpetuis, ac febre continua affectus est anno 1696. Mense Junio; Vena ut aperiretur suasi, sed ob magnam inquietudinem feri minimè potuit; Die morbi quinta e

ta è cubili surrexit, ac in vicinum puteum se projicit, cui periculo accurrunt Domestici, & celeritate, qua potuere, è Puteo extrahunt fanum, qui in aquis fuit submersus Phreniticus. Tanta fuit humoris frigidi vis, ut calorem, atque effervescentiam cruoris, etiam externè compescere valuerit, sic ergo ab aquis egressus Rusticus, benè se habuit ac amplius non recordabatur ejus quod Phreniticus egerat.

OBSERVATIO CXXXVII.

Ex Miscellan. Natur. Curios. Dec. III. Ann. V. & VI. Obs. 122.

De Corde pilis referto.

DE Corde hirsuto meminit Clariss. Dom. Dom. *David. Græbnerus Med. Vet. restit. cap. 16. de Corde pag. 121.* & ante ipsum de tali corde alii; hinc narrat *Valer. Maximus Lib. 1. cap. 8. de Miracul.* Aristomeni Messenio cor repertum fuisse hirsutum, de quo etiam *Plinius lib. 11. Histor. Nat. & Joh. Schenckius Observ. Med. lib. 2.* De corde Pilis referto scribunt curiosas Observationes *Petrus Crinitus de honest. Disciplina, Bauhin. lib. Anat. Ant. Benivenius de abditis morb. causis; Theod. Craanen de homine; Plutarchus in Paral. Cæl. Rhodigin. Antiq. Lection. lib. 4. M. Ant. Muretus lib. 12. cap. 10. Var. Lection. & tandem Amatus Lusitanus Cent. 6.* narrat olim Ferrariæ nostræ se observasse cor cujusdam Latronis insignis & audacissimi, pilis circumseptum, sic pariter hîc Ferrariæ Anno 1696. sub fine Mensis Aprilis, quendam Plebeium ætatis annorum XLVII. forti pleuritide extinctum, in Hospitali S. Mariæ Novellæ, meæ curæ commisso, cultro anatomico aperui, & Cor inventum est undique pilis refertum, in pulmonis autem ala dextra abscessum vidimus mortis ac morbi causam; sic monstra nascuntur in dies, & mirabilia depromit natura, semper admirabilis semperque curiosa in triplici suo regno, animali nempe, vegetabili & minerali.

OBSERVATIO CXXXVIII.

Ex Miscellan. Natur. Curios. Dec. III. Ann. V. & VI. Obs. 123.

De Vermiculis cum urina profusis.

VIr honestus annorum xxxix. temperamenti sanguinei, mense Augusto anni 1696. postquam multam vini quantitatem ad sitim extinguendam ingurgitasset, incidit in omnimodam urinæ suppressionem, & nihil conferentibus usitatis remediis per triduum à suo Medico subministratis, Me in consilium vocat Ægroti Uxor, qui prædictorum relatione audita, injecto statim clystere ex *Lacte vaccino* & *saccharo rubro*, jussi, ut sanguis à dextro pede ad uncias decem extraheretur; post verò sanguinis missionem sequentem Emulsionem exhibui: *℞. Seminum Violæ purpureæ, ʒ. ℞. cum aqua Malvæ q. s. Fiat Emulsio, cui adde pulveris Oculorum Cancris fluviatilis præparatorum ʒ. j. Misce.* Tribus autem elapsis horis ab hisce remediis, multam urinæ copiam effudit in qua observati fuere plurimi vermiculi rubri coloris, sicque sanus evasit. Exiguos etiam Vermiculos in renibus genitos, cum urina profusos, se vidisse testatur *Fernelius lib. 6. Patholog.*

OBSERVATIO CXXXIX.

Ex Miscellan. Natur. Curios. Decur. III. Ann. V. & VI. Obs. 124.

De Furore Uterino ex inflammatione Uteri.

Mihi nuper narravit Medicus quidam Mantuanus, Virginem quandam jam nubilem, vitam otiosam ducentem, postquam amorem clandestinum cum Nobile quodam contraxisset contra Parentum suorum voluntatem, in somnis fatigatam esse, & die clamasse, multa incompta atque lasciva pronunciasse, ita ut insana

Josephi Lanzoni Opera. Tom. II.

M m m

vide.

videretur, & quando Masculos videbat, illicò in eos ruissè ac peti-
 issè venereos amplexus, oscula, & vigilabat perpetuò, nec co-
 medens, nec potum assumens; Febre accedente continua, multa
 facta fuère remedia tam Chirurgica, quam Pharmaceutica, ast om-
 nia incassum; Decima quarta enim morbi die periit; Aperto
 Cadavere omnia viscera sana apparuère, præter Uterum, qui inflam-
 matus observatus est, quæ inflammatio etiam ad Tubas & Ovaria per-
 tingebat.

OBSERVATIO CXL.

Ex Miscellan. Natur. Curios. Decur. III. Ann. V. & VI. Obs. 125.

De Hysterica passione, Lactis Asinini usu sanata.

ANthysterica volatilia potiùs adaugere insultus hystericos ait
 Clariss. D. Joh. Bapt. Scaramuccius Practicus Urbini celeberrim-
 us, ac amicus meus, & Collega semper colendus in Theorem. famili-
 ar. 18. pag. mihi 270. quoniam, ait ipse, libertatem majorem spi-
 ritibus imponunt; unde Lac Asininum massam humoralem dulci-
 ficans laudat; & sanè, ut verum fatear, Ego Anno 1696. Juvenu-
 lam annorum XX. hystericam curavi, usu Lactis Asinini, per xxiv.
 dies manè jejuno stomacho exhibiti, cum exigua quantitate Sac-
 chari fini pulverisati ad pondus unciarum sex; Nuncque aliam Fœ-
 minam Hysterica passione affectam sub cura mea teneo, quæ frus-
 trà anthysterica varia remedia experta est; nunc verò post com-
 munem purgationem, Lacte Asinino utitur & verè fateri possum,
 neque minimum hystericum insultum eam perferre.

OBSERVATIO CXLI.

Ex Miscellan. Natur. Curios. Dec. III. Ann. V. & VI. Obs. 126.

De Hydrope ulcere. aperto in Scroto sanato.

DE Hydrope per abscessum in Scroto sanato, curiosam observationem narrat Clariss. Dominus Gerbezius Medicus Labacensis dignissimus, Academicus Curiosus ac Amicus meus semper colendus, in *Miscell. Acad. Natur. Curios. Decur. 2. pag. 182.* Ad cujus historiæ confirmationem sequentem adjungere mihi liceat casum: Miles quadragenarius Hydrope Ascite confirmato laborabat Anno 1695. multisque incassum tentatis remediis jam jam vitæ finem expectabat, & loculum; Chirurgus quidam ad desperatam vocatus curam, setaceum aperit in Scroto, per cujus vias aqua Hydropis assiduè extillabat, magno cum Ægroti levamine; sicque tandem sanus evasit; Pariterque Reverendus Pater Bernardus Zane Ordinis B. Petri de Pisis Sacerdos pius, & S. Mariæ Rosarum Ferrariæ Prior dignissimus mihi nuper narravit, se Venetiis vidisse suæ Religionis Sacerdotem hydropicum confirmatum, qui ope ulceris arte excitati in Scroto à quodam Chirurgo Gallo, sensim sine sensu quotidie extillante lymphæ in abdominis cavitæ stagnante, tandem convaluit; & ad plures supervixit annos, quin & quod notabile fuit, ulcus scroti, etiam sanatum est.

OBSERVATIO CXLII.

Ex Miscellan. Natur. Curiosor. Dec. III. Ann. V. & VI. Obs. 280.

De prædictione ex Barba.

Multos futura ex Barba prædixisse narrat Clarissimus Georgius Piëtorius Villinganus in *lib. 3. suæ Philologiæ, pag. mihi*
Mmm 2 91.

91. Et mihi quoque contigit videre Anno 1694. Mense Septembris, Rusticum quendam, Annorum ætatis XLIII. qui derepentè canitiem propriis in capillis & Barba vidit, non sine ipsius ac Conjugis admiratione; post triduum ab inimico clam est occisus sclopeto, dum Ecclesiam peteret; Mihi pariter tunc temporis, hanc ob causam narravit Sacerdos quidam Amicus meus fide dignissimus, se Anno 1673. observasse sexagenarium alioquin robustum, cui absque ulla occasione spontè cecidit tota Barba; & post septem dies ille apoplecticus obiit.

OBSERVATIO CXLIII.

Ex Miscellan. Natur. Curios. Dec. III. Ann. V. & VI. Obs. 281.

De Pure in brachii tumore collecto, per alvum expurgato.

Purulentum humorem in alvum posse defluere, notavit olim Clariss. Ambrosius Pareus, lib. de Vulneribus Sclop. cap. 12. pag. mihi 351. Nuperque mihi videre contigit Militem robustum Annorum XXXIX. cujus in brachio dextro magnus sponte apparuit Tumor; Chirurgus alioquin gnarus, suppurationem tentavit, sed frustra, nam tertia ab applicato suppurante remedio die, post ventris dolores, diarrhœa affectus est; per quam etiam purulenta tumoris materia excreta est per alvum, magna Chirurgi admiratione. De Pure quoque in coxæ tumore collecto, per alvum expurgato, egi in *Observat. XLIX. Miscellan. Academ. nostr. Curios. Decur. II. Ann. IX. pag. 82.*

OBSERVATIO CXLIV.

Ex Miscellan. Natur. Curios. Decur. III. Ann. V. & VI. Obs. 282.

De Puero sine Ano.

ANno 1698. mense Octobris, observavi puerum; ortum à quadam Rustica bonæ temperiei annorum ætatis XXIX. quæ Mihi fassa est tres se jam peperisse filios, & omnes sine ano; imò circa hoc à Me petiit consilium, & remedium, ad hanc arcendam miseriam in posterum; Arte apertus est anus, sed secundo à vulnere die mortuus est.

OBSERVATIO CXLV.

Ex Miscellan. Natur. Curios. Dec. III. Ann. V. & VI. Obs. 283.

De Muliere barbata.

DE barbata Muliere mentionem facit Eruditissimus *Casp. à Reies*, in *Camp. Elys. jucund. quæst. pag. mihi 712.* Egoque Anno 1697. Mulierem Romandiolam Annorum L. sterilem observavi, barbam gerentem; quæ interrogata mihi retulit, se nunquam menstruas purgationes vidisse, nec mammas tumefactas, pectus enim velut viri erat. De hac re vide quoque *P. Caspar. Schott. in Phys. Curios. lib. 3. cap. 32.*

OBSERVATIO CXLVI.

Ex Miscellan. Natur. Curios. Dec. III. Ann. V. & VI. Obs. 284.

De Febre Quartana Abortu soluta.

EST tamen, ait Origenes in Numer. cap. 12. interdum & Abortus bonus; Et reverâ bonus Mihi apparuit in Nobili Fœmina Ferrariensi ætatis annorum xxxi. quæ spatio trium Annorum Quartana Febri laboravit; à qua neque ope *Chinæ Chinæ* neque aliorum febrifugorum liberari potuit; at gravida facta, Quartana quæ simplex fuerat facta est duplex, cum capitis sævo dolore; quarto gestationis mense Abortus accidit, multa cum sanguinis effusione, post verò Abortum libera à Febre Quartana evasit, nuncque Dei gratia sana & vegeta vivit, ac se iterum concepisse jam putat.

OBSERVATIO CXLVII.

Ex Miscell. Natur. Curiosor. Decur. III. Ann. VII. & VIII.
Obs. 68.

De Herpete sola aqua marina curato.

ORiginem, progressum, & quidquid inest arti Medicinæ, observationibus magna ex parte deberi, ait *Excellentis. D. Georgius Baglivus in Romano Archi-Lycæo Anatomes Professor diligentissimus*, ac *Amicus meus singularis in lib. primo de praxi Medica cap. 2. pag. mihi 6.* undè meritò ad Apollineam excolendam Artem *Academia nostra Leopoldina Imperialis* in colligendis Medicis Observationibus quovis anno infudit, & collectas publici juris facit ad utilitatem Reipublicæ Medicæ; Liceat ergo nunc mihi sequentem Collegis nostris Curiosis communicare historiam de Herpete sola aqua marina curato; erat enim Plebeius quidam noster Ferrari-

rariensis temperie biliosa præditus, annorum ætatis xxxiiii. mense Junii Anno 1696. qui hinc inde in coxis, brachiis, utroque genu, & cubito, pectore, ac facie maculas habebat elevatas, rubras, scabras, & serpentes, ac de novo hinc indè erumpentes; cui consilium à me perenti balneum aquæ Marinæ commendo; qui etiam ter, quaterve ad se lavandum nudus in vicinas Maris Adriatici aquas descendit; & sic sanitatem optatam recuperavit, ac à fœdo illo affectu liberatus fuit; hinc Chirurgus noster Ferrariensis fide dignissimus mihi elapsa die retulit, se feliciter duos viros curasse herpete laborantes. Tota lotionem aquæ salinæ cum adjecto sulphure, & alumine; Alios autem scio Peritos adhibuisse in tali profligando morbo aquas thermarum.

OBSERVATIO CXLVIII.

Ex Miscellan. Natur. Curios. Dec. III. Ann. VII. & VIII. Obs. 69.

De Tumore insigni à capitis lotionem.

A Capitis lotura per æstatem, obortum sub ala sinistra fuisse tumorem testatur *Marc. Aurel. Severinus de Recond. nat. Abcess. lib. 4. c. 5. pag. miki 168.* cui penè simile exemplum, me observasse recordor Anno 1698. Mense Augusto dum ruri essem, in Filia cujusdam Rustici annorum ætatis xii. cui Puellæ alioquin sanæ post lotionem capitis à Matre factam aqua frigida Surditas supervenit, à quâ subito insigni tumore in brachio dextro liberata fuit; tumor autem suppuratus feliciter curatus est; nunc sana vivit, & Domino benedicit.

OBSERVATIO CXLIX.

Ex Miscellan. Natur. Curios. Dec. III. Ann. VII. & VIII. Obs. 70.

De Cæcitate, ex intempestiva Sanguinis missione.

Phlebotomiam aliquandò juvare, aliquandò noxam afferre, sci-
mus. Idque experientia indies comprobat; sic Anno 1698.
die 7. Decembris Adolescentem observavi, alioquin sanum, cui
alvi fluxus supervenit; Vocatus Medicus, sanguinem è brachio
dextro ad libram unam extrahit; quo misso sensim sine sensu visio-
nem amittit, alvo prius suppressa; Multa adhibita sunt à me re-
media; omnia verò frustranea fuère; nam cæcus, & nunc ipse quo-
que vivit.

OBSERVATIO CL.

Ex Miscell. Natur. Curios. Decur. III. Ann. VII. & VIII. Obs. 71.

De dolore maximo Dentium Nive apposita ablato.

Aquam Nivis dolores Dentium sedare ait Avicenna lib. 2. cap.
524. idemque quandam historiam narrando confirmat Zacu-
tus Lusitanus in sua Praxi Medica mirabili lib. I. observ. 85. sic Famu-
lam Ego vidi, annorum XXXV. temperiei biliosæ, quæ à multis an-
nis Dentium dolore vexabatur; multis frustra tentatis auxiliis, tandem
Nivis usum subiit; hac enim circumposita dentium suorum dolorem
mitigabat; E contra verò Civem honestum nosco, qui tempera-
mento sanguineo præditus, quotiescunque frigidam gustat potionem,
illicò in dolorem dentium incidit; ita ut cogatur non tantum calidè
comedere, sed & calidè bibere.

OBSERVATIO CLI.

Ex Miscell. Nat. Curios. Dec. III. Ann. VII. & VIII. Obs. 72.

De Vermibus per tussim rejectis.

PER tussim Vermes in Phthificis aliquandò ejectos fuisse scribit *Felix Platerus Prax. tom. 3. de animal. excret. cap. 13. lib. 2. pag. mihi. 786.* Et ego hoc Anno 1699. in Peripneumoniaco, observavi per tussim excretum vermem rubrum & non exiguum; post cujus excretionem sequuta est magna sanguinis purulenti copia; indeque Mors.

OBSERVATIO CLII.

Ex Miscell. Nat. Cur. Dec. III. Ann. VII. & VIII. Obs. 72.

De Morte à frigido Potu.

POMPONIUM LATUM virum doctissimum, ac constantissimi animi, & vitæ frugalis, septuagenarium, è vita excessisse ob assumptum gelidum potum, narrat *Eruditiss. Sim. Majolus in Canicul Dier. tom. 1. colloq. de montibus.* Gelidissimo enim, ait ipse, vini potu Ventriculi calorem oppressit; Idemque Me observasse recordor Anno salutis nostræ 1697. Mense Junio die 17. in Puella ætatis annorum quinque, quæ post assumptam gelidissimam emulsionem, illi à Patre exhibitam, Iliaco dolore affectam, intrà breve quatuor dierum spatium, tumefacto, atque indurato ventre obiit magno patris dolore; pariterque recordor de Juvene Ariminensi Ætatis annorum XXVII. qui post assumptionem non parvæ quantitatis *peponis glacie gelidi facti*, incidit in febrem ardentem à qua quinta die necatus fuit.

OBSERVATIO CLIII.

Ex Miscell. Natur. Curios. Decur. III. Ann. VII. & VIII. Obs. 74.

De Pulvere Febrifugo.

Globulum Cupressinum siccatum, atque pulverisatum ad pondus drachmarum trium in vino albo generoso exhibitum in accessionis principio, febres intermittentes curare, ait Clarissimus Dominus *Alexander Pascolus*, Perusinus Medicus, & Lector eruditissimus in suis sermonibus ad calcem sui tractatus de febris nuper typis dati Italico idiomate pag. 55. Idemque Ego hoc Anno 1699. pluries expertus fui, & præcipuè in quadragenario hypochondriaco, Quartana Febri pertinaciter affecto per annum, qui tandem ope pulveris hujus prædicti, bis exhibiti, modo supra notato, sanus evasit; Monialem pariter hoc remedio curatam vidi, & liberatam ab erratica Febri per biennium infestante; Potest etiam exhiberi remedium supra dictum sequenti modo: &. Pulveris Globuli Cupressini, 3. ℞. Julep. simpl. q. s. Misce: Fiant Boli aurati assumendi antè prandium, superbibendo libr. j. Aquæ Nucærianæ, vel aquæ Hordei, quod verò continuari debet sex dierum spatio, ut advertit loco citato laudatus Dominus *Pascolus*.

OBSERVATIO CLIV.

Ex Miscellan. Natur. Curios. Dec. III. Ann. VII. & VIII. Obs. 75.

De Calculis in Pericardio.

HOnesta quædam Fœmina, annorum ætatis XXXIII., temperamenti biliosi, trium filiorum Mater, suppressione mensium primò afficitur, ita ut se gravidam esse existimaret; ast ventre non tumescente tertio à catameniorum cessatione mense, frequentem syncopem patitur, à quâ tandem necatur; Aperto cadavere:

adavere ala pulmonis dextra atri coloris reperitur, inque ea aperta materia atra tartarea apparet; in corde nihil novi; in Pericardio verò tres Lapillos invenimus subviridis coloris, quorum duo exigui erant, alius autem magnus & duarum prorsus unciarum ponderis; cætera in hujus mulieris corpore sana erant. De variis rebus præternaturalibus in Pericardii cavitate repertis mentionem Ego feci in mea *Dissertatione de Pericardio* impressa in tomo primo *Bibliothecæ Anatomicæ Dn. Clerici & Mangeti, impressionis secundæ* Genevæ. Anno 1699. pag. 916. quam Lector curiosus videat; sic me legisse recordor apud *VVierum de Præstig. Dæmon. & Burnetum in Thesaur. Medic. Pract. lib. 3.* in Imperatoris Maximiliani Secundi corde secto, inventos fuisse tres Lapillos magnitudine pisorum, unus interim major altero colore rubigineo, qui Imperator dum viveret frequenter gravi cordis palpitatione afficiebatur.

OBSERVATIO CLV.

Ex Miscellan. Natur. Curios. Dec. III. Ann. VII.

& VIII. Obs. 101.

De duplici Dentium ordine in Infante.

DE triplici ordine Dentium in Ludovico XIII. Galliarum Rege curiosam refert historiam clarissimus *Thom. Bartholinus in Anat. Reform. lib. 4. cap. 12.* & duplicem ordinem me notasse jam in Cive nostro Ferrariensi, memini in mea *de Dentibus dissertatione anatomica, quæ impressa reperitur in secunda editione Bibliothecæ Anatomicæ tom. 2. pag. 513.* Nunc notare libet, quod nuperrimè vidi in Puero recenter nato; nempe duplicem Dentium ordinem, exigui quidem illi erant sed tamen benè formati; interrogata Obstetrix, mihi jurato asseveravit tales Dentes jam Puerum ab utero Matris egressum habuisse; Infans verò post quatuor dies mortuus est.

OBSERVATIO CLVI.

Ex Miscell. Natur. Curios. Dec. III. Ann. VII. & VIII. Obs. 102.

Noxa ex Cibo cocto in Vase æneo.

F Amula quædam Monialium Sancti Rochi Ferrariæ Anno præfenti 1700. accepit à Monialibus oryzam coctam in vase æneo: ipsamque suis filiis edendam porrexit; qui talem pro cœna cum assumsissent cibum, noctè diro vomitu, doloribus, ac alvi dejectionibus miserè affecti sunt, ita ut mater ipsos emori putaret; & mihi postea juravit, filios suos nihil aliud quam oryzam illam à Monialibus dono datam comedisse; quapropter judicavi, ob esum cibi cocti in vase æneo ista symptomata evenire, recordatus *observationis 95. Cent. 3. Joh. Rhodii*, qui esum lethalem leguminis ex ære cocti enarrat in quodam hortulano; Pariter tres Rev. Moniales Ferrariæ Anno 1698. Mense Julio variis symptomatibus affectæ sunt, ut cardialgia, vomitu, ventris torminibus, alvi fluxu, ariditate faucium, siti &c. ex sola assumptione Pastæ triticeæ coctæ cum butyro, & caseo conditæ, ac recoctæ in vase æneo; quarum Monialium una forsitan debilior aliis duabus mortua est; Putabant multi, Arsenicum permixtum fuisse cibo illi; Ego autem semper, idem à sola cupri malitia originem habuisse judicabam; me enim docuere Autores de æris malignitate; hinc *D. Sennertus Pract. lib. 6. part. 6. cap. 10.* ait; *Cuprum venenosa qualitate non caret, quæ & esculenta, & potulenta, si in vasis cupreis coquantur, aut diutius servantur imbuuntur; quæ postea intrâ corpus assumpta ventriculum turbant, nauseam, vomitiones, ariditatem linguæ, erosiones ventriculi, dolorem, & ventris fluxus excitant; & Dn. Frideric. Hoffmann. clavi in Schroëder. lib. 3. cap. 12.* scribit hæc verba: *si vinum, acerrimum aut alius succus acidus fuerit æri affusus, ac internè propinatus, legitimi veneni mineralis symptomata producit.* Et *Avicenna lib. 12. tract. 2. cap. 234.* inquit: *oportet quidem, ut caveatur usus dimittendi illud in quo est salsedo, & amaritudo, aut pinguedo, sicut sunt olea, & carnes,*

carmines, aut acetositas, aut dulcedo, in vasibus æris, & bibendi ex eis; ipsa enim transmittunt procul dubio ziniariam, & ziniar est venenum. Caveant ergo Medici, & lento pede pronuntient de veneno malitiosè propinato, aut accidentaliter assumpto; rectè docet enim Dom. Joh. Baptista Sitonius in Miscell. tractat. 17. arduum nimis, & humano impar ingenio opus esse dijudicare, an aliquis veneno extinctus sit? & Casp. à Reies in Camp. elys. jucund. Quæst. 64. num. 35. ait de veneno assumpto cautè, aut minimè pronuntiandum esse à Medicis; qui oportet ut sciant ferè semper contrà fiscum se itare debere in ipsis casibus, nec temerè credere de venenis, ut inquit Ursinus in Bibliotheca Med. Mangeti, tom. 4. pag. 784. incerta enim, & fallacia signa sunt; & veneni interni ab externo dignotionem difficillimam, aut fermè impossibilem esse scribit optimè à Reies loc. cit. Nec fisci propterea standum accusationibus; nam quis innocens esse poterit si accusare sufficiat, ut Imperator Julianus advertit, referente Eruditissimo D. Joh. Paulo Ferrario in Reflex. med. Legal. pag. 6.

OBSERVATIO CLVII.

Ex Miscellan. Natur. Curiosor. Dec. III. Ann. VII. & VIII.
Obs. 103.

De Variis Antipathiis curiosis.

VARIAS in præsentì observatione antipathias curiosas notare statui, primò de Cive Ferrariensi cui cum *Liliis* antipathia tanta est ut odorem etiam à longè fugiat, oporteat, ne in vomitum, & lipothymiam incidat. Monialem nosco, quæ sanguinis hæmorrhagiam per nares confestim patitur, si *Allii* odorem persentit. Militem alioquin sanum nausea, ac vertigine correptum sola *Ranarum* præsentia observavi. Antipathiam cum *Anguillis* in Muliere gravida notavi jam in *Miscell. Nat. Curios. Decur. 2. ann. 9. observ. 208. pag. 379.* idemque hoc anno 1700. observavi in Juvenula primipara cujusdam Fabri Uxore. Sacerdos quidam noster *Calendulæ flores* summoperè averfatur; aliumque

nosco honestum Civem, qui nec odorem *Casei* tolerare potest, & tanto minùs ejusdem esum. A *Pæonia* fugiebat Juvenis ut retuli in dictis *Miscell. Cur. Decur. 2. Ann. 9. observ. 40. pag. 77.* sicque à *Rosis* alius abhorrebat, imò capitis dolore afficiebatur, dum *Rosam* olfaciebat. Adolescentulum anno elapso 1699. tertiana duplici correptum curabam cui *Emulsionem seminum Peponum* exhibui; ast illicò ac apposita saltem fuit, in tremorem, ac syncopem incidit; mater, post duas horas iterum porrexit dictam potionem, iterumque tremor, & syncope supervenêre. Domestici hoc mihi cùm narraissent & idem expertus fuisssem, prohibui, ne in posterum adolescens non tantùm emulsiones non assumeret, verum ne quoque aspiceret; De *Proscro* sua narrat *Excellentissimus Dn. D. Joh. annes Ludovicus Hannemannus in Observ. 51. Ann. 4. Decur. 2. pag. 121.* quæ *Menthæ* odorem, ne quidem herbæ ejus præsentiam, sine animi deliquio ferre non poterat, idemque pariter Ego nuperrimè notavi in Sacerdote quodam Romandiolo. Vir ætatis annorum 37. talem inimicitiam cum *sulphure*, ac *sulphuratis* tenet, ut scabie affectus, inunctione unguenti ad scabiem in cujus compositione *pulvis Sulphuris* habetur, statim in *Lipothymiam*, ac postea tremorem, & capitis dolorem inciderit; imò ille mihi juravit, nec sine angore ac cordis palpitatione *Sulphuris* præsentiam posse tolerare; quod autem mirabile est nausea tentatur, sola *Sulphuris* nominatione; Ancillam nosco, quæ à nativitate, à *Vino* abstinet, ita ut solo *Vini* odore vomitu afficiatur. Quendam à gravi morbo liberatum *Panem* neque videre, neque ut nominetur tolerare potuisse, refert *Clariss. Dn. D. Casp. Theoph. Bierlingius in Miscell. Acad. nostr. Curios. Decur. 1. Ann. 2. observ. 207. pag. 309.* Idemquem Ego Anno 1699. in milite quodam post longam *Quartanam* observavi. *Elbingæ* Primarium fuisse Pastorem, qui *Porcelli assati* caput videre non poterat, asserit *Clar. Dn. D. Jacob. Bernerus in Misc. cit. Ann. 6. & 7. obs. 199. pag. 294.* Et Ego pariter Anno 1698. mense Junio notavi Viginem annorum quindecim quæ caput *Vituli elixati* tolerare nequibat; Varias antipathias cum *Felibus* enarrat *D. Lucas Schroeckius nunc Acad. Leopoldinæ nostræ dignissimus Præses in suo scholio ad observ. 50. Ann. 2. Decur.*

our. II. pag. 83. sic Ego uxorem alicujus Rustici nosco, quæ tanta cum *Felibus* antipathia vexatur, ut in sola *Felis* præsentia deliquia patitur, ac sudores circa frontem; idemque etiam accidere in Puero novem annorum mihi fatetur honesta hujus urbis Matrona.

OBSERVATIO CLVIII.

Ex Miscellan. Natur. Curios. Dec. III. Ann. IX. & X. Obs. 16

De Morte ex Scabie malè curata.

Cautè Scabiosos medicandos esse ait *Acad. Leopoldinæ Curiosorum decus*, *Amicusque meus semper colendus.* DD. *Marcus Gerbezius*, in *Observat.* 167. *Decur.* III. Ann. 2. pag. 254. & aliqua ibi exempla morborum à Scabie intropulsa ortorum affert, ad quam observationem curiosum Lectorem remitto brevitatis causa; Addere solummodò hîc mihi in præsentiarum liceat; Militem quendam Me nuperrimè observasse Annorum ætatis xli. temperiei melancholicæ, fœda Scabie laborantem, qui postquam ab Agyrta quodam Bononiensi, incognito unguento unctus fuisset, à Scabie mundatus est; Mox febris maligna eum invasit cum delirio, convulsione, ac urinæ suppressione; & hinc die morbi quinta vivere desiit, cautè ergo Scabiem medicandam fore, doceat hæc tragica Militis nostri historia, & nec temerè in posterum credendum Agyrtis ac Circumforaneis, qui absque methodo, ac doctrinis, homines è medio tollunt.

OBSERVATIO CLIX.

Ex Miscellan. Natur. Curios. Dec. III. Ann. IX. & X. Obs. 17.

De Mania in Cæco ex nimio Puellæ amore.

A Sprum, & Codrum cæcos amantes, irridet *Martialis*, primum in *Lib. 8. Epigr. 49.*

Formam plane, sed cæcus diligit Asper.

Et alterum in lib. 3. epigr. 15.

Plus credit nemo, quam tota Codrus in urbe &c.

Qui cæci amarunt illas quas formosas esse audierunt, & crediderunt, sed non viderunt; nostris hisce temporibus etiam Cæcum vidi Ego, ut cum *Satyrico* loquar, qui nunquam visæ flagrabat amore *Puellæ*, & tam vehementer eam amabat talique flamma cupidinis torquebatur, ut cum illi eam negassent Parentes nubendam, tanto affectus fuerit dolore, ut brevi maniacus factus, intra quatuor mensium spatium, macie confectus, obierit.

OBSERVATIO CLX.

Ex Miscellan. Natur. Curios. Dec. III. Ann. IX. & X. Obs. 18.

De Phthiriasi Oleo Olivarum curata.

R Ara multa, & curiosa de Phthiriasi collegit *Dn. D. Schroëkius*, Acad. Nat. Curios. Præses dignissimus, in suo additamento ad *Observat. 39. D. Johan. Helvvigii. pag. 146.* ubi inter alia, refert Oleo ligni *Corylini* pediculos fugari juxta *Stockeri* experimentum. Ego etiam fateri possum Adolescentulam Me nuper curasse à Phthiriasi, solo balneo olei olivarum; nudam enim bis in die in vase capaci dicti olei imponendam curavi. Sicque octo dierum spatio, perfecte sanatam vidi, absque alio ullo neque interno præsidio.

OBSER-

OBSERVATIO CLXI.

Ex Miscellan. Natur. Curios. Dec. III. Ann. IX. & X. Obs. 19.

De Venæ sectione in Gravida absque ulla noxa unoquoque gestationis mense celebrata.

Venam secari posse tutò in Gravidis, docet inter alios Medicinæ Magistros nunquam satis laudatus Dn. D. Christianus Helvvichius Practicus Uratislavienſis felicissimus Academiae Naturæ Curiosorum Collega eruditissimus in *observat.* 189. Dec. III. Ann. 5. & 6. pagin. 437. ubi inter alia doctè ab ipso narrata refert, in Gravida Venæ Sectionem celebratam fuisse sine ulla noxa bis, ultimis gestationis mensibus; quare circa hoc quod nuperrimè Ego met observavi in mea exercenda Praxi enunciabo: Erat Mulier plethorica Annorum ætatis xxix. sarcinatoris cujusdam nostri Ferrariensis Conjux, quæ bis abortum passa, tertio, & quarto gestationis mense, tandem imprægnata, auxilium petit; quo circa jussi quovis mense venam aperiri in brachio, modò dextro, modò sinistro alternativè; ultimis autem mensibus in manu salvatellam incidi curavi, & sic justo tempore peperisse puellum robustum ac vegetum qui nunc sanus vivit cum Matre, quæ illum lacte proprio (ut vera genitrix debet) enutrit.

OBSERVATIO CLXII.

Ex Miscellan. Natur. Curios. Dec. III. Ann. IX. & X. Obs. 20.

De Cachexia cum Hydropis principio, ulcere in crure à natura aperto sanata.

Rusticum quendam annorum ætatis XLVI. observavi, qui omisſis exercitiis, arthritide laborare incepit, una cum obstruc-

Josephi Lanzoni Opera. Tom. II. O o o tio=

tionibus utriusque hypochondrii & præsertim dextri, & in sinistro latere ob tumorem lienis difficulter decumbebat; huic facies non-nihil tumida erat cum colore lurido; aderant & manuum, brachiorumque emaciatio, urinarum cruditas, rugitus ventris, febriculæ errantes vespere præsertim ingruentes, usus aëre aquæ corruptæ vaporibus inquinato, nec Solis orientis radiis expurgato, quæ omnia Cachexiæ erant indicia, majorisque mali anteaambulones, atque incipientem Hydropem minabantur, cui accedebat jus hæreditarium, eo enim morbo parens mortis fata subivit; Natura verò, quæ sola morborum est medicatrix, sponte in Crure dextro ulcere foedo, magnam ichorosa lymphæ quantitatem quotidie amandavit, sicque intra mensem sanus evasit; & nunc sanato ulcere bona fruitur valetudine.

OBSERVATIO CLXIII.

Ex Miscellan. Natur. Curios. Dec. III. Ann. IX. & X. Obs. 2^a.

De Variis liquoribus infusis in venas variorum Animalium, & circa hæc observatis.

CANEM ad tabulam ligatum se accepisse ait Clariss. Baglivus in Romano Archilycæo Anatomes Professor nostri amicissimus, in sua dissertat. de experim. anatom. pract. pag. 104. ipsique jugularem dextram aperuisse & infudisse in illam uncias duas Spiritus vini rectificati, sicque canem vix peracta syringatione expirasse adhuc ligatum; Nos autem nonnullas similes infusiones fecimus, & quæ observavimus nunc candidè exponemus:

I. Cani duorum Annorum, sano, venam cruralem sinistram perforavi, ac syphunculi ope vini optimi unciam unam in sanguinem injeci, & ligato vulnere liberum reliqui; qui statim huc illuc inordinatè currere cœpit, inde se movere; & post breve temporis spatium, alvum exoneravit & quod notabile fuit, sudore omnino persusus, in terram se projecit, somnoque alto correptus, duorum die-

rum

rum spatio dormiendo absque cibo ac potu vixit; postea expergefactus latravit, comedit, minxit, nuncque sanus vivit, ut antea.

I L. Canem juvenem, & sanitate optima fruientem super tabulam vivum more anatomico ligavi; & ei aperta vena jugulari dextra, in sanguinem per syringam infudi *Spiritus Chalcanthi* unciam unam, & vix peracta operatione, canis emortuus est; aperto cadavere totum sanguinem nigri coloris, ac coagulatum in arteriis, ac venis observavi; viscera cætera alioquin sana erant.

I I L. Asello aperui venam cruralem in eamque infudi *Spiritus Cornu Cervi* ʒ. j. permixtum cum aqua rosarum ad unciam unam; ligato vulnere asellus se contorquere cœpit, postea copiosè urinavit, nunc verò sanus est.

I V. Felem benè ligavit Rusticus quidam & mihi ligatum attulit, cui ego aperta vena crurali dextra propè inguina, per syringam infudi *Spiritus Sulphuris guttas V. in aquæ vitæ communis ʒ. ij.*; ligato vulnere novem horarum spatio expiravit; aperto cadavere, nigræ maculæ in Hepate, Liene, Pulmonibus aliisque visceribus apparuere; & cruorem in vasis omnibus congelatum, imò Vesicam urinariam non sero, sed sanguine plenam foetido, observavi.

V. Cuniculo ad tabulam ligato aperui jugularem dextram, infusaque in eam *drachma una Spiritus Salis dulcis*; vix peracta Syringatione, Cuniculus adhuc ligatus expiravit, quo aperto sanguinis coagulatio in pulmone tantum est observata; & in aliis locis, sanguis erat omnimodè dissolutus; Cæteræ partes erant sanæ &c.

V I. *Aquam simplicem* pluries infudi in venas variorum canum; omnesque sani evaserunt, in uno Cane *Spiritus Nitri* est infusus, & mortuus est; in alio *Spiritus Cerasorum nigrorum*, & sanus evasit; in duobus, *Spiritus Fuliginis*, & primus post quinque horas est mortuus; alter post duos dies, diris cruciatus vomitibus, extinctus est; in uno Cane infusa *aqua Cinnamomi*, dementia, cœcitas, surditas, ac rabies abortæ sunt, quibus post hebdomadem mors successit; in alio autem Cane, eadem *aqua Cinnamomi* injecta, nihil mali præter vomitum peperit. In Sue quatuor Mensium *Spiritus Terebenthinæ* infusus, necem intulit, qui tamen infusus in Venam cruralem Canis venatici nihil mali attulit; notavi verò *Spiritum Tartari*, *Vitrioli*, & *Salis Ammoniaci* infusum in venas animalium, semper mortem

effecisse, quod etiam solo Sanguinis attactu *Oleum Tabaci* intra paucas horas fecit.

OBSERVATIO CLXIV.

Ex Miscellan. Natur. Curios. Dec. III. Ann. IX. & X. Obs. 113.

De Morte ob Tineam malè curatam.

DE Muliere legitur apud *Saxoniam Prælect. Pract. & Th. Bonetum in Sepulchreto Anatom. tom. 3.* Tinea tentata crebris lotionibus sanata, quæ in capitis dolorem ac febrem continuam lethalem incidit, cujus emortuæ Cadavere aperto, media pars totius Cerebri, cum membranis putrida inventa fuit, inhoreque citrino referta. Similiter Ego Anno 1702. mense Febuario, adolescentem vidi, Pauperculæ cujusdam Ferrariensis filium, Tinea acriter tentatum, ac scabie fœda per totum corpus affectum, qui intempestivè inunctus, ac lotus, *medicaminibus* etiam *mercurio paratis*, liber quidem à Scabie, & Tinea evasit, at feбри maligna, cum delirio correptus, in Xenodochio S. Mariæ Novellæ hujus Urbis, meæ curæ commisso, die morbi septima miserè obiit. Cadavere aperto, Cerebrum maculis nigris undequaque conspersum vidi, cum membranis lividis, & Corde flaccido; in Diaphragmate verò tumorem non exiguum notavi; Hepar durum erat præter ordinem, ac expectationem nostram; Renes naturaliter constituti erant, nec ullam labem ostendebant; In Ventriculo nihil erat, nisi aqua viscida, & flava, ac fœtida; Reliqua verò illæsa & juxta naturæ ordinem inventa sunt.

OBSERVATIO CLXV.

Ex Miscellan. Natur. Curios. Decur. III. Ann. IX. & X. Obs. 114.

De Quartana Febri Ebrietate fugata.

Militem Quartanarium vidi, nullo alio adhibito remedio, sola *Ebrietate* à Quartana Febri liber evasit. Die enim, quo ingruere debebat Quartana, *libras duas spiritus vini* potavit, ex quo ebrius factus est, postea sanus.

OBSERVATIO CLXVI.

Ex Miscellan. Natur. Curios. Dec. III. Ann. IX. & X. Obs. 138.

De Febri Maligna tumore brachii soluta.

Auriga Annorum XLV, biliosæ temperiei, Anno 1702. mense Octobris in Xenodochio Sanctæ Mariæ Novellæ, ægrotabat Febri Maligna adeò ut ad sancta sacramenta confugere opus fuerit; Multa tentata fuerunt remedia ab Arte nostra præscripta, ast omnia incassum, donec tandem die vigesima morbi dolor, inde tumor magnus in sinistro brachio apparuit, quo suppurato, ac curato, Æger perfectè convaluit; & quod notabile fuit, sanies, quæ prima ex abscessu prodiit, atra fuit, fuliginis colore.

OBSERVATIO CLXVII.

Ex Miscellan. Natur. Curios. Dec. III. Ann. IX. & X. Obs. 139.

De Doloze Capitis pertinaci, nullis cedente remediis in Canem transplantato.

Multas & curiosas historias de morbis transplantatis refert Eruditissimus *Frommannus* in suo pulcherrimo, ac doctissimo *Trac-*

tatu de Fascinatione pag. mihi 1002. & sequent : Inter alia elegans exemplum ipsi communicatum, à Clariss. Dn. D. Georg. Abrah. Mercklino, Medico olim Norimbergensi Feliciss. narrat de Lanione, qui Podagra affectus carnem crudam bubulam afflictiis pedibus detinuit, postea removit, & cani imposuit; Lanio convaluit, Canis verò podagricus factus; Quâ de re similem fermè casum ego nunc narrare in curiosorum gratiam volo, hoc Anno 1702. mense Septembris observatum, in quodam Milite præsidii nostri Ferrariensis, ætatis annorum XXIX. robustæ temperaturæ, & corporis quadrati, Hic verò Miles afficiebatur sævo Capitis dolore, qui nullis cedebat remediis seu Pharmaceuticis, vel Chirurgicis, imò semper magis illum torquebat, tandem desperatus, à Vetula edoctus, in urina propria ovum coctum comedendum cani venatico exhibuit, sicque sanus evasit, non sine admiratione.

OBSERVATIO CLXVIII.

Ex Miscellan. Natur. Curiso. Dec. III. Ann. IX. & X. Obs. 140.

De Fluore albo, Salivatione sponte orta, sanato.

SALIVATIONEM tam naturalem, quam arte suscitatum plures curasse infirmitates notavi ego in mea exercitatione de saliva humana, nuper typis data. Hic autem ei addere mihi liceat sequentem observationem de Fluore albo Salivatione spontè orta sanato in Muliere quadam quadragenaria, quæ diuturno albo Fluore laborabat hoc anno Mense Augusti, à quo, post multa remedia frustra tentata, salivatione magna spontè orta, protinus liberata est.

OBSERVATIO CLXIX.

Ex Miscellan. Natur. Curios. Dec. III. Ann. IX. & X. Obs. 141.

De Phthisi a Vermibus.

DE Nobili, desperata Phthisi diu pressa, tandemque mortuo, narrat insignis ac eruditissimus *Dn. D. Christ. Franc. Paulinus in Cynograph. curios. Sect. 4. cap. 8.* cui defuncto ex ore innumeri prodire Vermiculi rubri capitis; Similemque casum refert in suis *Observat. Borellus*; Pariter Ego hoc Anno 1702. Civem Ferrariensem ætatis annorum L. observavi Phthisicum, cujus ex ore sæpè Vermes non exigui prodibant.

OBSERVATIO CLXX.

Ex Miscellan. Natur. Curios. Dec. III. Ann. IX. & X. Obs. 142.

De Gonorrhœa pertinaci, rotulis nostris fugata.

Quidam Conjuges à triennio laborabant Syphilide; Vir labem contraxit per ulcera in pudendis, hinc in ore, subsequenti-
bus Gonorrhœa, Alopecia, & Artuum doloribus; similia symptomata supervenerunt Conjugi; Aliquo adhibito specifico antivenerico purgante, cuncta remissa fuere, & Vir penè liber videbatur, sed renovata cum uxore copula recrudit in eo Gonorrhœa; Hæc igitur in utroque rebellis perseverabat, cum artuum doloribus pro Cœli inclementia, tinge-
bat enim indusia virenti flavedine, licet primo introitu præmonstraret albedinem; In Viro erat remissior, indolens, & diluto feminali liquamine paulatim extillans; ætas utriusque consistens, utriusque habitus gracilis, temperamentum autem Viri sanguineo-melancholicum, Fœminæ bilioso-melancholicum; Me vocarunt in auxilium, ut si aliquod arcanum ad
Gono-

Gonorrhœam haberem, ipsis exhiberem, ut morbi radix, & symptoma proflatarum, atque erodentium succorum, & salium in membranis musculorum, ac ligamentorum dyscrasia funditus extirparetur; Quocirca prius purgato communiter corpore; sequentes rotulas contra *Gonorrhœam* à me pluries in aliis casibus feliciter expertas, præscripsi, quibus quotidie assumptis manè jejuno stomacho, intra quindecim dierum spatium sani Conjuges evasere; hæc verò rotularum est descriptio genuina: *R. Ligni Sancti limati, Corticum ejusdem, Salsæparillæ electæ, Suberis pulverisati, Coriandrorum præparat., Cinnamomi electi, Rosarum rubrarum, Cornu Cervi usti, ana, ʒ. j. Misce, & pulverisentur omnia subtilissimè & cum saccharo & aqua Lactucæ Q. S. fiant Rotulæ S.A.*

OBSERVATIO CLXXI.

Ex Miscellan. Natur. Curios. Dec. III. Ann. IX. & X. Obs. 143.

De Umbilici Hæmorrhagia.

HÆmorrhagiam Umbilici se observasse scribit in quodam Apothecario *Guiliem. Fabricius Hildamus in Cent. 3. Observ. 37.* talemque Sanguinis effluxum etiam Ego hoc anno 1702. notavi, in quodam Mirandulensi, qui feбри continua correptus, die morbi undecima, spontè Sanguinis fluxione per Umbilicum excitata, per quam libræ duæ cruoris emanarunt, & nullo alio tentato ad febres remedio, nec ope remediorum hæmorrhagia cohibita, sed sponte cessante, perfectè convaluit, & nunc D. O. M. favente, sanitate gaudet inculpata.

OBSERVATIO CLXXII.

Ex Miscellan. Natur. Curios. Dec. III. Ann. IX. & X. Obs. 144.

De Abdominis Tumore sponte sanato.

PUella quædam à Nobilibus parentibus nata, tumore ventris laborans, Hydropica censebatur ab omnibus, & cum Umbilicus prominere, Me jubente, apertio ejus facta à Chirurgo fuit, per quam puris laudabilis libræ sex boni ponderis effluxerunt; nulloque alio adhibito remedio, nisi vini ablutione omninò sanata fuit, notandum tamen, etiam per alvum, aliam puris partem excretam fuisse ipso tempore, quo foramen erat apertum in Umbilici prominentia.

OBSERVATIO CLXXIII.

Ex Miscellan. Natur. Curios. Dec. III. Ann. IX. & X. Obs. 202.

De Brachii dolore ex imaginatione.

CURIOSAM observationem circa imaginationis effectum refert *Clariss. D. P. Malebranche lib. 2. de Inquir. Verit. cap. 7. de Ancilla* quadam, quæ candelam admovebat dum Ægro cuidam vena pedis incidebatur, & simul ac illa scalpellum vidit infixum, tantus pavor ipsius invasit artus, ut per triduum, aut quatrimum, in eodem pedis loco, quem viderat incidi, senserit dolorem adeò acerbum, ut per illud tempus in lecto decumbere coacta fuerit; hujusque causam refert in spiritus in illas partes corporis sese violenter diffundentes; similem casum in Adolescente quodam nostro Ferrariensi hoc Anno notavi; Hic attentè cum conspexisset Chirurgum phlebotomantem in Brachio dextro Sacerdotem Pleuritide correptum, post duas horas incidit in dolorem brachii dextri valdè molestum, & præsertim in loco, ubi vena brachii cephalica in Sacerdote prædicto

fecta fuerat; qui dolor spatio duorum dierum perseveravit, donec suborta ephemera evanuit; Febris verò sudore terminavit feliciter.

OBSERVATIO CLXXIV.

Ex Miscellan. Natur. Curios. Dec. III. Ann. IX. & X. Obs. 203.

De Variis in Anatome repertis.

Nonnulla collegit, quæ rarò in Anatome reperiuntur *Reald. Columbus Cremonensis de re Anat. lib. 15.* lectu dignissima, ac maximæ utilitatis; Pariter Ego nonnulla inpræsentiarum notare volo, observata in cadaveribus & hominum, & brutorum, cultro anatomico subjectis: Primò igitur in Cane venatico non duos *Renes*, sed unum tantum offendi in dextra abdominis parte, molis tamen majoris ac sunt *Renes* ordinarii aliorum Canum. Secundò, *Lapillos plures rubri coloris in Jecore* cujusdam Pauperis febri maligna correpti ac extincti; Tertiò, *Vermem* sat crassum, & longum in *vesica* alicujus Sacerdotis Romandioli; Quartò, *Puellum imperforatum*, id est, sine ani foramine, tertia ab ortu die mortuum; Quintò, *duas linguas* in Cane. Sextò, *tumorem in Corde* cujusdam Vetulæ annorum *LXIII*. Septimò, *duplicem vesicam* in Sue; quæ tamen *Vesicæ*, una sub alia jacebant atque in unum tantum collum terminabant; Octavò, *Testes* non in scroto sed in *abdomine* absconditos, in tribus subjectis; Imo in Adolescentis Pleuritide mortuo *tres testes* inveni; Nonò, in Thoracis cavitate *magnam aquæ citrinæ* quantitatem in *Cadavere* Fabri lignarii Ferrariensis febri continua & cardialgia denati Anno 1700. Mense Novembris. Decimò Tandem *Pulmones* in pluribus *pleuræ* partibus *connexos*, nunc in uno tantum latere, nunc in ambobus, in variis corporibus humanis animadverti meisque ostendi Auditoribus.

OBSERVATIO CLXXV.

Ex Miscellan. Natur. Curios. Dec. III. Ann. IX. & X. Obs. 204.

De Chirurgia Infusoria in Canibus.

Multa experimenta circa Infusoriam Chirurgiam se fecisse refert *Clariss. Georgius Baglivus* Prof. Roman. mihi Amicissimus; Ego hîc nonnulla notabo circa idem opus à Me ope infusoriæ, observata.

I. Catulo ligato ad tabulam, venam aperui Jugularem sinistram, & exiguam *aquæ fortis* quantitatem injeci, & vix terminato opere, adhuc ligatus catulus mortuus est; aperto cadavere Sanguinem in jugulari omninò coagulatum reperi; Viscera verò sana erant.

II. Per Syringam injeci pariter in jugularem alterius Canis majoris ad tabulam, ut suprâ benè ligati, uncias tres *aquæ communis*, post modum ligato vulnere, tremore correptum fuit Animal duarum horarum spatio perdurante; Cæterum benè se habebat, & nunc sanus vivit.

III. Cani fœminæ gravidæ cruralem dextram secui, atque injeci *Spiritum vini* ad pondus unciae unius boni ponderis; clauso vulnere, passa est canis horrores universales, & abortum die sequenti, attamen sana evasit.

IV. In meo prædio, Asello alioquin sano, aperui cruralem sinistram & ope syringæ *Aquæ Cinnamomi* unciam injeci; Clauso exindè, & fasciato vulnere, per diem integrum non comedit, neque bibit; postea comedere incepit, & nunc sanus vivit, solummodò color pilorum mutatur in dies; Quin eodem die Caprum ligavi alioquin sanum, eique cruralem pariter lævam aperui, atque injeci mediante infusoria ʒ.j. boni ponderis *Spiritus Salis dulcis*, statimque vulnus claudi curavi; Notavique, Caprum in gyrum rapi multo temporis spatio; indè humi stratus per diem integrum mansit absque cibo & potu, & urinam copiosè emisit;

alia verò subsequente die comedere incepit, nunc sanus vivit, è domestico verò, qui antea fuerat, evasit sylvester, ita ut nunc non solum ab hominibus sed ab animalibus etiam fugiat.

OBSERVATIO CLXXVI.

Ex Miscellan. Natur. Curios. Decur. III. Ann. IX. & X. Obs. 205.

De Scabie crescente Luna aucta.

CAlculi dolores Luna crescente auctos notavit Dn. D. Vitus Riedlinus in suo Itinere Medico pag. 34. qui locus à me lectus in memoriam revocavit id, quod Observavi Anno 1699. in quodam Milite Scabie laborante per xvii. Menses; quæ Scabies crescente Luna ita crescebat; ut præter naturam intumescerent manus, genua, & pedes, motum progressivum impedirent, adeò ut spatio trium, vel quatuor dierum in lecto decumbere Miles cogeretur, quovis mense primo scilicet novæ Lunæ tempore; Pariter mihi narravit Vir fide dignus, se vidisse Clericum Regularem, qui in principio cujusvis Lunæ, sævo dentium dolore afficiebatur spatio duorum dierum perdurante; dentes autem bonæ erant qualitatæ.

OBSERVATIO CLXXVII.

Ex Miscellan. Natur. Curios. Dec. III. Ann. IX. & X. Obs. 206.

De Urina Frigida in Febre Maligna.

URinam frigidam emissam à Muliere febricitante observavit Excellentissimus Bernhardinus Tombinus, quemadmodum legitur in Actis Philoexoticorum Brixia num. xxx. Ego autem Anno 1703. testor, Militem quendam febre maligna correptum me vidisse, quæ eum ad deliria & convulsiones usque deduxit, is verò, quod admirabile fuit, urinam frigidam emittebat, quò viso, subsequen-

turæ

turæ mortis indicium pronuntiare non dubitavi; quod etiam evenit; nam die morbi septima æger extremo cessit Fato.

OBSERVATIO CLXXVIII.

Ex Miscellan. Natur. Curiosor. Decur. III. Ann. IX. & X. Obs. 207.

De Diabete solo Aquæ ferratæ usu curato.

PAuperculus quidam, ætatis annorum XLI. temperiei biliosæ, urinæ detinebatur profluvio; ita ut uno tantum die triginta libras urinæ redderet, hinc sitis intolerabilis orta est, ita ut quavis nocte plusquam libras novem aquæ communis ebiberet; Ego in consilium vocatus, *aquam ferratam* potandam, pro remedio propono; alia enim pharmaceutica remedia potentiora paupertas Ægroti non permittebat; & hoc solo auxilio brevi convaluit; nuncque sanus vivit; Pariter recordor Anno 1701. Mense Julii *aquæ ferratæ* usu Religiosum quendam Me curasse ab immani Dysenteria, ac Mulierculam Anno 1702. nimio mensium fluxu laborantem hoc eodem præsidio sanatam me vidisse memini; hanc *aquam ferratam* in curatione Diabetis laudat Lazar. Riverius in *Prax. Medic.*

OBSERVATIO CLXXIX.

Ex Miscellan. Natur. Curiosor. Decur. III. Ann. IX. & X. Obs. 208.

De Febri tertiana simplici, cum surditate symptomatrica.

ADolefcens Nobilis tertiana Febri corripitur hoc Anno 1704. Mense Junii; & cùm incepit rigor ac vomitus, surditas pariter aggreffitur, crescente Febri augetur ita, ut in paroxysmi febrilis augmento nec campanarum sonitum, nec tympanorum strepitum, neque tubarum clangores audiat; Ast declinante febre,

paulatim cessat surditas, & sensim auditum recuperat; cessante autem omninò tertiana, omninò pariter surditas evanescit.

OBSERVATIO CLXXX.

Ex Ephemerid. Curios. Cent. I. & II. Obs. 39.

De Verminoso Abdominis Tumore.

A Dolescens Annorum xiv. post dolores circa umbilicum in Abdomine internè subortos, febre continua quatuordecim diebus laboravit; hinc apparuit quidam tumor mollis distans ab umbilico ad tres digitos in parte dextrâ, & hoc in abscessum mutato, absque ullo Chirurgico auxilio, sanies in magnâ effluxit quantitate & copiâ: hinc post aliquot dies Vermes plures teretes viventes exiêre mediocris magnitudinis; Abscessus verò post eruptionem, quamvis validiora ac præstantiora per Expertissimum Chirurgiæ Professore ad curationem vocatum, remedia adhibita fuerint, ne-tiquam tamen ad perfectum statum salutis restitui ac redigi potuit; quia materies ichorosa, & putrida assidue emanebat, ex quo magna ac summa emaciatio supervenit, cum virium jactura; unde tandem miserè ex hac vita in æternam migravit Patiens. Aperto post obitum Cadavere, statim sublatum fuit dubium de loco, ubi lumbrici memorati fuerunt producti; fuit enim notatus, & diligenter observatus canaliculus quidam membranofus calami scriptorii magnitudinem, & latitudinem quatuor digitorum adæquans, ducens originem à tunicâ internâ Intestini Ileï usque ad Peritonæum protensus, per quem vermes ab Intestino transibant, & per abscessum apertum exitum sibimetipsis parabant; Ex hac observatione confirmatur opinio illorum Doctorum, qui dicunt in nostro Corpore Humano de facili posse produci diversas concretiones, membranofas nimirum, carneas & novos ductus, & receptacula juxta nostri corporis indigentiam pro variis usibus exequendis.

OBSERVATIO CLXXXI.

Ex Ephemerid. Curios. Cent. I. & II. Obs. 40.

De Puella nata cum Variolis.

NArrat Clariff. D. *Franciscus Mauriceau*, Chirurgus Parisinus, in suo *Tract. de morbis Gravidarum & Puerperarum Lib. 1. cap. 2.* se ortum fuisse Variolis affectum, quod licet rarissimum sit, attamen aliquando accidit, ut Ego observavi ter in praxi meâ; & præcipuè Anno elapso 1705. mense Octobris die quarto in Puella, quam octimestrem peperit Uxor cujusdam Fabri ferrarii Ferrariensis, morbo acuto detenta, quæ scilicet filiola in auras vitales edita comparuit toto corpore variolis fœdato, magna & Matris & Parentum admiratione; mortua autem est hæc Puella tertio à nativitate die.

OBSERVATIO CLXXXII.

Ex Ephemerid. Curios. Cent. I. & II. Obs. 41.

De Menstruis Vomitu evacuatis.

HIstorias Vomitus Sanguinis Menstrui varias legimus, quibus sequentem addere mihi nunc liceat. Anno 1700. Mense Junii vocatus fui ad visendam Filiam cujusdam Mercatoris nostri Ferrariensis Annorum xxiv. quæ à tribus mensibus suppressionem Menstruorum passa, petebat auxilium; purgato corpore, & bis misso è vena pedis sanguine, Vomitu sanguinis tentatur per vices repetente, ita ut intra quatuor dierum spatium libras penè quatuor cruoris evomuerit; Iterum Mensibus sequentibus per vomitum catamenia fluxère; donec tandem meo consilio Conjux facta, ac brevi gravida non amplius talem vomitionem est experta; nunc sana vivit, & plurium filiorum est parens; similes casus videat curiosus Lector in

Miscel-

Miscellan. Acad. Nat. Curios. Ann. 4. & 5. Decur. 1. pag. 63. Ann. 6. & 7. ejusd. Decur. pag. 83. Ann. 2. Dec. 11. pag. 251. & alibi & præsertim Apian. Clariss. D. Harderi obs. 22.

OBSERVATIO CLXXXIII.

Ex Ephemerid. Curios. Centur. I. & II. Obs. 42.

De Catameniorum fluxu non assueto tempore in variis Fœminis.

IN Praxi Medica facienda multas observavi Mulieres post quinquagesimum ætatis annum Menstruo fluxu ordinata periodo præditas, aliasque Puellas, quæ ante decimum ætatis annum Catamenia viderunt; Sic Famula quædam Monialium est hîc Ferrariæ septuagenaria, quæ quovis Mense fluxum patitur Menstruorum spatio quatuor dierum perdurantem; Pariter Uxorem cujusdam Judæi novi annorum LXIX. Menstruatam. Idem observavi in honestâ Viduâ annor. LXXII. & in quadam Rusticâ annor. LXVII. & in aliis multis annor. LV. & ultra; Vidi pariter filiolarum Sarcinatoris annorum quinque Catameniorum fluxum patientem; similiter filiam Civis cujusdam nostri annorum septem Menstruatam observavi; ac de alia quatuor tantum annorum idem notasse facta est mihi nuper Obstetrix fide digna.

OBSERVATIO CLXXXIV.

Ex Ephemerid. Curios. Cent. I. & II. Obs. 43.

De Acicula deglutita cum Urina excreta.

Puer quidam annorum quatuor, Filius Fabri lignarii Ferrariensis, invenit humi jacentem aciculam in quodam cubiculo, eamque deglutivit; Desperati Parentes me in consilium vocant, statimque jussi, ut pastam triticeam cum butyro coctam, aliaque oleosa & pingua

guia exhiberent, ut sic inviscata acus deglutita sine noxâ per alvum expurgaretur; quare sub vesperam *Conservæ Rosarum & Cassiæ recens extractæ, ana, 3. ij.* propinavi; Verùm natura, quæ sola vias nobis incognitas adhuc in corpore humano cognoscit, ac statò tempore aperit, per vias Urinæ aciculam sine ulla Puelli noxa dimisit magna Parentum admiratione, & hoc secunda die à deglutitione acus. Similia exempla rerum scilicet deglutitarum, per insolitas vias è corpore humano ejectarum, passim leguntur apud nostros Autores & præsertim apud *Joh. Schenckium lib. 3. Fabricium Hildanum, Alexand. Benedictum, Langium, Helmontium, Christ. Frid. Garmannum, Diemerbroeck;* & alios tam Antiquos, quàm Recentiores.

OBSERVATIO CLXXXV.

Ex Ephemerid. Curios. Centur. I. & II. Obs. 61.

De Angina ex retentione muci Narium.

DE Colico dolore cujusdam Mercatoris, à retentione mucositatis narium orto meminit jam *Clarissimus Dominus Joh. de Muralto, Vir omni eruditionis genere instructus; in Miscell. Academ. Natur. Curiosor. Decur. II. Ann. 8. Observ. 13.* Et Ego Anno 1701. mense Februario observavi Monachum quendam, qui magno fluxu muci per Nares cum capitis gravedine afficiebatur; quo repente suppresso, incidit in Anginam; ut nihil omninò deglutire posset; ast sectis sub linguâ venis, & sanguine ad libram unam extracto, brevi dierum duorum spatio sanatus est; & quod notatu dignum fuit, cùm convalescere incepit, muci etiam fluxus per nares rediit; & sic quod fuit causa morbi, extitit & causa salutis.

OBSERVATIO CLXXXVI.

Ex Ephemerid. Curios. Centur. I. & II. Obs. 62.

De Mania in Puero Castratione curata.

PUellus maniacus Annorum septem, plura expertus remedia incassum, tandem Castratus convaluit; quæ observatio convenit cum *Observ. 32. Samuelis Formii Riverio* communicata, de Adolescente Maniaco, ad cujus curationem potentissima usurpata fuerant remedia, ita ut ventum fuerit ad *Antimonii* usum, ad *Trepanum*, & ad *Arteriotomiam* temporum, at cum omnia illa nihil conferrent, ad *Castrationem* deventum est, qua instituta remissa fuere omnia symptomata, & furor omnino cessavit, manente tantummodo Delirio Melancholico, ita ut Mania in Melancholiam versa fuerit; quod tamen in meo casu non accidit, nam nunc sanus omnino vivit.

OBSERVATIO CLXXXVII.

Ex Ephemerid. Curios. Cent. I. & II. Obs. 63.

De Alvi fluxu periodico.

PUellus quidam Ferrariensis ætatis annorum novem, Anno quarto Dysenteria laboravit, à qua difficulter liberatus est; post quam affectionem, quovis mense, crescente Lunâ, diarrhœa tentatur per duos, tresve dies; & hoc symptoma à quarto anno, usque ad nonum, qui præsens est, continuat; multa tentata præsidia, sed omnia frustranea fuerunt.

OBSERVATIO CLXXXVIII.

Ex Ephemerid. Curios. Centur. I. & II. Obs. 64.

De Ulcere ex Vespæ punctura.

Rustica quædam Fœmina à Vespâ puncturam in facie sub oculo dextro passa est, ex qua protinus natus est dolor, & inflammatio; quæ non cessavit, nisi per abscessum, quo rupto ortum est ulcus, quod difficulter sanatum est, & nonnisi trium mensium spatio; similem, imò peioris eventus historiam, Me legisse recorder in *Centur. 4. Observ. Chirurg. Guil. Fabricii Hildani n. 78.*

OBSERVATIO CLXXXIX.

Ex Ephemerid. Curiosor. Centur. I. & II. Obs. 65.

De Morte ex suppresso sudore.

Sudores aliquid venenosi intra se continere credidit, non sine aliqua probabilitate Illustris Anatomicus *Daniel Tawry in suâ novâ Anatom. part. 2. cap. 10.*; liberant enim à doloribus arthriticis, qui nonnisi à salibus acerrimis oriri possunt, liberant à peste; ac insensibilis transpirationis interruptio Febres putridas, ac malignas producit, quæ omnia non possunt contingere, nisi sudores valdè corrosivum quid continerent; Hoc autem apparuit maximè mense Octobri Anni 1704. in quodam Hortulano alioquin sano, ætatis annorum xxxiiii. qui ex suppressione consueti sudoris incidit in febrem malignam tantæ ac talis acutiei, ut quatuor dierum spatio mortuus sit, frustra tentatis alexipharmacis, sanguinis missione per cucurbitulas scarificatas, aliisque remediis, quæ Ars Medica, & temporis brevitās subministrare poterant. Recordor etiam Mercatoris, qui à suppresso sudore in Ophthalmiam contumacem incidit, & ab hac tandem in cœcitatem, sine ullâ spe visionem

recuperandi: Colligere hinc liceat quantæ necessitatis sit sudoris excretio, & è contrâ quantum damnum afferat hominibus ejusdem suppressio.

OBSERVATIO CX.C.

Ex Ephemerid. Curiosor. Centur. I. & II. Obs. 66.

De Calculo in dextrâ Maxillâ.

CIVIS quidam Mantuanus toto juventutis suæ tempore Calculo vesicæ laboravit, adeò ut quinquagesimo ætatis suæ Anno lithotomiam passus sit, & ex ejus vesicâ calculus magnitudine ovi columbini extractus fuerit: postmodum verò in dextrâ maxillâ dolorem sentire cœpit, cum tumore in mandibulâ exteriùs apparente, quo aperto, extractus fuit lapillus granum fabæ æmulans, durus, ac rotundus inæqualiter; Similem casum Lector curiosus videre potest in *Act. Philexoticor. Nat. & Art. Brixia Mens. Junii N. 32. pag. 83.*

OBSERVATIO CXCI.

Ex Ephemeridi. Curiosor. Cent. I. & II. Obs. 67.

De ingenti ac subita Mammarum inflatione.

CURIOSUM valdè fuit symptoma, quod accidit Anno 1704. cui-dam Fœminæ honestæ ætatis annorum XXIX. hæc enim bona fruebatur valetudine, & naturali catameniorum fluxu tentabatur, quo tempore sibi pedes abluit, & illicò menses steterê, ac tumor & dolor in Mammis ortus est, nocte verò, ad tantam magnitudinem ubera pervenêre, ut surgere nec è cubili, nec se movere potuerit; donec bis phlebotomiam passa in utroque pede, sic intrâ triduum sana facta est, & Mammæ ad naturalem statum rediêre; Historiam au-

OBSERV. MEDIC. *Observ. CXCI.* 489
autem penè similem Me legisse recordor in *Ast. Philosoph. Angl.*
Oldemburgi Ann. 1669. mens. Octobr. observ. 3.

OBSERVATIO CXCH.

Ex Ephemeridib. Curios. Cent. I. & II. Obs. 63.

De Febre periodica lunari.

R Aram Febrem Anno 1706. observavi in quadam formosissima Juvene annorum XXI., virgine, & boni corporis habitûs; hæc primò passa mensium suppressionem, postea in febrem incidit cum rigore, ac vomitu incipientem, atque in sudorem terminantem spatio horarum decem, quæ febris prima Lunæ quadra redibat, postea in Plenilunio, tandemque in ultima quadra; & ita perseveravit per tres menses, quibus elapsis sponte febris cessavit; & catameniorum fluxus iterùm advenit.

OBSERVATIO CXCIH.

Ex Ephemeridib. Curios. Cent. I. & II. Obs. 181.

De Hydropæ Sanato.

A Rtificem quendam nostrum Hydropicum, ætatis XLIV. annorum curandum habui, cui venter in tantam excreverat molem, ut indies ruptus videretur, & æger pro deplorato haberetur; qui tamen, Deo adjuvante, solo *diureticorum* usu à Me sanatus fuit; sumebat enim quotidie libram unam *Aquæ Ononidis* cum ʒj. *Spiritus Salis dulcis*, inde *Aquam Villensem cum succo Limoniorum*; & sic apertis urinæ viis, profusa per vesicam incredibili lymphæ copia, convaluit. Aliusque Medicus, fide dignus, amicus meus, retulit, se Puellam asciticam curasse ope *succi herbæ Cochleariæ* ad unciam unam; quovis mane exhibiti, jejuno stomacho, cui additæ fuerunt guttæ novem *Spiritus Chalcanti*, unde copiosæ urinæ red-

ditæ sunt, Similem casum etiam notavi in *Miscell. Cur. Dec. III.*
ann. 4. obs. 74.

OBSERVATIO CX CIV.

Ex Ephemeridib. Curios. Cent. I. & II. Obs. 182.

De subita Morte ex percussione regionis Ventriculi.

Percussam cum impetu Stomachi regionem Mortem subitam inferre, docet D. *Dominicus Mistichellus* in suo tractatu de *Apoplexia lib. 1. cap. 6.* quod Anno 1709. verificatum notavi in adolescente Filio cujusdam Militis nostri, qui postquam in terram procidit, atque Stomachi regionem super saxum magna violentia percussit statim mortuus est,

OBSERVATIO CX CV.

Ex Ephemeridib. Curios. Cent. I. & II. Obs. 183.

De vi admiranda Digestionis in quodam Bajulo.

Fermentum Ventriculi digestivum miram vim habere ostendit Ill. D. *Anton. Vallisnerius*, Prof. P. Patavinus in eruditissimo suo opere de corporis humani vermibus pag. 20. Liceat mihi notare, quod in Bajulo quodam observavi. Hic annorum ætatis xxxix. robusti temperamenti, carnes & pisces licet crudos sine nausea comedit, ova cum testis suis, vitrum, carbones, funes, corium, ossa animalium fracta tamen prius malleo, fœnum; herbas quasunque crudas, & ligna. Ast elapsa hebdomada audiivi à Rev. Sacerdote, ipsum post comestionem non exiguæ quantitatis calcis domi suæ, supra montes Veronenses positæ, ex dolore Iliaco mortuum esse.

OBSERVATIO CXCVI.

Ex Ephemeridib. Curios. Centur. III. & IV. Obs. 21:

De viribus Aquæ vitæ.

Aquæ ardentis usum etiam antiquis temporibus in Medicinâ locum habuisse, testatur Jo. Mich. Savonarola in libro de ea conscripto. Ejusdem usum Ego quoque pluries feliciter expertus sum. Ad ulcera optimam esse observavi; & enim sine tanto unguentorum apparatu, sola impositione spiritus vini & mundificatio & incarnatio successit. Ita simplices contusiones eâdem curatas non semel vidi. Vulnus ea curatum in milite notavi in *Misc. Nat. Cur. Dec. II. Ann. 10. Obs. 134.* Hæmorrhagiam contumacem ab evulso dente molari in quodam Rustico sola ea cohibui. Scabiem curatam sola, sed frequenti, lotionne cum aqua vitæ, Anno 1711. in quadam Adolescentula ab omnibus unguentis abhorrente deprehendi. Vomitum in Muliere gravida immanem usu Spiritus vini extra & intra per plures dies adhibiti compescui. Famulus quidam erysipelate phlegmonode in dextra manu laborans meo consilio eum parti affectæ apposuit, unde dolor ac inflammatio cessavit. A. 1710 tumores quidam genarum cum dolore dentium populariter grassati sunt, quos feliciter curavi internas oris partes sæpè cum eo eluendo, unde salivatio suborta morbum fugavit. Honestæ quædam Fœmina annor. XL. hinc inde in coxis, brachiis, utroque cubito & dorso maculas habebat elevatas, rubras, asperas & serpentes, atque de novo subinde erumpentes, quam prius purgato corpore, & sola frequenti lotionne aquæ vitæ sanavi. Impetiginem in facie & collo, sola hac, in qua tartarus fuerat solutus, apposita bis sanatam vidi. Vir quinquagenarius molesto hæmorrhoidum dolore conflictatus cum modica inflammatione, adhibito cataplasmate ex Cæpa cocta & aqua vitæ parato, intra biduum sanus evasit.

OBSERVATIO CXCVII.

Ex Ephemeridib. Curios. Cent. III. & IV. Obs. 59.

Urina Verminosa.

JUvenis cum per concubitum venereum gonorrhœam virulentam contraxisset, non sine summo ardore urinæ, post triginta dies sanguinem purum mingebat, inde purulentam urinam excernebat, quæ diligenter observata multos vivos Vermiculos, quales in aceto notantur, exhibebat per lotium natantes; quod ad plures dies continuabat, donec per multum tempus assumpto *Sal-separillæ decocto* perfectè convaluit. Similes casus urinæ verminosæ *Cl. D. Ros. Lentilius, Medicus Stutgardiensis Doctitissimus, in Parall. ad Dec. 1. Ann. 8. obs. 11. Miscellan. Acad. Natur. Curiosor. recenset: Vide etiam Zodiac. Med. Gall. Ann. 1. Mens. April. Obs. 2.*

OBSERVATIO CXCVIII.

Ex Ephemeridib. Curios. Cent. III. & IV. Obs. 60.

Arteriotomia.

ARteriotomiam non tam periculosam esse, qualem olim ob metum aneurismatis crediderunt, Neoterici contendunt, imò *Cl. Paulus Barbette*, postquam docuit modum, quo hæc operatio ritè instituitur, addit, hanc optimum esse præsidium in Cephalæa, Mania, Epilepsia, & Oculorum affectibus; idemque comprobatur *in suis Act. Med. præstantissimus Thom. Bartholinus ann. 1671. num. 4.* Et Ego testor, pluries hanc operationem feliciter cessisse.

Sic in Muliere quadragenaria sævo Oculorum dolore affecta, secta temporali Arteria à Chirurgo experientissimo *Dominic. Ferreto*

reto in Xenodochio S. Mariæ novellæ Ferrariensi meæ curæ commisso, melius se habere incepit. Pariter Anno 1705. dum Laurentum petebam, in Romandiola Rusticum Maniacum ope arteriotomiæ sanitati restitutum vidi. Adolescentem Epilepticum, Pistoris cujusdam Tridentini filium, annorum tredecim post Arteriotomiam in utroque tempore institutam, sanatum fuisse observavit Parochus fide dignus. Honestæ Fœmina ætatis annorum xxxix. per multos dies affligebatur gravissimo Capitis dolore circa frontem & supercilia, qui singulis propemodum horis recurrebat, tam acutus, ut sibi Caput cultello aperiri semidelirans optaret, & si quis cubiculum ingrediebatur, clavum sibi Cerebro infigi videretur; sola verò Arteriotomia in utroque tempore celebrata, sana evasit. Denique in pertinaci Ophthalmia ter in praxi mea feliciter sum usus tali Chirurgico præsidio in utroque sexu, & præsertim Anno 1711. mense Maji in Puella post Variolas Ophthalmia pertinaci laborante.

OBSERVATIO CXCIIX.

Ex Ephemeridib. Curios. Cent. III. & IV. Obs. 61.

Maligna Febris Dentium casu finita.

HEmerodromus quidam Anno 1710. annorum ætatis suæ xxvi. Febri acuta & maligna correptus fuit, cum pessimis symptomatibus, quæ, licet septimâ viderentur sopita, undecimâ die rursus invalescebant; aderat Phrenitis, Convulsio, Vomitus, Alvi fluxus, cum Singultu ac Syncope; tandem parotides apparuere, quibus suppuratis mitiora facta sunt symptomata; & Febris die vigesima cessavit, Dentes verò unus post alium sponte, capilli etiam intra triduum à cute capitis separati, sponte pariter ceciderunt.

OBSERVATIO CC.

Ex Ephemeridib. Curios. Cent. III. & IV. Obs. 62.

Quædam rara in Anatome reperta.

IN Cranio cujusdam Militis Anno 1709. mense Januarii Pleuritide extincti, observavi defuisse Suturam rectam; idemque Ann. 1689. in Cranio Mulieris, febri maligna defunctæ, me deprehendisse recordor.

In Surdo à nativitate, forti Apoplexia occiso, Tympani membranam crassiolem ac densiorem notavi Ann. 1690. die 30. Januarii.

In tribus Asthmate denatis sequentia observavi; in primo Adolescente annorum XIX. totam Pulmonum substantiam fero plenam; in secundo quadragenario, lapillos in dextro Pulmonis lobo; in tertio autem, qui fuerat Faber ferrarius, reperta est vomica in sinistra Pulmonis parte.

In Corpore Canis venatici, ut ductum Pecquetianum meis ostenderem discipulis, vivi aperti unicum tantum Renem offendit.

In Phthisico Ann. 1697. extincto totum succum felleum fa-xeum reperi, secta enim cystide, Calculus pyriformis viridis coloris extractus est, quem conservavi usque in mensem Novembrem, qui Euro spirante, in viridem liquorem sponte est dissolutus.

Lienem rotundæ figuræ, substantiæ alioquin sanæ, observavi in Cadavere servi cujusdam Pleuritide extincti Ann. 1709. mense Januarii; simile quid legitur in *Th. Bartholini Cent. 1.*

Anno 1710. in Lepore videre mihi licuit tres Renes, duos nimirum in dextra parte, minores tamen; unum autem in sinistra justæ molis, omnes bonæ constitutionis; retulitque mihi Chirurgus quidam, se vidisse pariter in vacca duos Lienes realiter inter se distinctos & separatos, sanæ tamen substantiæ.

OBSERV.

OBSERVATIO CCI.

Ex Ephemeridib. Curios. Cent. III. & IV. Obs. 68.

De Morbis Lanionum.

OMnem laudem meretur egregium opus Clarissimi Domini *Ramazzini*, Professoris P. Patavini, de morbis *Artificum*: eruditè enim ibi morbosas eorum affectiones descriptas habet curiosus Lector. Verùm quia de Lanionum morbis verba vix facit, ideò inpræsentiarum mihi liceat aliquid à me notatum exponere. Lanus igitur, sive Lanio, & Macellarius, ille turpis est artifex, qui carnes in carnario vendit, sicque dicitur, quod animalia concidat & laniet, ut ait *Calvinus in Lexic. Jurid.* Lanistæ verò a laniandis corporibus sic dicuntur, & à Laniis differunt, quoniam isti modò apud Auctores carnifices sunt, modò Præfecti ludi gladiatorii, qui gladiatoribus dictata dabant modumque pugnandi edocebant; ut testantur *Hildebrand. in Antiq. Roman.* *Beroaldus in Sueton.* & *Laurentius in Polymath. lib. I.* Corporum autem Lanionum à Me pluries facta observatione, notavi, pravis semper succis infecta esse, vel ob pravum vivendi modum, vel ob exhalationes cadaverinas, à mactatis animalibus evaporantes, quæ in Lanii corpus introductæ fermenta, humores ac spiritus inquinare valent; unde cachexiæ sæpè oriuntur, & foedo colore tinguntur Laniones, cum obstructionibus, & aliquandò præternaturali salivatione, ac Scorbuto. Sic duos à Cachexia in Hydropem incidisse observavi: multos Ictericia pertinaci affectos: sæpè, uti ipsi mihi fassi sunt, Vertigine corripuntur, atque pedum intumescencia; quatenus scilicet foetidi halitus Capitibus internas partes lædunt, animalesque spiritus fugant, & in gyrum veluti agitant; nec non assiduè manendo in sordidis liquoribus pedes malè afficiuntur, atque ob ingressum illarum pessimarum particularum inflantur ac tument; Vomitu etiam ac Nausea sæpè tentantur, & præsertim cùm artis prima rudimenta suscipiunt; foetidum etiam odorem semper exhalant: particulæ enim à sordibus

& carnibus maceratorum animalium elevatæ, in vestium porositates, ac etiam cutis ipsius corporis introductæ, semper a suo sulphure nauseosos emittunt halitus. Præterea quoniam pondera magna, & frequenter deportant, in altum extollunt, atque huc & illuc trahunt, ut sunt boum, vaccarum, vitulorum &c. cadavera, hinc est, quod etiam sæpè morbis obnoxii fiant, qui Bajulos afficere solent, ut sunt ruptura vasorum in pectore, Hernia, Gibbositas, & Varix: primus, dum spiritum continere eis est necesse, unde vasa Sanguinea nimis distenta facillè rumpuntur; secundus, quia spiritum cohibendo facillè Peritonæum relaxatur; tertius, quoniam temporis progressu, vertebriis ad anteriora inflexis, habitum contrahunt in tali figura & situ; quartus demum accidit, dum contingit dilatatio venarum in valvulis, ex motu sanguinis ad superiora retardato, ob musculos crurum nimis distentos, ut ait laudatus *Ramazzinus* l. c. cap. 37. Idem etiam dicendum de Cœliopolis, vulgo Trippari, nempe illis, qui Intestina animalium purgant ac vendunt, iisdem enim morbis tentantur, atque majora patiuntur symptomata ac Laniones, & præsertim in vitio crurum ac pedum, & hoc ob assiduam atque copiosam aquarum putridarum illuviem, in qua semper versantur. Addendum etiam, quod isti ut plurimum sebaceas candelas conficiunt, ex qua operatione dolores Capitis, Vertigines, Oculorum rubor, & difficilis Respiratio oriuntur, prout legere licet ex *Olao Borrichio* in *observ.* 86. *Volum. V. Act. med. Hafn.* imo auctore eodem *Ramazzino*, iidem perpetua Inappetentia, & Nausea tentantur; & fœminæ penes eorum officinas habitantes uterinis passionibus afficiuntur, *vid. cap. 16. de Morb. Artif.* Curiosam refert historiam *Bierlingius* in *Miscell. Curios. Dec. I. Ann. 2. Obs. 207.* de Lanione mucronem cultri abhorrente, ita ut si Suem jugulare vellet cultro acie prædito, linteolum involveret, clausisque oculis isti animali jugulum incideret; hic tamen casus, potius ad antipathiam, quam ad morbum est referendus. Hucusque de morbis corporis, nunc pauca de moribus addere liceat, desumpta ab auctoritate *Martialis* in *Epigr.* 67. *lib. 11.*

Et delator es, & calumniator,
Et fraudator es, & negotiator.

Et fallator es, & Lanista, miror.

Quare non habes, Vacerra, nummos.

Quibus vitiis Laniones abundare solent, ut interpretatur *Dominic. Macrus in suo Hierolexico*: pro Lanista enim Lanium intelligit, qui lanienam, artem scilicet turpem in macello exercet. Laniones ergo ut plurimum malis moribus induti sunt, unde ebrii, blasphemii, luxuriosi, ac de facili homicidæ evadunt, sine pietate, petulantes, ac sordidi fures: rarò enim in pondere justam emptoribus mensuram porrigunt; unde sæpè hic Ferrariæ à Tribunalibus vexantur, & in carceribus detenti pœnas luunt.

OBSERVATIO CCII.

Ex Ephemeridib. Curios. Cent. III. & IV. Obs. 151.

De Variis observatis in Boum contagio.

ANnis 1713. & 1714. in nostro Ferrariensi Ducatu Lues contagiosa Boum adeò exarsit, ut ultimum istorum animalium excidium minaretur; maximum erat damnum, maximus erat timor, ne ab hac animalium specie in alias animalium & hominum species transfret; memores illius *Titi Livii in lib. 41.* nempe *Consulibus eo difficilior erat, quod pestilentia, quæ priore anno in Boves ingruerat, eo verterat in hominum morbos &c.* Correpti enim Boves cibum respuebant, aures subito collapsæ procidebant, pili erigebantur, tremor penè universalis aderat, oculi lachrymabant, per nares multa lymphæ copia exibat, alvus solvebatur, & in aliquibus pustulæ sub cute prodibant, ita ut crederent aliqui, Variolis Boves ipsos affici, tandemque brevi septem dierum spatio, magno cum cruciatu, ut ex mugitu apparebat, moriebantur. Hanc esse febrem malignam contagiosam, semper sum arbitratus, quia uno affecto, statim cæteri afficiebantur, & uno mortuo, ferè omnes peribant. Et non tantum esse malignam, sed ardentem, manifestum esse ait *Clariss. D. Nigris solus noster*, quia patiuntur Bo-

ves affecti intensum calorem, exhalando à naribus & ore halitum similem igni; ut fatentur Mulo-medici, qui manum immissam sustinere haud potuère: præterquam quod Boves affecti semper potarent, potarent nunquam ad satietatem; causa igitur istius febris immediata est motus fermentativus præternaturalis humorum, ortus à particulis salino-acribus arsenicalibus, quæ in massam sanguinis derivatæ ipsius compagem alterant primò, inde solvunt; undè oritur Febris maligna, contagiosa à dissolutione, & per consequens mortalissima, vel curatu difficillima.

In horum cadaverum sectione, viscera reperta sunt sana, præterquam quod in aliquibus Omasum vidi penè sphacelatum. Nonnulli Rustici Boum mortuorum ex hac contagione carnes comederunt absque nocumento. Aliqui ex Medicis credidère, particulas illas salino-acres arsenicales cum aëre permixtas ingredi corpus horum Animalium; Alii ex pravo alimento derivatas putarunt; Multi ex humida, ac pluviosa tempestate ortas esse dixère; nonnullis placuit corporum cœlestium influxum de hac pestilentia accusare. Ego autem puto, ex inundationibus, & intemperiebus elapsis, terram malè fuisse dispositam, ac ut ita dicam, ægrotantem, unde ex ea vapores maligni arsenicales elevati, in Bovesque introducti febrem hanc pessimam excitarunt, quod suis temporibus etiam evenisse scribit *Ammianus Marcellinus* his verbis; *affirmant alii terrarum halitu densiore crassatum, aëra emittendis corporum spiraminibus resistantem, necare nonnullos, qua causa animalia præter homines cætera, jugiter prona Homero auctore, & experimentis deinceps multis cum tales incessunt labe, ante novimus interire.* (*Histor. lib. 19. §. 3.*) Multa fuère experta remedia, omnia verò incassum. *Antimonium crudum cum Nitro ac Sulphure* exhibebant aliqui; *Theriacam, Oleum contra Pestem nostrum, Contraiervam, Absinthium, & Terram sigillatam*, multi *Farinam hordei, Camphoram, Spiritum Vini, Scordium, Cornu Cervi* & similia pluries repetita; *Venæsectio* etiam & *Setacea* frustranea fuère. Ego semper judicavi inutilia fore multa, & exotica experiri remedia; undè *Seneca* ait, *medicinam herbarum scientiam esse*: suadebam igitur usum *Graminis, Sonchi, Cichorei, Cardui sancti, & Scorzonerae* in decoctis exhibendis. Quæri posset, cur istæ particulæ falsæ & acres arsenicales solum sunt

sunt Bovinæ speciei infensæ & cur hæc pestis solum per contactum talia inficiat animalia? cui responderet Hippocrâtes: *differre corpus à corpore, naturam à natura, nutrimentum à nutrimento.* Unde Lucretius cecinit.

Propter dissimilem naturam, dissimilesque

Texturas inter sese, primasque figuras.

Utinam interim tale flagellum se sistat, ac nocendi finem imponat, ne perveniat

——— *ad miseros damno graviore Colonos*

Pestis, & in nostræ dominetur mœnibus urbis.

OBSERVATIO CCIII.

Ex Ephemeridib. Curios. Cent. III. & IV. Obs. 152.

De Strabismo ex terrore.

Adolescentula annorum ætatis quatuordecim cùm mense Augusto Ann. 1713. ruri esset, & sola penes arborem decumberet, vidit per herbas adrepentem anguem sibi vicinum, unde tanto terrore est correpta, ut senserit

Metu riguisse capillos,

Et gelidum subito frigore pectus erat.

Ut verbis utar Poëtæ, subito sic terrore perfusa, surgere volebat, non tamen, uti nec clamare poterat, sicque *obstupuit, steteruntque comæ, vox faucibus hæsit.* Ex hoc autem valido terrore Strabismo fuit affecta in utroque oculo, convulsione nempe musculorum oculos moventium, quæ adhuc perdurat. Confer exempla Amentię & Epilepsiæ ex terrore in *Miscellan. Acad. nostræ Curios. Dec. III. Ann. 9. Obs. 57. & 67.*

OBSERVATIO CCIV.

Ex Ephemeridib. Curiosor. Cent. III. & IV. Obs. 153.

De Ufu aquæ Villensis cum cibo.

A *Quæ Villensis* usum cum cibo nuper in erudita lectione descripsit, ac publici juris fecit *Clariss. D. Matth. Regali*. Quæ mihi circa hoc observare contigit, candidè proferam. Calculosus quidam Hetruscus à pluribus annis doloribus Nephriticis vexabatur, qui sæpè usque ad orci fauces illum urgebant; tandem à vino prorsus abstinuit, atque pro potu per Mensem *Aquam Villensem* cum cibis potavit, & hoc remedio per duos Annos immunis à Nephritide evasit. Atque Sacerdotem etiam vidi quadragenarium, qui usu *aquæ hujus* cum cibo se liberavit à frequenti Urinæ suppressione, quod remedii genus à quodam Monacho Cisterciensi, olim Medicinæ Doctore se didicisse mihi retulit.

OBSERVATIO CCV.

Ex Ephemeridib. Curios. Cent. III. & IV. Obs. 154.

De dolore Capitis periodico in Narium hæmorrhagiam terminante.

VIduam Ferrariensem, xxxiii. annorum Mariti mortem lachrymis acriter prosequentem, & quam præ dolore menstrua defecerant, novi; quæ in plenilunio quovis mense dolore Capitis sævo afficitur, qui tamen superveniente Narium hæmorrhagia ad plures uncias iterum cessat. Similiter Anno 1709. Juvenem Centensem observavi, qui quovis mense Cephalæa cum vomitu lymphaticæ materiæ tentabatur, frustra multis propterea adhibitis medicamentis; qui tamen dolor superveniente sanguinis fluxu per Nares evanescebat, & aliquando tam largiter effusus est cruor, ut ferè

ferè ad mortem redactus fuerit Juvenis, fluxu tandem ope *pilularum Helvetii ex Alumine & sanguine Draconis conflatarum* suppresso.

OBSERVATIO CCVI.

Ex Ephemeridib. Curios. Cent. V. & VI. Obs. 39.

Epicarpium antifebrile.

Circa Amuletorum usum vanitatis & superstitionis multum occurrere, semper fui arbitratus; verum quia honestissima quædam Mulier Lucensis mihi candidè affirmavit, plures sequenti amuleto à Febre Tertianâ & Quartana febri liberatos fuisse, atque experimento factò hîc Ferrariæ in quodam Famulo Quartanario, & in Milite arcis nostræ, exitus feliciter cessit, ideo arcanum hoc, quo fœmina non paucam sibi comparavit pecuniam, in publicum profero: *℞. Thuris in lachrymas pulverisati, ʒ. ij. Croci optimi, gr. X. Salis communis, ʒ. ʒ. fuliginis. ʒ. X. Vitelli ovi recentis num. j.* Misce, Fiat Emplastrum pulsibus applicandum ante accessionem, nec removendum usque ad finem febris.

OBSERVATIO CCVII.

Ex Ephemeridib. Curios. Centur. V. & VI. Obs. 40.

De Hydrope esu Ceparum sanato.

Aductus ad Me fuit Rusticus quidam nostri Ferrariensis suburbii, annorum quadraginta, Asciticus, ventre in immensum fere tumente, pedibus item inflatis, reliquo verò corpore consumtus, umbilicus prominebat, & crura transsudabant. Consilium petiit, fassus, se præter *potum urinæ pueri* semel in die assumtum, aliud medicamen, ob paupertatem, non assumisse: itaque *Cepas* coctas & manducatas commendo; ipse etiam quotidie iis crudis &

coctis in cibo utebatur, atque pro potu *decoctum* etiam *Ceparum* assumebat : quo factum est, ut urinam copiosè emitteret; sicque per mensem continuans sanus evasit, & adhuc salvus vivit.

OBSERVATIO CCVIII.

Ex Ephemeridib. Curiosor. Cent. V. & VI. Obs. 41.

De Ictero notabili.

IN prægressa *Centuria tertia Miscell. nostr. Curios.* historia de Ictero singulari mihi in memoriam revocat sequentem : Civis quidam noster Ferrariensis, annorum XL. mediocris habitûs, cibis copiosis & potibus generosioribus liberè indulgens, pondus cum gravi dolore in dextro latere persensit, in cujus declinatione tota facies viridi colore usque ad guttur tincta, dextra pars corporis atro colore notabatur, sinistra verò flavescebat; ita ut notabile fuerit, tres diversos colores in uno Icterico comparuisse. Urina ejus modò Viridis, modò atra apparebat, & præsertim hæc, quæ noctu excernebatur, atrii coloris erat, quæ verò in die, viridis conspiciebatur. Purgato corpore, ex usu *Salis Absinthii* ad 3. j. per plures dies, colorum facta est mutatio, facies enim, quæ prius viridis erat, flava facta est, & pars dextra, quæ atrii coloris prius apparebat, flava evasit, læva autem atrum paulatim induit colorem, & ita post vigesimum diem color unus, flavus nempe factus est, qui usu *Syrupi Cichorei cum Rhabarbaro*, per plures dies, unà cum usu *Chinae Chinae* sensim evanuit.

OBSERVATIO CCIX.

Ex Ephemeridib. Curios. Cent. V. & VI. Obs. 42.

Experta in hæmorrhoidum dolore.

Religiosum novi, qui *balsamo sulphuris* in hoc affectu utitur; Fœminam, quæ *oleum ovorum*; Puellum, qui *adipem ranarum*; & piscatorem, qui *ceпам sub cineribus coctam* adhibent. Judæum quendam vidi, qui à longo tempore ab eo vexatus, post varia præsidia, tandem sequenti unguento sanatus est: *℞. Unguenti Rosati, Malvini, ana, ʒ. j. Mercurii crudi, ʒ. ij. Sulphuris vivi ʒ. j. Croci. Orientalis, gr. V. Misce in mortario plumbeo ꝑ. a.*

OBSERVATIO CCX.

Ex Ephemeridib. Curios. Cent. V. & VI. Obs. 71.

De Sudore colorato.

ALiquos apud Persas esse, scribit ex *Taverniero Illustr. D. Joh. Bapt. Bianchi in Hist. Hepat. part. 2. cap. 10. pag. 137.* qui aliqua viscerum indispositione detenti, verno tempore *decoctionem radice chinæ recentis* copiosè potant, hinc ad lectum compositi uberrimis sudoribus perfunduntur, atque sudorem flavum emittunt. Ego bis in praxi medica facienda sudores coloratos me vidisse recorder; primò Bajulus erat annorum ætatis xxxiiii. laborans maligna febre, cui circa undecimum diem delirium successit, cum motibus tremulis ac convulsivis; exhibito *pulvere Bezoar occidentalis cum aqua Cordiali Saxonie, Theriacali, & Scordii composita* in maximum sudorem incidit, qui ad decimam quartam diem us-

que perseveravit, cessantibus pravis symptomatibus, & accedente salute; notatum autem fuit, sudorem coloratum fuisse, ita ut subucula & sindones virides apparuerint. Secundò Meretrix quædam virulentia venerea affecta, cum nodis & ulceribus, ad *Decoctum Guajaci & Salsæparillæ* confugit; concitato sudore, hic apparuit odore foetidus, ac colore ater, ita ut totam penè cutem tinctam observaverimus unà cum indusio & linteis; & quod notabile insuper fuit, cùm ista linea supellex à sordibus mundanda ad lixivium traderetur, illicò tota disrupta, ac in minutas partes diffissa fuit, veluti ab aqua forti tacta fuisset. Pariter mihi narravit Chirurgus aliquis noster fide dignissimus, se vidisse olim Adolescentem febre ardente correptum non sine mortis periculo, cui undecima die sudores flavi copiosi acciderunt, ita ut Ictericus putaretur, & si aliquis ex Domesticis eum tangebatur, statim is flavo colore tingebatur; qui sudor ad plures dies perduravit, cessato autem eo, pariter cessavit & febris.

OBSERVATIO CCXI.

Ex Ephemeridib. Curios. Cent. V. & VI. Obs. 72.

De Vermibus in variis corporis partibus observatis.

Vermes in sanguine febris maligna correpti Anno 1702. clarissimè observavi, atque meis Discipulis ostendi; in ejusdem etiam urina Vermiculos rubri coloris, licet exiguos, non semel vidi; qui Æger nono morbi die frigido sudore perfusus obiit: ex ejus verò cadavere per nares duos Vermes atrii coloris vivos exeuntes se vidisse Famulus retulit. Post magnum auris dextræ pruritus atque dolorem in quodam Plebeio nonnullos Vermiculos flavos ab aure exeuntes vidi, quos sequuta est modica sanguinis portio guttatim exstillans. In ulcere auris antiquo Vermes exiguos in magna copia obortos fuisse, observavi Anno 1704. mense Junio

rio in quodam pauperculo, duro lienis tumore per plures annos laborante. Puellus novem annorum post Variolas ophthalmia dextri oculi contumaci adeò laborabat, ut de visu illius partis dubitaretur; in oculi laborantis angulo tumor apparuit, ex quo suppurato ac aperto, pauco cum pure exivit Vermis rubri coloris.

OBSERVATIO CCXII.

Ex Ephemeridib. Curios. Centur. V. & VI. Obs. 95.

Vermis per vomitum ejectus.

GRavissimè ex acuta & maligna febre laboraverat Vir quidam, Josephus de Rogerio dictus, quam subsecuta est non levior Dysenteria, ab utroque malo ope medicamentorum liberatus, tanta fame deinceps correptus est, ut unica die varii generis esculenta ingurgitaverit ferè ad libras 64. nec tamen exinde famescere desierit. Ad illam compescendam plurima adhibita fuère remedia, ex *amaris* potissimùm composita, ut acidum exorbitans, quod tantæ famis causa credebatur, infringeretur: ea verò in longum tempus assumpta & cum *aloë* commixta expulère tandem inopinato vermem adeò grandem & horribilem, ut serpentis formam ac magnitudinem referret, qui statim ab egestione vita privatus longitudinem suæ molis exhibuit palmorum xxviii. & ultra, atque ex parte supera pilosus apparuit; Æger autem sensim restauratus, liber à tam molesto vorandi desiderio factus, adhuc in vivis est.

OBSERVATIO CCXIII.

Ex Ephemeridib. Curios. Cent. V. & VI. Obs. 96.

Hydropica sanata.

Fœmina quædam consistentis ætatis, Aurelia de Angelo vocata, per annum & ultra diro Ascite vexata, cum nullis videret se profecisse medicamentis, vitæ ejusmodi pertæsa & veluti in desperationem ducta, ne sitis ardore, quem intolerabilem profitebatur, pereundum sibi foret, una die septem prægrandes aqueos ut vocant *Cucumeres* seu *Pepones* devoravit, nec his contenta, aquam ad plures calices largissimè potavit, adeò ut difficili mox & aucta respiratione pressa, absque pulsu, totoque corpore algida jam jam moritura videretur; & quidem funus ac inferias propinqui paraverant, operientes infaustum exitum proximè successurum; sed, en! cœpit inopinato tam affluenter urina per suos ductus erumpere, unà cum copiosissimo sudore, ut undique ubertim aquosus humor efflueret, idque ad dies plurimos; & sic tandem abdomen detumeret; tandem ingens juxta aures tumor obortus est de parotidum genere, eoque in suppurationem perducto ac curato, ipsa convaluit.

OBSERVATIO CCXIV.

Ex Ephemerid. Curios. Cent. V. & VI. in Append. pag. 10.

Constitutio Epidemica Ferrariensis; Anni 1715.

Postquam Annis proximè elapsis lues pessima Boves miserabiliter invasit, atque copiosissimi imbres tellurem inquinaverunt nostrum, totumque agrum Ferrariensem stagnantibus aquis pessimè vitiatum vidimus, ita ut semina futuræ messis pro majori parte perditæ

perdita fuerint, unde caritas, ac inopia anni 1715. surrexit; facta est etiam sanitatis jactura.

Martio mense vix inchoato, magnus Bufonum & Ranarum numerus observatus est, & crescente Vere innumerabilis Culicum, Vermium, Serpentum, Muscarum, Papilionum, Locustarum, Eru-carum, aliorumque Insectorum copia super terræ faciem apparuit, & liberum aëris campum occupavit, ex quo nonnulli multas ægritudines in humano genere prædixerunt; Verno etiam tempore adhuc currente maximi Solis æstus in Maii fine corpora nostra vexarunt, mox aura nebulosa & humida, dolorum Dentium, Capitis, & Rheumæ parens surrexit, quæ tamen brevi in multam est mutata serenitatem. Accessit Junius, & summis caloribus corpora nostra affecit, hinc exordium habuere Febres quædam, quæ prima facie Tertianæ simplicis notam præferebant, mox duplicatæ pertinaciter utrumque sexum, omnesque ætates invadebant; primò enim rigor incipiebat, qui ad plures horas durabat, vomitus amari succi aderat, cardialgia, dolor capitis, & eximia succedebat fitis; in multis tormina, & ventris fluxus, in aliis summa alvi stypticitas, inappetentia in omnibus, ac vigiliæ aderant; in tali, ac tanto autem numero Febres istæ invadebant, ut nulla ferè domus, nulla Religiosorum, tam marium quam fœminarum Monasteria, nullus denique in urbe locus fuerit, ab hoc febrili incendio immunis; miserandum erat videre unum vix in domo ægrotare, dein paucos post dies totam febricitare familiam, sic Cœnobia, Xenodochia videbantur, & rura repleta febricitantibus; in timidis nonnullis ac effœminatis contagionis timorem crearunt; ægrotantes crescebant in dies, & sine salute primorum, numerum augebant secundi, ut vix sufficerent Medici ad tantas ægrotorum visitationes, dies enim licet æstivus ad tale ministerium brevis erat. In Curatione talium Febrium primò *Lenitiva* proponebantur ad educendas pravas materias in primis viis hærentes, & hoc die pari, & vacua fiebat; elapsa autem impari, in qua febris redibat, *Venæ sectio* celebrabatur; sed hic notavi, die talis remedii, quo febris quia tertiana, abesse debuerat, accessionem reduplicatam, & ex simplici, duplicem factam fuisse, & continuam, sicque majus minari periculum; qua experientia edoctus, imposterum nunquam in talibus curandis

randis Febribus Venam secari jussi, sed ubi opus erat, *cucurbitulas scarificatas* tantummodo applicari mandavi; *Alterantia*, *Cordialia*, *Clysteria*, *Narcotica*, *Diuretica*, & *Sudorifica* in cassum semper fuere administrata; imò summum illud remedium, nempe *cortex Chinæ Chinæ*, per plures dies exhibitum parum aut nihil præstabat auxilii; sive cum vino generoso, sive in bolo cum *Syrupo Absinthii*, confecto in Decoctione, Tinctura, Extracto, Syrupis, in Rotulis, aliisque modis exhiberetur: Medicorum aliqui istum pulverem cum *Rhabarbaro*, *Zedoaria*, *Gentiana*, & *Centauro minori* mixtum dederunt, aliique pulverem *corticum Fraxini*, & *corticum Aurantiorum*, *baccarum Juniperi* similiter experti sunt. Si in aliquibus cessabat febris, brevi redibat, ac ter & quater recidivam patiebantur ægrotantes. Ego & uxor mea dilectissima, sub Augusti finem ab hac febre correpti, usque ad Novembrem ea laboravimus. Sic inter alios sub festo Paschatis Clariss. Dn. Hieronymus Baruffaldus Philosophiæ Doctor Excellentiss. atque Amicus meus suavissimus pertinacissimam hanc febrem, pravis stipatam symptomatis usque ad æquinoxium autumnale fuit passus; ego optima instituta victus ratione, & ad plures dies assumpto vino generoso, in quo *China China* infusa fuerat, tandem convalui; uxor vero mea, quia purgata, & aliis pharmaceuticis remediis usa est, sanguine etiam è vena pedis emisso ad febrem cicurandam, semper in pejus ruebat, & majores patiebatur febriles insultus. Modo Quartanæ duplices apparebant, modo simplices, hinc Tertianæ redibant, inde duplices fiebant, iterum Quartana, imò in aliquibus de septima in septimam diem revertiebantur febres, pertinacem, & malignam semper fervendo naturam. Observatum est, nonnullos aërem mutavisse, aliaque loca petivisse, ibique morantes sanitatem recuperasse; Reversi verò Ferrariam, illicò à nova febre vexati sunt.

Pauca fuere funera, sed longissimæ convalescentiæ, hinc in multis obstructions abortæ, in aliis crurum, & pedum intumescencia, in aliquibus icteritia, surditas, tremor, ac scabies, signa erant infirmitatis elapsæ. Notatum fuit in pejus semper ruere Ægrotos, atque recidivare faciliter, spirante Euro, qui ventus perinaciter ad plures dies perseverabat. Causam inquirentes nonnulli,

li, nimium sideribus tribuentes, putaverunt, stellarum influxum malignum, primò Boves, inde Homines affecisse; alii calorem æstatis nimis intensum, longum, atque molestum, accusabant, quatenus extenuando corpora, & humores fundendo, nec non ipsos spiritus dissipando, hujusce naturæ febres excitaret; Multi in vino causam horum morborum latitare autumabant, eo quia anno elapso 1714. ab cœli inclementiam ex uvis ferè immaturis vinum aciditate abundans confectum fuerit, quod assumptum crasim humorum, ac fermentorum vitiando, tales febres excitaret; Non pauci cadavera Boum, Lue pessima anno elapso denatorum, & hinc inde passim sepulta, causam istarum calamitatum agnovère: dicebant enim, particulas nobis infensas, ac mortiferas à cadaverum corruptione elevatas atque per porositates terræ ad aërem inquinandum sublevatas, infectionem in humoribus nostris peperisse: nec defuerunt, qui nimis creduli hanc pessimam constitutionem a fascino & maleficarum artibus diabolicè provenire crediderunt. Aliqui, cum quibus ego facio, cogitaverunt causam harum febrium internam fuisse humores viscidos atque tenaces, concoctu difficiles ac vix separabiles, nec sine longo tempore consummptos; externam autem causam in vitio terræ constitutum esse; cum enim annis elapsis, ex copiosis imbribus, & fluminum diluvie tota facies nostræ telluris tecta apparuerit, & per consequens viscera ejus coinquinata a stagnantibus aquis fuissent, unde infectæ ex pravis humoribus herbæ pascua nociva exhibuerint; Ex hoc morbi Animalium, Arborum multarum obitus, rubigo segetum orta; particulæ enim nitro-sulphuræ assiduè elevabantur, & fructus adhuc tenellos & uvas nondum maturas adurendo, spem colligendi alimenta furabantur; quin puteorum nostrorum aquæ, quibus juscula, pultes &c. conficiuntur, particulis istis imbutæ, vitium cum alimento præstabant. Qui exactam vivendi normam observabant, sæpè pejus vexabantur, quam illi, qui diætæ regulas aspernati, omnis generis cibaria pro libitu ac voluntate assumebant; Aliqui intemperantes, ante accessionem largam vini generosi quantitatem potabant, ac inde se ad somnum & sudorem componebant, & nonnulli tali modo sanitati sunt restituti. Alii omnimodè se abdicarunt à vino, absque ullo fructu: Febres enim pari perti-

nacia procedebant, atque diætam, quantumvis regulis propriis exercitam eludebant. Ad effugiendam pessimam hanc constitutionem ad rura ibant non pauci, verùm quia agri nobis vicini, eadem valetudine afficiebantur, parùm utilitatis experti sunt; qui verò extra nostra confinia proficiscebantur, atque vel Bononiam, Mantuam, Patavium, Veronam, Venetias, atque Romandiolæ urbes pergebant, ii sanitatem faciliè recuperabant. Non minùs accidit nonnullis, qui tædio affecti ad exteras urbes se contulerunt adhuc febricitantes, ut absque alio remedio pristinam recuperaverint sanitatem, & benè valentes in patriam redierint. In puellis passim observabatur in præsentì constitutione magna Lumbricorum copia, per vomitum enim & per secessum Vermes in febrium exordio prodibant, & multi pueri ex hac peste denati sunt. Hystericas insuper affectiones in fœminis, talibus febribus conjunctas præter modum notavi, earumque insultus fortiores, atque frequentiores maximè in febris principio, & augmento. Fructus penè omnes Verminosi, ac ingrati saporis, ita ut bonæ substantiæ fuerint illi soli, qui ab exteris ad nos mittebantur & præsertim illi optimi succi erant, qui à Patavinis montibus veniebant. Postremò tandem observavi per publicas nostras vias, per vicos, & plateas, si quid aquæ, aut alterius humiditatis, ad paucos dies permaneret, viridem colorem, ac fœtorem emittere, quod non tam faciliè annis transactis eveniebat. Faxit Deus, ut hæc terminante Anno 1715. finem habeant, atque meliorem Anni venturi 1716. Constitutionem possimus sani describere.

OBSERVATIO CCXV.

Ex Ephemeridib. Curios. Cent. VIII. Obs. 9.

De innoxio esu carnis Boum Lue pessima contagiosa denatorum.

IN contagiosa ac penè pestilenti constitutione annorum 1713. & 1714. qua tota penè Italia vexata fuit in Bovino genere, cujus memini in Cent. V. Ephem. Curios. pag. 347. inter alia decreta a prudenti nostro Magistratu emanata, ad avertendam pessimam hanc Luem, unum.

num fuit, ne aliquis auderet sub vitæ pœna comedere carnes Bovinas ex Lue pestilentiali emortuas, ne fortè pessimus ille morbus corpora hominum invaderet, & sic fieret transitus a peste Boum ad contagium hominum: Verùm licet talia decreta singulatim rusticis fuerint insinuata, attamen nonnulli longè ab Urbe nostra degentes, antequam Boum e tali morbo mortuorum corpora sepelirent, non tantùm lucri causa excoriarunt, ob pelles eorum exsiccandas atque vendendas, verùm quoque coxarum musculos sale conditos atque fumo induratos servarunt, & hyeme succedente suaviter & sine ulla noxa, elixatos comederunt, nec unquam febrem, & neque exiguam, passi fuère, mihi que facti sunt, se toto hyemali tempore talem carnem comedisse, sine nausea & vomitu.

OBSERVATIO CCXVI.

Ex Ephemeridib. Curios. Cent. VIII. Obs. 10.

De Febre octana & sextana.

MIlitem Anno elapso curavi, qui quavis hebdomada die Veneris dolore Capitis absque febris vexabatur, quæ accedente die Sabbati evanescebat, talisque affectio ad menses aliquot perduravit. Anno verò præsentis 1717. fœminam observavi viduam, annorum XXXIII., sterilem, quæ qualibet sexta die febrem patiebatur frigore incipientem, & sudore terminantem; hæc autem a me curata fuit sola *Chinæ Chinæ* exhibitione, iterata per plures dies, imò die paroxysmi bis *corticem hunc Peruvianum in Vino Malvatico* assumebat, quod aliis diebus semel tantùm faciebat.

OBSERVATIO CCXVII.

Ex Ephemeridib. Curios. Cent. VIII. Obs. 11.

Odontalgia Venæsectione curata.

Mercator quidam nostras Ferrariensis, alioquin sanus, sæpè Dentium dolore afficiebatur, qui nullum sentiebat levamen nisi à sanguinis missione, ad quam statim recurrebat, cum eam pateretur. Et cujusdam Monialis recordor, quæ Stomachi ardorem quovis ferè mense sentiebat, & sola Venæ sectione ab eo liberabatur, quæ in pede celebrabatur.

OBSERVATIO CCXVIII.

Ex Ephemeridib. Curiosor. Cent. VIII. Obs. 12.

Mors ex Stomacho percussione.

DE fullone narrat *Anton. Benivenius*, qui unico pugno, Stomacho cujusdam Juvenis violentiùs impetito, eum interemit: ego etiam Anno 1712. vidi pistorem, qui itidem percussit puellum in regione Ventriculi, a quo illicò concidit veluti apoplecticus, & licet multæ artes adhibitæ fuerint ad revocandam in puero vitam, ex illo tamen ictu mortuus est.

OBSERVATIO CCXIX.

Ex Ephemerid. Curios. Cent. VIII. Obs. 13.

Lachrymæ sanguineæ.

Menstruas purgationes per oculos quovis mense veluti lachrymas sanguineas excretas vidit *Remb. Dodonæus*. Ego verò fletum sanguineum in adolescente observavi, quotiescumque data causa ad fletum incitabatur, rubore insigni oculi turgebant, & inde sanguineæ guttulæ, veluti cruoris rivus, exhibant: in verò Anno 1709. mense Julio febri maligna correptus vitam cum mortuo commutabat.

OBSERVATIO CCXX.

Ex Ephemerid. Curios. Cent. VII. & VIII. in Append. pag. 18.

Constitutio epidemica Ferrariensis Annorum 1716. & 1717.

Frigus hyemale, quod Anno 1715. mense Decembri incepit; anno etiam 1716. usque ad mensem Martii perduravit; multæ nives, cum ventis borealibus super faciem terræ glaciem ad multas hebdomadas conservarunt, & licet remissum sub Martii finem videretur frigus, attamen recrudit mense Aprili, & usque ad Majum non cessavit. Itaque hoc durante frigore, Gravedines multæ, ac Pleuritides observatæ sunt; quin imò Oculorum inflammationes passim abortæ & pertinaces adeò extiterunt, ut nonnullæ ad mensem usque pro tractæ, patientes vexarint. Ver accessit, & imbres frequentes tellurem infestabant, nostram flumina augebant, & segetes nimio madore irrigabant, si verò mutatis ventis serenitas apparebat, vix Sol igne suo terram fovebat, statim elevatis aqueis vaporibus nebulæ densissimæ abortæ sunt, hinc natæ in homi-

nibus Surditates, Apostemata, & vagi dolores cum flatibus; Ætas calidissima ineunte Junio derepentè invaluit, unde multæ tertianæ Febres, tam simplices, quam duplices obortæ sunt, cum nausea, vomitu materiæ amaricantis, capitis dolore, ac immodica siti, quinimò nonnullos Tertiana perniciofa vexavit, quæ omnes ope *Chinæ chinæ* sanatæ sunt, prius tamen leviter alvo exonerata. In Autumni primordiis pluvia multa, qua cessante, serenitas, usque ad Kalendas Decembris continuavit; ita ut semina terræ bono omine tradita, & magna uvarum copia feliciter collecta, vinaque optima reposita fuerint. Hoc autem tempore, salubritas aëris, corporibus humanis bonam valetudinem impertita est, ita ut præter aliquas leves Quartanas, & placidas erraticas Febres, nil aliud mali quoad salutem Ferrariensibus acciderit; Solummodò notatu dignum fuit, Autumni tempore, multas gravidas abortum passas fuisse sine ulla causa manifesta. December sanus extitit.

Terminato Decembri, mensis Januarius ingreditur Anni 1717. & frigus primò remissum apparuit; ast die hujus mensis undecimâ, aura septentrionalis rigida advenit, & tamen fortiter agitavit auras, ut quædam arbores, quidam muri, ab ejus impetu, erutæ, ac collapsi ruerint, quatuor dierum spatio borealis hic ventus dominatus fuit, quo cessante illicò magna nivis copia descendit, inde frigida serenitate favente, usque ad secundum anni mensem nives perduraverunt, mox aura dulciori reddita, dissolutisqua nivibus, sub finem Februarii frigoris sævities evanuit. Hoc verò tempore, Anginæ multæ, Colici dolores, ac Febres catarrhales ubique debaccharunt, imò Epidemia in infantibus tali hyeme incepit Variolarum, quæ postea toto Anno 1717. miserrimè perseverans puerorum stragem multiplicavit, & quod notabile fuit, hujus anni hyems, quoad morbos, plus juvenes, quam senes affecit, horum enim vix unum aut alterum curandum habui. Ineunte Vere multæ nebulæ densiores observabantur, quæ tandem in pluvias terminabant; sequebatur, imò semper major fiebat Epidemia Variolarum in puellis, ac nonnullæ malignæ febres obortæ sunt, quæ in principio leves apparebant, progressu tamen temporis funestæ, ac mortales manifestabantur, ex quibus febribus quatuor nostri Medicinæ Doctores, præter alios denati sunt, primus Dn. Andreas Zuffi,

fi, alter Dn. Joseph Vaccarius, Juvenis optimæ spei, tertius D. Cæsar Lollius discipulus meus, & quartus tandem Dn. Franciscus Salmius, ætatis annorum LVI. compater meus honoratissimus, & omni scientiarum genere instructus. Partus difficiles multi, & multæ pariter icteritiæ. Accessit æstas, cujus mensibus magna siccitas, & austrini venti calorem augebant; sequebantur malignæ febres atque nonnullos vexabant tertianæ duplices melioris notæ, cum vomitibus in principio accessionis, ac dolore capitis sævo, qui non nisi declinante febre mitescebat. Mense Augusti nonnullæ occurrerunt Dysentericiæ, quæ tamen Deo adjuvante sanatæ omnes fuere.

Erat miserandum cernere quotidie infantum cadavera Variolis enecata ad tumulum deferri. In principio Septembris Cælum mutavit faciem, & calore remisso, aquas dedit salutare ad terram irrigandam: sic maligna febrium constitutio migra fuit, & tantummodo subortæ vertigines, tussis, ac graveines. Increfcente Autumno iterum serenitas rediit, atque aureis Solis radiis toto Octobris mense gravissimus fumus. Cereris, Bacchi, ac Pomonæ dona hoc Anno non modica fuere collecta, & valetudines paucæ Homines malè habuerunt, non ita tamen in Bobus, ac Suibus accidit, in illa quippe animalia mors falcem immisit; unde timor colonis invasit, ne Epidemica Lues in Bovino genere anni 1713. resurgeret, & lachrymas iterum excitaret.

Cæterum præter dictas febres, & magnam Variolarum copiam cum Lumbricis in puellis, annus 1717. salubris dici potuit, nullæ enim Apoplexiæ, paucæ Quartanæ, in minima copia Scabies, ac articulorum dolores. Mense Decembri hyems apparuit, sed parum ab Autumno differebat, frigus enim tolerabile ac mite observabatur. Quod verò notabile fuit hoc Anno, extitit ventorum frequens copia, unde pericula multa, imò naufragia in mari Adriatico ad nostra ora, & Pado, aliisque nostris fluminibus acciderunt, subversis enim navigiis merces non tantum sed homines etiam miserabiliter deperditi fuere. Æstivo tempore magna Insectorum copia segetes infestabat, ac hominibus ruri præsertim degentibus molestiam inferebat. Arthriticos annus præsens modicè infestavit, & leviter tantum tacti citò ad consuetam exercenda mu-

nia

nia redibant. Ardente Sirio multi Canes in rabiem perciti fuerunt, quod aliis annis mitius evenire observatum fuit. Parturientibus, ac Puerperis Lucina favit, ita ut vix una puerperii vel partus tempore obierit; hystericas affectiones, ut plurimum mites, & magis in Juvenibus, quam Senibus tusses & gravedines in Autumui principio; Hypochondriacis, ac Melancholicis præsens annus, nec profuit, nec nocuit, eorum enim ordo, parùm consilia Medicorum imploravit, unusque ex illis tantummodo gradum fecit ad Maniam; nonnullæ observatæ fuerunt icteritiæ flavæ, absque præviis morbis, vel doloribus ortæ, quæ tamen adeò leves fuerunt, ut absque læsione actionum non solum apparuerint, verùm sine ullo prorsus remedio evanuerint sponte; istæ autem potius in Juvenibus, quam in Senibus observatæ sunt; Lue venerea affectos pessimè vexatos vidimus, & multos ex hac peste mortuos, licet multa tentaverint remedia, & ad usum ipsius *Mercurii* desperati confugerint. Sic postremo Andreas Pareschius Ferrariensis Gallica Lue affectus post decocta *Salsaparillæ*, *Ligni Guaiaci* & sudoribus tentatis, tandem ad *Mercurialem unctionem* desperatus advenit, qua admissa gingivæ, linguæ, aliarumque oris partium gangræna suborta, miserabile Veneris sectatoribus exemplum, ultimam clausit diem; in sanctimonialibus paucissimi morbi, & Regularium Religiosorum Sacerdotum nonnulla tantum funera; nosterque antistes Cardinalis de Verme ætatis ann. 77. febris maligna correptus sanctè obdormivit in Domino, in cujus cadavere reperta sunt penè omnia viscera sana. In aliquibus nostri suburbii locis, nonnullæ febres malignæ peticulares, & contagiosæ naturæ, uno enim ægrotante, brevi temporis intervallo tota simul ægrotavit familia, hæc tamen influenza trium tantummodò mensium spatio perduravit: accedente enim Autumno omninò evanuit; impetigines multæ in fine Novembris adultos affecerunt, quæ usque ad anni finem pertinaciter duravêre. In principio Decembris ophthalmiæ multæ, pertinaces tam in maribus quam in fœminis. Observavi tandem in multis pauperibus sola diæta multas febres sanatas, sicque cum *Joh. Damasceno* in ultimo aphorismo concludendum. *Dieteticam medicinam præstantiorem esse Phamaceutica, & Chirurgica.*

OBSERVATIO CCXXI.

Ex Ephemeridib. Curios. Centur. IX. Obs. 5.

Febris quartana à terrore fugata.

Adolescentula Ferrariensis, temperamenti sanguinei, sub autumno febre correpta fuit, octana, non quidem obscuris, sed paroxysmis evidentissimis, quæ hyeme in Quartanam conversa fuit; horrore primò horas duas durante corripiebatur, inde superveniebat febris sexdecim horarum spatio perdurans: frustra fuere adhibita plurima, ita ut adolescentula debilior facta vix è lecto surgere posset; denique quod remedia non potuere, valuit timor. Nam cum in accessionis principio existeret, & in lectum se ad paroxysmum sustinendum componeret, ac sopita somno indulgeret, repente soror ejus cubiculum ingreditur, dicens: Surge & propera, domus enim nostra incensa concrematur, audi clamores populi, audi vicinos fletus, fuge ignem, fuge necem. Hoc audito, surgit attonita, & semivestita ad januam domus currit; tunc soror ejus clamat: siste fatua, ne vides me tibi jocum fecisse, taleque finxisse periculum, ut à pertinacia febris timor te liberaret? Et ita revera evenit, ac jugulato quasi paroxysmo, statim sana facta est, adhuc Dei gratia sana vivit. Et Matronæ recordor, quæ patiebatur ferè continuum Capitis dolorem, atque ob infestum nuncium repentinum mortis filii sui, sana facta nunquam imposterum capitis sensit dolorem, mœsta tamen ac infelix ob filii necem diu vitam duxit.

OBSERVATIO CCXXII.

Ex Ephemeridib. Curios. Cent. IX. Obs. 6.

Surditas ex terrore.

Adolescentula nobilis & formosa, annorum ætatis quindecim cum ruri esset, ex conspecto angue, improvise in herba, juxta se observato, tanto terrore corripitur, ut tremens & frigido perfusa sudore domum reversa, lipothymiâ corriperetur: qua cessante surda est facta, & adhuc nonnisi fortiter clamantis vocem audit, sonumque campanæ haud percipit.

OBSERVATIO CCXXIII.

Ex Ephemeridib. Curiosor. Cent. IX. Obs. 7.

Splen petrefactus.

IN historia Academiae Regiæ Scientiarum Anni 1700. Dom. Litte ostendit Lienem humanum petrefactum erutum è Viro LX. Annorum; cui non absimilem liceat Mihi referre casum, cujusdam nempe fabri ferrarii, ætatis LV. annorum, temperiei melancholicæ, ad fletum proni atque ad iram; is post dolorem colicum icterus est factus; accessit febris primò quartana, mox duplicata malignæ naturæ, vigesimo autem morbi die pertinax narium hæmorrhagia, cum lethali eventu. In cujus cadavere aperto varia notabilia reperta sunt, uti Pulmo flaccidus & lividus, Cor nigris maculis fœdatum, Pancreas penè consumptum, Mesenterium flaccidum & saniosum, Jecur aqueis vesiculis plenum, Vesicula fellea vacua, Renes succenturiati ferè consumpti, Lien verò taliter induratus & exsiccatus, ut lapideam referret naturam, cultro enim anatomico non cedebat, & malleolo percussus in

tres

OBSERV. MEDIC. *Observ. CCXXIV.* 519
tres divisus partes ut saxum frangebatur. Quem D. Cæsar Lol-
lius, Discipulus quondam meus adhuc conservat.

OBSERVATIO CCXXIV.

Ex Ephemeridib. Curios. Centur. IX. Obs. 8.

Hæmorrhagia lethalis ex scarificatione.

Nuper miles præsidii nostri Ferrariensis Annorum LV. mali habitûs, & obstructionibus viscerum obnoxius, feбри mali moris correptus medicam imploravit opem; cui, præmisso clystere, impositæ fuere octo cucurbitulæ scarificatæ, per quas non tantum magna sanguinis copia effluxit, sed pessima etiam secuta est hæmorrhagia, quippe cruor enormiter dissolutus, totus per levia cucurbitularum foramina infra 24. horas effluxit, absque eo, quod ars nostra ei auxiliari potuerit, omnibus adstringentibus incassum adhibitis, sicque sensit per vulnera mortem.

OBSERVATIO CCXXV.

Ex Ephemerid. Curios. Cent. IX. Obs. 9.

Cæcitas ex Scabie retropulsa.

Paupercula quædam puella tredecim annorum, correpta fuit quartana, post cujus septimum paroxysmum sponte oborta est scabies universalis in corpore, & nullum amplius quartanæ vestigium apparuit: Ejus Mater, ne tota familia scabie fœdaretur, variis unguentis, ex *Sulphuratis* & *sublimato*, unà cum *Leandri foliis* ac *floribus* scabiem auferre tentavit; sic unguentis quater adhibitis, puella oculorum inflammatione primò tentata fuit; ex qua citò aucta suffusio ac cæcitas orta, quæ nunc etiam perdurat, evanescente tamen dolore & inflammatione.

OBSERVATIO CCXXVI.

Ex Ephemeridib. Curios. Cent. IX. Obs. 10.

Dolores Articulares. ex adstricta Diarrhæa.

QUò natura vergit, eò Medicum ducere convenire, ait *Hippocrates*; quod ratio & experientia testantur; nam cum pravi humores à natura per alvum fecernantur, malè eos retardat Medicus ac adstringit, ut ad partes nobiliores deferantur magno vitæ discrimine. Ita accidit mense Junio Anni 1718. in quodam Mercatore Bergomensi, qui diarrhœam passus, post biduum, ab Empyrico edoctus, pulvere *suberis* assumpto, alvi fluxum retardavit, aliisque adstringentibus omninò hunc sustulit; verùm oborti in illo sunt dolores articulares atrocissimi, ita ut nec brachia nec genua, imò nec caput movere potuerit, qui nervorum cruciatus per mensem duraverunt.

OBSERVATIO CCXXVII.

Ex Ephemeridib. Curiosor. Cent. IX. Obs. 11.

Tumor Verminosus.

VIr Romandiolus annorum LV. temperiei melancholica, ætatis tempore valdè delectatus venatione, cui supervenit febris tertiana duplex, cum vomitionibus biliosis in principio; ast leviter purgato corpore, melius se habere incepit; undecimâ autem morbi die tumor sub axilla sinistra apparuit, qui ad ovi magnitudinem crescens, tandem suppuratus, Chirurgi ferrum passus est; quo aperto exivit cum pure mixta non pauca quantitas Vermium vivorum exiguum, mox ulcere cicatrice obducto Æger convaluit.

OBSERVATIO CCXXVIII.

Ex Ephemeridib. Curios. Cent. IX. Obs. 12.

Insania periodica.

Nuper observavi Fœminam annorum XL. quæ absque febre insaniebat in quovis plenilunio, quod spatio duorum dierum durabat; quibus elapsis, iterum mentem recuperabat; nunquam ipsa menstruas vidit purgationes, capillos rubri coloris habet, & sudor ejus foetet; erysipelati valde obnoxia, morbum hunc modò in cruribus, modò in brachiis patitur, nec mensis integer transit, quod erysipelate non tentetur.

OBSERVATIO CCXXIX.

Ex Ephemeridib. Curios. Cent. IX. Obs. 13.

Dolor inter caput & genua reciprocus.

SArcinator quidam ætatis annorum xxxix. multis abhinc mensibus dolore capitis vexatur per integrum diem, & quidem bis in mense, & quod notatu dignum est, dolor semper correspondet dolori in genubus, ut crescente primo, hic pariter augeatur, & contra; modò autem incipit à genubus dolor, mox surgit in caput; nunc primò caput invadit, nunc genua; & uno evanescente, evanescit & alter. Ego suspicabar de Celtica lue, verùm patiens se nullam nisi conjugem honestissimam cognovisse sanctè testatus est; nihilominus tamen, leviter purgato corpore, decoctum *Salsaparillæ* per mensem exhibui, recta simul instituta victus ra-

tionem. Nunc melius se habere incipit, sperans se pristinam recuperaturum sanitatem. Et Fœminæ recordor, quæ dolorem auris dextræ patiebatur, cujus semper comes inseparabilis erat dolor calcanei, istique cruciatus maximè ad plures dies infestabant hyemali tempore.

OBSERVATIO CCXXX.

Ex Mangeti Bibl. Medic. Practic. Lib. XIV.

De puerperio infelici à potu frigido.

QUantum actu frigidus potus puerperis præsertim non longè à partu obsit, docuit celeberrimus D. D. Marcus Gerbezius Medicus Labacensis, & amicus meus singularis in suo tractatu de morb. complicat. part. 2. cap. 20. p. 453. unà cum Clariss. Dno. Dre Georgio Franco Patrono atque collega meo semper colendo in Ephem. Nat. Cur. Decur. 2. anno 9. observ. 200. quod etiam sequenti observatione patet.

Juvenis quædam Fœmina, hîc Ferrariæ, uxor unius fabri lignarii annorum XXI. feliciter peperit filiulam; puerpera hinc facta, sine ullo ventris dolore, lochia benè ac ritè fluebant, ejus die quinta à partu siti vehementi molestabatur, ad quam expellendam libram unam emulsionis seminis peponum factæ s. a. in aqua stillatitia cichorei, gelidè ebibit, post cujus assumptionem totius corporis improvisus rigor accessit cum ventris tumore, dolore, ac nonnulla, exigua tamen, convulsione; lochia suppressa sunt, ac die sequenti ingenti affecta fuit febris, à qua occisa est.

OBSERVATIO CCXXXI.

Ex Mangeti Bibl. Medico-Prætic. Lib. XV.

De Fele rabida.

CAnes rabidos venenato morfu homines occidisse, experiëntiâ constat; rarò autem de Fele hoc accidisse narratur; Verùm *Cornelius Stalpart. vanderuviel observat. cent. 1.* refert de cive Lugdunense in Bataviis mortuo ex morfu rabidæ felis; hîc autem Ferrariæ anno 1693. mense Maii Adolescentulam annorum xv. observavi; cui pollicem manus dextræ momordit rabida felis; de quo morfu parùm sollicita fuit, & parùm pariter solliciti fuere parentes; ast supervenientibus pravis symptomatibus, immensa siti, cephalæa, & potus fastidio, sequuto delirio, aut convulsione obiit.

OBSERVATIO CCXXXII.

Ex Mangeti Bibliothec. Medico-Prætic. Lib. XV.

De noxa ab esu carnis vaccinæ à cane rabido demorsæ.

DOctissimus *D. Petrus Borellus cent. 1. obs. 75.* narrat, Porcum à cane rabido demorsum fuisse, omnesque qui ejus carnem degustarunt, rabidos effectos fuisse, unde colligit maximè cavendum esse ab esu animalium à canibus rabidis demorforum; hinc pariter Ego anno elapso 1694. mense Augusti observavi familiam integram Rusticorum veneno affectam ob esum vaccæ demortuæ à cane rabido morsæ: tres autem ab illo veneno emortui sunt, alii vero ope remedium, Deo favente, sani evaserunt.

OBSERVATIO CCXXXIII.

Ex Manget. Bibliotheca Medic. Practic. Lib. XVIII.

De Arsenicô sine noxâ deglutitô.

PROBatum jam esse ait Clariss. & nunquam satis laudatus Dom. Lucas Tozzi, Archiater Pontificius & Amicus meus semper recolendus in *Comment. Aphorism. Hippocrat.* 16. lib. 4. pag. m. 209. gravius affici eos qui jejuni *arsenicum* assumpserunt, levius verò qui à pastu; idque verissimum notavi nuper in circumforaneô quôdam arcanorum jactatore, qui ut rudem illuderet plebem, *arsenicum* elapsâ die, horâ xxii. publicè manducavit absque ullâ noxâ: Hoc autem accidit, ut ipse candidè mihi fassus fuit, quia ante prædicti *arsenici* assumptionem cibis oleosis ac pinguibus usus fuit, quibus ventriculi interior tunica ad veneni particulas retundendas, fuerat oblinita.

Scholium.

Hæc ex communicatione *Præclariss. Viri Domin. Josephi Lanzoni*; quibus addimus, nos aliquoties observasse ejusmodi agyras non tantum assumptis oleosis ventriculum suum contra venenorum morsum præmuniisse, sed illis etiam materias plurimum viscosas adjunxisse, quibus quasi infasciaretur ac hebetaretur vis particularum corrodentium, earumque actio prorsus reprimeretur, ut vidimus motum globuli plumbei è sclopeto emissi, momento ab argilla oppositâ cohiberi. Viscosa autem quibus præcipuè utuntur illi, sunt animalium interanea in putrilaginem propè cocta, indeque etiam apparatus juncula crassiora ac viscidiora. Hoc mihi in memoriam revocat historiam cujusdam Viri, qui apud nos horrendâ cephalæâ diu tortus, in istiusmodi circulatorum manus præ desperatione tandem se conjecit, quique experiundis venenis in theatrum productus; (facta spe nihil ab iis commotionis funestæ excitari posse in

in ventriculo satis superque oleosis pinguibus præmunito, sed à super assumptis antidotis quicquid ad rebellioris mali eradicationem necessarium foret, abundè suffectum iri) eorum periculum in se ipsò fecit, atque ex eò convulsus, varièque vexatus per quatuor septimanas orci vestigia premens, nescio quò fatò tandem ad vitam rediit, ac revera per concussiones à venenis oppositisque largiùs antidotis suscitatas, pro tempore liber à cephalæâ suâ evasit, at tandem ab eâ de novò post aliquot annos recrudescente, brevi, nihil proficientibus auxiliis, è vivis ablatus est. Itaque in illo vis viscidorum ac oleosorum non satis oblinivit ventriculi parietes, quin aliquid indefensum veneno patuerit, ubi lethiferam actionem suam exercuerit. Credo equidem apud alios, qui talia sæpius experti sunt, ventriculum per omnes sui partes faciliùs posse defendi, sicque eos minus lædi, quia scilicet præterquàm quòd eorum stomachus à reliquiis viscosorum priùs assumptorum continuò prope oblinitus, faciliùs à super adjectis integrè defenditur, non absolum etiam videtur addere, membranam interiorem visceris in iisdem minùs fieri sensibilem ac lacerabilem, velut equus calcari assuetus, non ita punctiones præ callò cuti inductò persentit. Hocque novum non apparebit iis quibus de historiâ Mithridatis Regis Ponti, ac præcipuè illius Mulieris quæ Alexandro Magno fuit oblata constabit.

OBSERVATIO CCXXXIV.

Ex Mangeti Biblioth. Medico-Præct. Lib. 18.

De Fungorum Veneno.

Mulier honesta, bonis parentibus nata, Annorum xxxi. esu frequenti *fungorum* delectabatur; cùm elapsò mense postquam *fungorum* non exiguam quantitatem comedisset, paucis transactis horis, dolore, tormineque magno ventris, nec non cardialgia, cum sudore frigido, ac convulsione correpta fuit, imò totum corpus flavedine conspersum videbatur; Me statim vocant

Josephi Lanzoni Opera. Tom. II. X x x Domesti-

Domestici & fungos manducatos, tanquam hujus affectionis causam, accusant, Ego statim vomitorium medicamentum exhibeo, à quo non exiguam quantitatem materiæ corruptæ, ac foetidæ evomuit; mox per alvum nigra quædam, veluti piceam materiam excrevit, unà cum urina aquosa, ac omninò cruda; inde *Theriacam* ad pondus 3 i. cum vino albo generoso propinavit, atque stomachi, & cordis regionem *oleo nostro contra pestem ac venena* inungi jussi; sic tota nocte dormivit; mane expergefacta assumpsit uncias quinque *Vini Malvatici*, cum 3 i. *pulveris salis Absinthii*; sicque Divino favente Numine sana evasit.

OBSERVATIO CCXXXV.

Ex Mangeti Biblioth. Medico-Præctic. Lib. 18.

De Laudano opiato ad pondus 3. v. sine noxa assumpto.

DE Antimonii vitro ad pondus triginta granorum sumpto sine noxa narrat observationem *Clariss. Dom. Johan. Schenckius observat. medic. lib. 7.* & Ego observavi quendam Militem sine ullo prorsus nocumento assumentem *laudanum opiatum* ad pondus 3. v. & de Rustico quodam recordor qui cinerem, arenam, lapillos, cretam, gypsum, nitrum, & calcem, absque noxa vorabat, etiam pluries in die ob lucrum paucæ pecuniæ, ex quo exclamandum cum Poëta

..... *quid non mortalia pectora cogis*
Auri sacra fames

De opio autem inoffensè sumpto videatur Sextus Empiricus, Mercurialis de Veneno, Wierus, Garzias ab Horto, Monardes, Heurnius, Schenckius, & alii plures tum Antiqui, tum Recentes scriptores.

OBSERVATIO CCXXXVI.

Ex Mangeti Biblioth. Medico-Præct. Lib. 18.

Vini & Veneris nimium usum venenatum esse probatur exemplis.

Vini, ac Veneris nimium usum semper fuisse nocivum agnovit quoque antiquitus Poëta dum cecinit in Epigram.

Nec Veneris, nec tu vini capiaris amore

Uno namque modo, vina venusque nocent.

Ut Venus enervat Vires, sic copia Bacchi

Debilitat gressus, debilitatque pedes.

Attamen, licet immodicus vini, venerisque usus auferre valeat salutē ab hominibus, nonnulli, qui, non ut vivant, nati sunt, sed ut bibant, & coeant; tam bibaces sunt, ac salaces, ut nihil nisi vini Dolia, nil nisi meretrices in mente, in corde, ac præ manibus habeant; hinc cū Vir xxxix. aſſorum, temperiei calidæ ac humidæ; vini magnam quantitatem die, prima Augusti hujus Anni 1695. ingurgitasset, ut inde ebrietatem maxima fuerit correptus, circa vesperam Apoplecticus mortuus est; Aliumque mercatorem alioquin sanum cœcum factum vidi ab immodico vini usu, & à frequenti Bacchi delitia; immò Sacerdos mihi asseveravit se Mantuæ olim vidisse Adolescentem Annorum xv. maniacum factum ex immoderato vini usu, à qua mania nunquam usque ad mortem liberatus fuit; Circà Venerem verò, Juvenis adest hîc Ferrariæ Annorum ætatis xxvi. biliosæ temperiei, qui Paralyticus factus est à nimia Venere, & de alio Juvene. xxviii. Annorum, è nobili stirpe orto recordor, qui sæpè in Clinopali se exercebat, & in Veneris castris strenuus miles factus erat, ast in coïtus actu epilepticus factus est, cujus morbi insultus quavis hebdomada invadebat, ac spatio duarum horarum perdurabat, son-

ticus iste affectus menses vidit, & annos, donec Juvenis in trigesimo constitutus ætatis suæ anno, ipsa magis, magisque insæviente epilepsia mortuus est; alios edocens *Venerem Libitinam* dici, ac natalium non solum sed & mortis quoque Presidem esse, de quo videatur *Tiraquellus in leg. connubial. Plutarchus in Numa*; & meus *Tractatus de balsamatione cadaver. cap. 5.*

OBSERVATIO CCXXXVII.

Ex Mangeti Biblioth. Medico-Præctic. Lib. 18.

De morte à Gypso sumpto.

Gypsum esse venenatam materiam, & multos occidisse narrant *Plinius*, & *Sabellicus lib. 4. Ennead. 9.* Ego Anno 1691. duos Adoloscences observavi, quibus cum polenta exhibitum fuit gypsum; supervenit statim Tussis, ariditas linguæ, ac singultus, cum feбри, ac delirio, & syncope. *Theriaca* fuit à Domesticiis exhibita, & 3 i. *pulveris stercoris muris*, quod esse antidotum proprium gypsi docet *Sennertus*; verum die quarta ab assumptione gypsi minor adolescens mortuus est; majorque sanus evasit, solummodo tremore ferè de continuo affectus.

OBSERVATIO CCXXXVIII.

Ex Mangeti Biblioth. Medico-Præctic. Lib. 18.

De Vesparum ictu.

Remedium facile ad citò sanandos *Vesparum ictus* tradit *Clariss. D. Joh. Michaelis in Prax. Clinic. general. Append. de Venen. cap. 3.* nempe urinam propriam, quod sæpè in Rusticis expertus feliciter evenit; imò nuper Ancilla quædam delicatula deambulans in hortulò nostro ictu *vespæ* affecta, sola *urina* propria parti affectæ appositâ, nullòque aliò remediò à dolore illicò liberata est, & ab ictu,
Ami-

OBSERV. MEDIC. *Observ. CCXXXVIII.* 529
Amicumque habeo, qui mihi justè fatetur, se pluries expertum
esse, contra *ictus Vesparum* maximè facere *salivam* hominis jejuni.

OBSERVATIO CCXXXIX.

Ex Mangeti Biblioth. Medico-Prætic. Lib. 18.

De Morte ex Aqua forti.

Asservabat domi suæ quidam Mercator vas vitreum, in quo non
exigua quantitas *aquæ fortis* erat conservata ad usum separatio-
nis metallorum, cùm Puella Annorum sex siti capta, eam bibit,
indeque diris cruciatibus spatio quatuor horarum periit.

OBSERVATIO CCXL.

Ex Mangeti Biblioth. Medico-Prætic. Lib. 18.

*De Citri ac Limonum succo optimo remedio contra Venenum
Aquetta dictum.*

Multi assumpserunt sequentem liquorem *Aquetam* vulgo à
multis dictam;

℞. *Pulveris Arsenici, Stibii crudi, herbæ hyosciami, fermenti, ana,*
partes æqu. Ebulliant omnia in aqua communi donec tertia pars
consumpta sit, inde coletur, & serva; hæc aqua epota mortem
afferret, nisi celeriter opem portaret *succus Citri, vel Limoniorum*;
sic enim multi, quibus data fuit dicta aqua sanati sunt & necem
fugerunt.

OBSERVATIO CCXLI.

Ex Mangeti Bibliothec. Medico-Prætic. Lib. 18.

De facili Curatione Vulnerum simplicium.

MOdum facilem curandi simplicia vulnera hîc apponere mihi liceat, ad Medicinæ Tyrones erudiendos, qui sequens est à Me pluries feliciter expertus. Vulnera igitur manè & vesperi vinô albô generosô prius mundifico, postea *oleum hypericonis* vulneri appono, & sic hoc facili remedio simplicia vulnera citò certaque methodo sana reddo. Et elapsis diebus vulnus simplex sanatum vidi sola insperione pulveris tabaci.

OBSERVATIO CCXLII.

Ex Mangeti Bibliothec. Medico-Prætic. Lib. 18.

Remedia Varia experta ad vulnera simplicia sananda.

PRimò; Solum *vinum* calidè appositum pluries expertus fui multæ esse efficacix ad vulnera simplicia curanda. Secundò, *Pulvere tabaci* insperso militem vulnera sanare retulit expertus; Tertio, *Aquam vitæ*, *oleum Hypericonis*, *oleum vitelli ovorum*, *oleum Terebinthinæ*, & *oleum Abietinum* multæ esse efficacix ad vulnera consolidanda probavi sæpè in Praxi Medica facienda; imò *aquam communem* non solum sanguinem sistere, sed etiam vulnera simplicia quoque consolidare experientia me docuit; Quartò, sequenti unguento feliciter multi utuntur Chirurgi; nempe

℥. *Terebinthinæ* lotæ in *aqua salviæ*, ʒ. ʒ. *Mellis rosati simplicis*, ʒ. iiij. *Farinæ hordei*, ʒ. ij. *Aloës succotrinæ*, ʒ. iiij. *Pulveris sanguinis draconis in lachryma*, ʒ. j. *M. f. Unguentum S. A.*; Quintò *Balsamum sulphuris* ad vulnera sananda commendant multi sic edocti à Mart. Rulando; hocque probavit miles, & sanatus est. Sextò, *Pulverem vitrioli*

vitrioli romani rubificati non tantum hæmorrhagias sistere, sed etiam vulnera consolidare, expertus nuper fui in Adolescente, ab alio in brachio dextro vulnerato. Septimò, *Herbam millefolium* dictam contusam cum vino generoso appositam brevi curasse vulnus, Chirurgus Amicus meus fide dignus mihi retulit; quod etiam in Rustico Ego feliciter expertus nuper fui.

OBSERVATIO CCXLIII.

Ex Mangeti Bibliothec. Medico-Prætic. Lib. 18.

*De remedio ad Vulnera: ad Dominum Doctorem J. Jac. Mangetum
Amicum Colendissimum.*

PRimos duos tomos Bibliothecæ tuæ Præticæ diligentissimè collectæ, ac utilissimè publici juris factæ, rite accepi; & quia ab humanissimis tuis mihi scriptis, intellexi nunc quantum tomum sub typo existere, antequam ad umbilicum perducatur egregium tale opus; mihi liceat tibi transmittere sequentem formulam Balsami, qui intrà horas xxiv. omnia simplicia vulnera sanat.

℥. Olei Veteris olivarum, ʒ. iiij. Terebinthinæ Venetæ, ʒ. v. Florum Hyperici, ʒ. j. ῥ. Thuris electi, ʒ. j. Sanguinis draconis in lachrym. ʒ. iiij. Olei Abietini, ʒ. j. Florum Nicotianæ, pug. ij. M. omnia hæc simul, superinfundendo tantum Vini Malvarici, ut omnia submergantur; & stent per triduum in infusione; postea coquantur ad vini consumptionem, inde forti facta S. A. expressione, reponatur Balsamus in Vase ad usum.

Ad faciliter incarnanda Vulnera, & Ulcera.

℥. Pulveris Masticis, Myrrhæ, Thuris, ana, ʒ. j. Olei Terebinthinæ, Cerae, ex vitellis ovorum ana, ʒ. ij. Unguenti de Betonica, ʒ. iiij. Spiritus Vini optimi, ʒ. j. M. F. S. A. Unguentum.

OBSERVATIO CCXLIV.

Ex Mangeti Bibliothec. Medico-Pratic. Lib. 18.

De Observatione circa vulnera capitis.

Observandum fuit, inquit *Clariss. Dn. Joh. Jacob. Waldschmidtus in notis ad Barbettæ Chirurg.*, omnes in capite graviter vulneratos, si lumen, vel candelam ferre non potuerunt, fuisse mortuos; quod idem Ego pluries expertus fui, imò hoc tanquam signo lethalitatis ipsius vulneris nunc utor.

OBSERVATIO CCXLV.

Ex Mangeti Bibliothec. Medico-Practic. Lib. 18.

De fractura cranii, cute illæsa manente.

DE casu ex alto, cum fractura cranii sine læsione cutis externæ observationem me legisse recordor apud *Joh. Helvvigium obse. vat. 19.* cui observationi eruditum, atque optimum additamentum addidit Illustrissimus Vir omni eruditionum genere instructus Patronus meus in æternum colendus *Dn. Lucas Schræckius* nunc Academia Leopoldinæ nostræ dignissimus Præses; hîc Ego Mense Februarii hujus Anni 1695. Adolescentem vidi ligno in capite percussum sine vulnere, pauca tamen apparente contusione; qui post tres dies à percussione in sævum capitis dolorem; ac febrem incidit; Aperta cute à Chirurgo fractum cranium apparuit, à qua fractura die septima mortuus est; similes autem observationes de cranio fracto, cute illæsa manente, mentionem faciunt, præter citatum *Helvvigium, Forestus, Greg. Horstius, Fabritius Hildanus, Joh. Schenckius, & alii &c.*

OBSERVATIO CCXLVI.

Ex Mangeti Bibliothec. Medicò-Practic. Lib. 18.

De Vulnere sola aqua simplici curato.

Aquam simplicem sistere sanguinem colligitur ex libro Domini Josephi Cignoci Chirurgi Celeberrimi Florentini Domini mei semper colendi *comment. ad lib. Hippocrat. de Ulceribus pag. mihi 21.*; ex *observ. 136. Miscell. A. N. C. Decur. 2. Ann. 10*; ex Joseph. Zambecaro in *experimentis*; ex Dn. Caspar. Bartholino Th. Fil. in *exercitat. Miscellaneis*, & ex *Diariis Eruditor. Romæ Ann. 1670.* Verùm non solum cruorem sistere, sed etiam vulnera sanare posse aquam simplicem docet Philip. Palatius Med. Doct. in libro suo *de Vero Methodo quibuscunque vulneribus medendi cum aqua simplici*; quod quidem nuper in quodam milite expertum feliciter vidi; vulneratus enim hic miles fuit in brachio sinistro, & solâ aquâ appositâ bis in die sanatus sine alio remedio est; diligenter enim vulnere deterso linteolum aqua madefactum apponebat, inde fasciâ ligabat; & hac arte curatio vulneris facta fuit, hinc de Famula mea recordor in dextra manu vulnerata quæ vulnus suum brevi curavit aquam simplicem adhibendo.

OBSERVATIO CCXLVII.

Ex Mangeti Bibliothec. Medico-Præctic. Lib. 18.

De Vulnere in thorace, pure per urinam emissio, curato.

DOminus N. N. Annorum ætatis XLIV. boni corporis habitus vulneratus est in singulari certamine in parte sinistra thoracis inter quartam, ac quintam costam; Vulnere judicato penetrante, ac lethali, ob maximam sanguinis effusionem, tussim molestantem, ac febres maximas supervenientes, Chirurgus bis in die vulnus detergebat, ac ipsi medebatur ordinaria lege artis Pæoniæ, hinc undecima die non exiguam sanguinis corrupti copiam cum urina excrevit, & ita pariter quotidie usque ad XIX. diem, minuendo semper tamen de die in diem materiam purulentam; febres cessavere, tussis, & reliqua symptomata: sicque æger spatio XXVII. dierum perfecte sanus evasit; hinc de alio Milite recorder in Pectore vulnerato ab alio Milite, qui puris materiam per urinæ vias transmisit, & brevi convaluit; pariterque Pleuritide affectum vidi, sanguinem, ac pus cum urinario fero secernentem intra XIV. dies sanum, ex quo patet vias aliquas esse, nobis adhuc ignotas, per quas Natura modò lapillos, modò pus, modò sanguinem ad vesicam, à pectore, à Ventriculo, & aliis Visceribus, demittat; quas vias incognitas nobis, futura ætas videbit, ac fortunati nepotes aperient; multa enim, ut cum Seneca loquar, adhuc in humano corpore restant detegenda, semperque restabunt; de hac autem re satis.

OBSERVATIO CCXLVIII.

Ex Mangeti Bibliothec. Medico-Præctic. Lib. 18.

Epilepsia capitis vulnere curata.

DE Phalereo deplorato ob vomicæ morbum narrat *Plinius lib. 7. cap. 50.* & post eum *Nicol. Caussin* in *Polyhistor. Symbolic. lib. 3.* qui cum mortem in acie quæreret ab inimicis, vulnerato pectore medicinam invenit ex hoste; Sic enim ab inimicis sæpè quam non speramus utilitatem capimus, undè egregiè *Cassiodorus lib. 4. Variar. num. 47.* ait, homines lædere cupientes, beneficia frequenter impertire; Hinc juvenem nosco comitiali morbo laborantem, ad cujus curationem multa fuere, sed frustra tentata remedia, qui à milite fuit vulneratus in capite, cum cranii fractura insigni, adeò ut proximus fuerit Morti; Ast diligentis Chirurgi ope Divina favente Clementia post duos menses sanus evasit, & quod notabile fuit, nec tempore curationis vulneris, nec post curationem unquam neque minimam epilepsiam passus est, nunc sanus etiam vivit; Circa hanc rem quoque, me legisse recordor apud *Thom. Burnetum* in *Thesaur. Medic. Præctic. lib. 5.* de quodam nobili, qui post gravem de scalis lapsum, ob quem necesse fuit terebram cranio admove, à comitiali morbo sanus evasit, ac nunquam ex eo malum percepit; & de Puella refert *Laz. Riverius*, quæ mediante pleuritide ab epilepsia liberata fuit.



DISSERTATIO

DE VITA ET MORTE

AD

Dn. D. LUCAM SCHROECKIUM.

Medicum Augustanum, & Leopoldinæ Imperialis.

Academiæ dignissimum Præsidem.

Inserta Miscellaneis Naturæ Curiosorum. Decur. III. Ann. IX. & X. in Appendice pag. 113.

INgens ausum est meum, temeritatique affine, quod hanc Dissertationem de Vita, & Morte sub tuum conspectum venire sinam, Protecturam non habituram, quin potius sustinuerit judicem

Quo nil exactius, eruditiusque,

Sed nec candidius, benigniusque;

Quamobrem ad hoc tua me coëgit humanitas, incitavit virtuti adjuncta nobilitas, & stimulavit inseparabilis à comitate Prudentia:

Tu castus moribus, innocens pudore,

Velox ingenio, decore felix.

Cla-

Clarissimi Patris tui virtutes laudabili æmulatione imitaris, & quod de Hercule dictum, aureas ex animo catenas emittis, quibus non aures modò sed hominum tibi mentes adnectis; Plura me loqui gestientem pudor exterret, ne quid peccem in hujusce flammæ innocentiam; sub auspiciis igitur nominis tui, hanc Dissertatiunculam emitto, orans, ut animum obsequentem serena fronte admittas, & faveas; Hinc felix Hygieia te ad Nestoreos annos incolumem servet, dum Ego usque ad vitæ terminum permanebo: Tuæ Ill.^{mæ} Dominationis.

Addictissimus Famulus

JOSEPHUS LANZONUS, Med. Doct.

DISSERTATIO

DE VITA ET MORTE.

INgentis speciei Deam tibi, humanissimo Lectori, offero undique perlustrandam, Amorum scilicet matrem, Venerem ipsam; At cur obstrepis? quid hîc exponere Dearum salacissimam, ubi de Vita, & Morte disceptandum? Forsitan sepulchrales nœniæ commune aliquid habent cum nuptialibus tympanis? Ita sanè, Veterum enim exquisitissima ingenia Venerem non solùm natalium Præsidem coluère, verùm etiam Mortis; siquidem in æde Libitinæ quæ ad vitam pertinent vendere consueverunt, Libitinam non aliud, quam Venerem esse putantes; hoc autem argumento humanæ fragilitatis, ait *Rhodiginus*, unumquemque admonebant, quod una, eademque Dea principium, & finem Vitæ in potestate habeat, utque ingredientibus Vitam, vel decedentibus præsideat; sic unusquisque Vitæ dies, & potest esse supremus; alius namque inter materni uteri latebras, & inter fingentis adhuc naturæ manus intercidit; alius in ipso statim ævi flore, vix dum percepto vitæ sensu, perit, alius dum nascitur, alius dum vagit in cunis abripitur; imò ex tot hominum millibus, quam paucis datum est ad senectæ limen, quemadmo-

dum cecinit *Homerus*, pertingere. Adeamus igitur cum tali prodromo propositam de Vita & Morte Dissertationem, ut de eo saltem gloriari possimus, Nos hodie, si thesım Medico-Physicam attingere nequivimus, pro viribus talem moralem hypothetım detexisse. Ast accedendo ad institutum, statim ab initio magni Romanę eloquentiæ Parentis occurrit assertum; Vitam nempe quā fruimur, à Deo nobis ari, atque impertiri, quibus autem eadem innitatur fundamentis, quoque corruat modo, apud Medicos non ità constat, ut nulla se prodat dubitatio; examinare igitur conabimur primo loco, quid reverà importet Vita; secundo, cur ut plurimum certum tempus non transeat; postremò denique in quo Mors consistat; & ut primam propositæ orationis partem aggrediar enucleandam, oportet supponere de Vita tantum me loqui, non prout ab anima rationali principium successivasque operationes sumit, verum in quantum, anima rationalis principium successivasque operationes sumit, verum in quantum, anima rationali non considerata, animal quodcunque vivit; Quapropter Peripatetici Philosophi quos Medici Galenistæ secuti sunt, Vitam nil aliud esse docuerunt, præterquam mansionem vitalis caloris in humido, quod vocant radicale, ac tamdiu vitam conservari, quousque humido consumpto calor ipse exstinguatur; Rem exemplo illustrare conantur, flammula nimirum in candela, in qua observatur, quod ad ejus lumen conservandum duo requirantur, nempe calor seu ignis, & pabulum, ut cera, vel oleum, quod ipsi igni alimenta ministret: sic aiunt in animalis corpore natus calor existit, qui continuo vescitur humido quodam, quo corpus ipsum abundat, & quemadmodum quoties oleum debitam proportionem excedit, toties ignem ipsum lucernæ obruit, & quoties maximus ignis pauciori copię olei conjungitur, ac breviter absumpta pariter evanescit, ità nimium excedente vel radicali humido, vel calore nativo, animalis vita labitur; Ut autem verum fateamur, hujusmodi ratiocinium præter adductum exemplum de flamma nihil continere videtur rei tam certæ, aut saltem tam verosimilis, ut vestrum, *O Academici Curiosı*, mereatur assensum; Intellectus enim concipit quidem, ignem conservari propter pabulum, ignem deficere propter pabuli immodicam copiam; Difficultas autem est, ni fallor, hujusmodi operatio-

tionem conficere, in animalis corpore, ubi nec flammam existere, nec pabulum ministrari eadem ratione, qua fit exterius, constat; Quare hujusmodi metaphoram vulgaribus hominibus traditam credamus oportet, Philosophis verò res ab ovo, ut dici solet, inquirentibus, intimius rem emedullare convenit; negotium enim præ manibus habemus, quod non fictis verborum machinamentis est pertractandum, sed majori, quo fieri potest, candore, & certitudine.

Clarius forsan philosophantur, qui Vitam consistere docent in quadam partium proportionem, & harmonia, nempe quod tamdiu vivere dicatur Animal; quamdiu ejus partes ita sibi mutuò cohærent, atque respondent, ut fungi possint muneribus illis, quæ maximè vitam constituunt: nempe quandiù exercere possint motiones omnes, quæ sunt omninò necessariæ, ad hoc, ut anima valeat suas edere operationes, quod idem prorsus est asserere vitam nihil aliud esse, quam rectam partium organizationem; Et quamvis hujusmodi organizatio, & partium harmonia, conditio tantum prævia, & dispositio vulgò dicatur, ut anima corpus ipsum ingrediatur; hoc profectò de Brutis minimè, ni fallor, sentiendum, cum eo instanti vivere incipiant, quò primò conformantur; & quidem anima non de novo producta, sed solummodò ex recta fluidorum cum spiritibus, & utrorumque cum solidis partibus harmonia, resultante, cum quibus motus omnes, quos vitales appellamus, producant; & hoc quidem maximè probabilitate non caret, cum experiamur mechanico artificio fieri posse volatilia, quæ materiales alas habentia huc, & illuc agitari possunt: Porrò si quis nunquam hujusmodi machinam vidisset, statim cum viderit illam, huc illuc instar veri Animalis moveri, procul dubio, pronuntiabit verum esse Animal, nimirum quia potissimum Animalis argumentum est motus; Neque obijciant maximum esse discrimen inter verum, & fictum Animal, ut potè quod præter apparentem motum nihil ulterius possidet, quod valeat vitam testari, ac proinde longa diversaque ratione constitui vitam in Animalibus; quam partium varia contextura; Huic enim difficultati facile occurrunt, explicantes miram naturæ solertiam, quam Ars non nisi rudi quodam studio valet imitari. Quare licet diligentissimus fingatur Tarentinus Architas, hic tamen præter volatum, non potuit aliud Columbis à se constructis impertiri, nec proinde dicendum

dum est naturam diversis ab Arte instrumentis in suis foetibus parandis, procedere; Concludendum itaque reor Animal automa quoddam esse, cujus Vita in partium id componentium proportionem, ac harmonia consistit, & in tantum ab illis, quibus ad mensurandum tempus nos utimur, diversificari, in quantum hoc à natura, illa ab hoc, artificialem constructionem recognoscunt; illa motu destituta hoc mediante redeunt in motum, qui eorum vita dicendus, hoc verò nequaquam, quia nimirum nequit Ars singula assequi, atque invicem combinare instrumenta, quæ illam constituunt, ut superius dictum fuit: Nonne enim artificialia horologia sola mediante gravitate, motus omnes quibus indigent, exercent? & quonam alio medio nostrum hoc naturale utitur, nisi illo? An non propter sanguinis impulsu, qui pressionem, & pondus importat, in animantibus secretiones fiunt, nutritiones peraguntur, & calor conservatur? An non propter fermentationes in musculorum fibrillis excitatas motus omnes excitantur, cum tamen fermentatio nil aliud sit, quam quædam elatio, per quam dum majus spatium desideratur, fibrillæ distenduntur, motusque celebratur. His positis, & pro viribus delibatis magna superest difficultas, quomodo scilicet voluntarios motus, hac data hypothesi, exerceamus; cui difficultati, ut satisfacere possimus, operæ pretium est animadvertere, quod quamquam hi motus sensibus nostris percipiantur voluntarii, attamen illa ratione, qua exterius in horologiis quadam rota tacta immediatè incogitatus motus celebratur, eodem prorsus modo in Animalis corpore ii motus, qui voluntarii appellantur, peraguntur; scilicet, si quis citò extenderit manum in nostros oculos, tanquam nos verberaturus, quamvis sciamus, eum nobis Amicum, & non nisi joco id facere, vix tamen possumus nos cohibere ab illis claudendis, quod ostendit eos non claudere spontanea quadam opera, cum id fiat contra voluntatem nostram, quæ sola, aut saltem præcipua illius est actio, sed quod machina nostri corporis, ita sit composita, ut motus illius manus in oculos nostros excitet alium motum in nostro Cerebro, qui deducit spiritus animales in eos musculos qui palpebras deprimunt; nam nedum reor in ipso Cerebro separari, & cribrari succum nerveum, & animales spiritus, verum & copia aliqua retineri posse, ut ad

certos usus adhiberi valeant : Concipere item possumus ex diversis, vel per externos sensus, vel per phantasiam, & memoriam tactionibus, in nervorum aliquorum capitibus, seu infundibulis, talem dilationem fieri posse, ut spiritus animales, qui prius per eorumdem spatiola descendere ab angustia prohibebantur, mox qua data porta feliciter & ubertim excurrant. His ita stantibus, quis non videt quanta facilitate mechanicè motuum omnium harmonia peragi possit? nam exempli gratia, cum quis lapidum edulium videt, ex hac visione fibrillæ quædam Cerebri leviter, & cum delectatione tanguntur, ex quo facili negotio consentientes (quemadmodum in horologiis rotæ cum rotis) aliæ fibrillæ, quæ alias hujusmodi tactionem cum delectatione expertæ sunt, & in quibus præteritarum quasi sulci impressi fuere, disponunt Animal ad porrigendas manus, ad aperiendum os, ad deglutiendum, quia successivè semper præteritæ delectationis refricatur memoria, & vi præsentis cogitur animal ad continuationem; Unde eleganter non minus, quam doctè *Lucretius* cecinit, voluntarios corporis motus exemplo navis à vento commotæ patefaciens:

*Et facile est factu, quoniam conjuncta tenetur
Inde ea proportio, corpus ferit, atque ita tota
Paulatim moles protruditur, atque movetur;
Præterea tum recessit quoque corpus, & aer
Scilicet ut debet, qui semper mobilis extat
Per patefacta venit penetratque foramina largus,
Et dispergitur ad partes ita quasque minutas
Corporis; hinc igitur rebus sit utrinque duabus
Corpus ut, ac navis velis, ventoque feratur,
Nec tamen illud in his rebus mirabile constat
Tantula, quod tantum corpus, corpuscula possunt
Contorquere, & onus totum convertere nostrum:
*Josephi Lanzoni opera. Tom. II. Z z z Quippe**

*Quippe etenim ventus subtili corpore tenuis
 Trudit agens magnam, magno molimine navim,
 Et manus una regit quantovis impetu euntem,
 Atque Gubernaculum contorquet quolibet unum
 Multaque per trochleas, & tympana pondere magno
 Commovet, atque levi sustollit machina nisu.*

Sufficienter ergo probatam opinor primam hujus orationis partem, quo supposito devenire opus erit ad secundam, cur scilicet cujuscunque animalis vitæ præfixus propriæ speciei terminus nunquam pertransiri possit; quam tamen licet rem maximoperè difficilem agnoscam, conabor nihilominus breviori, quo potero, sermone extricare; Dico igitur quod cùm semen secundum omnes suas partes desierit se extendi, & ut meliori modo me explicem, cùm amplius non habeat corpora, quæ optent complexum aliarum sibi similium particularum, & sic Animal vegetationi terminum dederit, tunc omnia ad æquilibrium motus omnes gerentia consistentem vitæ statum, ætatem virilem à Medicis appellatam constituunt, quæ feliciter perdurat, imò infeliciter, dum timendum semper, ne cùm nequeant in eodem statu remanere, aut quiescere, in deterius ruant, quemadmodum de Valetudine dixit Hippocrates, & etiam juxta illud:

„ *Qui l'inopia, è l'affanno ogn'or si vede;*
 „ *E con il cibo ancor la vita manca*
 „ *E della morte rea crescon le prede,*

Ea enim corpora, quæ vel in motu sunt, vel alterius corporis motui resistunt, vel obsecundant, necesse est ut quotidie diminuantur, & minimarum molecularum jacturam insensibiliter experiantur; Audiamus quæso Philosophum Poëtam supradictum sua Musa canentem:

Quin etiam multis solis redeuntibus annis

*Annulus in digito superteruatur habendo ;
 Stillicidi casus lapidem cavat ; uncus aratri
 Ferreus occultè decrescit vomer in arvis ;
 Strataque jam vulgi pedibus detrita viarum
 Saxeæ conspiciamus*

Quod si igitur Lapides, & Metalla longo annorum cursu senescunt, & tabo conficiuntur, quanto magis Animalia, quæ non modo externis tum aëris, tum aliorum corporum motionibus sunt obnoxia, verum etiam perpetuo opus est fluidorum; & spirituum omnium imperus, & detrimenta sustineant, quo fit ut solidæ partes, per quas fluida præterfluunt, alterentur, discontinuentur, atque figuram propriam tandem amittant; figuram dico, qua omnia peragunt, & à qua vitæ continuatio dependet; figuram dico, qua nimirum cutis cribrum, transpirationem tantopere viventibus necessariam molitur, figuram nempe, qua viscera omnia impensu glandularum conglomeratarum, globatarum & vesiculatarum, nedum fluidorum cribrationibus, & permixtionibus consulunt, verum etiam fermentorum energiam conservant; hac igitur alterata, necessario læditur vitalis œconomia, senescente itaque animali necesse est ut tandem morti succumbat, quia nempe fluiditates vitæ protrahendæ necessariæ ab alteratis organis vitiantur, quæ ut plurimum sensim de spiritu amittentes vappescunt, atque vel ad stagnandum in Cerebri concamerationibus evadunt obnoxia, undè Rheumaticæ affectiones, & aëris interceptiones, vel alibi lentis passibus advenientem Mortem celerius accersunt; Ratio autem cur nonnulla Animalia celerius, nonnulla tardius morti debitum persolvant, à duabus causis petenda est, nimirum à majori fluidorum subtilitate, ac energia, qua lentescentiæ resistunt, & à robustiori viscerum, aliarumque solidarum partium structura, qua mediante annorum tabo vegetius resistunt, nec tam de facili propriam figuram deperdunt, unde annorum series diuturnior evadit; sin autem è converso, nec fluiditates sint admo-

dum subtiles, & vegetæ ut stagnationi resistere valeant, nec solidarum partium structura sit adeò firma, quæ tum externis, tum internis motionibus obsistere possit, necesse est, ut brevior Annorum curriculum animantis vitam metiatur, atque pallida Mors Animal invadat; Quare ut tandem dissertationi huic nostræ finem imponamus, per quam eruditè incomparabilis Philosophus *Renatus de Cartes* scripsit: corpus hominis viventis differre tantùm à corpore hominis mortui, quantùm differt horologium, aut aliud automaton, (id est alia Machina, quæ sponte movetur,) cùm rectè dispositum est, & in se habet principium corporale motuum, quorum gratia elaboratum est cum omnibus, quæ ad ejus actionem requisita sunt, ab eodem horologio, vel alia machina, dum rumpitur, & principium motûs ipsius agere cessat; quod totum intelligendum, mortem, nil aliud esse, quam omnimodam motionum omnium privationem, nam cùm vita ex dictis, in ordinato quodam motu consistat, mors è diametro vitæ opposita nihil aliud erit, quam quies. En igitur à primo ad ultimum pro viribus probatum vitam hominis esse admodum similem horologio, cujus sanè Mors in quiete pariter consistit, quemadmodum Vita in motu.

FINIS.

INDEX.



INDEX MATERIARUM

Cons. Consultationem; *Obs.*

Observationem significat.

A

A *Bdominis* tumor verminosus.
Obs. 180.

— — — sanatus. *Observ.* 172.

Abortum impediencia Amuleta.
Cons. 165.

Ex Abortu Febris Quartanæ cu-
ratio. *Obs.* 146.

Abortus ex Tenesmo. *Obs.* 64.

— præcavetur quâdoque Ve-
næ Sectione. *Cons.* 131. *Obs.*
161.

Aceti usus in nimia Obesitate.
Cons. 170. *Obs.* 75.

Achor. vid. *Favus.*

Acicula deglutita cum Urina ex-
creta. *Obs.* 184.

Adstringentium noxæ. *Obs.* 226.

Ægilops, ejus natura, causæ, signa,
& remedia. *Cons.* 41.

Josephi Lanzoni Opera. Tom. II.

In *Æneo* vase cibi cocti noxa.
Obs. 156.

Cum *Allio* Antipathia. *Observ.*
157.

Allii usus in Lacte concreto in
Ventriculo. *Obs.* 5.

— succus Magnetis virtutem
non impedit. *Obs.* 91.

Alopecia quid, ejusque remedia.
Cons. 154. 155.

Per *Alvum* Pus in Brachii tumo-
re collectum expurgatum. *Obs.*
143.

Per *Alvum* Pus in Coxæ tumo-
re collectum expurgatum. *Obs.*
17.

Alvus adstricta : *Obs.* 10.

Alvi adstrictio, ejusque causæ,
Prognosis & remedia. *Cons.*
89.

Alvi Fluxus vid. *Diarrhœa*, *Dy-*
senteria.

Aaaa

Alvi

- Alvi retentio, ejus causa, prognos, remedia & eventus. *Cons.* 88.
- Amaurosis, Amblyopia*, ejus causa, curatio & eventus. *Cons.* 46.
- Ex *Amore* nimio *Mania*. *Obs.* 47.
- — *Puellæ Mania* in *Coeco*. *Obs.* 159.
- Amuleta* Abortum impediencia. *Cons.* 165.
- Anchilops* vid. *Ægilops*.
- Anchyloblepharon*. vid. *Palpebrarum Coalitus*.
- Angina* quid, ejus causa, prognos, curatio & eventus. *Cons.* 57.
- ex retentione muci *Narium*. *Obs.* 185.
- Cum *Anguillis* *Antipathiâ* *Gravidæ* mulieris. *Obs.* 31. 157.
- Ani* deficientia in *Infante*. *Obs.* 144. 174.
- prolapsus quid, ejus causa, prognos, remedia & eventus. *Cons.* 96.
- Animi* deliquium, ejus causæ, prognos, curatio & eventus. *Cons.* 73.
- Anorexia* vid. *Inappetentia*.
- Antipathiæ* variæ. *Obs.* 157.
- Antipathia* cum *Poeonia*. *Obs.* 8.
- *Gravidæ* cum *Anguillis*. *Obs.* 31.
- Apoplexia* quid, ejus causa, prognos, remedia. *Cons.* 1.
- in *Paralysim* desinens. *Cons.* 26.
- Aquæ* in *Venas* *Canis* injectæ effectus. *Obs.* 163.
- communis infusio in *Venas*. *Obs.* 175.
- simplicis usus in *Narium hæmorrhagia*. *Obs.* 57.
- potu fugata *Arthritis*. *Obs.* 110.
- Aqua* an simul & semel utendum intus & foris. *Cons.* 161.
- antiscorbutica *Sennerti*. *Cons.* 111.
- Aquæ* *Cinnamomi* in *venas* *Canis* injectæ effectus. *Obs.* 163. 175.
- ferratæ usus in *Diabete*, *Dysenteria*, nimio *Mensium* fluxu. *Obs.* 178.
- fortis infusio in *Venas*. *Obs.* 175.
- Ex *Aqua* forti mors. *Obs.* 238.
- frigida tumor. *Obs.* 148.
- Aquæ* frigidæ usu *Colica biliosa* curata. *Obs.* 60.
- — — *Diarrhœa* sanata. *Obs.* 111.
- — — usus in *Dysenteria*. *Obs.* 21.
- — — balnei usus in *Dysenteria*. *Obs.* 112.
- — — — — *Pleuritide*. *Obs.* 136.
- Aqua* marina, falsa, curat *Herpetem*.

petem. *Obs.* 147.

Aquæ Tettucianæ usus in Dysenteria. *Obs.* 50.

— Thermæ an convenient in affectione Hypochondriaca. *Cons.* 164.

— Villensis usus. *Obs.* 204.

— vitæ vires. *Obs.* 196.

— — usus in vulnere. *Obs.* 55.

Aqua vitæ solutiva. *Cons.* 88. 173.

Aquetta quid & ejus Antidotum. *Obs.* 240.

Area. vid. Alopecia.

Arsenicum sine noxa deglutitum. *Obs.* 233.

Arteriotomiæ usus. *Obs.* 198.

Arthritis aquæ potu fugata *Obs.* 110.

— usu Betonicæ & vini abstinentia curata. *Obs.* 78.

Arthritidis remedium prodigiosum. *Obs.* 43.

Ab Arthritide Epilepsia fugata. *Obs.* 26.

Arthriticus vomitu lapillos rejiciens. *Obs.* 100.

Articulares dolores ex adstricta Diarrhœa. *Obs.* 225.

Articularis dolor quid, ejus causa, prognosis, remedia & eventus. *Cons.* 122.

Ascites. vid. Hydrops.

Asthma quid, ejus causa & remedia. *Cons.* 6.

Astmate denatorum sectio. *Obs.* 200.

B.

B Alneum aquæ frigidaë sanat quandoque Phrenitidem. *Obs.* 136. vid. Aqua.

Barba in muliere sterili & quæ nunquam menstrua passa est. *Obs.* 145.

Ex Barba prædictio. *Obs.* 142.

Betonicæ usu, & vini abstinentia curata Arthritis. *Obs.* 78.

Bolus Timæi in Singultu. *Cons.* 80.

— in hysterica passione. *Cons.* 174. *Obs.* 19.

Boum contagiosi morbi, horum causa, remedia. *Obs.* 202.

Brachii dolor ex imaginatione. *Obs.* 173.

— tumor purulentus, qui per alvi fluxum purulentum solutus est. *Obs.* 143.

C.

C Achexia cum incipiente Hydrope, ulcere spontaneo sanata. *Obs.* 162.

Calculorum mira excretio. *Obs.* 39.

A Calculis præservatio. *Obs.* 63.

Calculi multi vomitu rejecti in Arthritico. *Obs.* 100.

— in Jecore. *Obs.* 174.

Calculus in dextra Maxilla. *Obs.* 190.

- Calculi in Pericardio. *Obs.* 154. *Castrationis* usus in Mania. *Obs.* 186.
 — Renales magni. *Obs.* 2.
 — Renum quid, eorum causa, prognosis, remedia in & extra paroxysmum. *Cons.* 113.
 Cum *Calendulae* floribus Antipathia. *Obs.* 157.
 Ex *Candelae* sebaceae fumo mors. *Obs.* 28.
Capitis dolor pertinax, pars affecta, causa, Remedia. *Cons.* 23.
 — — à solo odore sulphuris. *Obs.* 66.
 — — diurnus. *Obs.* 80.
 — — periodicus in Narium hæmorrhagiam terminans. *Obs.* 205.
 — — arteriotomia sanatus. *Obs.* 198.
 — — in Canem transplantatus. *Obs.* 167.
 — — sonitu campanarum sanatus. *Obs.* 102. vid. *Cephalalgia*.
Cardialgia, ejus subjectum, causa, signa & remedia. *Cons.* 13. 75.
 Caro Boum Lue contagiosa denatorum innoxie comesta. *Obs.* 215.
 — Vaccæ à Cane rabido demorsæ noxam affert. *Obs.* 232.
 Cum Caseo antipathia. *Obs.* 157.
- Cataphora*, morbi historia, definitio, pars affecta, causa, prognosis, curatio & eventus. *Cons.* 39.
Catarrhus, ejus natura, causæ, signa & remedia. *Cons.* 27. & eventus. *Cons.* 28.
Ceparum usus in Hydrope. *Obs.* 207.
Cephalalgia, pars affecta, causæ, prognosis & remedia. *Cons.* 4.
 — capitis vulnere curata. *Obs.* 35.
 — ejus causa vermis ex nare in Rustica. *Obs.* 108. vid. *Capitis* dolor.
Ceratum Dolæi in furunculo. *Cons.* 137.
Chinae Chinae usus ad fugandos Vermes. *Obs.* 61.
Chirurgia infusoria in Canibus. *Obs.* 175.
 In *Chlorosi* an conveniat Connubium. *Cons.* 147.
Chocolatæ usus & abusus. *Cons.* 143.
Cholera quid, ejus sedes, causæ, prognosis, remedia, & eventus. *Cons.* 84.
Cicatrix in facie, ejusque curatio. *Cons.* 145.
Cichorei aqua sanat Fluxum Hepaticum. *Obs.* 16.
Cochleæ an convenient in Phthi-
 si.

si. *Cons.* 173.
Cæci filii quinque ex Patre *Cæ-*
co. *Obs.* 125.
Cæcus Maniacus ex amore. *Obs.*
 159.
Cæcitas ex adstricta *Dysenteria.*
Obs. 36.
 — ex *Scabie* retropulsa. *Obs.*
 225.
 — ex suppresso *Sudore.* *Obs.*
 189.
 — ex intempestiva *Venæ* Sec-
 tione. *Obs.* 149.
Colica biliosa usu aquæ frigidæ
 curata. *Obs.* 60.
Colicus dolor, morbi histo-
 ria, pars affecta, causæ, pro-
 gnosis, remedia, & eventus.
Cons. 87.
Coma, ejus definitio, causæ, si-
 gna, remedia & eventus. *Cons.*
 38.
 — somnolentum ex nimio *Ta-*
 baci usu. *Obs.* 52.
Confectio *Anacardina*, ejusque u-
 sus. *Cons.* 31.
An Connubium conveniat in *Chlo-*
rosi. *Cons.* 147.
Convulsio, ejus differentia, causæ,
 remedia & eventus. *Cons.* 35.
 — *Febri* excita curata. *Obs.*
 77.
Cor *Pilis* refertum. *Obs.* 137.
 In corde tumor in *Vetula.* *Obs.*
 174.
Cordis *Palpitatio*, ejus sympto-

mata, causæ, signa & remedia
Cons. 70. 71.

— — ex iracundia; ejusque cu-
 ratio in & extra paroxys-
 mum. *Cons.* 69.
 — — rara; *Obs.* 12. *Apertura*
Cadaveris. *ibid.*
Coriandri usus in *Febre* *Quarta-*
na. *Obs.* 30.
Cornu in fronte *Puelli.* *Obs.* 123.
Coxæ tumor purulentus per alvi
 fluxum solutus. *Obs.* 17.
Cranii fractura cute illæsa. *Obs.*
 245.
Crusta lactea, ejus causa & cu-
 ratio. *Cons.* 133.
Cupressinus globulus est febrifugus.
Obs. 163.
Cutis asperitas, ejusque remedia.
Cons. 139.
 — textura. *ibid.*

D.

D *Anta* quid. *Cons.* 173.
Deglutitus nummus post
 duos menses vomitu exclusus.
Obs. 15.
Dens molaris ortus in quinquæ-
 genario. *Obs.* 76.
Dentium ordo duplex in *Infante*
 recens nato. *Obs.* 155.
 — casus post febrem malignam.
Obs. 199.
 — dolor periodicus. *Observ.*
 176.

Dentium dolor Venæ Sectione sanatus. *Obs.* 217.

— doloris curatio ope nivis. *Obs.* 150.

— stupor quid, ejus causa, & curatio. *Cons.* 56.

Dentitio difficilis quid, ejus causæ, diagnosi, prognosis, & curatio. *Cons.* 136.

— fera *Obs.* 20.

Diabetes quid, ejus causa, signa, prognosis, remedia & eventus. *Cons.* 117.

— curatus per aquam ferratam. *Obs.* 178.

— in Puero *Obs.* 40: ejus causa. *ibid.*

Diaphoreticorum remediorum natura, agendi modus, diversitas. *Cons.* 171.

Diarrhœa ejus causæ, signa & remedia. *Cons.* 16.

— quid, pars affecta, causæ, prognosis, remedia & eventus. *Cons.* 92.

— annua. *Obs.* 4.

— periodica. *Obs.* 187.

— aquæ frigida potu sanata. *Obs.* 111.

— solo Plantaginis succo curata. *Obs.* 58.

ex — adstricta dolores articulares. *Obs.* 226.

ex — suppressa Singultus. *Obs.* 81.

Digestionis admiranda vis in Ba-

julo. *Obs.* 193.

Ex *Distorsione* manus sinistrae vomitus. *Obs.* 117.

Diureticorum usus in Hydrope. *Obs.* 193.

Dolor inter Caput & Genua reciprocus. *Obs.* 229.

Dolores post partum sedati spermate Ceti. *Obs.* 89.

Dysenteria quid, ejus causæ, signa, remedia. *Cons.* 17. & eventus. *Cons.* 93.

— aquæ frigida balneo curata. *Obs.* 112.

— — — potu sanata. *Obs.* 21.

— — — ferratæ usu sanata. *Obs.* 178.

— Scabie soluta. *Obs.* 51.

ex — adstricta Cæcitas. *Obs.* 36.

in — usus Aquæ Tettucianæ. *Obs.* 50.

Dyspepsia quid, ejus causa, curatio, & eventus. *Cons.* 79.

E.

Ebrietas à nimia mellis assumptione. *Obs.* 101.

Ectropion quid. *Cons.* 173.

Elaps quid. *Cons.* 173.

Electuarium in Alvi adstrictione. *Cons.* 89.

— in Diarrhœa. *Obs.* 4.

— in Vomitu Sanguinis. *Cons.* 83.

Elec-

- Electuarium Valdschmidii* in *Esseræ* quid, harum causa, & cura. *Cons.* 68.
 — *Zecchii* in Fluore albo. *Cons.* 127.
Empyema, morbi historia, causæ, signa, remedia, & eventus. *Cons.* 63.
Emulsio in Urinæ suppressione. *Obs.* 138
 Cum Emulsionibus antipathia. *Obs.* 157.
Epicarpium Febrifugum. *Obs.* 206.
Epidemica constitutio Ferrariensis Ann. 1715. *Obs.* 214.
 — — — Ann. 1716. & 1717. *Obs.* 220.
Epilepsia, morbi historia, definitio, pars affecta, signa & remedia. *Cons.* 37.
 — Arteriotomia sanata. *Obs.* 198.
 — Arthritide fugata. *Obs.* 26.
 — Febre Quartana superveniente sanata *Obs.* 115.
 — per subsequens matrimonium curata. *Obs.* 48.
 — ulcere in crure sanata. *Obs.* 99.
 — vulnere capitis curata. *Obs.* 248.
 — Puerorum quid, ejus signa, pars affecta, Prognosis, remedia. *Cons.* 135.
Epileptica gravis. *Obs.* 38.
Epilepticus saltans. *Obs.* 126.

Esseræ quid, harum causa, & cura. *Cons.* 146.

Euphrasie usus in oculi caligine. *Obs.* 54.

Excrementa per umbilicum emissæ. *Obs.* 94.

Experimenta Medica infida. *Obs.* 22

F.

Fæces alvinæ exeuntes per ulcus in inguine sanatum. *Obs.* 45.

Fames & *Sitis* læsa, differentiæ, pars affecta, causæ, curatio & eventus. *Cons.* 76.

Faucium ulcus ab unguento mercuriali *Obs.* 86.

Favus quid, differentiæ ab *Achoribus*, ejus causæ, & remedia. *Cons.* 124.

Febrifugum *Epicarpium*. *Observ.* 206.

— pluries expertum. *Obs.* 9.

Febrifugus pulvis. *Obs.* 153.

Febri excitata, curata *Convulsio*. *Obs.* 77.

Febris Chronica metu ac terrore curata. *Obs.* 85.

— Continua umbilici hæmorrhagia soluta. *Obs.* 171.

— — sanguinolento secessu soluta. *Obs.* 118.

— *Epidemica*, ejus causa & remedia. *Obs.* 214.

Febris

- Febris Hæctica, ejus sedes, signa, causa & remedia. *Cons.* 20.
 — Hemitritæa, ejus historia, natura, signa, remedia & eventus. *Cons.* 21.
 — mali moris, ejus idea, causa, symptomata, signa, remedia & eventus. *Cons.* 22.
 — maligna, ejus sedes, causa & remedia. *Cons.* 19.
 — — dentium casu finita. *Obs.* 199.
 — — tumore & abscessu brachi soluta. *Obs.* 166.
 — — ex tinea Mercurialibus tractata, inde mors; apertura cadaveris. *Obs.* 164.
 In Febre maligna urina frigida. *Obs.* 177.
 Febris octana & sextana. *Obs.* 216.
 — periodica lunaris. *Obs.* 202.
 — Quartana Abortu soluta. *Obs.* 146.
 — — Ebrietate fugata. *Obs.* 165.
 — — a terrore fugata. *Obs.* 221.
 — — Venere curata. *Obs.* 49.
 — — larga uvarum assumptione curata. *Obs.* 125.
 — — superveniens sanat Epilepsiam. *Obs.* 115.
 — — ejus remedium. *Obs.* 34.
 — Tertianæ cum surditate. *Obs.* 179.
 Ex Febri tertiana simplici mors. *Obs.* 32.
 in — — an Vena secanda. *Cons.* 168.
Fel in lapidem coagulatum in vesicula Ictericæ causa. *Obs.* 120.
Felis Rabida. *Obs.* 231.
 Cum Felibus antipathia. *Obs.* 157.
Fistula curata. *Obs.* 44.
Flatus dolorificus, quid, ejus causa, prognosis, remedia & eventus. *Cons.* 94.
Fluor Albus quid, ejus causa, prognosis, remedia & eventus. *Cons.* 127. 128.
 — — salivatione spontanea curatus. *Obs.* 168.
 — — Syrupo Coralliorum *Quercetani* sanatus. *Obs.* 87.
Fluxus Hepaticus quid, ejus causa, prognosis, remedia, eventus. *Cons.* 94.
 — — curatus. *Obs.* 16.
Fætus variolosus. *Obs.* 181.
Fotus Donzelli in Ischuria. *Cons.* 115.
Frigida Aquæ usus in Dysenteria. *Obs.* 21. vid. *Aqua*.
 Frigidus potus mortis causa. *Obs.* 7. 152.
 A Frigido potu Puerperium infelix. *Obs.* 230.
Fungorum venenum. *Obs.* 234.
Furor uterinus, causa antecedens amor; in Cadavere secto uterius inflammatus. *Obs.* 139.
Furunculus quid, prognosis & cura-

curatio. *Cons.* 137.

G.

G *Allina* pullum pariens. *Obs.* 90.*Ganglion* quid, ejus causa & curatio. *Cons.* 149. 150.*Globulus* plumbeus per triennium in corpore humano detentus, tandem per tumorem in inguine extractus. *Obs.* 128.*Glossopetræ* vires. *Obs.* 129.*Gonorrhœa* quid, ejus symptomata, causæ, pars affecta, prognos, remedia & eventus. *Cons.* 120.— *Rotulis* Authoris fugata. *Obs.* 170. *Rotularum* formulæ. *Cons.* 172.*Grando* quid, ejus remedia. *Cons.* 138.*Gravida* Epileptica. *Obs.* 38.*Gravidæ* Antipathia cum Anguillis. *Obs.* 31.*Gravidis* an Vena secanda. *Cons.* 131.*Gulæ* coalitus à Variolis. *Obs.* 13.*Gutta* Rosacea quid, ejus causa & remedia. *Cons.* 147.A *Gypso* sumpto mors. *Obs.* 237.

H.

H *Æmoptoë*, morbi historia, causa, pars affecta, signa, remedia. *Cons.* 8. 67.— qualibet *Lunatione*, ejus causa, prognos, remedia & eventus. *Cons.* 68.*Hæmorrhagia* lethalis ex scarificatione. *Obs.* 224.— *Narium*, ejus causa, prognos, remedia & eventus. *Cons.* 53. 54.— — sola aqua simplici curata. *Obs.* 136.— — solvens dolorem capitis periodicum. *Observ.* 205.Ex — — suppressa mors. *Obs.* 46.— *Umbilici*. *Obs.* 171.*Hæmorrhoidum* dolor quid, causæ, diagnosis, prognos, remedia, eventus. *Cons.* 99.— doloris remedia. *Cons.* 172. *Obs.* 209.— fluxus, ejus causæ, remedia, & eventus. *Cons.* 97. 98.*Herpetis* curatio ope aquæ marinæ, aquæ falsæ. *Obs.* 147.*Herpes* serpignosus quid, ejus causa & remedia. *Cons.* 140.*Hippolithus* quid. *Cons.* 161.*Hircini* sanguinis vires, præparatio & usus. *Cons.* 163.*Hirudines* appositæ in mensium

- fluxu imminuto. *Obs.* 41.
 Ex *Horrore* mors. *Obs.* 114.
 In *Hydrophobia* an conveniat sanguinis missio. *Cons.* 164.
Hydrops esu *Ceparum* sanatus. *Obs.* 207.
 — *Anasarca* quid, ejus causa, remedia & eventus. *Cons.* 102.
 — *Ascites* quid, pars affecta, causæ, prognos, remedia & eventus. *Cons.* 100.
 — — sanatus ope *Cucumerum* & *Aquæ*. *Obs.* 213.
 — — — *Diureticis*. *Obs.* 193.
 — — — ope *setacei* in *Scroto*. *Obs.* 141.
 — — — *urinæ* profluvio. *Obs.* 130.
 — *Pulmonis*, ejus causæ, signa, remedia & eventus. *Cons.* 74.
 In *Hydrope* an conveniat *Cru- rum* scarificatio. *Cons.* 173.
Hymen an detur. *Cons.* 124.
Hypeccatharsis, ejus remedium. *Cons.* 163.
Hypochondriaca affectio, morbi historia, causa, pars affecta, prognos, curatio & eventus. *Cons.* 107. 108.
 — — *Lactucæ* usu curata. *Obs.* 104.
 In — affectione an conveniant *aquæ thermales*. *Cons.* 164.

- Hypocophosis* quid, ejus causa & curatio. *Cons.* 50.
Hysterica passio quid, ejus causa, prognos, remedia & eventus. *Cons.* 229.
 — — ope *Lactis asinini* curata. *Obs.* 140.

I.

- I***cterus* quid, ejus causæ, prognos & remedia. *Cons.* 103.
 — notabilis. *Observ.* 208.
 — vini potu sanatus. *Obs.* 103.
Ictericæ sectio. *Obs.* 223.
Icteria continua à felle in *Vesica* in lapidem coagulato. *Obs.* 120.
Iliacus dolor quid, pars affecta, causæ, prognos & remedia. *Cons.* 18. & eventus. *Cons.* 86.
Imaginationis effectus. *Observ.* 173.
 Ex *imaginatione* *Syncope*. *Obs.* 119.
Impetigo quid, ejus causa, prognos & remedia. *Cons.* 144. modus singularis hunc morbum curandi. *ibid.*
Imprægnatio sine præviis *menstruis*. *Obs.* 71.
Incubus, pars affecta, causæ, signa & curatio. *Cons.* 36.
Inedia novem dierum in muliere. *Obs.* 19.

Infans

Infans sine ano. *Obs.* 144.

Inflatio Mammarum ingens & subitanea. *Obs.* 191.

Infusio variorum liquorum in Venas. *Obs.* 163. 175.

Inguinis ulcus alvi facibus transitum concedens sanatum. *Obs.* 45.

Insania diurna sive solaris. *Obs.* 117.

— periodica. *Obs.* 218.

Intestinorum motus peristalticus. *Cons.* 143.

Ischias facili remedio curata. *Obs.* 82.

Ischuria quid, ejus differentiae, causae, prognos, remedia. *Cons.* 115.

Juniperi baccæ decorticatae à calculo praeservant. *Obs.* 63.

L.

L *Ac* in infante. *Obs.* 65.

— concretum in Stomacho Allio dissolutum. *Obs.* 5.

Lactis examen ope microscopii factum. *Obs.* 79.

— Asinini usus in Passione hysterica. *Obs.* 140.

Lachrymae sanguineae. *Obs.* 219.

Lactuca usus in affectione Hypochondriaca. *Obs.* 104.

Lanionum morbi. *Obs.* 201. *Lan*io quis, unde dictus? *La*-

nionum mores. *Obs.* 201.

Laudanum sine noxa assumptum ad 3. v. *Obs.* 235.

Lien rotundae figurae in Pleuritico. *Obs.* 200.

— eximia magnitudinis. *Obs.* 24.

— petrefactus. *Obs.* 223.

Lienis obstructio, ejus causae, signa & remedia. *Cons.* 15.

— scirrhus, ejus causae, prognos, remedia, eventus. *Cons.* 106.

— tumor quid, ejus causae, signa, remedia & eventus. *Cons.* 104.

— — scirrhus, ejus causa, prognos, remedia. *Cons.* 105.

Lienteria quid, ejus causae, prognos, curatio, eventus. *Cons.* 90. 91.

In — an per superiora, an per inferiora purgandum. *Cons.* 164.

Lignum per tumorem excretum. *Obs.* 109.

Cum *Lilio* antipathia. *Obs.* 157.

Lingua duplex in Cane. *Obs.* 174.

Longævi. *Obs.* 73.

Lues Venerea, ejus causa, symptomata, remedia. *Cons.* 121.

Luis Venereae remedium singulare. *Obs.* 129.

M.

M *Acies* universalis, ejus causæ, & remedia. *Consf.* 61.

Magnetis virtutem non impedit
Allii succus. *Obsf.* 91.

Mammæ tres in fœmina. *Obsf.* 23.

In *Mamma* unica *Papillæ* duæ.
Obsf. 59.

Ex — vinum excretum. *Obsf.* 131.

Mammarum inflatio ingens & subitanea. *Obsf.* 191.

Mania, ejus historia, causæ, prognosis, remedia. *Consf.* 11. 29.

— ex amore nimio. *Observ.* 47.

— — — in Cæco. *Obsf.* 15.

— Arteriotomia curata. *Obsf.* 198.

— Castratione curata. *Observ.* 186.

Per *Matrimonium* subsequens *Epilepsia* curata. *Obsf.* 48.

In *Maxilla* dextra calculus. *Obsf.* 190.

Medicum an curare semper deceat. *Consf.* 173.

Melancholia, ejus causæ, signa, remedia. *Consf.* 30.

— *Hypochondrica*, pars affecta, signa & remedia. *Consf.* 7.

A *Mellis* assumptione nimia *E-*

brietas. *Obsf.* 101.

Memoriæ debilitas, imminutio, ejus causæ & remedia. *Consf.* 31.

Menses vomitu evacuati. *Observ.* 182.

— In Puellis. *Obsf.* 183.

— In Vetulis. *Obsf.* 183.

Mensium fluxus nimius quid, ejus causa, prognosis, remedia, & eventus. *Consf.* 126.

— — — sanatus per aquam feratam. *Obsf.* 178.

— — immodicus scabie superveniente curatus. *Observ.* 30.

Ex — fluxu suppresso illicò inflatio *Mammarum*. *Obsf.* 191.

— suppressio, ejus causa & remedia. *Consf.* 125.

In — suppressione curanda animadversiones. *Consf.* 166.

Menstrui sanguinis usus in *Nævis*. *Obsf.* 133.

Sine *Menstruis* præviis imprægnatio. *Obsf.* 71.

Ante *Menstrua* Sternutatio & Singultus. *Obsf.* 116.

Menstruorum fluxus imminutus
Hirudinum appositione curatus. *Obsf.* 41.

Mixtura Dolæi in Paralyfi. *Consf.* 26.

— *Sylvii* in Animi deliquio. *Consf.* 73.

Mixtura

- Mixtura Sylvii in Diarrhœa. *Cons.* 16.
 — — in Singultu. *Cons.* 15.
Monstrum mentulatum & bicorporeum. *Obs.* 98.
Morphæa quid, ejusque remedium. *Cons.* 153.
Mors in quo consistat. *pag.* 541.
 — ex Aqua forti. *Obs.* 239.
 — ex Febre tertiana simplici. *Obs.* 32.
 — ex frigido potu. *Obs.* 7. 152.
 — ex fumo candelæ sebaceæ. *Obs.* 28.
 — a gypso sumpto. *Obs.* 237.
 — ex horrore. *Obs.* 114.
 — a Narium hæmorrhagia suppressa. *Obs.* 46.
 — subita ex percussione regionis Ventriculi. *Obs.* 194. 218.
 — ex scabie malè curata. *Obs.* 158.
 — ex Singultu. *Obs.* 96.
 — ex Sudore suppresso. *Obs.* 189.
 — ob rineam malè curatam. *Obs.* 164.
 — Arborum (Ficus & Aloës) & Possessorum harum. *Obs.* 107.
Mortis prædictio ex somnio. *Obs.* 106.
 — præsagium ex barba. *Obs.* 142.
- In Mortuo Stercoris excretio. *Observ.* 33.
 Ex Muci Narium retentione Angina. *Obs.* 185.
Mulier barbata, sterilis & nunquam menstrua passa. *Obs.* 145.
- N.
- Nævi* sanguine menstruo delati. *Obs.* 133.
Narium coalitus à Variolis. *Obs.* 13.
Nausea & Vomitus, horum causæ & remedia. *Cons.* 12.
 — — — pars affecta, causa, prognosis, remedia & eventus. *Cons.* 82.
Nephritis quid, ejus causa, prognosis, remedia & eventus. *Cons.* 112.
Nivis usus in Arthritide. *Obs.* 43.
 — — — dentium dolore. *Obs.* 150.
Noctambulatio periodica. *Observ.* 134.
Nostalgia quid, causa ejus, prognosis, remedia, & eventus. *Cons.* 110.

O.

O *Besitas* quid, ejus causa & remedia. *Consf.* 158.
 — in ea Aceti usus. *Obsf.* 75.
Consf. 170.

In *Oculorum* dolore Arteriotomia. *Obsf.* 198.

In *Oculi* caligine Euphrasie usus. *Obsf.* 54.

Olei *Olivarum* usus in Phthiriasi. *Obsf.* 160.

Ophthalmia ex suppresso sudore. *Obsf.* 189.

— Arteriotomia sanata. *Obsf.* 198.

Orthopnæa, ejus causæ, curatio & eventus. *Consf.* 64.

Oscitatio nimia, ejus causa & curatio. *Consf.* 40.

Ossis squammula per Nares excreta. *Obsf.* 29.

Oxæna quid, ejus causæ, signa & curatio. *Consf.* 51. 52.

P.

P *Alpebrarum* coalitus quomodo curetur. *Consf.* 160.

Cum *Pane* antipathia. *Obsf.* 157.

An *Panis* repletio pessima. *Consf.* 173.

Papillæ duæ in unica mamma. *Obsf.* 59.

Paracenthesis, modus quo fit.

Consf. 63.

Paralysis post Apoplexiam, illius causa, prognosis, remedia. *Consf.* 2. 26.

— imperfecta, ejus signa & curatio. *Obsf.* 33.

Partus mirabilis. *Obsf.* 6.

— quinque puerorum. *Obsf.* 18. 132.

— vesicularum seu ovorum. *Obsf.* 6.

Pedum intumescentiæ post morbum curatio. *Consf.* 164.

In *Pericardio* calculi. *Obsf.* 154.

Peripneumonicus per tussim vermes rejiciens. *Obsf.* 151.

Perniones quid, horum causa, & curatio. *Consf.* 138.

Pervigilium, ejus causa, signa & remedia. *Consf.* 24.

Phlyctænæ quid, earum causa & remedia. *Consf.* 143.

Phrenitidis natura, causæ, signa, remedia, eventus. *Consf.* 25.

Phrenitis: ejus curatio ope Balnei aquæ frigidæ. *Obsf.* 136.

— vena jugulari secta curata. *Obsf.* 27.

Phthiriasis quid, ejusque causa & curatio. *Consf.* 160.

— curatio ope balnei olei olivarum. *Obsf.* 160.

Phthisis, ejus causa, signa & remedia. *Consf.* 60. 61.

— a vermibus. *Obsf.* 169.

In *Phthisi* an *Cochleæ* conveniant.

- niant. *Cons.* 173.
 Phthisici sectio. *Obs.* 200.
Pica & *Malacia* pars affecta, causa, prognosis, remedia. *Cons.* 78.
 — singularis in Gravida. *Obs.* 113.
Plantaginis succo solo *Diarrhœa* curata. *Obs.* 58.
Pleuritis, ejus historia, pars affecta, causa, signa, remedia, *Cons.* 9. 62.
 — balneo aquæ frigidæ curata. *Obs.* 136.
 — Spiritus Vini potu fugata. *Obs.* 53.
 In *Pleuritide* quid valeat sanguis Hircinus. *Cons.* 163.
 In — Vini usus. *ibid.*
 — — Anni 1696. noxa Venæ Sectionis, & purgationis. *Obs.* 135.
 — defuncti sectio. *Obs.* 137.
 Cum *Pæonia* antipathia. *Obs.* 8. 157.
Pollutio nocturna, ejus symptomata, & causæ, remedia & eventus. *Cons.* 119.
Porrigo quid, ejusque causa & curatio. *Cons.* 156.
Potio Riverii in *Hysterica* Passione. *Cons.* 129.
Præcordiorum turbatio cum pulsu magno irregulari, ejus causæ, prognosis, & curatio, eventus. *Cons.* 70.
Prædictio ex Barba. *Obs.* 142.
Præsagium ex Somnio. *Observ.* 72.
Pruritus totius corporis periodicus. *Obs.* 69.
Ptyalismus quid, ejus causæ, remedia & eventus. *Cons.* 55.
Puerperium infelix a potu frigido. *Obs.* 230.
Pulmones Pleuræ connexi. *Obs.* 174.
Pulmonum ulcus sanatum. *Obs.* 3.
Pulvis febrifugus. *Obs.* 153.
 — *Foresti* in *Epilepsia*. *Cons.* 37.
 — *Montagnanæ* in visione imminuta. *Cons.* 47.
 — *Muralti* in *Pica*. *Cons.* 78.
 — *Timæi* in *Secundinarum* retentione. *Cons.* 132.
Pus in Brachii tumore collectum per alvum expurgatum. *Obs.* 143.
 — in Coxæ tumore collectum per alvum expurgatum. *Obs.* 17.
 Ex *Purgante* assumpto Veneris stimulus. *Obs.* 62.
Purgatio corporum verno-autumnalis. *Cons.* 169. de ea Authoris sententia. *Cons.* 169. 173.
 — in morbis acutis an diebus criticis instituenda. *Cons.* 170.
Purgationis & Venæ sectionis noxa in *Pleuritide* Anni 1696. *Obs.*

Observ. 135.

S.

R.

R *Abida Felis. Obs. 231.*
a Rabido cane demorsa
Vacca, caro ejus noxam af-
fert. Obs. 232.
Cum Ranis antipathia. Obs. 157.
Raphani frustula per urinam ex-
creta. Obs. 122.
Raucedo quid, ejus causa, pro-
gnosis, curatio & eventus. Cons.
58. 79.
 — *Syrupo Raphani curata.*
Obs. 84.
 — *ejus remedium. Obs. 11.*
Remedia varia experta. Obs. 105.
Remediorum nonnullorum vani-
tas. Obs. 74.
Ren unicum in Cane venatico.
Obs. 174. 200.
 — *triplex in Lepore. Obs. 200.*
Rheumatismus quid, ejus causa,
prognosis, remedia, eventus.
Cons. 123.
Risus lethalis in Puerpera cum
singultu. Obs. 70. Apertura Ca-
daveris. ibid.
 — *in puero primo nativitatis*
die. Obs. 93.
Cum Rosis antipathia. Obs. 157.
Rotulæ Authoris contra Gonor-
hœam. Obs. 170. Cons. 172.

S *Al Alembroth quid, quomo-*
do conficiatur, & quid va-
leat in Praxi Medica. Cons. 160.
Salivatio spontanea curat quan-
doque fluorem Album. Obs.
168. vid. Ptyalismus.
Sanguinis sputum. vid. Hæmoptœ.
Scabies fœda & pertinax, ejus his-
toriam, causam, prognosin, reme-
dia. Cons. 141. 142.
 — *crescente Luna crescens.*
Obs. 176.
 — *continua. Obs. 115.*
Scabiæ soluta Dysenteria. Obs.
51.
Ex Scabiæ superveniente fluxus
mensium immodici curatio.
Obs. 30.
 — — *malè curata mors. Obs.*
158.
 — — *retropulsa cœcitas. Obs.*
225.
Scarificatio crurum in Hydrope
an facienda. Cons. 173.
Ex scarificatione Hæmorrhagia
lethalis. Obs. 224.
Scorbutus quid, ejus symptoma-
ta, definitio, causa, prognosis,
remedia & eventus. Cons. 111.
Scorpionum ictus. Obs. 68.
 — *venenum. ibid.*
Scrophulæ quid, earum natura,
prognosis & curatio. Cons. 148.
 Scrophulæ

- Scrophulæ, modus quo Rex Gal-
liarum Scrophulas sanat. *ibid.*
Singultus causæ & remedia. *Cons.*
14.
- quid, pars affecta, causæ,
prognosis, remedia & even-
tus. *Cons.* 80.
- frequentissimus, ejus causæ,
prognosis, remedia & even-
tus. *Cons.* 81.
- ex eo mors. *Obs.* 96.
- ex Diarrhœa suppressa. *Obs.*
81.
- alapa cohibitus. *Obs.* 92.
- & Risus lethalis in Puer-
pera. *Obs.* 70. Cadaveris a-
pertura. *ibid.*
- — Sternutatio. *Obs.* 14.
- — — ante Menstrua. *Obs.*
118.
- — Vomitus ex Venere. *Obs.*
37.
- Somnium* mortem prædicens. *Obs.*
106.
- Ex Somnio præsagium. *Observ.*
72.
- An Somnus post V. S. permitten-
dus. *Cons.* 131.
- Specificum* in Colica. *Cons.* 87.
- Spermatis* Ceti usus in dolori-
bus post partum. *Obs.* 89.
- Spiritus* Ceraforum, Chalcanthi,
Cornu Cervi, Fuliginis, Nitri,
Salis, Salis Ammoniacy, Sul-
phuris, Tartari, Terebinthi-
Josephi Lanzoni Opera. Tom. II.
- na, Vini, Vitrioli in Venas Ca-
nis injecti effectus. *Obs.* 163.
175.
- Geylfusius in Lienis Scir-
rho. *Cons.* 106.
- Vini potu fugata Pleuritis.
Obs. 53.
- — vis solutiva. *Obs.* 95.
- — Quartanam fugat. *Obs.*
165.
- — vires. *Obs.* 196.
- Splen.* v. *Lien.*
- Sputum* copiosum, ejusque reme-
dia. *Cons.* 61.
- Stecoris* excretio in mortuo. *Obs.*
33.
- Sterilitas* quid, ejus causæ, reme-
dia & eventus. *Cons.* 130.
- Sternutatio* & *Singultus* ante men-
strua. *Obs.* 116.
- cum Singultu. *Obs.* 14.
- Strabismus* ex terrore. *Obs.* 203.
- Stranguria* quid, ejus causæ, pro-
gnosis, remedia & eventus.
Cons. 116.
- Strumæ.* vid. *Scrophulæ.*
- Stupor* sensus, ejus natura, causa
& curatio. *Cons.* 34.
- Sudor* coloratus. *Obs.* 210.
- post mortem. *Obs.* 121.
- Vino similis. *Obs.* 88.
- Ex Sudore suppresso Mors. *Obs.*
189.
- — — Ophthalmia, Cæcitas.
Obs. 189.
- Cccc Suffo-

Suffocatio Uterina. vid. *Hysterica Passio.*

Suffusio spuria, ejusque causa. & remedia. *Cons.* 45.

Cum *Sulphure* antipathia. *Obs.* 157.

à *Sulphuris* odore Capitis dolor. *Obs.* 66.

Surditas, ejus historia, causæ, signa & curatio. *Cons.* 48. 49.

— à crassiori & densiori membrana Tympani. *Obs.* 200.

— cum febre tertiana. *Obs.* 179.

— ex terrore. *Obs.* 222.

Sutura rectæ cranii defectus. *Obs.* 200.

Syncope, ejus historia, definitio, causæ, prognosis, curatio. *Cons.* 72. 73.

— ex imaginatione. *Obs.* 119.

Syrupus Coralliorum *Quercetani* sanat fluorem album. *Observ.* 87.

— ex succo *Hederæ* terrestris *Quercetani.* *Cons.* 60.

T.

Ex **T** *Abaci* usu nimio Coma somnolentum. *Obs.* 52.

Tabellæ in Macie. *Cons.* 61.

Tenesmus quid, ejus causa, prognosis, remedia, eventus. *Cons.* 95.

Ex *Tenesmo* Abortus. *Obs.* 64.
Terminthus quid, ejus causa & curatio. *Cons.* 162.

Terra Catechu vel Japonica quid. *Cons.* 173.

Terror lethalis in Puerpera. *Obs.* 70.

A Terrore Febris Quartana fugata. *Obs.* 221.

Ex — Strabismus. *Obs.* 203.

— — Surditas. *Obs.* 222.

Testes in abdomine absconditi. *Obs.* 174.

— tres in homine. *Obs.* 174.

Thorax aqua citrina repletus. *Obs.* 174.

Tinctura in Vertigine a Dolæo præscripta. *Cons.* 3.

Ex *Tinea* malè curata mors. *Obs.* 164.

Ton quis morbus. *Cons.* 162.

Transplantatio doloris Capitis in Canem. *Obs.* 167.

Tremor, ejus differentia a Convulsione, causa, signa, remedia & eventus. *Cons.* 32.

Ad *Tremorem* remedium. *Obs.* 67.

Tumor à Capitis lotionè. *Observ.* 148.

— abdominis sanatus. *Observ.* 172.

— — verminosus. *Obs.* 180.

— vento planus. *Obs.* 97.

— verminosus. *Obs.* 227.

- Per Tumorem lignum excretum. — — — usus in Graviditate ad præcavendum abortum. *Obs.* 109.
- Tussis* pertinax, pars affecta, ejus causa, signa, remedia, & eventus. *Cons.* 5. 65. 66.
- in *Tussi* infantium an ungendum Pectus. *Cons.* 147.
- Per *Tussim* rejecti vermiculi. *Obs.* 151.
- Tympani* membrana crassior & densior surditatis causa. *Obs.* 200.
- Tympanites* quid, ejus causa, signa diagnostica, & prognostica remedia & eventus. *Cons.* 213.
- V.
- V** *Agitus* uterinus. *Obs.* 56.
- Vari* quid, eorum causa & curatio. *Cons.* 152.
- Variolæ* in Fœtu. *Obs.* 181.
- in Vetula. *Obs.* 42.
- A *Variolis* Gulæ & Narium coalitus. *Obs.* 13.
- Venæ Sectio* in pede an tuto in Gravidis fiat. *Cons.* 173.
- in Gravidis an administranda. *Cons.* 131.
- intempestiva cœcitatis causa. *Obs.* 149.
- an conveniat in Hydrophobia. *Cons.* 164.
- Sectionis abusus. *Cons.* 167.
- — — usus in Graviditate ad præcavendum abortum. *Obs.* 161.
- — — usus in dentium dolore; in Stomachi ardore: *Obs.* 217.
- — — & Purgationis noxa in Pleuritide anni 1696. *Obs.* 135.
- de — — — Sectione verno-autumnali Authoris sententia. *Cons.* 173.
- — — in Febris Tertianæ curatione. *Cons.* 168.
- post — — — Sectionem an dormiendum. *Cons.* 131.
- Venenum* assumptum esse cautè pronunciandum. *Obs.* 156.
- Ex *Venere* Vomitus & Singultus. *Obs.* 37.
- — — Febris Quartana curata. *Observ.* 49.
- Veneris* stimulus ex assumpto Pharmaco purgante. *Obs.* 62.
- ac Viniusus nimius est venenatus. *Obs.* 236.
- Ex *Ventriculi* regionis percussione mors. *Obs.* 194. 218.
- Vermis* per vomitum ejectus. *Obs.* 212.
- ab Utero. *Obs.* 1.
- in Vesica. *Obs.* 174.
- in variis corporis partibus. *Obs.* 211.

Vermis ex Nare Cephalalgiae
causa. *Obs.* 108.

Vermes in Phtifico. *Observ.*
169.

— per tussim ejecti. *Obs.* 151.

— horum causæ, prognosis,
remedia & eventus. *Cons.*
85.

ad — fugandos Chinæ Chinæ
usus. *Obs.* 61.

Vermiculi cum urina profusi. *Obs.*
138.

Verminosus tumor. *Obs.* 227.

— — Abdominis. *Obs.* 180.

Verminosa urina. *Obs.* 197.

Verruca quid, ejusque remedia.
Cons. 151.

Vertigo quid, ejus signa, subjec-
tum, causa, prognosis, remedia.
Cons. 3.

Vesica duplex in Sue. *Obs.* 174.

Vesicæ ulcus, ejus signa & re-
media. *Cons.* 118.

Vesicatoria quid? an convenient.
Cons. 159.

— eorum materia, effectus,
usus & abusus. *ibid.*

Ex Vespæ punctura ulcus. *Obs.*
187.

Vesparum ictus. *Obs.* 238.

De Viduarum morbis Scriptores.
Cons. 147.

Vinum è Mamina excretum. *Obs.*
131.

Vini in venam Canis injecti ef-

fectus. *Obs.* 163.

Cum Vino antipathia. *Observ.*
157.

Vini abstinentia & usu Betonicæ
Arthritis curata. *Obs.* 78.

— potu Icterus sanatus. *Obs.*
103.

— usus in Pleuritide. *Cons.*
163.

— ac Veneris usus nimius est
venenatus. *Obs.* 236.

Vinum medicatum *Veinharti* in
Alvi retentione. *Cons.* 88.

Vipera duplici capite prædicta.
Obs. 25.

Virginitatis signa: in iis an Me-
dicis, an Obstetricibus creden-
dum? an certa dentur? *Cons.*
224.

Visio in tenebris. *Obs.* 83.

— imminuta, ejus causæ, pro-
gnosis, curatio & eventus.
Cons. 47.

Vita quid? *pag.* 517.

— cur certum tempus non
transeat. *pag.* 517.

Ulcere in crure sanata Epilepsia.
Obs. 99.

Ulcus in inguine alvi facibus tran-
situm concedens sanatum. *Obs.*
45.

— in crure spontaneum ca-
chexiam sanans. *Obs.* 18.

— ex Vespæ punctura. *Obs.*
187.

Umbilici

- Umbilici hæmorrhagia. Observ.*
171. *Cons.* 143.
- Per Umbilicum emissa excre-
menta. *Obs.* 94. *Urina verminosa. Obs.* 197.
- Unguentum Burneti in Gutta Ro-*
facea. Cons. 147. *Cum Urina vermiculi excreti.*
Obs. 138.
- — in Phthiriasi. *Cons.* 157. — — acicula deglutita excreta.
— de Cepa. *Cons.* 174. *Obs.* 184.
- in Hæmorrhoidum dolore. *Per Urinam frustula Raphani ex-*
Obs. 209. *Cons.* 99. 172. *creta. Obs.* 122.
- in Lichene. *Cons.* 174. *Urina frigida in febre maligna.*
Obs. 177.
- Ab Unguento Mercuriali fau-
cium ulcus. *Obs.* 86. *Urinae incontinentia quid, ejus*
causa, prognosis, remedia & e-
ventus. Cons. 114.
- Vomitus ex manus sinistrae distor-*
sione. Obs. 127. — profluvio sanatus Hydrops
— ex cibo in vase æneo coc-
to. *Obs.* 156. Ascites. *Obs.* 130.
- & Singultus ex Venere. — suppressio, ejusque curatio.
Obs. 37. *Obs.* 138.
- Vomitu menstrua evacuata. Obs.*
182. — usus in Tremore. *Observ.*
67.
- exclusus nummus ante duos *Urticae usus in Ischiade. Observ.*
menses deglutitus. *Observ.*
15. 82.
- lapilli rejecti in Arthritico. *Uteri inflammatio inventa in ca-*
Obs. 100. *davere Virginis ex fluore Ute-*
— vermis ejectus. *Obs.* 212. *rino mortuæ. Obs.* 139.
- Vomitus sanguinis, morbi histo-*
ria, causa, prognosis, remedia
& eventus. Cons. 83. *Ex Utero Vermis. Obs.* 1.
- Urinae quantitas determinata in*
corpore humano an detur. *Uvarum assumptione larga Fe-*
bris Quartana curata. Observ.
124.
- Vulnerum Remedia experta. Obs.*
242. 243. — simplicium curatio facilis.
Obs. 241.

566 INDEX
 Vulnus aqua simplici curatum. Circa Vulnera Capitis observatio.
Obs. 246. *Obs.* 244.
 — — Vitæ curatum. *Observ.* Vulnus in thorace, pure per uri-
 55. nam emisso, curatum. *Observ.*
 Vulnere Capitis Epilepsia cura- 243.
 ta. *Obs.* 248.

FIN.



